

Yesu -bha bɔmɛ -nu kɛwɔn -nu

'Nii- "slüüslü "plüün -bho Yesu -bha bɔmɛ -nu -dhe -kɔ

1 ¹ Teofidhö, n dheebhang =bhlëësü, ma 'sëedhe -bleësü 'a- -ben zë bha, 'wɔn 'ö -gban pë "pɛpɛ 'ö Yesu -ya -kë waa- pë -nu 'ö me -nu -draan- -bha 'ö go- 'ka- -bha yë zü bho -sü -bha ² 'ö dho 'ö zun- 'ka -dhekpɔɔyi 'ö Atanna -ya =wli 'ö dho- 'ka dhang- 'gü -a -bha bha, a kë- -gban "pɛpɛ -gen -dɔ -a 'gü. "Sanni -yö 'dho dhang- 'gü, -yö 'ö -wu -kpɔ mɛ -nu 'ö- -nu sü 'ö -bha bɔmɛ -nu 'ka "kpung =taa yö bha- -nu -bha 'Nii- "slüüslü -bha 'gügbudhe 'ka. ³ -Dhe 'ö =ya 'go ga 'gü, -yö 'ö -dɔ -zɔn -nu -dhe -gen -yan 'gbɛ -dede 'ka -dhekpɔɔyi -kaɔng -yiisiö 'ka 'yö- -zɔn -nu -dhe -dhe 'ö "yaan. -Wo wo "yan -kpan -bha 'pö 'ö 'wɔn 'ö -gban Atanna -bha -gblüdédhe -bha 'ö- pö- -nu -dhe.

⁴ Yi do 'ka kö waa- -bha =klangdhiü -nu bha -wo pë -bhö sië -dhe do 'gü, 'yö- pö- -nu -dhe 'ö- pö: «'Ka 'dho bho Zedhizadhemö -dhe 'ka taa- =gblëen -kö, -ka ka "yan 'to 'Nii- "slüüslü 'ö n Dë -ya "plüün bho ka -dhe, 'a- -dhiang zë ka -dhe bha- -gɔ! ⁵ -A -gen -mü -dhe Zan -zë -yö mɛ -nu -zu "yi -në- 'ka, "kɛɛ ka -zë -a yi 'yaa =gblëen 'zü kö Atanna -yö ka pa 'Nii- "slüüslü 'ka.

Yesu -dho dhang- 'gü -kɔ

⁶ Yesu -bha bɔmɛ -nu 'ö weng- -nu 'wo gun -dhe do 'gü bha, 'wo- dheɛ" kpɔ 'wo- pö: «Yi Dëmɛ, i- -pö -a yi =ya -loo kö 'i Izraedhö -mɛ -nu bho -dhuëndhe 'gü (Wlɔmö -mɛ -nu -gɔ) kö -wo -ya wo -dɔ 'flëë- 'gü 'zü -deewo -ee?» ⁷ 'Yö Yesu -ya -yɔ bɔ- -nu -gɔ 'ö- pö: «-Abin! -A -dhe 'yaa- -bha kö yi -nu waa- "töng -nu ('wo -gban 'wɔn -nu bha- -bha) 'ö n Dë -ya -ya 'ö -bha -gblüdédhe 'gü -wu 'ka bha 'ka- -nu dɔ. ⁸ "Kɛɛ (-a 'dhe ka -mawɔn 'dhö- -bha kö 'ka- dɔ yö -mü -dhe:) 'Nii- "slüüslü -dho lɔɔ- ka -ta 'ö Atanna -yö 'gügbudhe nu ka -dhe. Yö -në =ya kë "dhü 'yö 'wɔn 'ö -gban n -bha 'ka dho kë- pö -mɛ 'ka 'mɛ 'wo Zedhizadhemö pö 'gü -dhe -nu oo, Zude -sɛ 'gü -dhe -todhüsü waa- Samadhi -dhe -nu 'gü -a -nu -dhe 'ö dho "dhü 'ö zun- 'ka "sɛ "dhiütodhe 'gü.»

⁹-Dhe 'ö =ya 'wɔn -nu bha- pö "dhü 'dɔɔndhö 'ö =ya ö bo, 'yö =wlü Atanna -bha 'gügbudhe 'ka 'yö dho dhang- 'gü, 'yö dho "dhü 'ö -da dha 'kpong- 'gü, 'yö dha 'kpong- -yö kpa- -ta -a -nu "yan "dhiü mü.

¹⁰-A -nu "yan- -to Yesu -keng- zian 'ö 'dho sië- 'ka dhang- 'gü bha- 'ka, 'wo dho -dhe -ga kö gɔɔn- -nu =plɛ 'ö sɔ "puu 'dhö- -nu -bha (Atanna -bha "kië -nu bha) kö -wo dɔ sië- -nu "sɔ mü. ¹¹Yö gɔɔn- -nu =plɛ bha 'wo- pö- -nu -dhe: «Gadhidhe -mɛ -nu 'ka ya, -më 'ö -kë 'yö 'ka -dhe -ga dhang- 'gü zuudhö "dhü? Yesu do 'ö 'go sië ka kpö 'gü 'ö dho dhang- 'gü bha, -yö -dho ö yee kë 'zü 'ö nu -dhe -kɔ do 'ka- yö- 'ka kö -yö 'dho sië bha- 'dhö.

Me -dɔ Zuda "gblɔv 'gü -kɔ

¹²-Dhe 'ö =ya kë "dhü 'yö Yesu -bha bɔmɛ -nu bha 'wo go -tɔn 'wo- -dhe Odhivie -tɔn 'ö Zedhizadhëmö -dhe "sɔ bha- =gbin-, 'yö 'wo wo yee -kë 'wo dho Zedhizadhëmö 'plöö. -Go Zedhizadhëmö 'plöö kö 'i dho Odhivie -tɔn =gbin- -yö -mɔɔ "kidhung do -nu "sinma -bha. ¹³-Dhe 'ö =wa -loo Zedhizadhëmö, 'yö 'wo dho 'kɔdhi 'wo gun- 'gü 'kɔ -ta "dhüng 'gü bha- 'gü. 'Me 'wo gun mü bha -wa mɛ do -dhe Piedhö, 'yö 'wo- mɛ do 'bha -dhe Zan, 'yö Zakö, Andre, Fidhipö, Toma, Batedhemi, Matiö, Zakö 'ö -kë Adhöfe gbö 'ka, 'yö Simö, 'wo- 'tɔ kpɔ 'wo- -dhe "yangüsümɛ bha waa- Zudë 'ö -kë Zakö gbö 'ka 'pö. ¹⁴'Me 'wo bha- -nu -wɔ -gun do 'ö 'wo -yɛa do 'gü 'wo -bheɛ -kpeawo, waa- dhebhɔ 'bha -nu waa- Yesu dhe Madhi waa- dheebhang -nu 'dhö.

¹⁵Yi do 'ka kö 'dhang -bho Yesu "dhiü -mɛ -nu 'wo dho -mɔɔ mɛ këng do ö -kɔ =plɛ -nu -bha bha -wo -dhe do 'gü, 'yö Piedhö -yö =wli- -nu =gban wëédhö mü 'ö- pö- -nu -dhe: ¹⁶«N dheebhang -nu, -yö -së kö 'pë 'ö Atanna -bha 'Nii- -ya pö yi 'bha 'ka Davi "dhi 'ö -ben zë -sü 'ka- -bha 'sëédhe 'gü, 'ö -gban Zuda 'ö zian bho 'mɛ 'wo Yesu kun -a -nu 'ka -a -bha bha -yö kë. ¹⁷Zuda bha -yö -kë 'mɛ 'kwa gun Yesu -keng- bha- mɛ do 'ka, yë 'kwa- -kë bha- -bha -gun 'pö.

¹⁸Wëéga 'ö -kë -a mɛ zë -saa 'ka bha 'yö 'bhlaadhe do dho- 'ka. -Dhe 'ö =ya kë "dhü, 'yö dho ö -gɔ 'bhlaadhe bha- 'gü 'yö- -pö mü 'ö wü, 'yö- gblëen- =gban 'wo -pɛn 'do 'do, 'yö ga. ¹⁹'Me 'wo Zedhizadhëmö -pö ya- 'gü -a -nu =gban "pepe -wo kë 'wɔn bha- ma, 'yö- -wɔn 'gü 'yö 'wo 'bhlaadhe bha- -dhe wo -wɔ 'gü Akɛdama (=waa- pö "dhü kö -wa -pö 'bhlaadhe 'ö mɛ =yɔɔn -yö =wɛnng- 'gü). ²⁰'Wɔn 'ö -gban Zuda -bha bha -yö -ben zë -sü 'ka "Tan 'sëédhe ('wo- Somö kë bha-) 'gü 'nu yi 'bha 'ka -dhe:

«Me 'bha -bha -wɔn 'ya 'dho zun- -bha 'kɔ -bha,
mɛ 'bha 'ya 'dho -ya 'gü.»

'Yö -ben zë -sü 'ka 'zü -dhe:

«Me do 'bha -yö dɔ- "gblɔv 'gü.»

²¹⁻²²-Dhe 'ö "dhü mɛ do -yö -da yi "piü kö -yö kë kwa Dëme Yesu -bha -go ga 'gü -sü bha- -sɛɛ- 'ka 'pö. Mɛ 'ö "dhü bha -yö kë 'mɛ 'ö gun 'mɛ 'ö 'kwa

gun kwa Dëmë Yesu =keng- "töng "pɛpɛ 'ö- -kë, 'ö bɔ- 'ka "sɛ -nu 'gü 'ö go- 'ka yi 'ö Zan -ya -zu 'ka bha- -bha 'ö dho 'ö zun- 'ka yi 'ö go- 'ka kwa kpö 'gü, 'ö Atanna -ya =wlü 'ö dho- 'ka dhang- 'gü -a -bha bha- mɛ do =nɛ- 'ka.

²³=Dhe 'ö =ya kë "dhü 'yö 'wo mɛ =plɛ 'tɔ sü, mɛ 'wo bha -wa mɛ do -dhe Zosefu 'wo- -dhe Baazabasö, 'yö 'wo- 'tɔ kpɔ Zutusö, waa- Matiasö. ²⁴'Yö 'wo =bheä kwa Dëmë -dhe 'wo- pö: «Yi Dëmë, bhi 'ö 'i mɛ =gban "pɛpɛ zuëga dɔ, mɛ =plɛ 'wo ya- mɛ 'dhe 'i i -kɔ -yɛ -bha -a -zɔn yi -dhe ²⁵kö -yö kë Zuda "yɔ 'gü 'ka! -A -gen -mü =dhe Zuda -yö kë -go ö -bha yë 'ö -kë i -bha "ta 'sü -yë 'ka bha- 'gü 'yö dho -dhe 'ö- =mɔɔ bha- 'gü. ²⁶=Dhe =wa bheä" =dhe -kɔ bha- 'dhö 'yö 'wo zë "kpüü -kë, 'yö to Matiasö -bha -bha, 'yö -da Yesu -bha bɔmɛ -nu -kaɔng do ga do bha- -nu "piü.

'Nii- "slüöslü nu -kɔ

2 ¹=Dhe 'ö Zuifö -nu -bha =niidadhe 'wo- -dhe Pangtökɔtö bha- yi =ya =loo, 'dhang -bho Yesu "dhiü -mɛ -nu =gban "pɛpɛ -wo -gun -dhe do 'gü 'kɔ do 'bha 'gü. ²'Wo dho "kan wo -ta kö pɛ vin 'gbu- 'bha =ya -da -nu "tu 'gü dhang- 'gü. -A vin- -kë =dhe "tɛɛ 'gbu- 'ö -ziö -a 'dhö 'yö 'kɔ 'wo gun- 'gü bha- pa. ³'Yö pɛ 'bha 'ö bho peng 'nɛɛ- -bha bha 'ö -ya -a -nu =gbin- 'dɔɔndhö. ⁴'Yö 'Nii- "slüöslü -yö -da -a -nu 'gü, 'yö- -nu =gban "pɛpɛ pa, 'yö 'wo -ya dhiang zë -sü -bha -wu "wɛɛ 'ö 'waa- dɔ 'nu -blɛɛsü bha- 'gü -dhe -kɔ 'ö Atanna -bha 'Nii- bha 'ö- dɔ- 'ka- -nu "dhi -a 'dhö.

⁵-A yi 'ö "dhü bha- 'ka kö Zuifö -nu 'wo Zedhizadhëmö 'plöö, waa- mɛ 'dhe -nu 'wo go "sɛ "pɛpɛ =gban 'gü, 'ö 'wo -kë Atanna -bhlëyame 'ka kö -wo Zedhizadhëmö mü. ⁶=Dhe 'ö pɛ vin bha =waa- ma, 'yö- mɛ kpö 'gbe =dede 'wo nu 'kɔ bha- "dhi "dhiü mü =gbang 'wo- dɔ sië 'kɔɔdhö mü bha- =wɔn 'gü. 'Wɔn bha- 'wɔn -ya -nu -kɔn =dedewo, -a -gen -mü =dhe mɛ "pɛpɛ 'wo nu "dhü bha -wo 'dhang -bho Yesu "dhiü -mɛ -nu -wu 'gü ma wo -dɔ -wu -nu 'gü 'do 'do 'ka, 'ö dhiang -nu 'wo- zë sië bha 'wo- 'gü ma 'kpakpadhö. ⁷=Dhe 'ö- 'wɔn -ya -nu kɔn "dhü, 'yö 'wo -ya "kaabho bho -sü -bha 'wo- pö: «-Ka dɔ! 'Mɛ 'wo dhiang zë sië ya, Gadhidhe -mɛ -nu 'waa -mü -ɛɛ? ⁸-Yö kë -kɔ -kë =dhe 'yö dhiang -nu 'wo- zë sië ya kwa- 'gü ma kwa -dɔ -wu -nu 'gü 'do 'do 'ka? ⁹"Kɛɛ kö 'mɛ 'kwa ya mɛ 'bha -nu -go Paatö -sɛ -nu oo, Medi -sɛ -nu waa- Edhamö -sɛ -nu 'gü, 'ö mɛ 'bha -nu -wo go Mezopotami -sɛ, Zude -sɛ, Kapadɔsö -sɛ, Pɔng -sɛ, Azi -sɛ ¹⁰Flizi -sɛ, Panfidhi -sɛ, Ezitö -sɛ waa- Dhibi -pö -nu 'wo Sidhenö -dhe -züzü -a -nu 'gü, 'ö mɛ 'bha -nu 'wo go Wlɔmö, ¹¹'ö mɛ 'wo Zuifö 'nɛ =dede 'ka 'pö, 'mɛ 'wo wo zuë" =slëë 'pö Zuifö -nu -bha bheä" -kɔ 'gü waa- mɛ -nu 'wo go Kletö -dhe -nu, waa- Adhabi -sɛ -nu 'gü 'wo mü, "kɛɛ 'yö dhiang -nu 'wo- zë sië 'ö -gban Atanna -bha 'wɔn -sɛ 'ö- -kë -a -bha bha 'kwa- ma kwa -dɔ -wu -nu 'gü 'do 'do 'ka?» ¹²-A 'wɔn -ya -nu -kɔn =dedewo 'ö 'pɛ 'wo dho- pö 'wii- dɔ, 'yö 'wo- pö wo 'ko -nu -dhe: «=Ya kë "dhü kö 'wɔn ya- 'klɔɔ- -mü -mɛ 'ka?» ¹³"Kɛɛ -a mɛ bha -nu -zë kö -wo =wɛɛ dɔ sië 'dhang bho Yesu "dhiü -mɛ -nu -bha 'wo- pö: «-Aa, n 'bha, 'mɛ 'wo bha we =nɛ =yaa- -nu 'kun!»

Piedhö -bha 'wɔn -gen dɔ -kɔ

14 'Yö Piedhö waa- Yesu -bha bɔmɛ -nu -kaɔng do ga do -kpɛa 'wo to bha 'wo =wli 'wo dɔ wo -gean 'me 'wo bha- -nu wëëdhö, 'yö Piedhö -yö ö -wu "dhiü =wli 'yö dhiang zë- -nu -dhe 'ö- pö: «Me 'ka Zuifö 'ka, 'ö 'ka Zedhizadhémö -pö ya- 'gü waa 'me 'ka nu, -ka ka "tu 'to kö 'wɔn 'ö kè sië bha 'a- -gen pö ka -dhe. 15 -A -gen -mü =dhe 'me 'ka- -nu -ga sië bha we 'yaa- -nu -bha =dhe -kɔ 'ka ka -zu 'gɔn sië- 'ka bha- 'dhö. -A 'klɔɔ- -mü =dhe "tüng 'kwa dɔ- 'ka ya "yënnng "tɛɛ -ta -mü (we -bha me 'kun "tüng 'yaa kè -ni!). 16 "Kɛɛ 'pè 'ö Atanna -yö bɔ ö -wudhiüloomɛ Zoedhö 'gü 'ö- pö yi 'bha 'ka bha 'yö- 'gü -wɔn 'dhö kè sië -dɛɛ bha. 17 -A -gen -mü =dhe Atanna -ya -pö Zoedhö -dhe 'ö- pö:

«"Tüng -totaamasü 'gü,
a -dho ma 'Nii- 'gü -gblü me suu "pɛpɛ =gban -ta,
'ö ka gbö -nu waa- ka 'dhu -nu 'wo n -wu "dhiü =loo,
'ö ka -bha 'nè "wli -sü -nu "yan 'gü 'dhö -da
'wo tɛanwɔn 'ö -gban Atanna -bha -a dɔ
'Ö kaa- me zizi -nu
'wo "yɛɛn bho (tɛanwɔn -nu 'wo Atanna "piü) -a 'ka.

18 Tean- =dede 'ka,
a -dho ma 'Nii- 'gü -gblü ma yëkème -nu,
gɔɔn- -nu waa- dhong -nu -ta
kö -wo n -wu "dhiü =loo yi 'ö bha- 'ka.

19 A -dho "dhabhliwɔn "gblügblü -nu kè
dhang- 'gü -dhe -nu waa- "kpungtaadhe -nu 'gü.
=Yɔɔn -nu, pɛng -nu waa- pɛng "gbiën -nu -wo -dho kè.

20 'Yënnng- 'bhü- -dho kè tii,
'ö "su -yö -kè -dhe =yɔɔn 'dhö,
'yö yi 'ö kwa Dème -ya -ya ö 'tɔ bho -yi 'ka,
yi 'kpii- bha 'yö gun -na =loo.

21 -Ya bo kè -sü 'ka "dhü,
mɛ "su mɛ 'ö dho kwa Dème mɔɔ-,
-yö -dho "ta- -mɛ -dhe 'ö- dha.»

22 'Yö Piedhö -yö dhiang zë 'zü 'ö- pö: «Izraëdhö -mɛ -nu, -ka ka "tu to: Yesu 'ö go Nazadhetö bha Atanna -ya -bɔ kwa -dhe, 'yö bɔ- 'gü kö -ya -zɔn kwa -dhe -dhe yö =nè- bɔ, 'yö "dhabhliwɔn "gblügblü -nu -kè -dhe -kɔ 'ö kaa =dede 'ka- dɔ- 'ka bha- 'dhö. 23 "Kɛɛ 'yö 'wo- "dhiü dɔ ka -dhe =dhe -kɔ 'ö gun- 'ka Atanna zuë" "piü 'nu -blɛɛsü, 'ö gun- "piü =dhe -yö kè- 'ka -a 'dhö, 'yö 'ka- dɔ 'wɔnyaakème -nu -gɔ, 'yö 'wo- dɔ "dhü -bha 'wo- zë, 24 "kɛɛ =dhe 'ö =wa bo- -wëëdhe bho -sü 'ka 'ö =ya ga, Atanna -ya -bho ga -bha "dhiüdhe -gɔ 'ö- bo, -a -gen -mü =dhe ga faan 'yaa =mɔɔ- -bha kö -yö wɔ- -ta 25 =dhe -kɔ 'ö Davi -ya pö- 'ka yi 'bha 'ka -a -bu 'gü 'ö- pö =dhe:

- <A- 'wɔn dɔ -dhe n Dëme -yö n "piü -kpeawo,
 'ö n -maa -kë,
 -a -wɔn 'gü n 'yao- -nu -kɔ 'yii 'dho =mɔɔ n -bha.
- 26 Yö -në- -wɔn 'gü 'yö n -nii 'dhö -da,
 'yö 'a dhiang zë zuë" -nii -da 'ka.
 A- 'wɔn -dɔ -dhe a -dho ga -dhekpɔyi do 'ka,
 "kɛɛ a n -zu -yö 'pë 'ö Atanna -ya pö
 ö -dho kë n -dhe bha- -dhe -kpeawo.
- 27 -A -gen -mü -dhe a- -pö -dhe:
 'Bhii 'dho kwaa- n 'nii- -zü =geebɔɔ,
 -ya 'go mü 'bhii 'dho "wɔ- -bha
 kö i -bha yëkëmɛ "slüüslü bha- kwi -yö "bu.
- 28 'Bha -tosea kë -zian -zɔn n -dhe,
 i -bha -kë n "piü -sü bha -yö n zuë" -nii -da -kpeawo bha- 'dhö.»
- 29 Yö Piedhö -yö dhiang zë 'ö dho- 'ka ö "dhiü 'ö- pö: «N dheebhang
 -nu, -ka dɔ kö 'wɔn 'ö -gban kwa "bhema -wɔngbusü Davi -bha bha 'a- pö
 ka -dhe 'kpakpadhö. -A -gen -mü -dhe Davi bha -yö -ga 'ö 'wo- =gee bho,
 'ö- bun 'dhö -tun =dɛɛ kwa -gɔ yö. 30 "Kɛɛ 'ö gun kö -yö -tun "yaan -yö -gun
 Atanna -wudhiüloome 'ka, 'ö- 'wɔn dɔ 'kpakpadhö -dhe -yö dhiang -zë ö
 -dhe 'ö -sö -bhö 'ö- pö ö -dhe =dhe ö -dho -a suu 'gü -në do 'sü 'ö- -ya ö -bha
 -gblüdë 'ka =dhe Davi 'dhö 'pö. 31 -A -kë "dhü -sü bha- 'gü 'wɔn 'ö dho kë 'yö
 Davi -ya to "dhiü 'ö- dɔ. 'Wɔn 'ö -gban Atanna -bha -Yame -bha -go ga 'gü
 -sü -bha bha -në 'ö- -dhiang zë 'ö- pö -dhe:
 <Atanna 'yii -kɔ "kan- "dhiü =geebɔɔ kö- kwi -yö "bu bha.
 (-A -kë "dhü -sü bha- 'gü, kö dhiang 'ö Davi -ya zë bha 'yii- bho ö -du 'gü,
 Atanna -bha 'Nii- "slüüslü =në- dɔ- "dhi.)
- 32 Yesu 'a- -dhiang zë sië ka -dhe ya, Atanna -yaa- bho ga 'gü, me =gban "pepe
 kwa- "sɛɛ- 'ka, kwa- 'wɔn -dɔ. 33 Yö- sü 'ö- -ya -yɛa -bhlëësü 'ö- "sɔɔ dhang- 'gü
 bha- 'gü, 'yö 'Nii- "slüüslü 'ö- dë -ya "plüün bho- -dhe bha- -slɔɔ, 'yö- -lɔɔ yi -ta.
 Pë -nu 'ka- yö sië "ɛɛn 'ka- ma sië bha 'Nii- "slüüslü bha -në- -nu -kë. 34 -A -gen
 -mü -dhe Davi bha 'yii -da dhang- 'gü -dhe Yesu 'dhö, "kɛɛ -ya -pö 'ö- pö:
 <N Dëme Atanna -ya -pö n Dëme -dhe:
 -Bhö -ya ma -yɛa -së ya- 'gü!
- 35 Kö -yö 'to- 'ka "dhü -yö zun- 'ka yi 'a dho i -kɔ ziö- 'ka i 'yao- -nu -gɔ
 bha- -bha».
- 36 =Dhe 'ö "dhü Izraedhö -mɛ -nu =gban "pepe, -ka 'dhang bho- "dhiü =dhe
 Yesu 'ka- dɔ "dhü -bha bha -në Atanna -ya -ya mɛ =gban "pepe Dëme, -a
 -bha -Yame Klisi 'ka. Yö -në Atanna -ya pö ö -dho bɔ mɛ "bhü- -nu -dhe.»
- 37 =Dhe 'wo Piedhö -wu bha- ma, 'yö dho- -nu -gɔ =gblɛɛn, 'yö peng -yö
 -kan -nu -bha, kö =waa- 'wɔn dɔ =dhe 'wa -da Atanna "dhiü. 'Yö 'wo Piedhö
 waa- 'dhang -bho Yesu "dhiü -mɛ -nu 'wo to bha- -nu dhe" kpɔ 'wo- pö:
 «Yi dheebhang -nu, =dhe 'ö "dhü bha 'yi- kë -dhe?» 38 Yö Piedhö -ya pö-

-nu -dhe: «-Ka bo ka -sɔng 'ka kö 'mɛ 'ö "dhü -yö ö -bha -toseadhe slëë-, kö -yö ö kwaa- ö kè -sɔng yaa -nu -zü, kö -wa -bɔ Yesu 'ka -zu bho Yes -a 'tɔ 'gü, kö -ya -bha 'wɔn yaa -nu -mawɔn 'to! -Ya kè "dhü 'Nii- 'slüüslü 'ö Atanna -ya -gbaɔ bha ka -dho ka -bha -slɔɔ. ³⁹-A -gen -mü -dhe -ya "plüün -së bha- -bho kaa- ka bhang -nu ka -dhe, 'yö dho 'ö- bho 'pö 'mɛ 'wo 'sɛ 'wɛɛ -nu 'gü -gblɛɛngblɛɛn, 'ö kwa Dëmɛ, kwa -bha Atanna dho- -nu -dhe kö -wo kè- -bha 'në -nu 'ka bha- -nu -dhe.»

⁴⁰'Yö Piedhö -yö dhiang -nu zè 'zü 'gbe 'ka -a -nu -dhe, 'yö -dhio -nu dɔ- -nu -ta 'ö- -nu faan dɔ, kö -wa "wɪ dha -sü -wɔn -bha kö -wo 'go 'wɔnyaakëmɛ -nu 'wo Yesu zè, 'ö Atanna dho 'wɔn bho- -nu 'gü bha- -nu kpö 'gü.

⁴¹'Yö mɛ 'gbe 'wo 'dhang bho Atanna -wu 'ö Piedhö -ya pö bha- "dhiü, 'yö 'wo- -nu -bɔ Yesu 'ka -zu bho. 'Yö mɛ 'wo -mɔɔ mɛ "gblü -yaaga -bha 'wo -da 'dhang -bho Yesu "dhiü -mɛ -nu "piü yi do bha- 'ka. ⁴²-Wo -gun wo faan dɔ sië -kpeawo 'ö 'wo wo "tu to mɛ draan- -wu -nu 'ö Yesu -bha bɔmɛ -nu gun- zɔn sië- -nu -dhe bha- -bha. 'Ö- -nu -kɔ -yö -kè 'wɔn do -bha, 'ö- -nu -bha -dhië gun do, ('yö 'wo to mü 'wo kwa Dëmɛ Yesu -bha -bhöpë -bhö), -a -nu -bha -bhea Atanna -dhe -sü -nu bha 'wo- -gban -kè wo "kwëë.

'Dhang -bho Yesu "dhiü -mɛ -nu -kè 'ko "piü -kɔ

⁴³'Suü- -gun mɛ -gban "pepe 'gü, 'ö 'wo 'dhang -bho Yesu "dhiü -mɛ -nu -bhlëë -ya "dhabhliwɔn "gblügbliü -nu waa- -kian -wɔn 'gbe -nu 'ö- -bha bɔmɛ -nu gun- kè sië bha- -wɔn 'gü. ⁴⁴'Dhang -bho Yesu "dhiü -mɛ -nu -gun wo kpö 'ka "dhü do, 'ö- -nu -slɔɔpë -gban- gun do. ⁴⁵'Mɛ 'wo bha -wo gun woo- 'bhlaadhe -nu, "ɛɛn pë -nu 'ö- -nu -slɔɔpë 'ka -a -nu "dhɔɔ dɔ sië 'yö 'wo- -naɔ -loo 'ko -ta, 'yö 'pë 'ö -mɔɔ 'mɛ 'ö "dhü -a -bha -kpla -bho 'ka -pë -bha 'wo- nu- -mɛ -dhe. ⁴⁶'Yö 'wo -loo 'ko -ta -dhekpaɔyi -gban "pepe 'ka Zuifö -nu -bha Atanna -dhökëgükɔ 'gü, 'yö 'wo kwa Dëmɛ Yesu -bha -bhöpë -bhö, kö -wo pë -nu -bhö sië 'ko "piü -a -nu -gɔ 'kɔɔdhe -nu 'gü -niidadhe waa- zuëwaanüsü 'ka. ⁴⁷'Yö 'wo Atanna 'tɔ bhɔ, 'yö- -nu -dho -yö "segümɛ -nu -kè. 'Yö kwa Dëmɛ Yesu -yö 'dhang bho ö "dhiü -mɛ 'ö -wa dha -a -da -a -nu "piü yi -gban "pepe 'ka.

-Genloome do -kè "klüüklü -kɔ

3 ¹Yi do 'ka kö Piedhö waa- Zan -wo 'dho sië Zuifö -nu -bha Atanna -dhökëgükɔ 'gü kö 'yënnɔ- -ya 'kpɔ mɛ -gɔ 'ka -a -nu -bha -bhea Atanna -dhe "töng 'gü, ²'yö 'wo -genloome do yö kö -yö -ya -sü 'ka 'kɔdhi 'dhe 'wo- -dhe 'kɔdhi -sësü bha- "dhiü. Gɔndë bha -yö -bhɔ ö -bha 'yua bha- 'ka. -Wo -nu 'ka -dhekpaɔyi -gban "pepe 'ka 'wo- -ya mü kö -yö 'wëëga -gbadhe 'mɛ 'wo -da sië Atanna -dhökëgükɔ 'gü bha -në- -nu -gɔ. ³'Yö Piedhö waa- Zan -nu yö kö -wo 'dho sië Atanna -dhökëgükɔ 'gü, 'yö gba -dhe -a -nu -gɔ. ⁴'Yö Piedhö waa- Zan 'wo- -ga zuudhö, 'yö Piedhö -ya

pö- -dhe: «-Bhö -dhe -ga =zɔɔ!» ⁵Yö gɔɔn- bha 'ö ö "yan "dhiü =wliü 'yö- -nu -ga -së 'ka, -a -gen -mü -dhe kö -yö ö -zu 'gɔn sië -dhe -wo -dho pë 'bha nu ö -dhe. ⁶Yö Piedhö -ya pö- -dhe 'zü 'ö- pö: «Wëëga 'yaa n -gɔ kö 'a- nu i -dhe "këe pë 'bha -yö n -gɔ, a -dho yö -zë nu i -dhe: Yesu Klisi 'ö go Nazadhetö bha- 'tɔ 'gü, -bhö "wliü kö 'i 'ta!»

⁷Dhe 'ö -yaa- pö "dhü 'yö gɔɔn- bha- kun- kwëe" 'ka, 'yö- =wliü, 'yö- -gen -yö dɔ dingdhö -a =wlöö, ⁸'yö -wlö 'ö -gban ö -gen bha- -ta, 'yö -ya 'ta 'sü -sü -bha. 'Yö waa- Yesu -bha bɔmë -nu 'wo -da Atanna -dhɔkëgüko 'gü kö -yö "ta 'sü sië, kö -yö -wlö sië, kö -yö Atanna 'tɔ bho sië. ⁹Me "pepe 'wo gun 'mü -wa -yö kö -yö 'ta 'sü sië Atanna 'tɔ bho -sü 'ka. ¹⁰Dhe 'ö =waa- ga 'ö =waa- dɔ =dhe 'me 'ö gun -ya -sü 'ka Atanna -dhɔkëgüko "dhi -sësü "dhiü, 'ö gun gba -dhe sië bha yö mü, 'yö "suü 'dhö -da -nu 'gü 'yö 'wɔn 'ö -kë -dhe bha- 'wɔn -ya -nu kɔn.

Piedhö dhiang zë Atanna -dhɔkëgüko 'gü -ko

¹¹Gɔndënë bha 'yii go Piedhö waa- Zan -a -nu -keng-, -a -wɔn 'gü mɛ kpö 'wo gun Atanna -dhɔkëgüko 'gü bha 'mɛ bha- -kë "klüöklü -wɔn bha 'yö- 'wɔn -ya -nu kɔn =dedewo, 'yö 'wo -beang sü 'wo nu- -nu -zian 'ka 'kɔ "gbeetazédhe 'dhe 'wo- -dhe Sadhomɔ -bha 'kɔ "gbeetazédhe bha- 'gü. ¹²Dhe 'ö Piedhö =yaa- -nu yö, 'yö- pö- -nu -dhe: «Izraëdhö -mɛ -nu, -më 'ö -kë 'yö 'mɛ ya- -kë "klüöklü -sü -wɔn -yö ka kɔn? -Më 'ö -kë 'yö 'ka yi -ga -dhe 'pë yi -në 'yi gɔndënë ya- -bha "yua bo yi -dɔ -bha 'gügbudhe "ɛɛn yi -dɔ -bha -kplü Atanna -bha -kɔ -së 'ka -a 'dhö? ¹³Ablaamö, Izaakö waa- Zaköbö -a -nu -bha Atanna 'ö -kë kwa "bhema -nu -bha Atanna 'ka bha -në- -kë kö mɛ -nu -wo ö -bha yëkëmɛ Yesu 'tɔ bho ('yö- -bö 'ö- bho ga 'gü).

Yesu 'ö "dhü bha Zuifö -nu kaa =dede ka kë- -kun 'ka- dɔ kaa- "segɔdhiümɛ -nu -gɔ, 'ö 'ka 'wɔn yaa -nu pö- -bha Pidhatö -kuu "dhiü, "këe kö yö -zë -ya "piü -dhe 'ö ö kwaa- -zü. ¹⁴'Ö 'kii "wɔ mɛ 'ö "slüöslü, 'ö pö 'aa- -bha Atanna wëëdhö bha- -wɔn -bha, 'ö 'ka 'mɛ yö -zë 'ö -kë mezëmɛ 'ka bha -në- -dhe Pidhatö -gɔ kö -ya bho -kaso 'gü ka -dhe. ¹⁵Yö 'ka 'mɛ 'ö -toseadhe nu mɛ =gban "pepe -dhe bha- zë -kɔ bha- 'gü. "Këe Atanna -ya -bho ga 'gü, yi- "sɛɛ- 'ka. ¹⁶Me 'ka- dɔ 'kpakpadhö 'ö -ya ya, 'gügbudhe 'ö Yesu 'tɔ 'gü bha -në- gba faan 'ka 'yö 'ka- -ga sië bha. -Zu -yö Yesu -dhe -sü -në gɔndënë ya- -bha "yua bo 'kpakpadhö mɛ =gban "pepe ka "yaan bha.

¹⁷Dhe 'ö "dhü, n dheebhang -nu, 'a- -dɔ -dhe 'wɔn kaa- ka -gɔmɛ -nu 'ka- -kë Yesu 'ka "dhü bha 'kaa- 'wɔn =në- dɔ. ¹⁸'Këe -yö -kë "dhü kö 'pë 'ö Atanna -yö bɔ ö -wudhiüloomɛ =gban "pepe -ta 'ö- pö bha- 'gü -wɔn -në -yö kë. Yö -mü -dhe -a -bha -Yamɛ -wëëdhe -dho bho. ¹⁹-A -wɔn 'gü, -ka ka zuë" slëë- kö 'ka ka wë -ya Atanna "piü kö -yö kaa- 'wɔn yaa -nu -mawɔn 'to. ²⁰-Ya kë "dhü, -yö -dho -ya -dɔ 'flëë- 'gü "tüng nu ka -dhe, 'ö 'mɛ 'ö -yaa- -ya 'nu "pepedhö ka Dhame 'ka 'ö -kë Yesu 'ka bha- nu ka -dhe. ²¹-Ya 'go yö -zë 'gü, Yesu Klisi -dho 'to dhang- 'gü 'ö dho- 'ka "dhü 'ö zun- 'ka pë -gban

"pepe kë -dee "tüng 'ö Atanna -yö bɔ- 'ka ö -wudhiüloome 'ö- -nu -ya -dɪ -ta bha- -nu -ta, 'ö- pö 'ö- yi -ya -gwëë bha- -bha. ²²Yö Yesu -wɔn dhiang zë- -nu -dhe 'ö- pö: «Moizö kë- pö yö -në- -bu 'gü yi 'bha 'ka 'ö- pö:

«Kwa Dëmë, kwa -bha Atanna -dho ö -wudhiüloome

'ö -dhe n 'dhö -a sü ka -zinng 'gü 'ö- bɔ ka -dhe.

'Wɔn "pepe 'ö dho- pö ka -dhe bha -kaa ma!

²³ Më "bu me 'ö 'yii- -wu ma,

-yö -dho 'go Atanna -bha me -nu -zinng 'gü 'ö- 'gü -yö -see» bha.»

²⁴ Atanna -wudhiüloome -nu "pepe 'ö go- 'ka Samiedhö -bha 'ö zun- 'ka -dëe -bha, -a -nu -gban "pepe -wo 'wɔn 'ö -gban 'yi bha- -bha bha- -dhiang -zë. ²⁵ Pë 'ö Atanna -ya "plüün bho 'ö bɔ- 'ka ö -wudhiüloome -nu -ta bha -yö ka -bha 'ka, 'ö -nëngkwëëdhe 'ö- -da waa- ka "bhema -nu wo -zinng 'gü bha 'ö ka -bha 'ka 'pö. -A -gen -mü -dhe -ya -pö Ablaamö -dhe 'ö- pö:

«A -dho bɔ i suu 'gü -në -nu -ta

'a 'dhuë- -kë "kpungtaame "pepe -gban -bha.»

²⁶ Yö -në- -wɔn 'gü, 'yö Atanna -yö ö -bha yëkëme (Yesu) sü 'ö- bɔ ka -në ka -dhe "dhiü -blëesü -kö kö -yö 'dhuë- kë ka -bha, "këe kö -yö 'me 'ö "dhü -a -kɔ bho- këwɔn yaa -nu bha 'do 'do 'ka.»

Piedhö waa- Zan -nu -bha -dho zagɔbhome -kuu "dhiü -kɔ -dhiang

4 ¹ Piedhö waa- Zan -wo -to dhiang -zë "següme -nu -dhe -dhe 'gü, 'yö "saabhome -nu oo, "yan -to Zuifö -nu -bha Atanna -dhökëgükɔ -bha -më -nu -gɔmë -nu waa- Sadusien -nu 'wo dɔ -beang -bha 'wo nu. ² Yesu -bha bɔmë -nu -bha "següme -nu draan- -wɔn bha 'yii dhi- -nu -dhe, -a -gen -mü -dhe -wa -pö "següme -nu -dhe -dhe Yesu -yö -go ga 'gü kö -ya -zɔn -dhe 'më -wa ga -wo -mɔɔ -bha kö -wo 'go ga 'gü. ³ Yö 'wo- -nu kun 'wo- -nu -da -kaso 'gü, 'yö 'wo -wɔ mü 'yö -dhe -yö -kpaɔ. -A -gen -mü -dhe 'wo- -nu kun kö "bin -ya 'ma.

⁴ "Tüng 'ö kë sië- 'ka "dhü bha kö 'me 'ö 'wɔn -taɔng -së 'ö Piedhö waa- Zan 'wo- pö bha 'wo- ma, kö- me 'gbe -dhe -wa 'dhang bho Yesu -wɔn "dhiü. 'Yö 'dhang -bho Yesu "dhiü -më -nu 'wo kë 'gbe 'wo dho 'wo -mɔɔ me "gblü "sɔɔdhu -nu "sinma -bha.

⁵ -Dhe 'ö- -tadhe -ya -kpaɔ, 'yö Zuifö -nu -gɔmë -nu waa- -nu -bha me zizi -nu waa- -nu -bha 'tɔnggɔmë -nu 'wo bho 'ko -ta Zedhizadhëmö 'plöö. ⁶ "Saabhome 'kpïi- 'wo- -dhe Anö bha- 'dhö, Kaifö 'dhö, Zan 'dhö, Dhezandrö waa- "saabhome 'kpïi- -gɔ 'kɔɔmë -nu -gban "pepe -wo -gun -dhe bha- 'gü. ⁷ Yö 'wo nu Yesu -bha bɔmë -nu bha- -nu 'ka -a -nu -kuu "dhiü, 'yö 'wo- -nu dhëe" kpɔ 'wo- pö: «-Genloome ya ka- -bha "yua bo -kɔ -kë -dhe? 'Gügbudhe suu -mëe -në 'ka- bo- 'ka, 'ëen ka- -bo de 'tɔ 'gü?»

⁸ Yö Piedhö 'ö 'Nii- "slüüslü- 'dhö- pa -sü 'ka bha 'ö- -yɔ bɔ- -nu -gɔ 'ö- pö: «"Sëkɔɔnme -nu, me zizi -nu, ⁹ -dhe 'ö -kë -dhe 'ka nu yi 'ka zagɔbhome -kuu "dhiü, 'ö- -gen 'yii kë 'wɔn "wëe 'bha -zë 'ka 'ö -kë 'ta 'yi- wo

-genloome ya- -dhe 'yi- -bha 'yua bo bha -në- 'ka, 'yö 'ka yi dhe' 'kpɔ sië 'zü -a dha -kɔ 'ka bha, ¹⁰-yö -së kö 'ka- -gen ma, kö Izraedhö -me -nu -gban 'pepe -wa dɔ 'pö. Gɔndënë bha kē 'ö- wo 'klüöklü 'kpakpadhö 'ö ka 'yan 'dhö- -bha 'ö dɔ bha -ya -wo 'gügbudhe 'ö Yesu Klisi 'ö go Nazadhetö, 'ö 'ka- dɔ 'dhü -bha 'ka- zë, 'ö Atanna -ya bho ga 'gü bha- 'tɔ bha -në- 'saa- 'gü.

¹¹Yesu 'ö 'wɔn 'ö -gban -bha 'ö -ben zë -sü 'ka Atanna -bha 'sëédhe 'gü -dhe:

«Gwë 'ö 'kɔdɔme -nu 'ka ka -kwaa- -zü bha -në

-ya kē 'kɔ 'kpan -ya -ta -gwë 'ka bha yö -mü. ¹²Yöö doseng -në dha -sü -yö -slɔɔ- 'piü, -a -gen -mü -dhe 'tɔ 'wɛɛ 'bha kö dho kē 'kpong -taa kö 'kwa bɔ- -ta 'kwa dha 'yaa 'dhö.»

¹³-Dhe 'ö -wa Piedhö waa- Zan -nu dhiang zë -kɔ bha- yö -zugbandhe 'ka, -a 'wɔn -ya -nu -kɔn, -a -gen -mü -dhe -a -nu -bhlëë 'yaa gun 'ɛɛn 'zü 'wii -klang 'bha kē kö woo pē dɔ, 'pē 'mɛ 'kö 'wo bha 'wo- dɔ doseng yö -mü -dhe -wo -gun Yesu -keng-. ¹⁴Kɛɛ -dhe 'ö -kē -dhe 'mɛ 'ö -kē 'klüöklü bha -yö -gun dɔ -sü 'ka- -nu 'sɔɔ mü, 'ö- -nu 'yan -yö gun- -bha bha, 'pē 'wo dho- pö 'wii- -slɔɔ.

¹⁵-Dhe 'ö -ya kē 'dhü 'yö 'wo- pö Piedhö waa- Zan -nu -dhe -wo zun 'kpenng. -Dhe 'ö -wa zun 'kpenng, -yö zagɔbhome -nu 'wo wo -gɔ dun 'pē 'wo dho- kē Piedhö waa- Zan -a -nu 'ka -a -wɔn 'gü. ¹⁶'Yö 'wo- pö wo 'ko -nu -dhe: «-Më -dede -në 'kwa dho -mɔɔ- -bha 'kwa- kē 'mɛ 'wo ya- -nu 'ka? 'Mɛ 'wo Zedhizadhemö -pö ya- 'gü -a -nu -gban 'pepe -wa 'wɔn -dɔ -dhe 'dhabhliwɔn 'kpii- 'ö -kē ya wo -në 'wo- -kē, 'yii -dɔ 'pö 'yii 'dho -mɔɔ- -bha kö 'yi zaodhe -da -bha. ¹⁷Kɛɛ kö 'wɔn bha 'ya 'dho -pen -dhe -gban 'pepe 'gü, -ka -kwa -ya -a -nu 'yan 'gü kö 'kwa- pö- -nu -dhe glɔglɔdhö -dhe 'wa 'dho dhiang zë mɛ 'bha -dhe 'zü Yesu bha- 'tɔ 'gü!» ¹⁸'Yö 'wo Piedhö waa- Zan -a -nu -dhe, 'yö 'wo- pö- -nu -dhe glɔglɔdhö -dhe -wo wo bo mɛ -nu -klang kē -sü waa- dhiang -zë mɛ -nu -dhe -sü 'ö Yesu 'tɔ 'gü bha- 'ka tongtongdhö.

¹⁹Kɛɛ 'yö Piedhö waa- Zan 'wo- pö- -nu -dhe: «Kaa -dede -kaa -ga, -yö -së Atanna wëédhö kö 'yi ka -bhlëë -ya kö -yö ziö yö -zë -bha -ta -ee? ²⁰-Abin! 'Yi -zë 'yii 'dho -mɔɔ- -bha kö 'yi yi bo 'wɔn 'yi- yö, 'ɛɛn 'yi- ma -a pö -sü 'ka!» ²¹'Yö zagɔbhome -nu 'wo 'suü -da -nu 'gü 'zü -deewo, 'yö 'wo wo -kwaa- -nu -zü 'wo dho. 'Yö 'wii- -nu -wëédhe bho -dhe yö, -a -gen -mü -dhe kö 'següme -nu -gban 'pepe -wo Atanna 'tɔ bho sië 'wɔn 'ö -kē bha- -wɔn 'gü. ²²'Mɛ 'ö- -dhe -yö bo 'dhabhli 'gü 'dhü bha 'ö gun 'dhü kö- -kwe -ya ziö -kwe -kaɔng -yiisiö -ta.

'Dhang -bho Yesu "dhiü -me -nu -bhea Atanna -dhe -kɔ

²³-Dhe 'ö -wa wo kwaa- -nu -zü, 'yö Piedhö waa- Zan 'wo dho woo- me -nu 'piü, 'yö -wu 'ö 'saabhome -gɔme -nu waa- me zizi -nu 'wo- pö- -nu -dhe bha 'wo- -gen dɔ 'pö- -nu -dhe.

²⁴-Dhe 'ö -wa 'wɔn bha- ma, 'yö 'dhang -bho Yesu "dhiü -me -nu 'wo wo -wu -kē do 'yö 'wo -bhea Atanna -dhe 'wo- pö: «'Yi Dëme, bhi -në 'i dhang-

'dhö, "sɛ 'dhö, "yi waa- -nu 'güpɛ "pepe =gban -da. ²⁵Bhi =nɛ 'i bɔ yi "bhema Davi 'ö -kɛ i -bha yɛkɛmɛ 'ka bha- 'gü yi 'bha 'ka, 'yö 'i- pö i -bha 'Nii- "slüüslü -wu 'ka -dhe:

◀-Mɛ =nɛ -kɛ 'yö 'wɔn -siö mɛ -dhe -kɔ suu ya

'ö -da 'mɛ 'waa Zuifö 'ka- -nu 'gü?

=Wa "kpɛnng- kɛ kwa Dɛmɛ -gɔ, "kɛɛ -a -nu -kɔ 'yii =mɔɔ- -bha kö -wa 'gü -wɔn kɛ.

²⁶"Kpung =taa -gblüɛ -nu =wa dɔ- -gɔ =gɔɔn -yan 'gü,

'yö -gɔmɛ -nu =wa wo zü 'ma 'koo

kwa Dɛmɛ Atanna waa- -bha -Yamɛ

'ö- pö ö dho -a bɔ mɛ "bhu- -nu -dhe bha- -nu -gɔ.

²⁷-A -gen -mü =dhe -yö tɛan- =dede 'ka =dhe Edhodö 'dhö, Pidhatö waa-

mɛ 'bha -nu 'ö 'waa Zuifö 'ka -a -nu 'dhö, Izraɛdhö -mɛ -nu 'dhö, -a -nu

=gban "pepe -wo kɛ -loo wo 'ko -ta 'pödhɛ ya- 'gü i -bha yɛkɛmɛ "slüüslü

Yesu 'ö i -bha -Yamɛ 'ka bha- -gɔ. ²⁸'Yö 'wo pɛ "pepe 'i -wu -bha "dhiü yi

'bha 'ka i -bha 'gügbudhe 'gü, 'ö -kɛ i -dhidhewɔn 'ka bha- -kɛ -kɔ bha- 'gü.

²⁹=Dhe 'ö "dhü, yi Dɛmɛ, -bhö -a -nu -bha "suü -da yi 'gü -wu -nu ya- -nu

-ga kö 'i "wɔ- -bha 'mɛ 'yi kɛ i -bha yɛkɛmɛ -nu 'ka ya yi -gɔ kö 'yi i -wu pö

-zugbandhe 'ka mɛ -nu -dhe. ³⁰-Bhö i -bha 'gügbudhe -zɔn mɛ -nu -dhe,

"yua -bho mɛ -bha -sü waa- "dhabhliwɔn -nu kɛ -sü 'ka i -bha yɛkɛmɛ

"slüüslü Yesu bha- 'tɔ 'gü.»

³¹=Dhe 'ö =wa wo bo -bhɛa Atanna -dhe -sü 'ka =dhe -kɔ bha- 'dhö, 'yö

-dhe 'wo gun -ya -sü 'ka- 'gü bha 'ö -ya =zii -sü -bha, 'yö- -nu =gban "pepe

'wo pa 'Nii- "slüüslü 'ka, 'yö 'wo -ya Atanna -wu pö -sü -bha -zugbandhe

'ka mɛ -nu -dhe.

'Dhang -bho Yesu "dhiü -mɛ -nu -bha woo- pɛ -nu 'gü -gblü wo 'ko -ta -kɔ -dhiang

³²'Dhang -bho Yesu "dhiü -mɛ -nu kpö 'wo bha- -nu -zugɔngüwɔn -gun

do, -a -nu -dhidhewɔn -gun do. -A mɛ 'bha 'yii- pö pɛ 'bha -bha -dhe mang

do n -bha -mü, "kɛɛ pɛ 'dhö 'mɛ 'dhe- -gɔ, -wa -loo 'ko -ta 'yö -kɛ -a -nu

=gban -bha 'ka. ³³Yesu -bha bɔmɛ -nu bha -wo kwa Dɛmɛ Yesu -bha -go

ga 'gü -sü -dhiang -zɛ 'gügbudhe =dede 'ka; 'yö Atanna -yö 'dhang -bho

Yesu "dhiü -mɛ -nu -kaɔwɔn -dhi =dedewo. ³⁴⁻³⁵Pɛ 'bha -saan 'yaa gun mɛ

'bha -bha -a -nu kpö 'gü, -a -gen -mü =dhe 'mɛ 'ö 'bhlaadhe -nu 'wo- -nu -gɔ

waa- 'kɔ -nu 'dhö -wa 'dhɔɔ -dɔ, 'ö 'wo dho- 'wɛɛga 'ka Yesu -bha bɔmɛ -nu

-dhe, 'yö 'wo- -wɛɛ bho kö -wa 'gü -gblü wo 'ko -ta, 'yö 'mɛ 'ö 'dhö -a -ma

-wɔn 'dhö zun 'wɛɛga 'ö- -bha, 'yö- pö, 'yö 'wo- nu- -mɛ -dhe.

³⁶Zosefu 'ö -kɛ Dhevi -gɔ "kwean- 'gü 'nɛ do 'ka 'ö bhɔ Siplé 'ö Yesu -bha

bɔmɛ -nu -wa 'tɔ kpɔ (glɛkö -wu 'gü) 'wo- -dhe Baanabasö, ('ö =waa- pö

'dhü kö -wa -pö mɛ faandɔmɛ bha) ³⁷-Yö ö -bha 'bhlaa- do 'dhɔɔ dɔ -kɔ

bha =nɛ- 'gü 'yö nu- 'wɛɛga 'ka Yesu -bha bɔmɛ -nu -dhe.

Ananiasö waa- Safiidha -a -nu këwɔn -dhiang

5 ¹"Kɛɛ 'yö gɔndënë do 'wo- -dhe Ananiasö, 'wo- -bha dhebho -dhe 'pö Safiidha bha 'wo -mɔɔ- 'gü, 'yö 'wo wo -bha -dhe do 'dhɔɔ dɔ. ²-A 'wëëga bha 'yö Ananiasö -ya 'bha -gblen kpɔ kö -yö 'to wo -gɔ, 'yö- -kpɛa sü ö dho- 'ka Yesu -bha bɔmɛ -nu -dhe kö waa- -bha dhebho -a -nu 'yaan -wɔn -yö 'ko 'yaan.

³-Dhe 'ö -ya kë 'dhü 'yö Piedhö -ya pö- -dhe: «Ananiasö, -më -në -kë 'yö 'i -wɪ -bha 'yö Sɔtraan -yö -ya i zuè" 'gü 'yö 'i =sua -kë 'Nii- 'slüüslü -dhe, 'yö -dhe 'i- 'dhɔɔ dɔ bha 'i- 'wëëga 'bha -gblen kpɔ? ⁴De -nɛ faan -wɔ i -ta kö 'i i -bha -dhe bha- 'dhɔɔ dɔ? "ɛɛn -a 'wëëga bha i -bha 'yaa -mü -ee? -Më -në -kë 'yö 'slë suu bha 'ö -da i 'gü? =Sua bha 'bhii- kë mɛ "bhu- -zè -dhe, i- -kë Atanna -në- -dhe bha, (i -dho -a -dhe 'yö).»

⁵-Dhe 'ö Ananiasö -ya -wu bha- ma, 'yö to 'mü 'ö -pö 'sia- 'yö ga. Mɛ "pɛpɛ 'wo 'wɔn bha- ma, 'yö "suü -ziisü -yö -da -nu 'gü. ⁶'Yö 'nëglɔɔn -nu 'wo nu 'wo sɔ bɔ- -bha, 'yö 'wo- sü 'wo dho- 'ka 'wo- -wɛɛ bho.

⁷-Dhe 'ö =wa -ya 'në 'bha wo pinngdhö, 'yö Ananiasö -bha dhebho -yö -da 'kɔɔdhö 'pö kö 'wɔn 'ö -kë bha 'yaa- 'bha dɔ. ⁸'Yö Piedhö -ya dhe" kpɔ 'pö 'ö- pö: «-Bhö tean- -dhiang zè n -dhe, Safiidha, 'wëëga 'ö 'ka ka -bha -dhe bha- 'dhɔɔ dɔ- -bha bha- =gban -në ya -ee?» 'Yö- pö- -dhe: «=Iin, -a =gban -në bha.» ⁹'Yö Piedhö -ya pö- -dhe: «-Më -në -kë 'yö 'ka ka zü ma 'kɔɔ kö 'ka Atanna -bha 'Nii- 'gü dan? -Dhe -ga, 'mɛ 'wo 'go siè i -gɔn bun bho -dhe 'gü =wa -loo 'kɔ "kpan 'dhiü, -wo -dho 'dho bhii -du 'pö i 'ka.»

¹⁰-Yö -to 'pö -dhe do bha- 'gü 'ö -pö Yesu -bha bɔmɛ bha- =wlöö mü 'yö ga. 'Yö 'nëglɔɔn -nu do bha 'wo -da 'kɔɔdhö kö -ya ga, 'yö 'wo- sü 'wo dho- 'ka 'wo- -wɛɛ bho- -bha gɔn "sɔɔ.

¹¹'Yö Atanna -bha 'kɔɔhigümɛ -nu waa- mɛ "pɛpɛ 'wo 'wɔn bha- ma, 'yö "suü -ziisü 'dhö -da -nu 'gü.

"Dhabhliwɔn 'gbe 'ö Yesu -bha bɔmɛ -nu -wa -kë -a dhiang

¹²Yesu -bha bɔmɛ -nu -wo 'dhabhliwɔn -nu waa- -kian -wɔn 'gbe =dede -kë "segümɛ -nu 'yan 'dhiü. 'Dhang -bho Yesu 'dhiü -mɛ -nu -wo -gun wo 'ko kpö 'ka =dhe 'kɔ do 'gü -mɛ -nu 'dhö, 'kɔ "gbeeta zè -dhe 'wo- -dhe -dhe Sadhomɔ -bha 'kɔ "gbeeta zè -dhe bha- 'gü. ¹³'Ö 'mɛ 'waa 'dhang bho Yesu -wɔn 'dhiü 'waa gun =mɔɔ siè- -bha kö -wo -da -a -nu kpö 'gü, "kɛɛ -a -nu 'tɔ -zè -yö -gun -a -nu 'dhi -kpɛawo. ¹⁴Mɛ kpö 'gbe =dede, dhong -nu waa- gɔɔn- -nu, -wo 'dhang -bho kwa Dëmɛ Yesu -wɔn 'dhiü, 'ö 'wo -da 'dhang -bho -a 'dhiü -mɛ -nu -bhiëë 'gü.

¹⁵'Dhabhliwɔn -nu 'ö 'dhang -bho Yesu 'dhiü -mɛ -nu gun- kë siè bha- -wɔn 'gü, mɛ -nu -gun nu siè wo -bha 'yuèdhi -nu 'ka zian -glooga 'ö Piedhö -yö bɔ- -ta bha- 'piü, 'yö 'wo- -nu -wɔ "gbang -nu waa- sɛɛ" -nu -ta kö Piedhö -ya ziö, kö- dhong "fiëfiëdè -zè -yö dɔ- -nu -ta kö- -nu

-bha "yua -yö bo. ¹⁶Me 'gbe -ta -gbe -nu -wo gun 'go sië 'pödhe -nu 'wo Zedhizadhemö -dhe -züü -dhe -nu 'gü bha- -nu 'gü 'wo nu woo- "yuëdhi -nu 'ka, waa- 'me 'ö "yina yaa 'dhö- -nu sëë bho sië- -nu 'dhö, 'ö- -nu -gban -bha "yua -nu 'wo bo, 'ö "yina yaa -yö go- -nu 'gü 'pö.

"Yënnngbaɔndhe -da Yesu -bha bɔme -nu -ta -kɔ -ple -naa -a -dhiang

¹⁷Dhe 'ö =ya kē "dhü 'yö "saabhɔme -nu -gɔme 'kpii- waa- 'ö -bha me -nu 'wo Zedhizadhemö, 'wo -kē Sadusien -nu 'ka, 'yö gblɛn" -yö ma- -nu 'gü Yesu -bha bɔme -nu bha- -nu -bha. 'Yö 'wo- pö 'wo 'wɔn bho- -nu 'gü. ¹⁸'Yö 'wo- -nu kun 'wo- -nu -da -kaso 'gü.

¹⁹Dhe =ya dɔ gbeng, 'yö Atanna -bha "kië do -yö nu 'yö -kaso -kɔ "dhi -pu -a -nu -gɔ, 'yö- -nu zun "kpɛnng, 'yö- pö- -nu -dhe: ²⁰«-Ka 'dho Atanna -dhɔkägüko 'gü kō 'ka -tosea kē -kɔ -dee 'ö- -bha zian -ta bha- -zɔn me -nu -dhe!»

²¹'Yö Yesu -bha bɔme -nu 'wo- -kē -dhe -kɔ 'ö- pö- 'ka- -nu -dhe bha- 'dhö. 'Yö 'wo dho Atanna -dhɔkägüko 'gü -dhekpɔ tii 'gü, 'yö 'wo -ya me draan- -sü -bha mü.

'Yö "saabhɔme -nu -gɔme 'kpii- waa- me "pepe 'wo- "piü bha 'wo Zuifö -nu -bha me zizi -nu -dhe -dhe do 'gü kō 'wo -ya 'kwëë- kē. ("Yan -to Zuifö -nu -bha Atanna -dhɔkägüko -bha -me -nu -gɔme -yö -gun mü 'pö). 'Yö 'wo "sɔdha -nu bɔ kō -wo 'dho Yesu -bha bɔme -nu bha- -nu -dhe -dhe 'gü -kaso -kɔ 'gü.

²²"Kɛɛ -dhe 'ö =wa 'dho =wa -loo mü, 'wii- -nu yö -kaso -kɔ 'gü, 'yö 'wo wo yee -kē 'wo nu 'wo- -gen dɔ- -nu -dhe 'wo- pö: ²³«-Dhe 'yi -loo mü, yi -kpan -kaso -kɔ 'dhi -nu -bha kō -wo ta -sü 'ka -së 'ka, 'ö 'yi "yan -to 'kɔdhi -bha -me -nu yö kō -wo dɔ sië 'kɔdhi -nu -bha, "kɛɛ -dhe 'yi "kwɛɛ -pu 'yi -da 'kɔdhi 'yii- -nu yö.»

²⁴Dhe 'ö "yan -to Zuifö -nu -bha Atanna -dhɔkägüko -bha me -nu -gɔme waa- "saabhɔme -nu -gɔme -nu 'wo 'wɔn bha- ma, 'yö- 'wɔn -ya -nu kɔn, 'yö 'pë 'wo dho- pö 'wii- dɔ, 'yö 'wo- pö wo 'ko -dhe: «-Më -wɔn suu -në -ni -oo?» ²⁵-Wo -to mü 'yö me do -yö -wo, 'yö- pö- -nu -dhe: «-Ka -dhe -ga, 'me 'ka- -nu kun 'ka- -nu -da -kaso 'gü yaan "dhiü bha, -wo me draan- sië Atanna -dhɔkägüko 'gü tii- -dhö.»

²⁶Dhe 'ö =ya kē "dhü, 'yö "yan -to Zuifö -nu -bha Atanna -dhɔkägüko -bha -me -nu -gɔme waa- 'ö -bha me -nu 'wo gun 'mü bha 'wo dho Yesu -bha bɔme -nu bha- -nu 'kun -dhe 'gü, 'yö 'wo nu- -nu 'ka, "kɛɛ 'wii- -nu kē -kɔ 'bha 'gü, -a -gen -mü -dhe kō -wo "suü sië "següme -nu -gɔ kō 'wa 'dho wo -zuö -gwë 'ka.

²⁷Dhe 'ö =wa nu- -nu 'ka, 'yö 'wo dho- -nu 'ka -ya 'kwëë- kédhe 'gü, 'yö "saabhɔme -nu -gɔme 'kpii- 'dhö- -nu dhe" kpɔ 'ö- pö: ²⁸«'Yii -dhio dɔ ka -ta 'yii- pö 'ka 'dho me 'bha draan- Yesu ya- 'tɔ 'ka 'zü -ee? -Më -në 'ka- -kē ya? 'Yö ka -bha me draan- -wu =ya =mɔɔ Zedhizadhemö -dhe ya- 'gü -dhe

-gban "pepe 'gü, 'yö ka "piü -zianwo -dhe 'ka 'me bha- ga -wɔn kë yi -kwëe-ka ya.»

²⁹'Yö Piëdhö waa- Yesu -bha bɔme -nu -kpea 'wo to bha 'wo- -yɔ bɔ- -gɔ 'wo- pö: «-A -dhea -bha -dhe 'yi Atanna -në- -bhlëë -ya kö -yö ziö- me "bhü- -zë -bha -ta! ³⁰Yesu 'ka- dɔ "dhü -bha 'ka- zë bha kwa "bhema -nu -bha Atanna =yaa- bho ga 'gü, ³¹=yaa- "wli =yaa- -ya ö -bha -yëa -bhlëësü 'gü, =yaa- -ya -gɔme 'ka Medhame 'ka, kë "dhü kö Izraëdhö -següme -nu -wo bɔ- -ta kö -wo wo -bha -toseadhe slëë- Atanna "piü kö -wo dha -sü -slɔɔ, kö -ya -nu -bha 'wɔn yaa -nu -mawɔn 'to. ³²Yi 'wɔn -nu bha- "sëe- 'ka, 'Nii- "slüüslü 'ö Atanna -ya nu ö -bhlëëyame -nu -dhe bha -ya "sëe- 'ka 'pö.»

³³=Dhe 'ö -yakwëëkëme -nu =wa -wu bha- ma, 'yö -siö -nu -dhe "gbu- -dedewo, 'yö 'wo- pö 'wo Yesu -bha bɔme -nu zë. ³⁴"Këe Fadhizien mi do- gun- -nu kpö 'gü mü, 'wo- -dhe Gamadhiedhö, 'ö "següme -nu -wa -bhlëë -ya -dedewo, 'ö kë 'pö 'tɔnggɔme do 'ka, 'yö =wli -yakwëëkëme -nu bha- -nu kpö 'gü mü 'ö- pö- -nu -dhe -wo Yesu -bha bɔme -nu bha- -nu zun "kpenng 'në 'dede wo.

³⁵=Dhe 'ö =waa- -nu zun "kpenng, 'yö- pö -yakwëëkëme -nu bha- -nu -dhe: «Izraëdhö -me -nu 'ka ya, -ka ka -di 'kun 'pë 'ka dho- kë 'me 'wo ya- -nu 'ka bha- -wɔn 'gü! ³⁶Kaa =dede ka- 'wɔn -dɔ 'kpakpadhö -dhe gɔndënë 'wo- -dhe Tëüdasö, 'ö gun ö -di 'sü sië me -bhlëësü 'ka bha -yö kë -wli kwaa- "se ya- 'gü -a yi 'yii =gwëë -kö, 'ö 'me 'wo =mɔɔ me këng -yiiisö -nu -bha 'wo -ziö -keng-, "këe -dhe 'ö =waa- zë, 'yö 'me 'wo gun -keng- bha 'wo -pen, 'yö- -nu =gban 'wo -kan 'kwëë-, 'yö -kë 'wɔn 'dhe bha- "dhiütodhe 'ka. ³⁷=Dhe 'ö- 'dhe bha =ya kë "dhü, me dhung "töng 'gü 'zü, 'yö 'me 'dhe 'wo- -dhe 'pö Zuda 'ö go Gadhidhe -së 'gü bha 'ö =wli. 'Yö me 'gbe -dede gɔɔ bho 'yö 'wo -ziö -keng-. -Dhe 'ö =waa- zë 'pö, me "pepe 'wo gun -keng- bha 'yö 'wo -pen 'pö. ³⁸-A -kë "dhü -sü bha- 'gü, a- -pö ka -dhe: -Ka ka kwaa- 'me bha- -nu -zü kö -wo 'dho, 'ka 'dho ka "tu kë- -nu -bha 'zü do. -A -gen -mü -dhe =ya kë -dhe -a -nu kë "slë -nu waa- -nu kë -yë -nu bha -wo -go me "bhü- -në- 'gü, kö -yö -dho 'wü -dhe 'me 'wo bha- -nu -bha bha- 'dhö, ³⁹"këe =ya kë -dhe 'ö -go Atanna -në- "piü -dedewo tɛan- 'ka, kö ka -kɔ 'yii 'dho =mɔɔ- -bha kö 'ka- 'wü. -A -wɔn 'gü -kaa kë -së kö 'ka 'dho 'ko zë Atanna 'ka!» 'Yö -ya 'kwëë- këme -nu bha 'wo -wɔ Gamadhiedhö -wu -bha.

⁴⁰'Yö 'wo Yesu -bha bɔme -nu bha- -nu -dhe, 'yö 'wo- pö "sɔdha -nu -dhe -wa -nu -ma. =Dhe =wa bo- -nu -ma -sü 'ka, 'yö 'wo- pö- -nu -dhe 'wa 'dho dhiang zë me 'bha -dhe 'zü Yesu 'tɔ 'gü, 'yö 'wo wo =kwaa- -nu -zü.

⁴¹'Yö Yesu -bha bɔme -nu 'wo go -ya 'kwëë- bha- -dhe 'gü -niidadhe -dede 'ka, -a -gen -mü -dhe 'yiü- -dɔ -nu -bha -sü 'ö Yesu 'tɔ -wɔn 'gü bha -në- -nu -bhlëë -kë Atanna wëëdhö. ⁴²'Yö 'wo me -nu -draan -kpeawo yi =gban "pepe 'ka Atanna -dhɔkëgüko 'gü -dhe waa- 'kɔ "wëe 'gü -dhe -nu 'gü 'wɔn -taɔng -së 'ö -gban -a -bha -Yame Yesu -wɔn -bha bha- 'ka.

Me "saɔple 'wo dho Atanna -bha bɔme -nu -ta 'kun -a -nu 'sü -kɔ -dhiang

6 ¹-A "tüng bha- 'gü, -dhe 'ö -kë -dhe 'dhang -bho Yesu -wɔn "dhiü -me -nu -gun -da sië- "dhiü -kpeawo, 'yö "dhinaa -yö -da Zuifö -nu 'wo bho "se "wɛɛ 'gü 'wo glékö -wu pö waa- me 'dhe 'wo bho Zuifö -se 'gü -a -nu -zinng 'gü. Me 'dhe 'wo glékö -wu pö bha, -wa -pö -dhe 'waa -bhöpè nu woo- =geandhe -nu -dhe -dhe -kɔ 'wo- nu 'ka 'me 'wo to -a -nu -dhe bha- 'dhö yi "pepe 'wo -bhöpè 'gü -gblü 'ka bha- =gban 'ka.

²⁻³Yö Yesu -bha bɔme -nu -kaɔng do ga =ple bha 'wo 'dhang -bho Yesu "dhiü -me -nu =gban -dhe -dhe do 'gü, 'yö 'wo- pö- -nu -dhe: «Yi dheebhang -nu, 'yaa -së kö 'yi yi kwaa- Atanna -wu pö -sü -zü kö 'yi yi -zu kë -bhöpè -wɔn "piü! =Dhe 'ö "dhü, -ka me "saɔple 'ö me "pepe =gban 'wo- -nu 'tɔ -së pö, 'ö 'Nii- "slüüslü 'dhö- -nu pa -sü 'ka, 'ö 'wo =kpaɔsü -a -nu 'sü ka =zinng 'gü kö yë 'dhe bha 'yi- dɔ- -nu -kɔ 'ka. ⁴Yö =në =ya kë "dhü, 'yö yi -kɔ dho =mɔɔ- -bha kö 'yi bhea" Atanna -dhe "ɛɛn kö 'yi- -wu pö "tüng =gban "pepe 'gü kö 'yi 'dho- 'ka "dhiü -kpeawo.»

⁵-A pö 'wo- wo "dhü bha 'yö- "dhia -yö ma me kpö bha- -nu 'gü -dedewo, 'yö 'wo Etienö 'ö pa -sü 'ka 'Nii- "slüüslü waa- -zu -yö Atanna -dhe -sü 'ka bha- 'dhö, Fidhipö 'dhö, Plosɔdhö waa- Nikanɔɔ 'dhö, Timɔ waa- Paamenasö 'dhö, Nikodha 'ö go Angtɔsö 'ö ö zuë" -slëë Zuifö -nu -bha bhea" -kɔ 'ö gun "dhiü -blɛɛsü -a 'gü bha- -nu sü. ⁶Yö 'wo- -nu -zɔn Yesu -bha bɔme -nu -dhe, 'yö 'wo =bhea Atanna -dhe -a -nu -wɔn 'gü, 'yö 'wo wo -kɔ kpa- -nu -ta (kö -ya -nu -kaɔwɔn dhi).

⁷-Dhe 'ö =ya kë "dhü, Atanna -wu -yö -dho "dhiü -kpeawo 'yö 'dhang -bho Yesu "dhiü -me -nu 'bha 'dhö -da -ta -kpeawo 'pö Zedhizadhémö -pö 'gü, 'yö "saabhome -nu 'gbe =dede 'wo -wɪ -bha kö 'wo wo -zu yö Yesu -dhe.

Etienö 'kun -kɔ

⁸Etienö bha Atanna -bha 'dhuë- waa- -bha 'gügbudhe -wo -gun pa -sü 'ka. -A -wɔn 'gü -yö -gun "dhabhliwɔn "gblüglü -nu waa- -kian -wɔn -nu kë sië. ⁹-Dhe 'ö -kë "dhü, 'yö me 'bha -nu 'wo zaɔdhe -da Etienö 'ka. 'Me 'wo "dhü bha- me 'bha -nu -kë Zuifö -nu -bha -yakwëékégükö 'gü -me -nu 'wo- -nu -dhe «-go -dhuëndhe 'gü -me -nu» bha =në- 'ka. 'Me 'wo "dhü bha -wo -go Sidhenö -pö waa- Dhezandri -pö -nu 'gü, 'yö waa- Zuifö 'bha -nu 'ö 'waa wo -zë -a -nu -dhe "dhü, "kɛɛ 'wo go Sidhisi -dhe waa- Azi -dhe -nu 'gü 'pö bha waa- Etienö -nu 'wo -ya zaɔdhe -da -sü -bha wo "kwëë. ¹⁰"Kɛɛ -a -nu "dhi -yö -kun 'ö- -nu -kɔ 'yii =mɔɔ dhiang zë -sü -bha 'zü, -a -gen -mü -dhe kö Etienö -yö dhiang zë sië 'wɔndɔdhe 'ö 'Nii- "slüüslü -ya nu- -dhe bha- 'ka.

¹¹Yö 'me 'wo bha 'wo me -nu gbadiü -kë kö -wa pö Etienö -bha -dhe: «Yi- -yö kö -yö Moizö waa- Atanna -a -nu -bha fang bho sië.»

¹²Yö 'wo "següme -nu waa- me zizi -nu waa- 'tɔnggɔme -nu zü =yɔɔn Etienö -bha -kɔ bha- 'gü, 'yö 'wo =loo- -ta 'wo- kun, 'yö 'wo dho- 'ka

zagɔbhome 'kpii- -kuu "dhiü. ¹³'Yö 'wo nu 'pö 'me 'wo -sua -ya Etienö -bha bha- -nu 'ka 'yö 'wo- pö: «Me ya 'yaa ö bo kwa -bha Atanna -dhökëgüko -bhlëüsü bha waa- Moizö -bha 'tɔng- -nu -bha fang bho -sü 'ka. ¹⁴Yi- -ma -ta -dhe Yesu 'ö go Nazadhetö bha -yö -dho Atanna -dhökëgüko 'wü, 'ö kwa wɔ -kɔ 'ö Moizö -ya nu kwa "bhema -nu -dhe bha- -bho "gluv.

¹⁵'Yö 'me 'wo gun za -gɔ -yɛ 'gü -kɔ 'gü mü bha 'wo wo "yan -gban Etienö 'gü 'yö 'wo- -ga "wɛ zuudhö, 'yö 'wo- -dhe yö kö- wɔ 'gü- 'bhü sië -dhe Atanna -bha "kië wë 'dhö.

Etienö -ziö dhiang 'gü -kɔ -dhiang

7 ¹'Yö "saabhome -gɔme 'kpii- -yö Etienö dhex' kɔ 'ö- pö: «Dhiang -nu 'wo- pö i kɛ- -zë bha -yö -gun 'dhü -ee?» ²'Yö Etienö -ya -yɔ bɔ 'ö- pö: «N dë -nu, n dheebhang -nu, -ka ka "tu 'to! Atanna 'ö- 'tɔ -yö bho bha -yö kɛ 'ö -dɔ -zɔn kwa "bhema Ablaamö -dhe yi 'bha 'ka kö -yö -tun Mezopotami -se 'gü, kö 'yii 'dho -kô -ya Saadhang -pö 'gü, ³'yö- pö- -dhe: «Bhö 'go i -gɔ "següme -nu waa- i -gɔ 'kɔɔme -nu kɔ 'gü kö 'i 'dho "sɛ a dho- -dhe -zɔn i -dhe bha- 'gü.» ⁴Ablaamö -yö -go yö -në- 'gü Sadee -se 'gü 'yö dho -ya Saadhang. -A dë -yö -ga -dhe bha -në- 'gü. 'Yö Atanna -yö Ablaamö bɔ "sɛ 'ka- 'gü -dɛɛ ya- 'gü. ⁵'Yii -dhe 'bha nu- -dhe mü. -Dhe 'në -zian 'ö -kɛ -dhe mɛ -gen -yɛa 'dhö 'yii- nu- -dhe mü kö -yö kɛ- -dɔ -bha 'ka, "kɛɛ -ya "plüün -bho -dhe -dhe 'ö -dho "segɔ bha- nu- -dhe, 'ö- nu 'pö- suu 'gü -në -nu -dhe, "kɛɛ kö- "tɔng bha- 'gü kö 'në 'bha -zian 'yii kɛ -kô Ablaamö -gɔ. ⁶-Wu 'ö Atanna -ya pö- -dhe -kaa -ga 'ö ya, -ya -pö: 'ɔ suu 'gü -në -nu -dho -tosea kɛ -dhengdhe -ta "segɔ "wɛɛ 'gü, -wo -dho -dhuëndhe zɛ "sɛ bha- 'gü 'ö 'wo- -nu -wëédhe bho -kwe këng -yiiisö 'ka. ⁷"Kɛɛ a -dho 'wɔn "gbu- wɔ "segɔ 'wo dho kɛ- 'gü -dhuënd 'ka bha- 'gü -mɛ -nu -ta, 'ö 'wo go "segɔ bha- 'gü 'wo nu n -dhökë -dhe 'gü "sɛ ya- 'gü.»

⁸'Yö Etienö -yö dhiang zɛ 'ö dho- 'ka 'ö "dhiü 'ö- pö: «-Dhe 'ö -ya kɛ "dhü 'yö Atanna -yö -mlɛɛ -kɛ Ablaamö 'ka, 'yö- daɔdɔpɛ -kɛ -dho 'gbannë 'gü -sü 'ka (kö -ya -zɔn -dhe wo -në 'wo 'ö -bha 'ka). 'Yö Ablaamö -yö 'ö gbö Izaakö kɔ, 'yö- -kɛ 'gbannë 'ka kö -ya bho kö- -dhekpɔyɛ -ya kɛ "saaga. 'Yö Izaakö -dɔ 'pö 'ö 'ö gbö Zakɔbö -kɛ 'pö 'gbannë 'ka -kɔ do bha- 'gü. 'Yö Zakɔbö -dɔ 'pö 'ö 'ö bhang -nu -kaɔng do ga -plɛ 'wo -kɛ kwa "bhema -wɔngbusü 'ka bha- -nu -kɛ 'gbannë 'ka 'pö -kɔ do bha- 'gü.

⁹'Yö kwa "bhema -nu bha 'wo gblɛn" gɔn wo dheebhang Zosefu 'ka, 'yö 'wo- "dhɔɔ dɔ, 'yö kɛ -dhuënd 'ka Ezitö -se 'gü, "kɛɛ Atanna -yö -to "piü. ¹⁰'Yö- bho- -bha sëëbhodhe -gban "pepe 'gü 'yö- gba -kpaɔdhe 'ka, 'yö 'glëen- -ya 'gü Ezitö -mɛ -nu -bha -gblüdë 'ö gun "tɔng bha- 'gü bha- "yan 'gü. 'Yö Zosefu -ya Ezitö -se waa- 'ö -slɔɔpɛ "pepe -gban -gɔdhiüme 'ka.

¹¹-Dhe 'ö 'wɔn -nu bha -wa kɛ "dhü, 'yö "vüü -yö -da Ezitö -se waa- Kanaa -se -nu 'gü, 'yö- sëëbhodhe -yö -kɛ 'gbɛ -dedewo, 'yö 'pɛ 'ö kwa "bhema -nu woo- -bhö 'yaa gun.

¹²-Dhe 'ö Zakɔbö -yaa- ma -dhe -bhöpɛ -yö Ezitö -se 'gü, 'yö 'ö bhang -nu 'wo -kɛ kwa "bhema -nu 'ka bha- -nu bɔ 'mü, -bhöpɛ 'dhɔ -dhe 'gü -kɔ

-blæesü wo. ¹³Dho -ple -naa 'dhe 'wo dho- wo bha 'yö Zosefu -yö ö -du -zɔn ö dheebhang -nu -dhe (=dhe 'ö "yaan, 'yii ga =dhe -kɔ 'ö wo -zë 'wo gun wo -zu 'gɔn sië- 'ka bha- 'dhö), 'yö Fadhaɔn -yö gun -na Zosefu -bha 'kɔɔmɛ -nu dɔ.

¹⁴Dhe 'ö =ya kɛ "dhü 'yö Zosefu -yö naɔ dɔ 'ö dheebhang -nu bha- -nu -gɔ kö -wa dɔ wo dɛ Zakɔbö -gɔ kö waa- ö -gɔ 'kɔɔmɛ -nu 'ö- -nu -da 'kwëë- -sü -yö gun mɛ -dhü -kaɔng "saɔplɛ ga "sɔɔdhu bha -wo nu.

¹⁵Dhe naɔ bha 'wo- dɔ- -nu dɛ -gɔ, 'yö- -nu dɛ Zakɔbö waa- ö -gɔ 'kɔɔmɛ -nu 'wo dho Ezitö -sɛ 'gü. 'Yö 'wo to 'mü 'yö zun- 'ka- -nu ga -yi -bha. ¹⁶Dhe Zakɔbö =ya ga, 'yö 'wo dho- =gɛ 'ka Ablaamö -bha mɛ =geebhodhe 'ö- dhɔ Emɔɔ -bha 'nɛ -nu -gɔ Sisemö -pö 'gü bha- 'gü. -Dhe do 'wo Zakɔbö =wɛɛ bho- 'gü bha =nɛ 'wo kwa "bhɛma -nu -wɔ -bha 'pö.

¹⁷Dhe 'ö 'pɛ 'ö Atanna -ya "plüün bho Ablaamö -dhe (=dhe ö -dho Kanaa -sɛ nu- suu -nu -dhe) bha- 'gü -wɔn kɛ -yi 'yaa =gblɛɛn 'zü, "kɛɛ kö kwa "bhɛma -nu =wa pa =dedewo kö =wa kɛ 'gbe Ezitö -sɛ 'gü, ¹⁸'yö -gblüdɛ "wɛɛ 'ö 'yaa Zosefu dɔ =dhe Fadhaɔn 'dhö bha 'ö -ya "sɛgɔ "dhiü Ezitö -sɛ bha- 'gü. ¹⁹'Yö -gblüdɛ 'dhe 'ö bha 'ö "kpɛnng- -kɛ kwa "bhɛma -nu -gɔ, 'yö- -nu -wëédhe bho, 'yö- pö- -nu -dhe -wo wo kwaa- woo- 'nɛ "blɛ -dee -nu -zü kö -wo ga.

²⁰Moizö -bho "tüng bha =nɛ- 'gü, 'yö gun 'nɛ -dee -sɛ =dede 'ka, 'yö- -dho -yö Atanna kɛ. 'Yö- 'kpɔmɛ -nu 'wo- -bin "su -yaaga 'ka wo -gɔ 'kɔɔdhö (kö Fadhaɔn 'ya 'dho- 'wɔn dɔ). ²¹"Kɛɛ =dhe 'ö- kɛ -kɔ 'bhaa 'dhö 'zü, 'ö =wa wo kwaa- -zü "bü, 'yö Fadhaɔn 'dhu -ya yö, 'yö- sü 'ö dho- 'ka 'ö- -kɛ ö -bha 'nɛ 'ka 'yö ö -zu -kɛ "piü. ²²'Yö 'wo Moizö -draan Ezitö -sɛ bha- 'gü -wɔn kɛ -kɔ "pɛpɛ -gban -bha, 'yö -kɛ mɛ "gbu- 'ka ö "wɪ -kɔ -nu waa- ö këwɔn -nu 'gü.

²³Dhe Moizö 'kpɔ -kwe =ya kɛ -kaɔng -yiisiö, 'yö =wɪü yi do 'ka, 'yö dho -wo ö dheebhang -nu 'wo -kɛ Izraɛdhö -mɛ -nu 'ka bha- -nu -bha kö 'wo -kɔ 'ö- 'gü 'ö- dɔ. ²⁴Dhe 'ö dho 'yö -kpan Ezitö mi do -bha kö -yö ö dheebhang -nu bha- mɛ do -wëédhe bho sië "wɛɛwɛɛ, 'yö dho ö dheebhang bha- "piü kö ö- bhlɔɔ bho, 'yö Ezitö mi bha- zɛ. ²⁵'Yö ö -zu -gɔn -dhe ö dheebhang -nu 'wo -kɛ Izraɛdhö -mɛ -nu 'ka bha, -wo -dho -a 'gü ma =dhe Atanna -dho bɔ yö =nɛ ö -ta kö -ya -nu bho -dhuëndhe 'gü, "kɛɛ 'wii- 'gü ma "dhü. ²⁶-A -dhekpɔayi 'dhe 'ö dɔ- "piü bha, 'yö Moizö -yö -kpan Izraɛdhö mi -plɛ -bha kö -wo -gɔn gɔn sië, 'yö- pö 'ö- -nu "kan 'kwëë- kö -wo dhi wo 'ko -dhe 'yö- pö- -nu -dhe: <Mɛ 'ka ya, -yö -kɛ mü -dhe 'yö ka -du -slɔɔ 'ka ka 'ko -nu -wëë -kɛ wo sië "kɛɛ kö dheebhang -zɛ -mü ka 'ka ya? > ²⁷"Kɛɛ 'yö- mɛ 'dhe 'ö za yaa bho ö "tɛado -bha bha 'ö Moizö -blü, 'yö- pö- -dhe: <De =nɛ i -ya yi -gɔmɛ 'ka "ɛɛn yii- zadɔmɛ 'ka? > ²⁸"ɛɛn -yö i "piü -dhe 'i n zɛ =dhe -kɔ 'i Ezitö mi zɛ- 'ka yaan "dhiü bha- 'dhö -ee? > ²⁹Dhe 'ö Moizö =yaa- -wu ma =dhe 'pɛ bha- 'dhö, 'yö =dua 'yö dho Madian -sɛ 'gü 'yö -ya mü, 'yö 'nɛgɔɔn =plɛ kpɔ "sɛ bha- 'gü.

³⁰Dhe 'ö -kwe -kaɔng -yiisiö =ya ziö, 'yö Atanna -bha "kië do -yö ö -du -zɔn Moizö -dhe "tungtadhe 'ö Sinai -tɔn "sɔɔ bha- 'gü peng 'gü kö

-yö -kpɔɔkpö do -bhö sië ("kɛɛ kö 'yaa 'gü). ³¹=Dhe 'ö Moizö -ya -dhe bha- yö 'yö- 'wɔn -ya kɔn. =Dhe 'ö -yɔɔn sië -kpɔɔkpö bha- "sɔɔ kö 'ö- -ga 'kpakpadhö, 'yö kwa Dëmɛ Atanna -wu ma kö -ya pö sië: ³²Ma -nɛ 'a i "bhema -nu -bha Atanna 'ka, 'a Ablaamö, Izaakö waa- Zakäbö -nu -bha Atanna 'ka.>

'Yö Moizö -yö -ya =zii -sü -bha "suü 'ka, 'yö -dhe -ga -dhe bha- 'gü -sü -yö -kë 'gü -ziisü. ³³'Yö kwa Dëmɛ -ya pö- -dhe: «-Bhö i -bha -sabha bho i -gen 'gü, -a -gen -mü =dhe 'se 'i dɔ- -ta bha "se 'ö -ya -sü 'ka -dɪ -wɔn "dhiü Atanna -bha 'ka yö -mü.» =Dhe 'ö =yaa- pö- -dhe "dhü, 'yö go mü 'ö- pö: ³⁴«Sëë 'ö ma mɛ -nu 'wo- bho sië Ezitö -sɛ 'gü bha 'ma- -dhe yö, 'ma- -nu "gbu -wu ma; Yö -nɛ- -wɔn 'gü 'yö 'a -lɔɔ kö 'a- -nu bho =dhuëndhe 'gü. =Dhe 'ö "dhü, -bhö nu, -a "tüng =ya -loo kö 'a i bɔ Ezitö -sɛ 'gü!»

³⁵'Yö Etienö -yö dho ö "dhiü dhiang zë -sü 'ka 'ö- pö: «Moizö =dede 'ö Izraedhö -mɛ -nu 'wo- pö- -dhe: <Dee i -ya yi -gɔmɛ 'ka "ɛɛn za -dɔ yi -bha -mɛ 'ka> bha =nɛ Atanna -ya bɔ kö -ya -nu bho =dhuëndhe 'gü kö -yö kë- -nu -gɔmɛ 'ka. Atanna -bha "kië 'ö ö -dɪ -zɔn -dhe -kpɔɔ kpö 'ö pɛng 'dhö -bhö sië- 'gü bha =nɛ- -ta kun kö -yö kë Izraedhö -mɛ -nu -gɔmɛ waa- -nu -bho =dhuëndhe 'gü -mɛ bha- 'ka. ³⁶Moizö =nɛ Izraedhö -mɛ -nu bho =dhuëndhe 'gü Ezitö -sɛ 'gü, "dhabhliwɔn -nu kë -sü 'ka "sɛ bha- 'gü, =weeyi -zaɔndhö "dhiü -dhe -nu waa- "tungtadhe -nu 'gü -kwe -kaɔng -yiisio 'ka. ³⁷Moizö do bha 'zü -nɛ- pö Izraedhö -mɛ -nu -dhe:

<Atanna -dho ö -wudhiüloome do 'ö -dhe n 'dhö,

ö dho 'go ka suu 'gü -a bɔ ka -dhe>. ³⁸Moizö bha =nɛ gun Izraedhö -mɛ -nu kpö 'gü "tung -ta. 'Yö -kë kwa "bhema -nu "piü, 'yö -kë 'zü Atanna -bha "kië 'ö dhiang zë- -dhe Sinai -tɔn -gbin- bha- "piü, 'yö Atanna -yö ö -bha -tosea 'ö 'yaa yɛn -a -kë -bha -wu -nu nu- -dhe kö -ya nu kwa -dhe.

³⁹"Kɛɛ kwa "bhema -nu 'wii "wɪ- -bha kö -wo Moizö =bhlëë -ya, 'yö 'wo -kɔ -a -wu 'ka 'yö 'wo- pö -yö wo 'gü -sɛ kö 'wo wo yee kë 'wo 'dho Ezitö -sɛ 'gü. ⁴⁰'Yö 'wo- pö Aadhɔn -dhe: «-Bhö yi -bha -zlan -nu 'wo dho 'ta yi 'ka -a -nu -pɛ kë! -A -gen -mü -dhe Moizö 'ö go yi 'ka Ezitö -sɛ 'gü ya 'pɛ 'ö- -kë 'yaa- -dɔ!» ⁴¹'Yö -du 'nɛ do -pɛ -kë, 'yö 'wo "saa- bho- "dhiü, 'yö 'wo wo "dhia bho- -nu -dɪ -bha -kë -kɔ "dhiü -pɛ bha- -dhe.

⁴²'Yö Atanna -yö ö =taa -ya -nu -gɔ 'wɔn bha- 'gü, 'yö ö =kwa- -nu -zü 'yö 'wo 'bhüpe -nu 'wo dhang- 'gü -a -nu -dhɔkë -dhe -kɔ 'ö -ben zë -sü 'ka- 'ka Atanna -wudhiüloome -nu -gɔ 'sëedhe 'gü -a 'dhö -dhe:

<Atanna -ya -pö: Izraedhö -mɛ -nu, wü -nu 'ka- zë "ɛɛn "saa- -nu 'ka- bho -kwe -kaɔng -yiisio 'ka "tung -ta bha, ka- -bho ma =nɛ n -dhe -ee?

⁴³"Kɛɛ kö ka kë -dhɔkëpɛ 'wo- -dhe Mɔdhɔkö bha- -bha sɔ 'kɔ -sü 'ö 'ka dho- 'ka -dhe =gban -dhe =gban 'gü, waa- 'dhe 'ö- "blɛɛn- 'dhö "susɛng 'ka 'wo- -dhe Dhefan bha- 'dhö.

-Dhɔkɛpɛ -nu 'wo "dhü
 'ö 'wo -kë ka -bha -kë -kɔ "dhiü -pɛ -nu 'ka bha -nɛ
 'ka- -nu -dhɔkɛ.

-A -kë "dhü -sü -wɔn 'gü,
 a -dho "slɛ kɛ

kö -wo 'dho ka 'ka -dhe =gblɛɛn 'gü Babidhɔnɔ -dhe =taama»

44 Sɔ 'kɔ 'ö Atanna -bha 'tɔng- =gbɛɛ -yö gun- 'gü bha -yö -gun -nu -gɔ
 "tungtadhe bha- 'gü. Sɔ 'kɔ bha -wa -kë -dhe -kɔ 'ö Atanna -ya pö- 'ka
 Moizö -dhe 'ö- =gleng -da 'ka- -bha bha -nɛ- 'dhö. 45 'Yö sɔ 'kɔ bha 'ö -da 'pö
 kwa "bhema -nu 'wo dɔ mɛ 'dhe bha- -nu 'piü bha- -nu -kwɛɛ-, 'yö Zozue
 -yö zun- -nu -dhe "dhiü 'yö 'wo sɔ 'kɔ bha- sü 'wo dho- 'ka Kanaa -sɛ 'gü.
 "Kɛɛ kö 'sanni -wo -loo 'sɛ bha- 'gü kö Atanna =ya 'sɛ bha- 'gü -mɛ -nu
 "piü kɛ- -nu "dhiü, kö =waa- -nu -bha 'sɛ bha- 'kun- -nu -gɔ. Sɔ 'kɔ bha -yö
 -to -nu -gɔ 'sɛ bha- 'gü 'ö dho 'ö zun- 'ka Davi -bha -gblüädhe "tüng -bha.
 46 Davi -wɔn -yö Atanna -zɔ -kun. 'Yö- -dhe 'ö -bha Atanna 'ö -kë -a "bhema
 Zakɔbö -bha Atanna 'ka bha- -gɔ kö 'ö- -bha 'kɔ dɔ. 47 "Kɛɛ =dhe 'ö =ya kɛ
 "dhü, Sadjomɔ =nɛ kɛ Atanna -bha 'kɔ bha- dɔ =taama.

48 "Kɛɛ a- -pö ka -dhe tɛan- =dede 'ka -dhe Atanna =bhlɛɛsü 'ö -ya -sü 'ka
 dhang- 'gü bha, 'yaa -ya 'kɔ -nu 'ö mɛ "bhü- -nu 'wo- dɔ bha- 'gü -dhe -kɔ 'ö
 Atanna -wudhiüloome Ezai -ya pö- 'ka bha- 'dhö -dhe:

«Kwa Dɛmɛ -ya -pö: 49 Dhang- 'gü -dhe -nɛ ma -blüädhe -gbloo 'gü
 -dhe 'ka,

'yö 'sɛ 'dhö n -gɛndɔtapɛ 'ka.

-A -kë "dhü -sü bha- 'gü

-mɛ -kɔ suu =nɛ 'ka dho- dɔ n -dhe?

"ɛɛn -dhe -mɛɛ =nɛ dho kɛ n "tɛɛpadhe 'ka? 50 Ma 'aa mü 'a pɛ -nu
 bha- =gban -pɛ -kɛ -ee?»

51 'Yö Etienö -ya pö: «Gɔɔgbumɛ -nu 'ö ka zuɛ" waa- ka "tu -nu 'wo ta -sü
 'ka Atanna -wɔ -gɔ 'ö 'kaa "wɔ- -bha kö 'ka 'Nii- "slüüslü -wɔ ma -kpɛawo
 ya, ka -bhɔ ka "bhema -nu -bha =dedewo. 52 Atanna -wudhiüloome -mɛɛ
 =nɛ ka "bhema -nu 'wii- -wɛɛ -kɛ "dhiü bho? -Wo ka 'mɛ -nu 'wo mɛ doseng
 'ö pö 'aa- -bha -a nu -wɔn 'pö bha- -nu -zɛ. -A mɛ doseng 'ö pö 'aa- -bha 'zü
 "dhü bha 'yö 'ka ka -kɔ -kan 'zü- "dhiü 'yö 'ka- zɛ. 53 Atanna 'dhö bɔ 'zü 'ö
 -bha 'kiɛ -nu -ta 'ö 'tɔng- 'ö- nu ka -dhe 'kii- 'bha -bhlɛɛ -ya.»

Etienö ga -kɔ -dhiang

54 =Dhe 'ö zagɔbhome -nu =wa Etienö -wɔ bha- ma, 'yö -siö -nu -dhe
 =dedewo 'yö 'wo -ya 'sɔn "dhiü -bhö -sü -bha -a -bha. 55 "Kɛɛ Etienö 'kö
 'Nii- "slüüslü 'dhö- pa -sü 'ka bha, 'yö -dhe -ga dhang- 'gü, 'yö Atanna -bha
 'tɔbhɔdhe 'bhü yö, 'yö 'ö 'yan -kpan Yesu -bha kö -yö dɔ siɛ Atanna "sɔɔ
 -dhe =bhlɛɛsü bha- 'gü 56 'yö- pö: «-Ka -dhe -ga! 'Ma dhang- yö kö- "dhi

-ya "pu, ma n "yan -kpan Mëgböme -bha kö -yö dɔ sië Atanna "sɔɔ -dhe -bhlëësü bha- 'gü.»

⁵⁷=Dhe 'ö =ya kë "dhü, 'yö 'wo =gbla "gbu- 'ka 'wo wo -kɔ kpa wo "tu "dhiü 'yö 'wo =wliü 'wo dho 'wo =loo Etienö -ta. ⁵⁸Yö 'wo- -gan wo "piü -zuudhö 'wo dho- 'ka 'pö- =taama, 'yö 'wo -ya -a -zuö -gwë 'ka -sü -bha kö 'wo- zë. 'Yö 'më 'wo "sëedhe -kë -bha -a -bha zadɔyi 'ka bha, 'wo wo -bha sɔ 'dhe 'wo- -da sɔ -ta bha- -nu bho 'mü 'wo- dɔ 'nëglɔɔnnë do 'wo- -dhe Sɔdhö -a -gɔ kö -yö ö "yan 'to- -bha kö 'wo woo- -gwë -zuö -dhe yö.

⁵⁹=Dhe 'wo gun Etienö zë sië -gwë 'ka, 'yö =bhea 'ö- pö: «N Dëme Yesu, ma n -dɔ -wɔn wɔ i =kwëe-!» ⁶⁰=Dhe 'ö =yaa- pö "dhü 'yö zun ö kpiö 'gü 'yö =gbla "gbu- 'ka 'ö- pö: «N Dëme, 'bha 'dho- -nu 'kun tëë 'ka -a -nu këwɔn bha- -bha!» =Dhe 'ö- pö "dhü 'yö- 'nii- 'dhö -pö.

8 ¹⁻²Sɔdhö zü- -gun Etienö zëme -nu bha- -nu "piü. =Dhe 'ö =ya kë "dhü, 'yö Atanna -bhlëëyame -nu 'wo Etienö sü 'wo dho 'wo- -wëe bho, 'yö 'wo- -gbu bɔ =dedewo.

Atanna -bha 'kɔdhigüme -nu 'wo Zedhizadhëmö -a -nu -bha "yënnngbaɔndhe 'kpii- zü -yö -bho 'pö -dhekpɔyi do bha =në- 'ka. 'Yö =ya 'go Yesu -bha bɔme -nu -zë 'gü, 'dhang -bho Yesu "dhiü -më -nu =gban "pepe 'wo -pen 'wo dho Zude -se waa- Samadhi -së -nu 'gü.

³Sɔdhö -zë -yö -gun ö faan dɔ sië =dedewo kö 'ö Atanna -bha 'kɔdhigüme -nu =në- -nu suu yën, 'yö -sɔ 'kɔ -nu 'gü 'dɔɔndhö 'yö 'dhang -bho Yesu "dhiü -më -nu kun, gɔɔn- -nu waa dhong -nu, 'yö- -nu -da -kaso 'gü.

Fidhipö -bha Yesu -bha 'wɔn -taɔng -së -pö Samadhi -së 'gü -kɔ -dhiang

⁴Dhang -bho Yesu Klisi "dhiü -më -nu 'wo -pen "dhü bha, 'yö 'wo 'wɔn -taɔng -së bha- pö -dhe =gban "pepe 'gü 'wo dho- 'ka. ⁵Yö Fidhipö -yö -dho Samadhi -pö do 'bha 'gü 'pö, 'yö Klisi -wɔn dhiang zë 'më 'wo mü- -nu -dhe 'ö- pö Atanna -bha -Yame 'ö- -wɔn pö bha =në Yesu 'ka.

⁶=Dhe 'ö më 'gbe 'wo gun wo "tu 'to sië Fidhipö -wu -bha bha 'wo 'wɔn -nu 'ö- pö sië bha waa- "dhabhliwɔn -nu 'ö- kë sië bha- -dhe yö, më =gban "pepe -wo wo "tu to -së 'ka =dedewo 'ö -dhea -yö ga- -nu -ta dingdhö; ⁷-a -gen -mü -dhe 'më 'ö "yina yaa -nu gun- -nu 'gü, -a -nu -bha "yina yaa -nu bha -wo gun 'go sië- -nu 'gü 'gbla -sü 'ka "gbu- 'ka, 'ö "trüünyuame -nu waa- -genloome -nu 'wo -kë "klüöklü 'pö. ⁸Yö 'pö- bha- 'güme -nu =nii 'dhö -da =dedewo.

⁹Gɔndënë do 'wo- -dhe Simɔ -yö -gun 'pödhe bha- 'gü. Simɔ bha -yö -gun "zumi "gbu- do 'ö- -wɔn -yö Samadhi -më -nu kɔn -a 'ka. -A -wɔn 'gü -yö -gun ö -dɔ kë sië më =bhlëësü =dede 'ka. ¹⁰'ö 'më 'wo 'pödhe bha- 'gü, 'ö go- 'ka 'në -nu -bha ö zun- 'ka më "gblüglü -nu -bha, 'wo wo "tu to- -wu -bha -së =dede 'ka 'ö 'wo- -bhlëë -ya, kö -wa pö sië: «Kwa -bha -zlan 'wo- -dhe «'gü 'gbu- -zlan» "këe 'ö- -bha 'gügbudhe 'dhö -ziisü, 'ö =lɔɔ kwa

-dhe yö -mü Simɔ =në- 'ka.»¹¹ -Wo -gun wo "tu 'to sië- -wu -bha -së 'ka, -a -gen -mü -dhe 'ö gun "dhü kö- -bha "zuvdhe bha- wɔn -zun -a -nu 'kɔn -sü -bha -yi =ya =gwëë.¹² "Këe =dhe 'ö Fidhipö =ya 'wɔn -taɔng -së 'ö -gban Atanna -bha -gblüädëdhe waa- Yesu Klisi -bha bha- -dhiang zë- -nu -dhe, 'yö gɔɔn- -nu waa- dhong -nu 'bha -nu 'wo 'pödhe bha- 'gü bha 'wo 'dhang bho- "dhiü, 'yö 'wo- -nu -bɔ Yesu 'ka -zu bho.¹³ 'Yö Simɔ -dɪ 'pö 'ö 'dhang bho Yesu Klisi -wɔn "dhiü, 'yö 'wo- -bɔ 'ka -zu bho 'pö. 'Yö to Fidhipö -keng- 'yö- "yan 'dhö -da "dhabhliwɔn "gblügbliü -nu 'ö gun- kë sië bha- -dhe 'gü, 'yö- 'wɔn -ya kɔn.

¹⁴Yesu -bha bɔmë -nu 'wo gun Zedhizadhëmö bha, 'yö 'wo- ma =dhe 'me 'wo Samadhi =wa 'dhang bho Yesu -wɔn "dhiü, 'yö 'wo Piedhö waa- Zan -a -nu bɔ mü.

¹⁵=Dhe 'ö 'më 'wo bha =wa 'dho =wa =loo Samadhi -së 'gü, 'yö 'wo =bheä 'dhang -bho Yesu "dhiü -më -nu -wɔn 'gü Atanna -dhe kë "dhü kö -wo 'Nii- "slüüslü =slɔɔ.¹⁶ -A -gen -mü -dhe 'ö gun "dhü kö 'Nii- "slüüslü 'yii -da -a më do -zian 'gü -kö, "këe kö =waa- -nu -bɔ Yesu 'ka -zu -zë wo -a 'tɔ 'gü.¹⁷ =Dhe 'ö =ya kë "dhü, 'yö Piedhö waa- Zan 'wo wo -kɔ kpa- -nu -ta 'wo =bheä Atanna -dhe, 'yö 'Nii- "slüüslü 'dhö -da -a -nu 'gü.

¹⁸=Dhe 'ö Simɔ =ya 'wɔn bha- -dhe yö, =dhe Atanna =ya 'Nii- slüüslü nu 'dhang -bho Yesu "dhiü -më -nu -dhe, Yesu -bha bɔmë -nu 'wo -kɔ 'ö- kpa- -nu -ta bha- -wɔn 'gü, 'yö 'wëëga nu Piedhö waa- Zan -a -nu -dhe ¹⁹'yö- pö- -nu -dhe: «Ka 'gügbudhe bha- nu n -dhe 'pö kö 'ma n -kɔ kpa 'më 'ö- -ta, kö 'Nii- "slüüslü -yö -da -më 'gü!»²⁰ "Këe 'yö Piedhö -ya pö- -dhe: «Kaa- i -bha -naɔ -nu =gban, -ka 'gü -yö see-! -A -gen -mü -dhe i i -zu -gɔn -dhe 'bha yi gba 'wëë- 'ka Atanna dho 'gügbudhe 'ö- =gbaɔ =në- wo bha- nu i -dhe 'wëëga bha- -trɔɔn 'ka kö 'i 'Nii- "slüüslü nu- 'ka më -nu -dhe. i -bha 'wɔn 'bha 'yaa 'wɔn ya- 'gü,²¹ -a -gen -mü -dhe i zuë" 'yaa "puu Atanna wëëdhö.²² =Dhe 'ö "dhü, -bhö i kwaa- -zu 'gɔn -kɔ suu bha- -zü kö 'i bheä" kwa Dëmë -dhe kö =ya "wɪ- -bha kö -yö i -zutagüwɔn -nu bha- -nu -mawɔn 'to,²³ -a -gen -mü -dhe 'ma- 'wɔn dɔ -dhe i pa -sü 'ka 'wɔn yaa 'gbe 'ka, 'i 'wɔn yaa -gɔ =dhuëndhe 'gü.»²⁴ 'Yö Simɔ -ya pö Piedhö waa- Zan- -nu -dhe: «Kaa -dɪ 'pö, -ka bheä" kwa Dëmë -dhe n -wɔn 'gü kö pë -nu 'ka- pö sië bha 'wa 'dho kë n 'ka!»

²⁵=Dhe 'ö 'pë 'ö Piedhö waa- Zan 'wo- dɔ Yesu Klisi -wɔn 'gü, 'wo- pö më -nu -dhe 'ö 'wo kwa Dëmë -bha 'wɔn -taɔng -së pö, 'yö 'wo wo yee -kë 'wo dho Zedhizadhëmö. =Dhe 'ö =wa -da zian -ta 'wo 'dho sië, 'yö 'wo naɔ -së bha- dɔ Samadhi -pö 'gbe -nu 'gü.

Fidhipö waa- -lame do 'ö go Etiopi -së 'gü -a -nu -kpan 'kwëë- -kɔ

²⁶Yi do 'ka 'yö kwa Dëmë -bha "kië do -ya -pö Fidhipö -dhe: «-Bhö 'dho 'siayën -zian 'ka, zian 'ö go Zedhizadhëmö 'ö dho Gaza bha- "pëan 'ka! -Kpinngga 'ö "dhü bha "tung -ta -zian -mü.»²⁷ 'Yö Fidhipö -yö =wliü 'ö dho.

-A 'dho -sü 'ka 'yö -kpan gɔndënë do -bha zian -ta. Gɔndënë bha -yö -kë -lame 'kpii- do 'ö go Etiopi -sɛ 'gü, 'ö ö -zu to -gblüdedhe 'ö go Etiopi -sɛ 'gü 'wo- -dhe Kandasö bha- -bha =naɔ 'gü -a 'ka, 'yö nu Zedhizadhëmö kö 'ö Atanna -dhɔkë. ²⁸Yö gun ö yee kë sië 'ö dho ö -gɔ 'sɛ 'gü kö -yö -ya -sü 'ka ö -bha gɔ suu 'bha 'ö -soo -nu 'wo- -gan bha- 'gü kö -yö Atanna -wudhiüloomɛ Ezai -bha 'sëedhe bha- -wu pö sië.

²⁹Yö 'Nii- 'slüüslü -ya pö Fidhipö -dhe: «-Bhö 'dho kö 'i dɔ gɔ bha- "sɔɔ!»

³⁰Yö Fidhipö -yö dho -beang 'ka 'yö -kpan Etiopi mi bha- -bha, 'yö- -wu ma kö -yö Atanna -wudhiüloomɛ Ezai -bha 'sëedhe bha- -wu pö sië. 'Yö-dhɛ" kɔ 'ö- pö: «'Pë 'i- -wu pö sië bha 'i- 'gü -ma "wɛ -ee?» ³¹Yö gɔndënë bha 'ö- -yɔ bɔ- -gɔ 'ö- pö: «(-Yö n "piü =tɔn -dhe 'a- 'gü ma "kɛɛ) =ya kë -dhe mɛ 'bha 'yii- 'klɔɔ- pö n -dhe, -a -dho -a dɔ -kɔ -kë =dhe?» 'Yö- pö Fidhipö -dhe: «-Bhö -da kö 'i -ya n "sɔɔ yö!» 'Yö Fidhipö -yö -da "piü mü. ³²'Pë 'ö gun -ben zë -sü 'ka 'sëedhe bha- 'gü 'ö Etiopi mi gun- -wu pö sië bha -ya -pö:

«-Yö -kë -dhe "bhlaa 'wo 'dho sië- 'ka -a zë -dhe 'gü -a 'dhö.

'Ö -kë -dhe "bhlaanë 'wo- kaa- "kan sië

'ö 'yaa "wɪ -a 'dhö,

'yii ö "dhi "pɔ.

³³-Wo =bhlëë -bho -bha 'ö 'wo- -bha tɛanwɔn -kë =suawɔn 'ka, -a -wɔn 'gü mɛ 'bha 'yii 'dho- 'gü -në do -zian 'tɔ ma 'zü, -a 'klɔɔ- -mü -dhe -a -bha -bha -zë -ya bho- "dhiü "kpung =taa yö =naa bha, -a -gɛn -mü -dhe =waa- -bha -kë "kpung =taa -sü -zë bho- "dhiü.»

³⁴Yö Etiopi mi bha 'ö Fidhipö dhɛɛ" kɔ 'ö- pö: «-Bhö dɔ "gbu- bhɛa" =në 'a- wo 'i -dhe kö 'i- 'klɔɔ- pö n -dhe. De =në 'ö Atanna -wudhiüloomɛ -ya -dhiang zë bha? -Yö -wɪ ö -dɪ 'ka -ee, "ɛɛn -yö -wɪ mɛ "wɛɛ 'bha -në- 'ka -ee?» ³⁵Yö Fidhipö -ya zü bho 'wɔn -gɛn do ö gun- -wu pö sië bha- -ta 'ö naɔ -së 'ö -gban Yesu -wɔn -bha bha- pö- -dhe.

³⁶=Dhe 'wo 'dho sië wo "dhiü, 'yö 'wo dho 'wo -loo 'yi 'bha bha- =bhaa, 'yö Etiopi mi bha 'ö- pö: «'Yi =nɛ, -më =në- -wɔn =ya 'to kö 'a -bɔ Yesu 'ka -zu bho?» ³⁷Yö Fidhipö -ya pö- -dhe: «=Ya kë -dhe 'bha 'dhang bho Yesu "dhiü 'i zuë" =gban "pepe 'ka kö 'i -mɔɔ -bha 'i -bɔ -a 'ka -zu bho.» 'Yö gɔndënë bha 'ö- pö: «A 'dhang -bho "dhiü =dhe Yesu Klisi bha Atanna Gbö -mü.» ³⁸=Dhe 'ö =ya kë "dhü, 'yö Etiopi mi bha 'ö- pö 'mɛ 'ö gɔ bha- "dhiü "ta 'sü sië bha- -dhe -yö 'gbaannu. =Dhe 'ö 'gbaannu, 'yö Etiopi mi waa- Fidhipö 'wo go gɔ bha- 'gü 'wo zun 'sia-, 'yö- -nu =gban =ple 'wo -lɔɔ 'yi =bhaa. 'Yö Fidhipö -yö Etiopi mi bha- -bɔ Yesu 'ka -zu bho. ³⁹=Dhe 'ö =wa 'go 'yi =bhaa, 'yö kwa Dëme -bha 'Nii- -yö Fidhipö sü 'zodhö 'yö dho- 'ka. 'Yö Etiopi mi bha- "yan -yö =fië- 'ka, "kɛɛ 'yö yö -zë 'ö dho ö -bha 'ta 'ka ö "dhiü =niidadhe 'ka. ⁴⁰Fidhipö dho "kan ö -ta (kö 'Nii- 'slüüslü =yaa- 'sü -dhe 'gbu- -yö mɛ sü,) kö -yö dɔ sië Azo -pö 'gü. =Dhe 'ö -kë "dhü 'yö dho

'pö ö -bha 'ta 'ka 'dhiü, 'yö naɔ -së bha- dɔ 'pödhe -nu 'gü 'ö dho- 'ka 'dhü 'ö -loo- 'ka Sezadhe -pö 'gü.

Sɔdhö -bha ö zuë" -slëë Atanna "piü -kɔ

(Këwɔn -nu 22,6-16; 26,12-18)

9 ¹-A "tüng bha- 'gü, kö Sɔdhö -yö "suü -da kwa Dëme -bha -klang -nu 'gü, 'ö- -nu zë "slë -mɔɔ -kpɛawo. Yi do 'ka 'yö =wli 'ö dho "saabhomé -nu -gɔme 'kpii- "piü, ²'yö- -kɔ "gbluu 'sëédhe ('ö -ya kè- -gɔ 'wo dho- dɔ- -bha =dhe wo =në 'wo- bɔ, "ɛn 'wɔn -nu 'ö- kè sië bha -ya -kè wo =në wo faan 'ka bha) 'ö dho- -wɔn 'gü kö 'ö 'dho- 'ka Zuifö -nu -bha -yakwëëkëgüko -gɔme -nu 'wo Damasö -pö 'gü -a -nu -dhe. Kë "dhü kö 'ya 'ta -sü Yesu -bha ziantame -nu yö Damasö -pö 'gü, dhong -nu -mü -ee "ɛn gɔɔn- -nu -mü -ee, kö 'ö- -nu 'kun 'ö nu- -nu 'ka Zedhizadhemö.

³'Yö -da zian 'ö dho Damasö bha- -ta. =Dhe 'ö -ya =yɔɔn 'pödhe bha- "sɔɔ, 'ö dho "kan ö -ta kö -dhepuudhe 'ö go dhang- 'gü -yö 'bhü sië ö -züzü. ⁴'Yö kɔn =soo 'ö gun- -ta bha- 'ka 'yö -pö "sia-, 'yö me 'bha -wu ma kö -ya pö sië ö -dhe: «Sɔdhö, Sɔdhö, i n "yënnɔ -gbaɔn "dhü -më -wɔn 'gü?»

⁵'Yö Sɔdhö -ya dhɛ" kpɔ 'ö- pö: «Bhii 'de 'i bha?» 'Yö kwa Dëme Yesu -ya pö- -dhe: «Mang Yesu 'i n "yan 'gü =gbaɔn bho sië bha ma -mü, ["kɛɛ i -dha n -gɔ -dhe -dho kè 'ya-» 'Yö "suü 'dhö -da Sɔdhö 'gü, 'yö -ya =zii -sü -bha 'yö- pö: «N Dëme, -yö i "piü =dhe 'a- kè =dhe?» 'Yö kwa Dëme -ya pö- -dhe:] ⁶«-Bhö "wli kö 'i 'dho 'pödhe 'ö -ya i 'dhiü bha- 'gü! -Wo -dho 'pè 'i dho- kè -a pö i -dhe mü.» ⁷'Wɔn bha 'yö- 'wɔn -yö Sɔdhö "tayɔɔ -nu kɔn =dedewo 'yö 'pè woo- kè 'wii- dɔ, -a -gen -mü -dhe -wu 'ö -wɪ bha -wa -ma, "kɛɛ 'wii me 'bha yö.

⁸'Yö Sɔdhö -yö =wli "sia- 'yö ö "yan "dhiü -pu, "kɛɛ 'yii -dhe yö. 'Yö 'wo- kun- -kɔ -bha 'wo dho- 'ka Damasö 'plöö. ⁹-Yö -dhekpɔɔyi -yaaga -kè mü kö 'yaa -dhe yö, 'yaa pè 'bha -bhö, 'yaa müpè 'bha mü.

¹⁰'Dhang -bho Yesu "dhiü -me do bha 'wo- -dhe Ananiasö -yö -gun Damasö -pö bha- 'gü. 'Yö kwa Dëme -ya "yan 'gü -pu, 'yö- yö, 'yö- pö- -dhe: «Ananiasö!» 'Yö Ananiasö -ya pö: «-Yoo, 'ma "wɪ, n Dëme!» ¹¹'Yö kwa Dëme -ya pö- -dhe: «-Bhö "wli kö 'i 'dho -kpinnɔɔ 'wo- -dhe -kpinnɔɔ 'ö dɔ veedhö bha- -ta kö 'i 'dho 'i -da Zuda -gɔ 'kɔɔdhö, gɔɔn- 'ö go Taasö -pö 'gü 'wo- -dhe Sɔdhö bha- mɔɔ- -dhe 'gü! -Yö bhɛa" sië n -dhe 'kɔɔdhö mü. ¹²'Yö- "yan 'gü 'dhö -da -sü 'ka bhii Ananiasö -mɛ i 'ka kö 'bha -da -gɔ 'kɔɔdhö kö 'bha i -kɔ kpa- -ta kö -yö -dhe yö -deewo.» ¹³'Yö Ananiasö -ya -yɔ bɔ 'ö- pö: «N Dëme, me 'gbɛ =wa 'wɔn -nu 'ö -gban gɔndënë bha- -bha -a -gen dɔ n -dhe, 'wɔn yaa -nu 'ö- -kè i -bha mɛ -nu 'wo Zedhizadhemö -a -nu 'ka =waa- =gban pö n -dhe -wa! ¹⁴-A -nu yö -sü bha 'zü -yö -nu faan 'ö "saabhomé -nu -gɔme "gblüglü -nu -wa nu- -dhe bha =në- 'ka kö -yö 'me 'wo =bhɛa i 'tɔ 'gü -a -nu 'kun kö -ya -nu -da -kaso 'gü =zɔɔ -wa! (I- pö 'a 'dho mü -ee?) ¹⁵"Kɛɛ 'yö kwa Dëme -ya pö Ananiasö -dhe: «-Bhö 'dho =zɔɔ,

-a -gen -mü -dhe 'ma 'me bha- 'sü ma yëkëme 'ka kö 'a- bɔ "segɔ "weɛ -nu 'ö- 'gü -me -nu 'waa Zuifö 'ka waa- -nu -bha -gblüdë -nu waa- Izraëdhö -se 'gü -me -nu "piü kö -yö n -wɔn -dhiang zë- -nu -dhe. ¹⁶-A -wëëdhë -nu dho bho- -kɔ -nu 'ö- 'gü n 'tɔ -wɔn 'gü, mang =dede a -dho -a pö- -dhe.»

¹⁷'Yö Ananiasö -yö =wli 'ö dho 'yö -loo 'kɔ bha- 'gü, 'yö 'ö -kɔ kpa Sɔdhö -ta 'yö- pö- -dhe: «Sɔdhö n dheebhang, kwa Dëme Yesu 'ö 'ö -dɔ -zɔn i -dhe zian -ta kö i nu sië bha =në n bɔ i "piü 'pö kö 'i -dhe 'yö 'zü -deewo kö i pa 'Nii- 'slüüslü 'ka.»

¹⁸-Yö -to -dhe do bha- 'gü, 'yö pë 'bha -nu 'wo -kë -dhe 'yuü- "këɛ 'dhö 'wo go Sɔdhö "yan -bha 'wo =wɛnng "sia-, 'yö -dhe 'yö, =dhe 'ö =ya kë 'dhü, 'yö 'wo- -bɔ Yesu 'ka -zu bho. ¹⁹=Dhe 'ö =ya kë 'dhü 'yö Sɔdhö -yö pë -bhö, 'yö- faan -sɛa -yö -da 'gü. 'Yö waa- 'dhang -bho Yesu "dhiü -me -nu 'wo mü bha 'wo -dhekpacyi kpö -kë wo 'ko "piü Damasö mü. ²⁰-Yö -to -dhe do bha- 'gü 'ö zun Atanna -wu pö -sü -bha Zuifö -nu -bha -yakwëëkëgüko -nu 'gü 'ö- pö: «Yesu bha Atanna Gbö -mü.» ²¹Me "pɛpɛ 'wo- -wu bha- ma 'yö- 'wɔn -ya -nu kɔn 'yö 'wo- pö: «Gɔɔn- ya 'yaa mü 'ö gun 'me 'wo -bhea Yesu 'tɔ 'gü -a -nu 'kun sië 'ö- -nu -wëëdhë bho -kɔ -ziisü -kë ya -ee? Nu 'ö- wo ya 'zü 'yii nu kö -ya -nu 'kun kö -yö 'dho- -nu 'ka "saabhome -nu -gɔme -nu -dhe -ee?»

²²"Këɛ kö Sɔdhö -zë -yö 'ö -bha Atanna -wu =në- pö sië 'ö faan 'ka -kpeawo 'ö Zuifö -nu 'wo Damasö -a -nu zuë" =kaan- 'ka "kwëë 'ö dho- 'ka, 'ö =yaa- pö Yesu =në Atanna -bha -Yame 'ö- -ya bha- 'ka, 'ö 'pë woo- pö- -dhe 'waa- dɔ.

²³=Dhe 'ö -dhekpacyi kpö =ya ziö, 'yö Zuifö -nu 'wo -ziö wo 'ko "piü kö 'wo Sɔdhö zë. 'Yö- -nu -wu -yö to- -bha do, ²⁴"këɛ 'yö me 'bha -nu 'wo Sɔdhö -kpac "slë 'ö Zuifö -nu 'wo- kë sië bha- 'ka. Me -nu -wo wo "yan -to "saan 'wo- -kan 'pö- -zü bha- "dhi -bha 'yënnng- 'gü waa- gbeng -nu -gban 'gü kë "dhü kö =ya kë -dua -pë 'ka, kö 'wa- 'kun 'wo- zë.

²⁵=Dhe 'ö =ya kë 'dhü 'yö 'me 'wo 'dhang bho Yesu -wɔn "dhiü Sɔdhö -wu "dhiü bha 'wo- "slë =mɔɔ- -bha gbeng, waa- Sɔdhö -nu 'dhö, 'yö 'wo- -da "gblü 'gü, 'yö 'wo bhiëga dɔ- -bha 'wo- =lɔɔ "saan ('ö gun -klëën -sü 'kaa 'pö- bha- -zü bha-) =zlöö 'yö dho.

Sɔdhö -bha -loo Zedhizadhëmö -kɔ

²⁶=Dhe 'ö Sɔdhö =ya 'dho =ya -loo Zedhizadhëmö, 'yö "slë =mɔɔ- -bha kö 'ö 'dho 'dhang -bho Yesu "dhiü -me -nu kpö 'gü, "këɛ -wo -gun "suü sië- -gɔ, -a -gen -mü -dhe 'wii 'dhang bho Sɔdhö -bha -kë 'dhang -bho Yesu -wɔn "dhiü -me 'ka -sü bha- "dhiü. ²⁷'Yö Baanabasö -yö -da -dhe "dhiü 'yö 'wo dho Yesu -bha yëkëme -nu -dhe 'gü. 'Yö -kɔ 'ö kwa Dëme -yö 'ö -dɔ -zɔn 'ka Sɔdhö -dhe Damasö -zian -ta waa- 'ö dhiang -nu 'ö- zë- -dhe bha Baanabasö -ya -gen dɔ- -nu -dhe. 'Yö -kɔ 'ö Sɔdhö -yö dhiang zë- 'ka -zugbandhe 'ka Yesu 'tɔ 'gü Damasö -me -nu -dhe bha- -gen dɔ- -nu -dhe 'pö.

²⁸-Dhe 'ö -ya kë "dhü, 'yö Sɔdhö -yö -da -a -nu -bhiëë 'gü, 'yö weng- -nu 'wo -ziö Zedhizadhëmö -pö 'gü -dhe -gban "pepe 'gü kö -yö kwa Dëme -bha -nɔɔ -së bha- dɔ sië ö -ta "puu 'ka. ²⁹'Yö dhiang zë 'pö Zuifö -nu 'wo glëkö -wu pö bha- -nu -dhe, 'yö 'wo zaadhe -nu -da, "këë 'më 'wo bha -wo -gun "slë mɔɔ- sië- -bha kö 'wo- zë.

³⁰-Dhe 'ö- dheebhang -nu 'wo -kë Yesu -bha më 'ka bha -waa- ma -dhe woo- zë, 'yö 'wo dho- 'ka Sezadhe -pö 'gü 'yö 'wo- bɔ Taasö -pö 'ö- 'kpɔ -pö 'ka bha- 'gü.

³¹Zuëyagblüö- -yö -gun Atanna -bha 'kɔdhigümë -nu 'wo Zude -dhe -nu, Gadhidhe -dhe -nu waa- Samadhi -dhe -nu 'gü bha- -nu -gɔ, 'ö faan 'dhö -kë -a -nu -gɔ =dedewo, 'ö 'wo wo -bha -toseadhe -nu -kë kwa Dëme -bhlëë -ya -sü 'ka. 'Ö 'Nii- "slüöslü -bha -a -nu -ta 'kun -sü -wɔn 'gü, 'ö Atanna -bha më -nu -wo -da "dhiü -kpɛawo 'ö dho- 'ka.

Gɔndënë do 'wo- -dhe Ene -a -kë "klüöklü -kɔ

³²-A "töng bha- 'gü, Piëdhö -gun =nië sië "së 'gü -dhe -gban "pepe 'gü. Yi do 'ka 'yö dho 'dhang -bho Yesu "dhiü -më -nu 'wo Dhida -pö 'gü bha- -nu -dhe 'gü.

³³'Yö -kpan gɔndënë do 'wo- -dhe Ene bha- -bha kö- 'gü 'yaa -së, kö -yö wɔ sië sëë" -ta, "këë kö "trüün -yua =yaa- kë -kwe "saaga 'ka. ³⁴'Yö Piëdhö -ya pö- -dhe: «Ene, Yesu Klisi =ya i kë "klüöklü! -Bhö "wlü kö 'i i -bha sëë" -be kë!» Ene -to mü 'ö =wlü. ³⁵-Dhe 'ö 'më 'wo Dhida -pö bha waa- Saadhong -së -nu 'gü 'wo- yö, 'yö 'wo wo zuë" =slëë, 'yö 'wo 'dhang bho Yesu -wɔn "dhiü.

Dɔɔkasö -bö -kɔ

³⁶Dhebhɔnë do 'ö 'dhang bho Yesu -wɔn "dhiü 'wo- -dhe Tabita, "këë 'ö glëkö -nu 'wo- -dhe Dɔɔkasö ('ö =waa- pö "dhü Adhameen -wu 'gü kö -wa -pö =zloo bha), -yö -gun Zope -pö 'gü. -Yö -gun 'wɔn -sëkëdhe =dede 'ka, 'ö "flëeme -nu -ta kun. ³⁷-A "töng bha- 'gü 'yö 'yua 'dhö -pö -ta, 'yö ga.

=Dhe 'ö =waa- =gee "zu, 'yö 'wo- wɔ 'kɔdhi do 'gü 'kɔ -ta "dhüng 'gü.

³⁸'Yö 'dhang -bho Yesu "dhiü -më -nu 'wo Zope 'wo- ma -dhe Piëdhö -yö Dhida -pö 'ö Zope -dhe "sɔɔ mü bha- 'gü. 'Yö 'wo më =plë bɔ Piëdhö -dhe -dhe 'gü 'wo- pö: «Yi -bhea i -dhe kö 'i zun yi -dhe 'gü "vaandhö!»

³⁹-Dhe 'ö =waa- pö Piëdhö -dhe "dhü, -yö -to -dhe do bha- 'gü 'ö -ziö -nu -keng- 'wo dho. =Dhe 'ö =wa =loo Zope -pö 'gü, 'yö 'wo dho Piëdhö 'ka 'kɔdhi 'ö 'kɔ -ta "dhüng 'gü bha- 'gü, kö =geandhe -nu -wo =yɔɔn sië- -bha "gbu 'ka, 'ö 'wo "bhëë -nu 'wo- -da "bhëë =wlöö waa- =gbauu- -nu 'ö Dɔɔkasö -ya bɔ kö -yö -tun =kö ziö ö -gen "dhiü bha- -zɔn -dhe. ⁴⁰'Yö Piëdhö -yö më =gban "pepe zun "kpenng, 'yö zun ö kpiö 'gü 'yö =bhea Atanna -dhe, 'yö ö wë =slëë më =gee bha- -zian 'ka 'ö- pö: «Tabita, -bhö "wlü!» 'Yö më =gee bha 'ö ö "yan "dhiü -pw. =Dhe 'ö =ya Piëdhö yö, 'yö =wlü 'ö -ya ö -gean. ⁴¹'Yö

Piedhö -yö ö -kɔ -da -kwɛɛ- 'yö- dɔ -gɛan, 'yö -gɛandhe -nu waa- 'dhang -bho Yesu "dhiü -mɛ -nu 'wo to 'ö 'wo -ya -sü 'ka -dɪ -wɔn "dhiü Atanna -bha 'ka bha- -nu -dhe 'kɔ bha- 'gü, 'yö dhebho 'ö ga bha- -zɔn -a -nu -dhe kö -ya -bö.

⁴²Wɔn bha 'yö 'wo- ma Zope -pö 'gü -dhe -gban "pepe 'gü, 'yö mɛ 'gbe -dhe 'wo 'dhang bho kwa Dɛmɛ -wɔn "dhiü.

⁴³Piedhö -yö -to Zope -pö 'gü pinngdhö wükwi -yëkɛmɛ do 'bha 'wo- -dhe Simɔ bha- -gɔ 'kɔadhö.

Piedhö -bha -da Kɔɔnei -gɔ 'kɔadhö -kɔ

10 ¹Gɔndënë do- -gun 'pödhɛ 'bha 'wo- -dhe Sezadhe bha- 'gü 'wo- -dhe Kɔɔnei, -yö -gun Wɔmö "sɔdha këng do -gɔmɛ 'ka 'sɔdha kpö 'ö go Itadhi -sɛ 'gü bha- 'gü. ²Gɔndënë bha waa- ö -bha 'kɔɔmɛ -nu -gban "pepe -wo -gun -suü Atanna -gɔ mɛ 'ka 'ö 'wo- -bhlëë -ya, 'yö Zuifö "flɛesü -nu 'wo "sɛ bha- 'gü -a -nu -ta kun =dedewo, 'yö -bheɛ Atanna -dhe 'yö- 'gü 'yaa ga.

³Yi do 'ka kö 'yënnɛ- =ya 'kpɔ mɛ -gɔ 'ka, (Zuifö -nu -bha -bheɛ Atanna -dhe "töng 'ka), 'yö gɔndënë bha- "yan 'gü 'dhö -da. -A "yan 'gü 'ö -da bha 'yö Atanna -bha "kië do yö "pɛpɛdhö -sɛ 'ka kö =ya -da ö -gɔ 'kɔadhö 'yö- pö- -dhe: «Kɔɔnei!» ⁴Yö Kɔɔnei -ya -ga pinngdhö 'yö "suü 'dhö -da 'gü 'yö- pö: «Kwa ma 'mü, n Dɛmɛ?» 'Yö Atanna -bha "kië -ya pö- -dhe: «Atanna =ya i -bha bheɛ" -wu ma, i -bha "flɛmɛ -nu -ta 'kun -sü bha =yaa- -zu 'kun. ⁵-A -kë "dhü -sü bha- 'gü, -bhö mɛ bɔ Zope -pö 'gü kö -wa pö gɔndënë do 'wo- -dhe Simɔ 'wo- 'tɔ kpɔ Piedhö bha- -dhe kö -yö nu. ⁶-Yö wükwi -yëkɛmɛ 'wo- -dhe Simɔ, 'ö- -bha 'kɔ- dɔ =weeyi "sɔɔ bha- -gɔ 'kɔadhö.»

⁷-Dhe 'ö Atanna -bha "kië 'ö dhiang zë- -dhe bha =ya 'dho, 'yö Kɔɔnei -yö ö -bha gwëzë -nu =plɛ waa- -dɪ -bha "sɔdha do 'ö Atanna -bhlëë -ya 'pö, 'ö -kë "sɔdha kpö 'dhe 'ö Kɔɔnei -dɪ -bha 'ka -a 'gü bha- -nu -dhe.

⁸Yö 'wɔn "pepe 'ö -kë bha- =gban -gen dɔ- -nu -dhe, 'yö- -nu bɔ Zope.

⁹-A -dhekpɔyɪ 'dhe 'ö dɔ- "piü kö 'mɛ 'wo bha -wo -tun zian -ta, "kɛɛ kö =wa =yɔɔn Zope -pö "sɔɔ 'yënnɛ- =ya mɛ -gɔ =zinng 'gü "töng -bha, 'yö Piedhö -yö -da 'kɔ -ta "dhöng 'gü, (-a -gen -mü -dhe -a 'kɔ bha- -ta "dhöng 'gü -dhe -yö -gun 'gbeɛ 'ka -sɛ 'ka). -Yö -dho "dhü kö 'ö bheɛ" Atanna -dhe mü. ¹⁰-Yö -to -dhe bha- 'gü 'yö din- =ya kun. =Dhe 'ö 'mɛ 'ö- -nu -gɔ 'kɔadhö bha =wa zun- -bhö pɛ -kpa -sü -bha, 'yö Piedhö "yan 'gü -yö -da. ¹¹'Ö dho -dhe -ga kö dhang- "dhi =ya "pu, kö pɛ 'bha -yö 'go sië 'mü 'ö -lɔɔ. 'Pɛ 'ö bha -yö -kë =dhe sɔ 'kpɪi- suu 'bha 'ö- "zɔ -yiisiö =gban 'wo mɛ -kwɛɛ- -a 'dhö, kö -yö lɔɔ- sië 'ö go dhang- 'gü. ¹²-Kwɫaa -ta -wü -nu waa- "siapɛ -nu waa- -maa suu =gban "pepe -wo -gun sɔ bha- 'gü, ¹³Yö- "tv 'dhö -da -wu do bha 'gü kö -ya pö sië: «Piedhö, -bhö "wɫü kö 'i- 'bha zë 'i- -bhö!» ¹⁴Yö Piedhö -ya pö: «-Abin, n Dɛmɛ! 'Pɛ 'ö Zuifö -nu yi -bha 'tɔng- =ya pö 'ya 'dho- -bhö

'mii- 'bha -bhö do!» ¹⁵Yö -wu do bha 'ö- pö 'zü- -dhe -deewo 'ö- pö: «'Pë 'ö Atanna -yaa- pö -yö -së -bhöpë 'ka, bhi -zë 'bha 'dho- pö -yö 'ya-!» ¹⁶Wa -pö "dhü -genyan 'ka -yaaga, 'yö 'pë bha 'ö ö yee -kë 'ö dho dhang- 'gü.

¹⁷Piedhö -to ö -zu 'gɔn -sü -bha -a "yan 'gü 'ö -da bha- 'klɔɔ- 'ka, 'yö Kɔɔnei -bha 'me 'ö- -nu bɔ bha 'wo -da 'plöö 'pö, 'yö 'wo -ya Simɔ -bha 'kɔ -dhe mɔɔ- -sü -bha kö -wo mɛ -nu dhɛɛ' -nu 'kpɔ sië. 'Yö 'wo dho 'wo -loo Simɔ -bha 'kɔdhi "dhiü, ¹⁸'yö 'wo- 'kɔ dëme -dhe 'wo- dhɛɛ' kpɔ 'wo- pö: «Simɔ 'wo- -dhe Piedhö bha -yö 'kɔ ya =në- 'gü -ee?»

¹⁹Piedhö -to ö -zu 'gɔn -sü -bha -a "yan 'gü 'ö -da bha- 'klɔɔ- 'gü, 'yö 'Nii- "slüüslü -ya pö- -dhe: «-Bhö -dhe -ga, mɛ -yaaga -wo i mɔɔ- sië, ²⁰-bhö "wlü kö 'i zun "sia- kö keng- -nu 'ka 'dho, "sika 'ya 'dho kë i 'gü, -a -gen -mü =dhe ma =në 'a- -nu bɔ!»

²¹=Dhe 'ö =ya kë "dhü, 'yö Piedhö -yö go 'kɔ -ta "dhüng 'gü, 'yö- pö 'me 'wo bha- -nu -dhe: «Ma =në 'ka n mɔɔ- sië bha, 'kwa ma mü?» ²²Yö 'wo- pö- -dhe: «"Sɔdha -gɔmɛ Kɔɔnei =në yi bɔ, -yö -kë 'mɛ 'ö pö 'aa- -bha, 'ö Atanna -bhlëë -ya =dedewo -a 'ka, Zuifö -nu =gban "pepe -wa 'tɔ -së pö. 'Yö Atanna -yö ö -bha "kië do bɔ- -dhe kö -ya pö i -dhe kö 'i nu 'i dhiang zë- -dhe kö -yö ö "tu 'to- -bha.»

²³Yö Piedhö -ya -nu =yëë bho 'yö 'wo -wɔ mü.

=Dhe 'ö -dhe =ya =kpaɔ, 'yö waa- Piedhö -nu 'wo -da zian -ta. 'Yö 'dhang -bho Yesu "dhiü -mɛ -nu 'wo go Zope mü 'wo dho Piedhö dɔ, 'yö 'wo dho 'wo -loo Sezadhe -pö 'gü.

²⁴'Wo dho -wo -loo Sezadhe -a -tadhekpaɔ -ta. 'Ö "dhü bha kö Kɔɔnei =ya ö dëbhang -nu 'bha -nu waa- "taɔngdë =dede -nu -dhe kö -wo -ya sië Piedhö -gɔ.

²⁵=Dhe 'ö Kɔɔnei =ya Piedhö yö kö -yö -da sië 'kɔɔdhö, 'yö dho- -gɔ zian-, 'yö "gblëënu- =wlöö. ²⁶"Kɛɛ 'yö Piedhö -yö ö -kɔ -da 'gü, 'yö- pö- -dhe: «-Bhö "wlü, mɛ -mü n 'ka 'pö =dhe i 'dhö!» ²⁷Yö zun dhiang -zë Kɔɔnei -dhe -sü -bha 'yö 'wo dho 'wo -da 'ka 'kɔɔdhö, 'yö -kpan 'pö mɛ kpö -bha mü ²⁸'yö- pö- -nu -dhe: «Kaa =dede ka- 'wɔn -dɔ =dhe 'ö Zuifö -nu wɔ -kɔ 'gü 'waa -da 'mɛ 'waa Zuifö 'ka- -nu -gɔ 'kɔɔdhö, "ɛɛn 'waa =nëng- -nu -bha, "kɛɛ Atanna -ya -zɔn n -dhe =dhe 'ma 'dho mɛ 'bha -ga pë yaa 'ka 'zü 'ö 'a -kan -bha. ²⁹'Wɔn 'ö- -wɔn 'gü 'yö n -dhe 'ka- wo bha "sika bha 'yii -da n 'gü 'yö 'a nu bha 'yö bha. =Dhe 'ö "dhü 'kwa- ma yö?»

³⁰Yö Kɔɔnei -ya pö: «-A -dhekpaɔyi -yiisiö -naa =nɛ, -a "tüng =dede =në 'kwa dɔ- 'gü ya, kö a bhea' sië Atanna -dhe n -gɔ 'kɔɔdhö, 'yö n "yan 'gü 'dhö -da 'yëng- -kpɔ slöö' bha- 'ka, 'a dho -dhe -ga kö gɔndënë do 'ö sɔ 'bhü bho -sü 'dhö- -bha -yö dɔ sië n wëëdhö mü ³¹'yö- pö n -dhe: «Kɔɔnei, Atanna =ya i bhea' -wu ma, i -bha "flɛɛmɛ -nu -ta 'kun -sü bha =yaa- -zu 'kun. ³²=Dhe 'ö "dhü, -bhö mɛ bɔ Zope kö 'mɛ 'wo- -dhe Simɔ 'wo- 'tɔ -ya -ta -dhe Piedhö bha -yö nu. -Yö Simɔ 'dhe 'ö -kë wükwi -yëkëme 'ka bha- -gɔ 'kɔɔdhö =weeyi "dhiü.» ³³'Wɔn 'ö -kë 'yö 'a mɛ bɔ i -dhe vëëdhö bha 'yö

bha. =Dhe 'ö 'bha nu -zë wo kö =ya kë -së. =Dhe 'ö "dhü kö me -gban 'kwa bho 'ko -ta Atanna wëëdhö -së kö 'pë 'ö- do i 'dhi 'i- pö yi -dhe.»

**Dhiang 'ö Piedhö -ya zë Kɔɔnei -gɔ 'kɔɔdhö waa- 'me
'waa Zuifö 'ka -a -nu -bha 'Nii- "slüüslü -slɔɔ -kɔ**

³⁴'Yö Piedhö -yö dhiang zë -sü zü bho- -nu -dhe 'ö- pö: «Ma- 'wɔn do -tɔn -dhe Atanna 'yaa me -zë 'gü kë 'zü -taamasü ya- 'gü kö -yö ö -bha dhasü nu- -me -dhe. ³⁵"Kee me "ʊʊ me 'ö go "se "ʊʊ "se 'ö- 'gü 'ö- -bhlëë -ya, 'ö 'wɔn -nu 'ö pö 'aa- -bha -a -kë, -a -me -dho -ya -kë. ³⁶-Wu 'dhe 'kö Atanna -ya bo Izraëdhö -me -nu -dhe bha yö -zë ka- -do. Naɔ -së 'ö -gban zuëyagblüü- 'ö Atanna -ya kë waa- me "bhu- -nu wo =zinng 'gü -a -bha bha -yö -bo 'ka Yesu Klisi -në- -ta 'yö- -kë. Yesu Klisi bha =në me "bhu- -gban "pepe -kɔɔnme 'ka. ³⁷'Wɔn -nu 'wo -kë Zude -se "pepe -gban 'gü, "kee 'ö- zü -yö bho Gadhidhe kö Zan =ya me -go 'wɔn yaa 'gü -zu bho -sü -dhiang zë bha ka- -nu -do. ³⁸-Kɔ 'ö Atanna -yö ö -bha 'Nii- "slüüslü waa- -bha 'gügbudhe nu- 'ka Yesu 'ö go Nazadhetö bha- -dhe bha ka- -do 'pö. 'Ö go mü 'zü -kɔ 'ö Yesu bha 'ö -nië- 'ka kwa -bha "se ya- 'gü 'wɔn -së kë -sü waa- 'me 'wo Sɔtraan -gɔ -dhuëndhe 'gü -a -nu -bha 'yua -bho -a -nu -bha -sü -nu 'ka 'pö- -nu 'gü 'dɔɔndhö bha ka- -do! 'Wɔn -nu 'ö- -kë "dhü bha- -gen -mü -dhe Atanna -yö -gun "piü. ³⁹Pë "pepe 'ö- -kë Zedhizadhëmö -dhe waa- Zuifö "segɔ 'dhe -nu 'wo to -a -nu 'gü, yi- "see- 'ka, "kee 'yö 'wo- zë -a -do "dhü -bha -sü 'ka. ⁴⁰'Yö Atanna -ya bho ga 'gü -a -dhekpɔyi -yaaga -naa 'ka, 'yö 'gügbudhe nu- -dhe kö -yö ö -dɪ -zɔn me -nu -dhe -dhe ö "yaandhe 'ka, ⁴¹"kee Atanna 'yii "wɪ- -bha -a -gɔ kö -yö ö -dɪ -zɔn "següme -nu -gban -dhe kö 'yii kë 'me 'ö yi sü -blëesü 'ö yi -ya -dɪ -ta kö 'yi kë- "see- 'ka bha yi 'ka. =Dhe 'ö =yaa- bho ga 'gü "dhü, yi -bhöpë -nu -bhö 'yi müpë -nu mü yi 'kwëë-. ⁴²'Yö- pö yi -dhe 'yi 'wɔn -taɔng -së pö Zuifö -nu -dhe kö 'yi- pö- -nu -dhe 'zü -dhe yö -në Atanna -yö ö -ya kö 'ö za do "yaanme -nu 'wo "kɔpɔng -taa yö waa- =geebɔɔme -nu -bha. ⁴³Yesu bha 'wɔn 'ö -gban -bha, Atanna -wudhiüloomë -nu -gban "pepe -wa -dhiang -zë 'wo- pö =dhe, me "ʊʊ 'me 'ö =ya 'dhang bho- "dhiü, kö =ya ö -bha 'wɔn yaa -nu -mawɔn 'to -sü -slɔɔ Atanna "piü -a 'tɔ 'gü.»

⁴⁴Piedhö -yö -to dhiang bha- zë -dhe 'gü, 'yö 'Nii- "slüüslü -yö -lɔɔ me "pepe 'wo gun wo 'tu to sië- -wu -bha bha- -nu -ta. ⁴⁵Zuifö -nu 'wo 'dhang bho Yesu "dhiü 'ö waa Piedhö -nu 'wo nu bha -dhe 'ö =wa 'wɔn bha- -dhe yö, -a 'wɔn -ya -nu kɔn -dedewo Atanna -bha 'Nii- "slüüslü bha lɔɔ- 'ö- wo 'me 'waa Zuifö 'ka- -nu -ta bha- -wɔn 'gü. ⁴⁶-A "töng bha- 'gü kö -wu -dee -nu 'ö 'waa- ma -wa pö sië, kö -wo Atanna 'tɔ bho sië- -bha -kë 'kpiisü -wɔn 'gü.

⁴⁷=Dhe 'ö =ya kë "dhü 'yö Piedhö -ya pö ö "tayɔɔ -nu -dhe: «Me =wa 'Nii- "slüüslü =slɔɔ -dhe kwa 'dhö ya, kwa -dho -kɔ -a -nu -dhe -bo Yesu 'ka -zu bho -sü -ta -ee?» ⁴⁸=Dhe 'ö =ya kë "dhü 'yö- pö- -nu -dhe -wa -nu -bo Yesu 'ka -zu bho -a 'tɔ 'gü. 'Yö 'wo- -nu -zu. 'Yö 'me 'wo bha 'wo- pö Piedhö -dhe -yö -dhekpɔyi 'në 'bha kë wo "piü mü, 'yö Piedhö -yö -wɪ -bha.

**Piedhō -bha ö këwɔn bha- -gen -dɔ 'dhang -bho Yesu
"dhiü -me -nu 'wo Zedhizadhemö -a -nu -dhe -kɔ**

11 ¹Dhe 'ö Yesu -bha yëkëme -nu waa- 'dhang -bho "dhiü -me -nu 'wo Zude -se 'gü =waa- ma -dhe 'me 'waa Zuifö 'ka -a me 'bha -nu =wa 'dhang bho Atanna -wu "dhiü, ²'ö Piedhō -ya ö yee kë -ya nu -ya -loo Zedhizadhemö 'plöö, 'yö Zuifö -nu 'wo -to Yesu Klisi "piü -me -nu 'ka mü bha 'wo -ya -a pö -sü -bha Piedhō -dhe 'wo- pö: ³«-Da 'i- wo 'me 'waa yi suu 'gü -me -nu 'ka -a -nu -gɔ 'kɔɔdhö 'ö 'ka pë -bhö ka 'kwëë- bha 'yii yi -zu 'kun tongtongdhö!» ⁴'Yö Piedhō -yö 'wɔn bha- -gen dɔ- -nu -dhe "pɛɛpɛdhö 'ö go- zübhodhe -bha 'ö dho 'ö zun- 'ka- "dhiütodhe -bha 'ö- pö: ⁵«N dheebhang -nu, a -gun Zope -pö 'gü kö a bhea" sië Atanna -dhe, 'yö n 'yan 'gü 'dhö -da, 'yö 'a pë 'bha 'yö kö -yö nu sië n "tüng 'ka, 'pë bha -yö -gun -dhe sɔ 'kpii- bha 'ö- "zɔ 'yiisio =gban 'wo me =kwɛɛ- -a 'dhö kö -yö 'go sië dhang- 'gü 'ö =yɔɔn n "sɔɔ. ⁶'A -dhe -ga 'pë bha- 'gü "senngdhö, kö =kwlaa -ta -wü -nu, "bü -wü -nu, "siapë -nu waa- -maa -nu -a -nu =gban "pɛpɛ suu -yö 'pë bha- 'gü. ⁷'Yö n "tu 'dhö -da -wu do 'bha 'gü kö -ya pö sië n -dhe: «-Bhö "wli, Piedhō, kö 'i- 'bha zë 'i- -bhö!» ⁸'Yö 'a- pö: «-Abin, n Dëme, 'pë 'ö 'yii- 'tɔng- -ya pö 'ya 'dho- -bhö 'mii- 'bha -bhö do!» ⁹'Yö -wu do 'bha -yö go dhang- 'gü 'zü 'ö- pö n -dhe: «'Pë 'ö Atanna =yaa- pö -yö -së kö -wa -bhö, bhi -zë 'bha 'dho- pö- -bha -yö 'ya-!» ¹⁰'Wɔn bha -yö -kë "dhü -genyan 'ka -yaaga, 'yö pë -nu bha 'wo wo yee -kë 'wo dho dhang- 'gü.

¹¹-A "tüng -dede bha- 'gü, 'yö me -yaaga 'wo- -nu bɔ n -dhe -dhe 'gü 'wo go Sezadhe bha 'wo -loo 'kɔ 'a gun- 'gü bha- "dhi "dhiü. ¹²'Yö Atanna -bha 'Nii- -ya pö n -dhe -dhe yeng -nu 'yi 'dho, 'sika 'ya 'dho kë n 'gü. 'Yö kwa dheebhang -nu "saado 'ö yeng- -nu 'yi nu ya 'wo -da n "piü, 'yö 'yi dho Kɔɔnei -gɔ 'kɔɔdhö Sezadhe -pö 'gü. ¹³'Yö -kɔ 'ö Kɔɔnei -yö Atanna -bha "kië 'yö- 'ka 'ö -gɔ 'kɔɔdhö, 'yö- -gen dɔ yi -dhe 'ö- pö. 'Yö Atanna -bha "kië bha 'ö- pö n -dhe: «-Bhö me bɔ Zope, Simɔ 'ö- 'to -ya -ta 'dhö Piedhō 'ka bha- -dhe kö -yö nu! ¹⁴Kö -wu -nu 'ö kaa- i -gɔ 'kɔɔme -nu 'ka dho bɔ- -ta 'ka dha bha -ya pö i -dhe!» ¹⁵-Dhe 'ö 'ya 'dho 'ya -loo mü, 'ö 'ma dhiang zë -sü zü bho, 'yö 'Nii- 'slüüslü -yö -lɔɔ- -nu -ta -dhe -kɔ do 'ö -lɔɔ- 'ka kwa -ta zübhoyi 'ka bha- 'dhö. ¹⁶'Yö n -zu -yö -bö kwa Dëme -wu 'ö- pö -dhe: «Zan -zë -yö me -zu 'yi -në- 'ka, "kɛɛ ka -zë ka -dho pa 'Nii- 'slüüslü -në- 'ka bha- 'ka. ¹⁷Atanna -yö gbaodhe do bha- -kë -a -nu -gɔ 'pö -dhe -kɔ do 'ö- -kë 'ka yi -gɔ kö 'ya 'dhang bho kwa Dëme Yesu Klisi "dhiü bha- 'dhö. -Ya kë 'dhü ma -zë a -dho pö Atanna -dhe 'ya 'dho kë 'dhü -ee?»

¹⁸-Dhe 'wo -wu -nu bha- ma, 'yö -dhe -yö ga- -nu -ta, 'yö 'wo -ya Atanna 'tɔ bho -sü -bha -dhe: «-Ya "wɔ- -bha kö 'me 'waa Zuifö 'ka -wo wo zuë" slëë- ö "piü, kö -wo -tosea 'ö- "dhiütodhe 'yaa 'dhö -a -slɔɔ 'pö.»

-Bhea Atanna -dhe -sü zü -bho Angtɔsö -kɔ

¹⁹"Tüng 'wo -to Yesu "piü -me -nu -wëédhe bho- 'ka, 'ö 'wo Etienö zë- 'ka bha 'dhang -bho Yesu "dhiü -me -nu -wo -pɛn "se 'gü "tüng bha =në- 'gü,

'yö- me 'bha -nu -wo dho -ya Fenisi -se -nu, Siplë -se -nu waa- Angtiosö -pö -nu 'gü, 'yö 'wo -ya Atanna -wu pö -sü -bha me -nu -dhe, "këe -wa -pö Zuifö -nu -du -slɔɔ =në- -nu -dhe. ²⁰'Yö 'dhang -bho Yesu "dhiü -me -nu 'do 'do 'wo gun Siplë -dhe waa- Sidhenö -dhe -nu 'gü 'pö bha 'wo dho Angtiosö -pö 'gü, 'yö 'wo naɔ -së 'ö -gban kwa Dëme Yesu -wɔn -bha bha- dɔ 'me 'waa Zuifö 'ka -a -nu -gɔ 'pö. ²¹Kwa Dëme -bha 'gügbudhe -gun -nu 'piü, 'yö me 'gbe -dhe 'wo 'dhang bho- "dhiü, 'yö 'wo wo zuë" -slëë- 'piü.

²²=Dhe 'ö Atanna -bha 'kɔdhigüme -nu 'wo Zedhizadhemö =wa 'wɔn 'ö "dhü bha- -taɔng ma, 'yö 'wo Banabasö bɔ Angtiosö. ²³=Dhe 'ö =ya 'dho =ya -loo mü, 'ö- "yan =ya -da 'wɔn -së 'ö Atanna -ya -kë 'me 'wo mü -a -nu -dhe bha- 'gü, -ya zuë" =nii -da =dedewo. 'Yö- -nu faan dɔ kö -wo wo -zu -gban -to kwa Dëme "piü -sü 'ö me zuë" =gban 'ka bha- -bha. ²⁴Banabasö bha -yö -kë 'me 'ö- këwɔn gun -së, 'ö pa -sü 'ka Atanna -bha 'Nii- waa- -zu -yö -a -dhe -sü 'ka -a 'ka. Me 'gbe -dede -wo ka wo zuë" -slëë kwa Dëme "piü pö- bha- 'gü.

²⁵=Dhe 'ö =ya kë "dhü, 'yö Banabasö -yö dho Taasö -pö 'gü kö 'ö Sɔdhö mɔɔ- mü. ²⁶=Dhe 'ö Sɔdhö yö, 'yö nu- 'ka Angtiosö 'yö weng 'wo -kwe do -kë mü Atanna -bha 'kɔdhigüme -nu 'wo mü bha- -nu "piü, 'yö 'wo- me 'gbe =draan 'wɔn -nu 'wo -gban -to Atanna "piü -kɔ -bha bha- -bha. -Dhe 'ö Angtiosö bha =në 'wo 'dhang -bho Yesu "dhiü -me -nu 'tɔ -bleesü kpɔ- 'gü 'wo- -nu -dhe «kletien -nu» (=waa- pö "dhü kö -wa -pö -to Klisi "piü -me -nu).

²⁷-A "tüɔng bha- 'gü 'yö Atanna -wudhiüloome -nu 'bha -nu 'wo go Zedhizadhemö 'wo nu Angtiosö. ²⁸'Yö 'me 'wo bha- me do 'wo- -dhe Agabusö, 'yö =wliü- -nu kpö 'gü mü 'ö dɔ 'ö -gean 'ö dhiang zë Atanna -bha 'Nii- "slüüslü -bha 'gügbudhe 'ka 'ö- pö: «-A yi 'yaa =gbleen 'zü kö "vüü- -da "kpungtaadhe -gban "pepe 'gü.» ('Yö- "vüü 'ö "dhü bha 'ö -da 'pö "tüɔng 'ö Klodö -yö gun- 'ka -gblüdë 'kpüi- 'ka bha- 'gü "dhü tean- 'ka.) ²⁹'Yö 'dhang -bho Yesu "dhiü -me -nu 'wo- pö wo -dho 'pë 'ö- -nu -kɔ dho =mɔɔ- -bha -a bho 'ko -ta kö 'wo- bɔ wo dheebhang -nu 'wo Yesu -bha me 'ka Zude -se 'gü bha- -nu -dhe. ³⁰'Yö 'wo- -kë -dhe -kɔ 'wo- pö- 'ka bha- 'dhö, 'yö 'wo pö bho 'ko -ta 'wo- dɔ Banabasö waa- Sɔdhö -a -nu -gɔ, 'yö 'wo dho- 'ka me zizi -nu 'wo -to Atanna "piü -me 'ka Zude -se 'gü bha- -nu -dhe.

Zakö zë -kɔ waa- Piëdhö -da -kaso 'gü Zedhizadhemö -kɔ

12 ¹-A "tüɔng do bha- 'gü, 'yö -gblüdë Edhodö -yö zun Atanna -bha 'kɔdhigüme -nu 'bha -nu -wëëdhe bho -sü -bha, ²'yö- pö -wo Zan dheebhang Zakö zë, 'yö 'wo- -gɔ -kan. ³=Dhe 'ö =yaa- 'wɔn dɔ =dhe Zakö zë -sü bha- 'gü -wɔn =ya dhi Zuifö -nu -dhe, 'yö Piëdhö kun 'pö. (-Yö -kë "dhü Zuifö -nu -bha =niidadhe 'wo- -dhe 'bluu- 'ö "seke 'yaa- -bha -a -bhö -ta =niidadhe bha- -ta.) ⁴=Dhe 'ö =wa Piëdhö 'kun, 'yö Edhodö -ya -da -kaso 'gü, 'yö "sɔdha -nu -kaɔng do ga "sɔɔdo sü, 'yö- -nu dan -yiisiö

-yiisiö, 'yö 'wo wo 'ko -ta kun Piedhö -maa kë -sü -bha, -a -gen -mü -dhe -yö -gun Edhodö 'piü -dhe Pakö -niidadhe bha =ya "kan, kö 'ö 'dho Piedhö 'ka "següme -nu -kuu "dhiü kö -wa zë -wɔn -ya 'kwëë-. ⁵-A -kë "dhü -sü bha -'gü "sɔdha -nu -wo -gun Piedhö -gɔ "dhiü -kaso 'kɔɔdhö mü, "kɛɛ kö Atanna -bha 'kɔɔdhigüme -nu -zë -wo bhea" sië Atanna -dhe -a -wɔn 'gü wo faan -gban 'ka "dhü -kpɛawo.

Piedhö -go -kaso 'gü -kɔ

⁶-Dhekpaɔyi 'ö Edhodö dho 'dho Piedhö 'ka "següme -nu -kuu "dhiü -'ka bha -'ka gbeng, kö Piedhö -yö yi zë sië "sɔdha -nu =ple 'wo wo "yan to -bha bha- -nu =zinng 'gü, kö -wo lɔɔga =ple -kplü -sü 'ka- -bha, kö "sɔdha 'bha -nu -wo 'kɔɔdhi 'wo Piedhö -da 'gü bha- "dhi "dhiü 'pö. ⁷'Wo dho "kan wo -ta kö kwa Dëme -bha "kië do =ya -wo "yɛa-, kö -dhepuudhe -ya -da 'kɔɔdhi bha- 'gü -dhe =gban "pɛpɛ 'gü, kö Atanna -bha "kië bha =ya 'pa Piedhö -bha =yaa- pö- -dhe: «-Bhö "wliü "vaandhö!» =Dhe 'ö- pö "dhü, 'yö lɔɔga -nu 'wo gun Piedhö -bha bha 'wo -kan, 'yö 'wo go- -kɔ -nu -bha. ⁸'Yö Atanna -bha "kië -ya pö Piedhö -dhe: «-Bhö kwi "pen -ya i -ta kö 'i i -bha -sabha -ya i -gean!» 'Yö Piedhö -ya -kë =dhe -kɔ 'ö- pö- 'ka- -dhe bha- 'dhö. 'Yö- pö 'zü- -dhe: «-Bhö i -bha =gbauu -da kö 'i nu 'ko 'dho!»

⁹'Yö Piedhö -yö ö -bha =gbauu- -da, 'yö -ziö Atanna -bha "kië bha- -keng-, 'yö 'wo go -kaso -kɔɔdhi bha- 'gü kö Piedhö 'yii 'dhang bho -kö- "dhiü -dhe 'wɔn 'ö kë sië bha tean- -mü. Kö -yö -tun -kö ö -zu 'gɔn -dhe ö "yan 'gü =në -da sië, ¹⁰'yö 'wo -ziö "sɔdha kpö -bleesü -ta, 'yö 'wo dho 'wo -ziö -a =ple -naa -ta, 'yö 'wo dho 'wo -wo -da -dhe 'kpii- 'ö- "kwɛɛ 'dhö -piö 'kpong 'ka -wo "kpenng -dhe 'gü bha- "dhiü, 'yö 'kpong bha 'ö -pu ö -dɪ kao -a -nu wëëdhö, 'yö 'wo zun "kpenng. =Dhe 'wo "ta sië -kpinngga do "piü, Piedhö dho "kan ö -ta kö Atanna -bha "kië bha =ya -dheng kö -ya 'to ö do 'ka.

¹¹'Yö Piedhö -yö gun -na -a 'wɔn dɔ =dhe 'ö "yan 'gü 'yii -da, "kɛɛ tean- -mü. 'Yö- pö: «'Ma- 'wɔn dɔ =tɔn -dhe n Dëme =në ö -bha "kië bɔ kö -yö n bho Edhodö -bha mɛ -dhe waa- 'wɔn yaa 'ö Zuifö -nu "piü 'wo- kë n 'ka bha- -gɔ =dedewo tean- 'ka!»

¹²=Dhe 'ö ö -dɪ -wɔn 'gü yö -së 'ka, 'yö -ziö 'ö dho Zan 'wo- 'tɔ -ya -ta -dhe Makö bha- dhe 'wo- -dhe Madhi bha- -gɔ 'kɔɔdhö. Mɛ 'gbe -wo -gun bhea" sië Atanna -dhe Piedhö -wɔn 'gü 'kɔ bha- 'gü. ¹³=Dhe 'ö Piedhö =ya 'dho =ya =loo mü, 'yö "kwɛɛ -ta -ma, 'yö gwëëdhe do 'wo- -dhe Dhodé bha 'ö -wo mü kö -ya -mɛ dɔ. ¹⁴'Yö Piedhö -wu dɔ. 'Wɔn bha- -dhidhe -kɔ yaa bha- 'gü, 'yii 'dho kö -yö "kwɛɛ -zë "pu =yën Piedhö -gɔ, 'yö dɔ -beang -bha 'ö dho- pö 'mɛ 'wo 'kɔɔdhö =në- -nu -dhe -dhe: «Piedhö =ya =loo 'kɔɔdhi "dhiü yö!» ¹⁵'Yö 'wo- pö- -dhe: «'Slaa" =në yöö i 'kun 'yö Piedhö 'ö -kaso 'gü bha 'i- pö =ya nu -ee?» "Kɛɛ =dhe 'ö nëng -kë -pö "dhü -sü 'gü 'yö 'wo- pö: «Atanna -bha "kië 'ö Piedhö -keng- =në bha.

16 Kö Piédhö -yö "kwɛɛ -ta -ma sië -kpeawo. =Dhe 'wo "kwɛɛ -pu 'wo Piédhö yö, 'yö- 'wɔn -ya -nu kɔn -dedewo. 17 "Kɛɛ =dhe 'ö -kë "dhü, 'yö Piédhö -yö ö -kɔ "paa 'gü zë- -nu -dhe kö -wo wo "dhi ta, 'yö -kɔ 'ö kwa Dëmɛ -ya bho- 'ka -kaso 'gü 'yö- -gen dɔ- -nu -dhe kö -wa -gen dɔ Zakö waa- 'dhang -bho Yesu "dhiü -mɛ -nu 'wo to -a -nu -dhe 'pö, 'yö zun "kpenng 'yö dho zian "wɛɛ 'ka.

18 =Dhe 'ö -dhe =ya kpaa, 'yö "suü -ziisü -yö -da "sɔdha -nu 'wo gun wo "yan 'to sië Piédhö -bha -kaso 'gü bha- -nu 'gü, 'yö 'wo dɔ bunnggɛdhö; -a -gen -mü =dhe -dhe 'ö Piédhö -yö bɔ- -bha "ɛɛn 'pë 'ö- -kë 'wii- dɔ. 19 Yö Edhodö -ya pö -wa mɔɔ-, 'yö 'wo- =mɔɔ "kɛɛ 'wii- yö. Yö "sɔdha -nu 'wo wo "yan to Piédhö -bha bha- -nu dhɛɛ" kpɔ Piédhö -wɔn 'ka. =Dhe 'ö -kë =dhe -dhe 'ö Piédhö 'dhö- -bha "sɔdha -nu bha 'waa- -dhe dɔ bha 'yö- pö -wa -nu zë.

=Dhe 'ö =ya kë "dhü, 'yö Edhodö -yö go Zude -sɛ 'gü 'yö dho Sezadhe plöö, 'yö "tüng 'në 'bha -kë mü.

Edhodö ga -kɔ

20 'Wɔn- -gun -siö -sü 'ka Edhodö -dhe =dedewo Tii -mɛ -nu waa- Sidɔn -mɛ -nu "glɔɔ "piü. Yö 'mɛ 'wo bha 'wo wo -wɔ -kë do kö 'wo 'dho Edhodö -kuu "dhiü 'wo za dhi- -gɔ, 'yö 'wo bɔ -gblüdü -bha 'kɔ -maakɛmɛ 'wo- -dhe Blasöti bha- -ta, 'yö 'wo dho Edhodö "piü kö 'wo dhi wo 'ko -dhe, -a -gen -mü =dhe -a -nu -bha "següme -nu -bhöpë -gun 'go sië yö =në- -kwɛɛ-.

21 Yi 'wo- -ya bha =dhe 'ö =ya -loo, 'yö Edhodö -yö ö -bha -gblüdüdhɛ -sɔ -da, 'yö dho 'yö -ya ö -bha -blüdüdhɛ -gbloo 'gü, 'yö -ya dhiang zë -sü -bha mɛ -gban "pepe -dhe. 22 Yö "següme -nu 'wo zun "gbla -sü -bha 'wo- pö: «Mɛ 'ö dhiang zë sië bha mɛ "bhu- 'yaa -mü, -zlan do 'bha -mü!» 23 "Kɛɛ -yö -to -dhe do bha- 'gü, 'ö kwa Dëmɛ -bha "kië do -yö 'wɔn bho- 'gü, 'yö "yua 'dhö -da 'gü, 'yö -dhiasɛɛ 'në -yö -gɔɔn- 'gü 'yö- -bhö, 'yö ga Atanna -bha 'tɔbhɔdhe 'ö- to ö -dɔ -gɔ ('ö ö -dɔ sü Atanna 'ka bha- -wɔn 'gü.) 24 Yö 'mɛ 'wo 'dhang bho Atanna "dhiü 'wo -kë 'gbe -kpeawo 'ö dho- 'ka.

25 =Dhe 'ö Banabasö waa- Sɔdhö =wa bo ('wëë- 'ö 'dhang -bho Yesu "dhiü -mɛ -nu 'wo Angtɔsö 'wo- bho 'ko -ta bha- "kpläng -bho 'mɛ 'wo Zedhizadhémö -a -nu -bha -sü 'ka), 'yö 'wo wo yee -kë 'wo dho Angtɔsö. Yö Zan 'wo- 'tɔ -ya -ta -dhe Makö bha 'wo- -da wo -keng-.

Atanna -bha ö -kɔ -ye Baanabasö waa- Sɔdhö -nu -bha kö -wa -bha yë kë -kɔ

13 1 Atanna -wɔdhiüloome -nu waa- 'dhang -bho Yesu "dhiü -mɛ -nu draan- -mɛ -nu -wo -gun -bha 'kɔdhigüme -nu 'wo Angtɔsö -pö 'gü bha- -nu kpö 'gü. 'Mɛ 'wo "dhü bha -wa mɛ do -dhe Baanabasö, 'yö 'wo- mɛ do 'bha -dhe Simeɔn 'yö 'wo- 'tɔ kpɔ 'wo- -dhe Metii, 'yö 'wo- mɛ do -dhe Dhusiusö ('yö go 'pö Sidhenö -sɛ 'gü), 'yö Manɛ 'ö "klu bho -gblüdü Edhodö =keng-, waa- Sɔdhö. 2 Yi do 'ka kö -wo kwa Dëmɛ -dhɔkë sië, kö

-wo 'sunng- ma sië, 'yö 'Nii- 'slüüslü -ya pö- -nu -dhe: «-Ka Baanabasö waa- Sɔdhö -a -nu -ya -dɪ -ta kö yë 'a- -nu -dhe 'ka bha -wa kë!»³ 'Yö 'wo 'sunng- ma 'wo -bhea Atanna -dhe -a -nu -wɔn 'gü, 'yö 'wo wo -kɔ kpa- -nu -ta, 'yö 'wo 'dhuë- -kë -nu -bha, 'yö 'wo wo kwaa- -nu -zü 'wo dho.

Baanabasö waa- Sɔdhö -nu -bha -dho Siplë -se 'gü -kɔ

⁴'Yö Baanabasö waa- Sɔdhö 'ö 'Nii- 'slüüslü -ya -nu bɔ bha, 'wo dho 'wo -loo Sedhösi -pö 'gü, 'yö 'wo -ya 'yitagɔ 'gü mü 'wo dho "segɔ 'dhe -ya -sü 'ka 'yi =zinng 'gü 'wo- -dhe Siplë bha- 'gü.

⁵=Dhe 'ö =wa 'dho =wa -loo Sadhaminö -pö 'gü, 'yö 'wo zun Atanna -wu pö -sü -bha Zuifö -nu -bha -yakwëëkëgükö 'gü. Zan Makö -yö -gun -nu -keng- 'yö- -nu -ta kun.

⁶'Yö 'wo -ziö "segɔ bha- 'gü 'wo dho "dhü 'wo -loo Pafɔsö -pö 'gü. =Dhe 'ö =wa -loo Pafɔsö, 'yö 'wo -kpan "zɔvdhe këme do 'ö Zuifö 'ka 'wo- -dhe Baa Yesu bha- -bha mü. 'Mε 'ö bha -ya -pö 'ö -dɪ -dhe Atanna -wudhiüloome -mü 'ö 'ka, ⁷"kεε -yö -kë 'pö -gblüdë 'wo- -dhe Sɛɛziusö Podhusö bha- -kengme do 'ka. -Gblüdë bha -yö -gun =kpaɔme 'ka, 'yö Baanabasö waa- Sɔdhö -nu -dhe kö -wo Atanna -wu pö 'ö -dhe.

⁸"Kεε "zɔvdhe këme 'wo- 'tɔ kpɔ glekɔ -wu 'gü 'wo- -dhe Edhimasö bha, Sɔdhö waa- Baanabasö 'wii Atanna -wu -pö -gblüdë bha- -dhe -dhe 'yö- -gɔ, kö -ya "slë mɔɔ- sië kö -gblüdë bha 'ya 'dho 'dhang bho Yesu -wɔn "dhiü.

⁹=Dhe 'ö =ya kë "dhü, 'yö Sɔdhö 'wo- 'tɔ kpɔ 'pö Pɔdhö bha 'Nii- 'slüüslü -ya pa, 'yö 'ö wë =slëë -dε mi bha- -ta 'yö- -ga zuudhö ¹⁰'yö- -pö- -dhe: «Bhi 'ö 'i Sɔtraan gbö 'ka 'ö 'wɔn -së -dho 'yaa i kë, 'ö 'i pa -sü 'ka "kpënnng- waa- "slë yaa suu =gban "pepe -në- 'ka ya, -yö i "piü 'zü -dhe 'i teanwɔn 'ö -gban yi Dëme -bha bha- bho mε -nu 'gü -sua -bha -ee? ¹¹-Bhö -dhe -ga, yi Dëme -dho i -wëëdhe bho, -yö -dho i "yënnng trö 'ö 'bhaa -dhe yö 'ö dho 'ö zun- 'ka "tüng kpö -bha!» Edhimasö -to -dhe do bha- 'gü 'ö- "yënnng -yö =tröö 'sënsëndhö, 'yö zun 'ö -kɔ dan -sü -bha 'ö -züzü kö 'mε 'ö dho zian bho 'ö 'ka 'ö- =lɔɔ.

¹²=Dhe 'ö -gblüdë bha =ya 'wɔn 'ö -kë Edhimasö 'ka bha- -dhe yö, 'yö 'dhang bho Atanna -wu "dhiü, 'yö mε draan- -kɔ -nu 'wo go kwa Dëme Yesu "piü bha 'wo- -zɔ kun.

Pɔdhö waa- Baanabasö -a -nu -bha -kë Angtɔsö -pö 'ö Pisidi -se 'gü bha- 'gü -kɔ

¹³'Yö Pɔdhö waa- 'ö "tayɔɔ -nu -wo -da 'yitagɔ 'gü Pafɔsö -pö 'gü 'zü -deewo, 'yö 'wo dho Pɛɛzö -pö 'ö Panfidhi -se 'gü bha- 'gü. =Dhe 'ö =wa -loo mü, 'yö Zan Makö -yö -kan -a -nu -bha 'yö dho Zedhizadhëmö.

¹⁴'Yö wo -zë 'wo dho wo "dhiü 'wo dho 'wo -loo Angtɔsö -pö 'ö Pisidi bha- 'gü, 'yö 'wo dho Zuifö -nu kpö 'gü -a -nu -bha -yakwëëkëgükɔ -nu 'gü -a -nu =glooyi 'ka 'wo -ya mü.

¹⁵=Dhe 'ö 'kɔ bha- -gɔme -nu =wa wo bo Atanna -bha 'tɔng- -nu waa- Atanna -wudhiüloome -nu -wu 'bha -nu -wu pö -sü 'ka- -bha 'sëëdhe

'gü, 'yö Zuifö -nu -bha -yakwëëkëgükö -gɔmɛ -nu -wa pö Pɔdhö waa-Baanabasö -a -nu -dhe: «Yi dheebhang -nu, -ya kë -dhe 'wɔn 'bha 'dhö ka -gɔ kö 'ka- pö mɛ faan dɔ -wu 'ka 'mɛ 'wo ya- -nu -dhe kö "dhɛ -yö ka -gɔ.»

¹⁶'Yö Pɔdhö -yö -wliü 'yö ö -kɔ "paa 'gü zë- -nu -dhe 'ö- pö: «Izraedhö -mɛ -nu waa- 'mɛ 'kaa Zuifö 'ka, "kɛɛ 'ö 'ka Atanna -wu -bhlëë -zë -ya, -ka ka "tu 'to n -bha! ¹⁷Izraedhö -mɛ -nu, kwa -bha Atanna bha -yö kwa "bhɛma -nu sü ö -bha 'ka 'ö- -nu suu -da "dhiü kö -wo -tun -dhuëndghe 'gü Ezitö -se 'gü, 'yö- -nu bho mü ö -bha 'gügübdhe 'ka, ¹⁸'yö "klu bho- -nu -bha -kwe 'ö -mɔɔ -kwe -kaɔng -yiisiö -bha -a 'ka "tung -ta. ¹⁹'Yö Kanaa "sɛgɔ "saɔplɛ bha- -nu 'gü -see -gblü 'ka, 'yö- nu kwa "bhɛma -nu -dhe kö -wo -ya mü. ²⁰'Yö zagɔbhome -nu -ya -nu -gɔ "dhiü -kwe 'ö -mɔɔ -kwe këng -yiisiö waa- -kwe -kaɔng "sɔɔdhu -nu -bha -a 'ka 'ö dho "dhü 'ö zun Atanna -wudhiüloome Samiedhö -bha "tüng -bha. ²¹'Yö 'wo -gblüdë do -gbadhe Samiedhö -gɔ, 'yö Atanna -yö Saidhö 'ö -kë Kisö gbö 'ka, 'ö go Benngzame -gɔ "kweandhö bha- nu -nu -dhe, 'yö -ya Izraedhö -se -gɔ "dhiü -kwe -kaɔng -yiisiö 'ka.

²²=Dhe 'ö Atanna -yö ö -kɔ -kan Saidhö "dhiü, 'yö Davi -kë -nu -bha -gblüdë 'ka, 'yö "sɛɛdhe kë Davi -bha 'ö- pö:

«Zai gbö Davi bha n dhɔɔbhaame -mü,
yö -në dho n dhɔɔbhaawɔn -gban kë.»

²³Davi bha- suu 'gü -në do -në Atanna -ya -ya Izraedhö -se 'gü -mɛ -nu Dhame 'ka -dhe -kɔ 'ö- "plüün bho- 'ka -a 'dhö. Medhame 'ö "dhü bha -në 'wo- -dhe Yesu. ²⁴'Ö gun kö Yesu 'yii Atanna -bha yë zü bho -kö mɛ kpö 'gü, Zan -yö Atanna -wu -pö 'ö- pö Izraedhö -següme -nu -dhe -dhe -wo wo kwaa- wo -kë -sɔng yaa -nu -zü kö -wo wo wë bɔ Atanna "piü kö -wa -nu -bɔ -a 'ka -zu bho. ²⁵=Dhe 'ö Zan 'dhö -wo sië ö -bha -tosea "dhiütodhe 'gü 'yö- pö: «Ka ka -zu -gɔn -dhe de suu 'pö n 'ka? 'Mɛ 'ka -ya sië- -gɔ bha 'yaa -mü n 'ka, yö -zë -yö nu sië n zian- -ta. Mɛ 'ö bha yö -zë -bhlëë -yö 'kpüi- 'ö -ziö n -ta, -a -gen 'gü -sabha -zian fië- -dhö n 'ka.»

²⁶'Yö Pɔdhö -ya pö: «N dheebhang -nu, ka 'ö 'ka -kë Ablaamö suugüme -nu 'ka, waa- 'mɛ 'ö 'kaa Zuifö 'ka "kɛɛ 'ö 'ka Atanna -bhlëë -zë -ya, kwa -në naɔ -së 'ö -kë dha -sü -naɔ 'ka bha 'ö nu kwa -dhe. ²⁷'Mɛ 'wo Zedhizadhemö waa- wo -gɔdhiüme -nu 'wii "wɔ- -bha kö -wo Yesu 'sü wo Dhame 'ka, 'wii Atanna -wudhiüloome -nu -wu 'wo- pö -glooyi -gban "pɛpɛ 'ka bha- 'gü ma, "kɛɛ -wo kë- 'gü -wɔn -zë -kë Yesu zë -sü 'ka. ²⁸-A zë -gen 'bha 'yii kë, "kɛɛ -wo kë- -pö Pidhatö -dhe -ya zë. ²⁹=Dhe 'ö -wa 'wɔn -nu 'ö -ben zë -sü 'ka Atanna -bha 'sëédhe 'gü 'ö -gban Yesu -wëédhe bho -sü waa- ga -sü -nu -bha bha- -gban "pɛpɛ 'gü -wɔn kë, 'yö 'wo- bho "dhü -bha, 'yö 'wo- -da -gwë -ye 'gü, (-a -gen -mü -dhe -a -nu -bha mɛ -wɛɛ bho -kɔ bha). ³⁰"Kɛɛ 'yö Atanna -ya bho ga 'gü, ³¹'yö ö -dɔ -zɔn 'mɛ 'wo gun- -keng- 'wo go- 'ka Gadhidhe -se 'gü 'wo dho- 'ka Zedhizadhemö bha- -nu -dhe

-dhekpaoyi 'gbe -dede 'ka, 'me 'wo "dhü bha -në 'wo- "sɛɛ- 'ka -taamasü ya- 'gü, 'yö 'wo Yesu -dhiang zë sië Izraedhö -sɛgümɛ -nu -dhe. ³²Yii -di 'pö yi -nu 'wɔn -taɔng -sɛ bha -në- 'ka ka -dhe. 'Wɔn -taɔng -sɛ bha yö -mü -dhe 'wɔn 'ö Atanna -ya pö kwa "bhɛma -nu -dhe yi 'bha 'ka bha, ³³-ya kɛ -sü 'ka kwa 'ö 'kwa- -nu bhang -nu 'ka bha -në kwa -dhe =dɛɛ Yesu -bho ga 'gü -sü 'ka -dhe -kɔ 'ö -bɛn zë -sü 'ka- 'ka "Tan 'sëédhe ('wo- Somö -kɛ bha-) =plɛ -naa 'gü bha- 'dhö -dhe:

◀Atanna -ya -pö =dhe: Bhi -në 'i n Gbö 'ka,

◀ya 'go =dɛɛ 'gü 'ma- -zɔn mɛ -gban -dhe =dhe ma -në 'a i Dë 'ka.

³⁴'Yö Atanna -ya pö =dhe -yö -dho -a bho ga 'gü kö 'ya 'dho ga 'zü. 'Yö- pö 'zü =dhe:

◀'Dhuë- 'ö "slüüslü 'ö- "plüün bho Davi -dhe bha

◀ö -dho -a kɛ ka -bha tɛan- 'ka.

³⁵'Wɔn bha -yö -bɛn zë -sü 'ka Atanna -bha 'sëédhe 'gü -dhe 'bha 'gü 'zü, -a -gɛn -mü =dhe 'mɛ 'ö "Tan 'sëédhe ('wo- Somö -kɛ bha-) -bɛn zë bha -ya -pö Atanna -dhe:

◀'Bhii 'dho "wɪ- -bha kö i -sɛmɛ 'slüüslü bha- kwi -yö "bu.

³⁶Yë 'ö Atanna -ya -ya Davi -bha 'ka -yö kɛ- -kɛ, "kɛɛ =dhe 'ö =yaa- kɛ 'yö ga, 'yö 'wo- -wɛɛ bho -a "bhɛma -nu -wɛɛ bho -dhe 'gü, 'yö- kwi -yö -bu. (◀Ya kɛ "dhü kö -wu 'ö Atanna -ya pö "dhü bha 'yii- pö Davi -zë -dhe.)

³⁷Mɛ 'ö Atanna -ya bho ga 'gü bha yö -zë kwi 'yii "bu. ³⁸-A -kɛ "dhü -sü bha- 'gü n dheebhang -nu, -kaa dɔ =dhe pɛ 'ö Yesu -ya -kɛ bha -në- -wɔn 'gü 'yö Atanna dho =mɔɔ- -bha 'ö mɛ -nu -bha 'wɔn yaa -nu -mawɔn to -dhe -kɔ 'yi- pö sië- 'ka ka -dhe =dɛɛ ya- 'dhö. ³⁹Moizö -bha 'tɔng- -zë 'yii 'dho ka kɛ -song bho ka -bha Atanna wëédhö, "kɛɛ 'dhang -bho Yesu -wɔn "dhiü -sü bha -në dho ka kɛ "slüüslü Atanna wëédhö. ⁴⁰Kö -kaa kɛ -sɛ kö 'pɛ 'ö Atanna -wudhiüloome -nu -wa pö bha 'ya 'dho kɛ ka 'ka; ⁴¹-a -gɛn -mü =dhe -a -wudhiüloome -nu -wa -pö:

◀Atanna -ya pö: 'Mɛ 'ka Atanna -wu -san -kɛ,

◀'wɔn -yö ka 'kɔn kö 'ka 'ma "sɛ 'ka,

◀-a 'klɔɔ- -mü -dhe yë 'ö =waa- -wɔn -gɛn dɔ ka -dhe,

◀'ö 'kii 'dho 'dhang bho- "dhiü, a -dho -a kɛ ka -bha "tüng 'gü.»

⁴²-Dhe 'ö =wa bo dhiang -nu bha- -nu zë -sü 'ka, 'ö Pɔdhö waa- Baanabasö 'wo zun sië "kpɛnng, 'yö 'wo- pö- -nu -dhe -wo nu 'zü -glooyi 'dhe 'ö dho dɔ- "piü bha- 'ka kö -wo -wu -nu bha- 'gü 'bha pö wo -dhe.

⁴³-Dhe 'ö =wa ziö 'wo 'dho sië, 'yö Zuifö -nu 'gbe waa- 'mɛ 'wo -da Zuifö -nu -bha -bhɛa Atanna -dhe -kɔ 'gü -nu wo bha 'wo -ziö -a -nu -kɛng-. 'Yö Pɔdhö waa- Baanabasö 'wo dhiang -nu zë- -nu -dhe -a -nu faan dɔ -sü 'ka kö -wo 'to Atanna -bha "gblüsë 'ö- -kɛ bha- 'gü woo- -tosɛadhe -gban 'ka kö -wo 'dho- 'ka "dhiü.

⁴⁴-A -glooyi 'dhe 'ö dɔ- 'dhe bha- "piü bha- 'ka, 'mɛ 'wo 'pö- bha- 'gü, -a -nu 'kpüi- -dhe -gban -wo kɛ -loo 'ko -ta -dhe do bha- 'gü kö 'wo Atanna -wu

ma. ⁴⁵"Kɛɛ =dhe 'ö Zuifö -nu =wa me kpö bha- -nu yö, 'yö -drɔ -yö -da -nu 'gü 'yö 'wo -ya -sua -ye Pɔdhö "yan -bha -sü -bha. 'Yö 'wo -ya -dhiang yaa -zë -a -bha -sü -bha me -nu -dhe. ⁴⁶"Kɛɛ Pɔdhö waa- Baanabasö -wo wo -zu -gban 'wo dhiang zë- -nu -dhe 'wo- pö: «Atanna -wu ya- -dhea -bha =dhe -yö pö ka -në ka -dhe nu -blɛəsü, "kɛɛ -dhe 'ö -kë -dhe 'kaa 'wɪ- -bha kö 'ka 'dhang bho- -wɔn 'dhiü, 'ö 'kaa ka -du 'sü -dhe -sii 'ö 'yaa yën -a -slɔɔ -me 'dhö bha yi -dho yi wë slëë- 'me 'waa Zuifö 'ka- -nu 'piü. ⁴⁷-a -gen -mü -dhe yi Dëme -ya -pö yi -dhe: «A i -ya "segɔ "wɛɛ -nu -në- -nu -bha -dhepuudhe 'ka kö 'i 'dho dha -sü bha- -nao 'ka "segɔ -nu 'wo -dhe -gblɛn 'gü -a -nu 'gü.

⁴⁸=Dhe 'ö 'me 'waa Zuifö 'ka 'wo- -nu -wu bha- ma, 'yö- -nu -nii -da =dedewo 'yö 'wo- pö: «Kwa Dëme -wu bha -yö -së!» 'Yö me "pɛpɛ 'ö Atanna -ya -nu -da -tosea 'ö 'yaa yën -a këme 'ka bha 'wo 'dhang bho Yesu -wɔn 'dhiü.

⁴⁹'Yö kwa Dëme -wu -yö -pen "segɔ bha- 'gü -dhe =gban "pɛpɛ 'gü. ⁵⁰"Kɛɛ 'yö Zuifö -nu 'wo dhebhɔ =bhlëəsü -nu 'wo 'pö- bha- 'gü, 'wo -da Zuifö -nu -bha bhea" -kɔ 'gü bha waa- 'pödë -nu zü -yɔɔn Pɔdhö waa- Baanabasö -nu -bha kö -wa -nu -wëédhe bho. =Dhe 'ö =ya kë "dhü 'yö 'wo- -nu -kë, 'yö 'wo go- -nu -bha "segɔ bha- 'gü. ⁵¹'Yö Pɔdhö waa- Baanabasö 'wo wo -gen -bha -ma kö "se 'ö dɔ- -nu -gen -bha 'pö- bha- 'gü bha -yö 'go- -nu -gen -bha kö -wa -zɔn -nu -dhe =dhe ('me 'wo bha Atanna =ya 'wɔn bho- -nu 'gü kö-) -dhe 'bha 'yii 'to wo -zë wo -bha, 'yö 'wo dho Ikɔnö -pö 'gü.

⁵²'Dhang -bho Yesu "dhiü -me -nu 'wo Angtiɔsö -wo -gun pa -sü 'ka zuëniidathe waa- 'Nii- "slüüslü 'ka.

Pɔdhö waa- Banabasö -a -nu -bha -kë Ikɔnö -kɔ

14 ¹=Dhe 'ö Pɔdhö waa- Banabasö 'wo -loo Ikɔnö -pö 'gü, 'yö 'wo -da Zuifö -nu -bha -yakwëékëgüko 'gü 'zü, 'yö 'wo -ya Yesu -bha 'wɔn -taɔng -së pö -sü -bha 'me 'wo gun mü bha- -nu -dhe. -A -kë "dhü -sü -wɔn 'gü, 'me 'wo Zuifö 'ka waa- 'me 'waa Zuifö 'ka- me 'gbe -wo kë 'dhang -bho Yesu -wɔn 'dhiü 'ö 'wo- -wɔn -dhe teanwɔn. ²"Kɛɛ 'yö Zuifö 'dhe 'wii "wɪ- -bha kö -wo 'dhang bho 'wɔn 'dhiü bha, 'wo 'me 'waa Zuifö 'ka -a -nu -zü -yɔɔn kwa dheebhang 'dhe -nu 'wo Yesu -wɔn -dhe teanwɔn bha- -nu -bha kö -wo -zu 'gɔn -kɔ yaa kë- -nu -wɔn 'gü. ³"Kɛɛ yö -zë -gban 'gü Pɔdhö waa- Banabasö -wo kë -gwëë Ikɔnö -pö 'gü 'ö 'wo 'wɔn 'ö -gban kwa Dëme -bha -a -dhiang zë -zugbandhe waa- -zu -yö kwa Dëme -dhe -sü 'ka, 'ö kwa Dëme -ya -zɔn 'pö me -gban -dhe =dhe 'wɔn -nu 'wo -gban -a -bha "gblüsédhe -bha 'wo- pö bha tean- -mü, 'ö -kɔ -mɔɔ 'wɔn -bha -sü nu- -nu -dhe kö -wo 'dhabhliwɔn -nu kë- 'ka.

⁴'Yö 'pöme -nu 'wo -pɛ 'gü, 'yö- me -kɔ "pean do -yö bɔ Zuifö -nu 'ka, 'yö- -kɔ "pean 'bha -yö -kë Yesu -bha yëkëme -nu -bha 'ka.

⁵=Dhe 'ö =ya kë "dhü 'yö Zuifö -nu waa- 'me 'waa Zuifö 'ka bha 'wo wo zü ma 'koo waa- wo -gɔdhiüme -nu 'dhö kö 'wo Pɔdhö waa- Banabasö

-nu -wëédhe bho kö 'wo- -nu -zuö -gwë 'ka. ⁶"Këe -dhe 'ö me -ple bha 'wo- 'wɔn dɔ, wo -dɪ 'ka, 'yö 'wo -dua 'wo dho Dhikaoni -se 'gü, 'pödhe 'wo- -dhe Dhitrö bha waa- Dëebö -dhe -nu 'gü waa- -nu -züzü -dhe -nu 'dhö, ⁷'yö 'wo -ya 'wɔn -taɔng -së pö -sü -bha mü.

Pɔdhö waa- Banabasö -a -nu -bha -kë Dhitrö -pö 'gü -kɔ

⁸Dhitrö -dhe bha "trüünyuame do- -gun mü. 'Me bha -yö -bho "yua bha- 'ka, 'ö gun "dhü kö 'ö bho 'yii dɔ ö -gean do. ⁹"Këe -yö -gun ö "tu 'to sië dhiang 'ö Pɔdhö gun- zë sië bha- -bha. -Dhe 'ö Pɔdhö -yaa- dɔ -dhe -yö 'dhang -bho Yesu -wɔn "dhiü, -dhe -yö -mɔɔ -bha 'ö- -bha "yua bo, 'yö ö "yan -gban 'gü "wë zuudhö, ¹⁰'yö- pö- -dhe "gbu- 'ka 'ö- pö: «-Bhö "wlü 'vadhö kö 'i dɔ i -gean!» 'Yö 'me bha 'ö =wlü 'vadhö 'yö dɔ ö -gean 'yö zun 'ta 'sü -sü -bha.

¹¹-Dhe 'ö me kpö 'gbe -wa 'wɔn 'ö Pɔdhö -ya -kë bha- -dhe yö, 'yö 'wo -gbla woo- 'se 'gü -wu 'ö -kë Dhikaoni -wu 'ka bha- 'gü 'wo- pö: «-Zlan -nu -wa mɛbhudhe kwi -da wo -bha -wa 'go dhang- 'gü -wa nu kwa "piü!» ¹²'Yö 'wo Banabasö 'tɔ kpɔ woo- -dhɔkëpë =bhlëësü 'wo- -dhe Zösö bha- 'tɔ bha, 'yö 'wo Pɔdhö yöö -dɪ 'pö- 'tɔ kpɔ woo- -dhɔkëpë do 'bha 'wo- -dhe 'pö Ëemesö bha- 'tɔ -bha; -a -gen -mü -dhe me =ple bha Pɔdhö -në gun dhiangzëme 'ka -dhe -a -nu -bha -zlan Ëemesö bha- 'dhö. ¹³-A -nu -bha -dhɔkëpë 'wo- Zösö -kë bha- -dhɔkëgükɔ -gun dɔ sië -da 'plöö -dhe 'gü. 'Yö -zlan -kɔ bha- "dhiüme -yö nu -du -nu 'wo "dhü "bin ta -sü 'ka bhië" -bha, 'wo- -da -nu bho 'gü bha- 'ka "saan 'ö -klëën 'pö- -zü bha- "dhi do "dhiü. 'Yö Zösö "dhiüme bha waa- me kpö 'wo gun 'mü -a -nu -wu 'dhö -kë 'gü do kö 'wo "saa- bho -du -nu bha- nu- 'ka Banabasö waa- Pɔdhö -nu "dhiü.

¹⁴"Këe -dhe 'ö Yesu -bha yëkëme -nu -ple 'ö- 'me do- -kë Pɔdhö 'ka 'ö- me do- -kë Baanabasö 'ka bha -wa 'wɔn bha- ma, 'yö 'wo woo- sɔ -ta "dhüng 'gü -sɔ -nu -pɛ, (kö -wa -zɔn -a -nu -dhe -dhe 'wii "wɪ- bha kö -wa kë "dhü). 'Yö 'wo -beang sü 'wo -sɔ -nu kpö 'gü kö -wa pö sië- -nu -dhe: ¹⁵«'Me 'ka ya, -më 'pö ka -bha 'yö 'ka "slë suu bha- -kë -dhe 'pë bha- 'dhö? Me "bhu- -mü yi 'ka 'pö -dhe ka 'dhö, Atanna 'yaa -mü yi 'ka, "këe naɔ -së 'yi nu- pö ka -dhe yö -mü -dhe kö 'ka ka kwaa- -dhɔkëpë "wlaasü -nu bha- -nu -zü kö 'ka ka wë slëë- Atanna 'yaandhe 'ö dhang- 'dhö, "se 'dhö, =weeyi 'dhö -a -nu -kë waa- -nu 'gü -pë -nu 'dhö bha -në- "piü kö 'ka- -dhökë! ¹⁶Atanna 'ö "dhü bha -yö kë ö -kwaa "sɛgɔ "pepe -gban 'gü -mɛ -nu -zü yi 'bha 'ka 'ö 'wo wo dhɔɔbhaawɔn -nu -kë. ¹⁷"Këe 'sa kö -yö ö -bha "klusëdhe -zɔn sië ka -dhe -kpɛawo 'wɔn -së -nu -kë ka -dhe -sü 'ka, -a -gen -mü -dhe yö -në ka gba dha 'yi 'ka, 'ö go mü 'ö- "slë -kë 'yö ka -bha tapë -nu 'wo -dhi 'yö 'ka- -nu -kan -a "kan "tüng 'gü, 'yö -bhöpë -nu nu ka -dhe, 'yö go mü 'zü 'ö ka gba zuëniidadhe 'ka kë "dhü kö 'ka ö dɔ.» ¹⁸"Këe yö -në- -gban 'gü, Banabasö waa- Pɔdhö -wo kë sëë -bho =dedewo 'mɛ 'wo bha- -nu -kɔ -bho "saa- bha -bho wo "dhiü -sü bha- -bha.

19=Dhe 'ö =ya kë "dhü, 'yö Zuifö -nu 'bha -nu -wo -go Angtɔsö -dhe 'ö Pisidi -se 'gü waa- Ikɔnö -pödhe -nu bha- -nu 'gü, 'wo nu 'wo me kpö bha- -nu zuë" -slëë wo "piü. 'Yö 'wo zun Pɔdhö -zë -gwë 'ka -sü -bha 'wo- -gbiü 'wo dho- 'ka 'pö- -taama 'wo- to mü kö -wo wo -zɔ 'gɔn sië =dhe -ya ga. 20"Kεε =dhe 'ö 'me 'wo 'dhang bho Yesu "dhiü bha =wa nu =wa -loo mü, 'ö =wa -klëën Pɔdhö -zü, 'yö Pɔdhö -yö =wlü 'yö 'wo dho 'pödhö. =Dhe 'ö- -tadhe =ya -kpaɔ, 'yö waa- Banabasö 'wo dho Dεεbö -pö 'gü. 21'Yö 'wo Yesu -bha 'wɔn -taɔng -së pö mü. 'Yö megbedhe 'wo 'dhang bho Yesu -wɔn "dhiü -a -nu -wu "dhiü 'yö 'wo -kë -bha -klang -nu 'ka. 'Ö go 'mü 'yö 'wo wo yee -kë 'zü -deewo 'wo dho Dhitrö -pö, Ikɔnö -pö waa- Angtɔsö -pö -nu 'wo Pisidi -se 'gü bha- -nu 'gü. 22'Yö 'wo 'me 'wo 'dhang bho Yesu "dhiü -a -nu faan dɔ kö -wo wo 'gü dɔ 'gbu- -zɔ -yö -a -dhe -sü -bha 'yö 'wo- pö- -nu -dhe: «Me "pepe 'wo 'dhang bho- -wɔn "dhiü -wo -dho saan" 'sü =dedewo "kpongtaadhe ya- 'gü, 'yö 'wo gun -na -da Atanna -bha -gblüdedhekédhe 'gü. 23'Yö 'wo "dhiü -sü me 'ka -me -nu -ya Atanna -bha 'kɔdhigüme kpö 'gü -dhe =gban "pepe 'gü. =Dhe 'ö =wa bo 'sunng- 'ma -sü waa- -bhea Atanna -dhe -sü 'ka, 'yö 'wo 'me 'wo Atanna -bha me kpö 'dhe 'ö- 'gü -a -wɔn -wɔ kwa Dëme 'wo 'dhang bho- "dhiü bha- =kwεε-.

24'Yö 'wo bɔ Pisidi -se 'gü 'wo dho Panfidhi -se 'gü, 25'yö 'wo Atanna -wu pö 'me 'wo Pεεzö -pö 'gü -a -nu -dhe. 'Yö go mü 'yö 'wo dho Atadhi -pö 'gü. 26=Dhe 'wo go 'mü, 'yö 'wo -da "yitagɔ 'gü 'wo dho 'zü Angtɔsö, -dhe do 'wo wo -bha "ta zü bho- -bha bha- 'gü. -Dhe bha -në "sanni -wo 'dho woo- "ta bha- 'gü, 'yö 'me 'wo 'dhang bho Yesu -wɔn "dhiü 'wo mü bha 'wo- -nu -wɔn -wɔ Atanna -kwεε- kö -yö ö -zɔ kë- -nu 'gü kö yë 'wo 'dho sië- kë bha -yö dhi- -nu -gɔ.

27=Dhe 'ö =wa -loo Angtɔsö, 'yö 'wɔn "pepe 'ö waa- Atanna -nu 'wo- -kë kö -wo "ta bha- 'kpö sië bha, =waa- -kɔ 'ö "kwεε -pu 'ka 'me 'waa Zuifö 'ka- -nu -gɔ kö woo -dɔ 'pö -wo 'dhang bho ö "dhiü bha- -gen dɔ 'dhang -bho Yesu "dhiü -me -nu 'wo mü- -nu -dhe. 28'Yö 'wo "tüng 'bha -kë -a -nu "piü mü.

-Yakwëë 'kpii- 'ö Yesu -bha me -nu -wa -kë Zedhizadhëmö -a -dhiang

15 1=Dhe 'ö =ya kë "dhü, 'yö me 'bha -nu -wo go Zude -se 'gü 'wo nu Angtɔsö -pö 'gü, 'yö 'wo zun 'dhang -bho Yesu "dhiü -me -nu 'wo mü -a -nu draan- -sü -bha 'wo- pö: «=Ya kë -dhe 'kii 'dho 'gbannë -zë 'gü -dhe -kɔ 'ö -ben zë -sü 'ka Moizö -bha 'tɔng- 'gü -a 'dhö, 'kii 'dho dha.» 2'Yö 'wo -ya dhiang -nu zë -sü waa- zaɔdhe -da Pɔdhö waa- Banabasö -nu 'ka -sü -bha, -a -gen -mü =dhe Pɔdhö waa- Banabasö 'wii "wɔ- -nu -wu -bha gbonggbongdhö. 'Yö -kë Yesu -bha me -nu 'wo Angtɔsö -a -nu 'gü -së kö 'wo me dɔ Pɔdhö waa- Baanabasö -nu -keng- kö -wo 'dho Zedhizadhëmö kö Yesu -bha yëkëme -nu waa- Atanna -bha me -nu "dhiüziöwome -nu 'wo mü bha -wo 'wɔn bha- -bho 'koo kë wo -dhe.

3 'Yö 'wo- -nu dɔ zian- 'yö 'wo dho. 'Yö 'wo bɔ Fenisi -se waa- Samadhi -se -nu 'gü, 'yö -kɔ 'ö 'mɛ 'waa Zuifö 'ka 'wo wo zuë" -slëë- 'ka Atanna "piü bha, 'wo- -gen -nu dɔ 'dhang -bho Yesu "dhiü -mɛ -nu 'wo -dhe -nu bha- 'gü -a -nu -dhe, 'yö- -nu zuë" -nii -da 'pö -dedewo.

4=Dhe 'ö =wa -loo Zedhizadhémö 'plöö, 'yö 'dhang -bho Yesu "dhiü -mɛ -nu 'dhö, Yesu -bha yëkëme -nu waa- Atanna -bha -mɛ -nu "dhiüziöwome -nu 'wo -dhe bha- 'gü 'wo -kɔ -ya -a -nu -dheng -gɔ, 'yö woo -dɪ 'pö waa- Atanna -nu 'wo 'wɔn -nu 'wo- -kë wo 'kwëë- -a -nu -bha "ta 'kpɔ -sü 'gü bha 'wo- -gen dɔ 'pö- -nu -dhe. 5 'Yö Fadhizien -nu 'bha -nu 'wo 'dhang bho Yesu -wɔn "dhiü bha 'wo =wli 'wo- pö: «Ka -kwaa pö 'dhang -bho Yesu "dhiü -mɛ -nu 'ö 'waa Zuifö 'ka bha- -nu -dhe -wo 'dho 'gbannë 'gü, =ya 'go mü kö 'tɔng- 'ö Moizö -ya nu kwa -dhe bha -wa -bhlëë -ya.

6 'Yö Yesu -bha yëkëme -nu waa- Atanna -bha mɛ -nu "dhiüziöwome -nu 'wo -ya -dhe do 'gü kö 'wo -dhe -ga 'wɔn bha- 'gü. 7=Dhe 'ö- -nu -dɪ -slɔɔ =wa zaɔdhe -da wo "kwëë pinpindhö 'wɔn bha- 'gü, 'yö Piedhö -yö =wli 'ö- pö: «N dheebhang -nu, kaa =dede ka- 'wɔn -dɔ 'kpakpadhö -a yi -ya -gwëë -dhe Atanna -në n -ya ka kpö 'gü kë "dhü kö 'a kë ö -bha mɛ dha -sü -naɔ 'ö -gban Yesu -bha bha- pöme 'ka 'mɛ 'waa Zuifö 'ka -a -nu -dhe kö -wa ma kö -wo 'dhang bho- "dhiü 'pö. 8 'Yö Atanna 'ö mɛ "bhu- -nu zuë" dɔ bha 'ö ö -bha 'Nii- "slüüslü -lɔɔ- -nu -ta =dhe kwa 'dhö kö -ya -zɔn -dhe -a -nu "dhia -yö ö 'gü 'pö. 9 'Yii 'mɛ 'wo Zuifö 'ka waa- 'mɛ 'waa Zuifö 'ka -a -nu -bho 'koo kë kwa -zinng 'gü. 'Yö- -nu këwɔn yaa -nu -mawɔn to- -nu -bha 'dhang -bho Yesu "dhiü -sü -wɔn 'gü, 'yö- -nu sü 'mɛ 'ö pö 'aa- -nu -bha 'ka ö wëëdhö. 10=Dhe 'ö "dhü, 'pë 'ö Atanna -ya pö 'kwa 'dho- kë ka- -kë -më -wɔn 'gü? "Een Atanna 'gü 'pö 'ka- dan sië -ee? -A -bha 'tɔng- 'ö kwaa kwa "bhema -nu kwa -kɔ 'yii -mɔɔ- -bha kö 'kwa- 'kun -a -bha -kë "gbu- -sü -wɔn 'gü bha 'yö 'ka- "piü 'zü -dhe 'dhang -bho Yesu "dhiü -mɛ -nu 'ö 'waa Zuifö 'ka -wa yö -në- 'kun -ee? 11 Kwa 'dhang -bho "dhiü -dhe kwa Dëme Yesu -bha -gasite -në- -wɔn 'gü 'yö 'kwa dhasü -slɔɔ. -Kɔ do bha -në woo- -dɪ 'pö 'wo- -slɔɔ- 'ka.»

12=Dhe 'ö Piedhö -ya bo dhiang bha- zë -sü 'ka, 'yö -dhea -yö ga 'mɛ 'wo gun 'mü bha- -nu -ta. 'Yö 'wo wo "tu to Banabasö waa- Pɔdhö -nu -wu -bha, 'yö 'wo zun -kɔ 'ö Atanna -yö bɔ- 'ka wo -ta 'ö "dhabhliwɔn -nu -kë 'ka -a -nu -bha -nië -sü 'ö 'mɛ 'waa Zuifö 'ka- -nu kpö 'gü bha 'wo zun- -gen bho -sü -bha -a -nu -dhe.

13=Dhe 'ö =wa bo 'wɔn -nu bha- -nu -gen bho -sü 'ka 'yö Zakö -ya pö: «N dheebhang -nu, -ka ka "tu 'to n -ta! 14-Kɔ 'ö Atanna -yö ö -zu -kë 'ka -kɔ -blëesü wo 'mɛ 'waa Zuifö 'ka- -nu "piü kö -yö mɛ 'sü- -nu =zinng 'gü kö -wo kë ö -bha "segɔ 'güme -nu 'ka bha, Simɔ -yaa- -dhiang zë. 15'Sa waa- Atanna -wudhiüloome -nu 'wo gun yi 'bha 'ka -a -nu -wu -ya 'gü do, -a -gen -mü -dhe 'pë 'ö -ben zë -sü 'ka Atanna -bha 'sëëdhe 'gü Davi suu 'gü -në -nu -bu 'gü -ya -pö:

16 «Kwa Dëme -ya pö: 'Wɔn -nu ya =wa ziö,

a -dho n yee kë 'a nu
 'a Davi -bha 'kɔ 'ö wü bha- dɔ 'zü -deewo,
 'yö 'a- 'wü -dhe -nu bha- -nu -pë -kë kö -yö -gban 'zü -deewo.
 17 Kë "dhü kö me -kpɛa 'wo to -wo kwa Dëme 'gbluv mɔɔ-,
 kö 'a 'me 'waa Zuifö 'ka- -nu -dhe 'pö kö -wo kë n -bha 'ka.»
 18 'Wɔn -nu 'ö kwa Dëme -ya pö 'ö- yi -ya -gwëë bha -në 'wo bha.»
 19 'Yö Zakö -yö ö -bha -da -ta 'ö- pö: «Pë -nu 'wo bha -në- -nu -wɔn 'gü
 'yö -kë n 'gü -së kö 'kwa 'dho sëëbhodhe nu 'me 'waa Zuifö 'ka 'ö 'wo wo
 zuë" -slëë Atanna 'piü bha- -nu -dhe! 20 "Këe -ka -kwa 'sëëdhe bɔ- -nu -dhe
 kö 'kwa- pö 'wa 'dho -tuüppë -nu 'wo "saa- bho sië- 'ka -dhɔkëpë -nu "dhiü
 bha -në- -bhö! =Dhe -wo wo -dɪ 'kun -zua zë -sü -gɔ, =ya 'go mü 'zü wü
 'ö- =yɔɔn 'yii =wennng 'wa 'dho- -bhö. =Ya 'go mü 'zü 'wa 'dho pë =yɔɔn -bhö,
 21 -a -gen -mü -dhe 'ö go- 'ka kwa "bhema -nu -bha "tɔng -bha 'ö nu 'ö zun-
 'ka =dɛɛ -bha, -wo Moizö -bha 'tɔng- -wɔn dhiang -zë me -dhe 'pö- -gban
 "pɛpɛ 'gü -kpɛawo; -a -gen -mü 'zü =dhe Zuifö -nu -wo 'tɔng- bha- -wu -pö
 wo -bha -yakwëëkëgükɔ -nu 'gü -a -nu -glooyi -gban "pɛpɛ 'ka.

**'Sëëdhe 'wo- bɔ 'dhang -bho Yesu "dhiü -me
 -nu 'ö 'waa Zuifö 'ka -a -nu -dhe**

22 =Dhe 'ö =ya kë "dhü 'yö Yesu -bha yëkëme -nu 'wo Zedhizadhemö -pö
 'gü bha waa- me zizi -nu waa- 'dhang -bho Yesu "dhiü -me -nu 'wo to -a
 -nu =gban "pɛpɛ 'wo wo -wu -kë do 'yö 'wo -kɔ -yɛ me 'bha -nu -bha wo
 kpö 'gü, 'yö 'wo- -nu -da Pɔdhö waa- Banabasö -nu 'piü, 'yö 'wo- -nu bɔ
 Angtɔsö. 'Me 'wo -kɔ -yɛ -nu -bha "dhü bha -wa me do -dhe Zudë, 'yö
 'wo- 'tɔ kpɔ Bazabasö, 'yö 'wo- me do 'bha -dhe Sidhasö. Me =plɛ bha
 -wugbiindhe -gun -nu -gɔ -a -nu kpö 'gü. 23 'Sëëdhe 'wo- dɔ- -nu -gɔ kö
 -wo 'dho- 'ka Angtɔsö -me -nu -dhe bha -wa -ben -zë 'pö 'wo- pö: «Yesu
 -bha yëkëme -nu waa- me zizi -nu 'yi ka dheebhang 'ka 'yi Zedhizadhemö
 'plöë ya, 'ya 'me 'ka 'dhang bho Yesu -wɔn "dhiü "këe 'ö 'kaa Zuifö 'ka,
 'ö 'ka Angtɔsö -pö 'gü 'ɛɛn 'ö 'ka Siidhi -sɛ waa- Sidhisi -sɛ -nu 'gü bha
 ka =tua bho 'gbɛ. 24 'Ya- ma -dhe me 'bha -nu -wa 'go yi "piü yö =wa
 zuëkaankwëëdhe waa- -zɔgɔndhe 'gbɛ -da ka 'gü -a -nu zë -dhiang -nu 'ka,
 "këe 'yii -wu 'kpɔ- -nu -bha kö -wa kë "dhü (-wa -bho wo -dɪ 'gü). 25 'Wɔn
 'ö- -wɔn 'gü 'yö =dhe 'ö 'ya -ya -dhe do 'gü 'ö 'ya -dhe -ga 'wɔn bha- 'gü, 'ö
 yi -wu =ya kë- 'gü do 'yö 'yi me -da Baanabasö waa- Pɔdhö -a -nu -keng-
 'yi- -nu bɔ sië ka -dhe bha 'yö bha, -a -gen -mü =dhe me =plɛ bha- -nu -wɔn
 -yö yi -gɔ 'gbu-. 26 -A pö 'yi- wo "dhü bha- 'klɔɔ- -mü =dhe me =plɛ bha -në
 'wo woo- -tosea "dhiü dɔ kwa Dëme Yesu Klisi 'tɔ -wɔn 'gü. 27 =Dhe 'ö "dhü
 yi Zudë waa- Sidhasö -a -nu -bɔ ka -dhe kö 'wɔn -nu 'yi- -nu -ben zë sië
 'sëëdhe 'gü ya =në -wa 'gü pö ka -dhe 'kpakpadhö -së 'ka wo -dɪ "dhi. 28 -A
 -gen -mü =dhe -yö -kë yaa- Atanna -bha 'Nii- 'slüüslü -nu yi 'gü -së kö 'ya
 'dho =kwɛɛ- 'gbiin- "wɛɛ 'bha -ya ka -ta 'zü kö 'yii kë 'wɔn -nu 'ö 'tɔng- -ya

pö 'ka ka kwaa- -zü -a 'ka. ²⁹Yö -mü -dhe kö -tuüpe -nu 'wo 'saa- bho- 'ka -dhökëpe -nu 'dhiü bha 'ka 'dho- -bhö. =Ya 'go mü 'zü 'ka 'dho pe =yɔɔn -bhö. 'Ka 'dho wü 'ö 'wii- =yɔɔn =wennng -a -bhö 'pö, -a -gen -mü -dhe kö -'tung =ya 'to- 'gü, =ya 'go mü 'zü kö 'ka ka -dt 'kun -zua zë -sü -gɔ. 'Ya ka =tua bho 'gbɛ»

³⁰=Dhe 'ö =ya kè "dhü, 'yö 'wo wo =kwaa 'me 'wo bha- -nu -zü 'yö 'wo dho Angtiɔsö. =Dhe 'ö =wa 'dho =wa -loo mü 'yö 'wo 'dhang -bho Yesu "dhiü -me -nu "pepe =gban -dhe -dhe do 'gü, 'yö 'wo 'sëedhe bha- nu- -nu -dhe. ³¹=Dhe 'ö =wa bo- -wu pö -sü 'ka, 'yö- -nu zuë" =nii 'dhö -da =dedewo -a -nu faan dɔ -wu 'wo- bɔ- -nu -dhe bha- -wɔn 'gü.

³²Zudë waa- Sidhasö 'wo -kë Atanna -wudhiüloomɛ 'ka 'pö bha -wo dhiang -zë pinngdhö wo dheebhang -nu 'wo mü bha- -nu -dhe, 'ö 'wo- -nu faan dɔ -a -nu -bha -zu -yö Yesu -dhe -sü bha- -bha.

³³=Dhe 'ö =wa "tüng 'bha kè 'mü, 'yö 'me 'wo nu "dhü bha- me 'bha -nu 'wo wo -wu -da wo dheebhang -nu 'wo mü bha- -nu -dhe kö 'wo wo yee kè 'wo 'dho wo =taama. 'Yö 'wo wo -wu kpɔ- -nu -bha 'yö 'wo dho. ³⁴"Kee 'yö Sidhasö -zë 'yii "wɪ 'dho -wɔn -bha, 'yö to mü.

³⁵'Yö Pɔdhö waa- Baanabasö -nu 'wo to mü waa- me "wɛɛ 'gbe 'dhö, 'yö 'wo me =draan- Atanna -wu -bha, kö -wo 'wɔn -taɔng -së 'ö -kë kwa Dëme -wu 'ka bha- pö sië me -nu -dhe.

Pɔdhö waa- Banabasö -a -nu -kan "kwëë -kɔ

³⁶=Dhe 'ö "tüng 'bha =ya ziö, 'yö Pɔdhö -ya pö Banabasö -dhe: «-Kwa kwa yee kè 'kwa bɔ 'pö- -nu 'gü, kwa dheebhang -nu 'kwa kwa Dëme -wu pö- -nu -dhe bha- -nu "piü kö 'wo 'dho sië "dhiü -a -nu -bha -zu -yö Yesu -dhe -sü 'gü kö 'kwa- 'wɔn dɔ!» ³⁷-Yö -gun Banabasö "piü -dhe Zan 'wo- 'to kpɔ Makö bha -yö 'dho wo -keng-, ³⁸"kee 'yö Pɔdhö -zë 'yii "wɪ- -bha; -a -gen -mü -dhe 'ö gun "dhü kö =ya "kan- -nu -bha 'nu Panfidhi -sɛ 'gü. ³⁹'Yö -kë zaɔdhe 'kpüi- 'ka Pɔdhö waa- Banabasö -a -nu -zinng 'gü 'yö 'wo -kan 'kwëë-. 'Yö Banabasö -yö Makö sü ö -keng- 'yö 'wo -da 'yitagɔ 'gü 'wo dho 'sɛgɔ 'ö -ya -sü 'ka "yi =zinng 'gü 'wo- Siplë -dhe -kë bha- 'gü.

⁴⁰'Yö Pɔdhö -yö Sidhasö sü ö -keng- 'pö. 'Yö 'dhang -bho Yesu -wɔn "dhiü -me -nu 'wo Angtiɔsö -pö 'gü 'wo Pɔdhö waa- Sidhasö -nu -wɔn -loo kwa Dëme =kwɛɛ- kö -yö ö -zu kè- -nu "piü 'yö 'wo dho. ⁴¹'Yö 'wo bɔ Siidhi -dhe waa- Sidhisi -dhe -nu 'gü 'dhang -bho Yesu "dhiü -me -nu 'wo mü -a -nu faan dɔ -sü 'ka -zu -yö Yesu -dhe -sü -bha.

Timote -bha -dho Pɔdhö waa- Sidhasö -nu dɔ -kɔ

16 ¹'Yö Pɔdhö -yö dho 'ö -loo Dɛɛbö -pö waa- Dhitrö -pö -nu 'gü. 'Dhang -bho Yesu "dhiü -me do -yö -gun 'pö- bha- 'gü 'wo- -dhe Timote. -Yö -gun Zuifö dhebhɔ do 'ö 'dhang bho Yesu "dhiü -në- gbö 'ka, "kee 'yö- dë -zë 'ö -kë Glökö mi 'ka. ²'Dhang -bho Yesu "dhiü -me -nu 'wo

Dhitrö -dhe waa- Ikonö -dhe -nu 'gü -wo -gun "sædhe -së kè sië Timote bha- bha. ³Yö -kë Pɔdhö 'gü -së kö -yö ziö wo -keng-, 'yö- sü 'ö- -kë 'gbannë 'ka Zuifö -nu 'wo "së bha- 'gü bha- -nu -wɔn 'gü kö- -nu zuë" 'ya 'dho 'to -taama, -a -gen -mü -dhe me -gban "pepe- -gun 'wɔn dɔ sië -dhe -a dë- Glëkö mi 'ka, (yö -në- -wɔn 'gü 'yö 'yii 'dho 'gbannë 'gü ö 'nëdhe 'gü).

⁴Pödhe "pepe 'wo bɔ- 'gü, 'wɔn -nu 'ö Yesu -bha yëkëme -nu waa- me zizi -nu 'wo Zedhizadhëmö 'wo- pö bha -wa -gen -dɔ 'dhang -bho Yesu "dhiü -me -nu 'wo mü -a -nu -dhe 'pö kö -wa kè -dhe -kɔ 'wo- pö- 'ka bha- 'dhö. ⁵Atanna -bha 'kɔdhigümë -nu -gun faan -slɔɔ sië -zɔ -yö Yesu -dhe -sü bha- 'gü, 'ö- -nu 'bha 'dhö -da 'gü -kpeawo -dhekpaɔyi "pepe -gban- 'ka.

Pɔdhö "yan 'gü -da Troasö -pö 'gü -kɔ

⁶Atanna -bha 'Nii- "slüüslü 'yii "wɔ- -bha 'me 'wo bha- -nu -gɔ kö -wo -a -wɔ pö Azi -pö -nu 'gü. 'Wɔn 'ö- -wɔn 'gü 'yö 'wo bɔ Flizi -sɛ waa- Gadhatö -sɛ -nu -në- 'gü bha 'yö bha. ⁷Dhe 'ö =wa =loo Misi -dhe "sɔɔ, -yö -gun -nu "piü -dhe 'wo 'dho Bitini -sɛ 'gü, "kɛɛ Yesu -bha 'Nii- "slüüslü 'ö- -nu 'gü bha 'yii "wɔ- -bha -a -nu -gɔ kö -wo 'dho mü. ⁸-A -kë "dhü -sü bha- 'gü 'yö 'wo bɔ Misi -sɛ 'gü, 'yö 'wo 'dho 'wo =loo Troasö 'plöö "yitagɔ dɔdhe 'gü.

⁹=Dhe 'ö dɔ gbenɔ, 'yö Pɔdhö "yan 'gü 'dhö -da, 'yö gɔndënë do 'ö go Maseduanö -sɛ 'gü bha- yö kö -yö dɔ sië ö wëëdhö, 'yö =bheä Pɔdhö -dhe 'ö- pö: «-Bhö dɔ "gbu- kö 'i bɔ Maseduanö -sɛ 'gü kö i "ta yi -dhe!»

¹⁰=Dhe 'ö Pɔdhö "yan 'gü -ya -da -dhe -kɔ bha- 'dhö, 'yö 'yi- "slë =mɔɔ kö 'yi 'dho Maseduanö -sɛ 'gü, -a -gen -mü -dhe kö 'ya- 'wɔn dɔ -dhe Atanna -yö yi -dhe mü kö 'yi 'dho Yesu -bha 'wɔn -taɔng -së bha- 'ka 'me 'wo "pean bha- 'ka -në- -nu -dhe.

Dhidi 'dhang -bho Yesu "dhiü -kɔ

¹¹Yö yi -da "yitagɔ 'gü 'yi go Troasö 'yi dho vëëdhö 'pödhe 'wo- -dhe Samotrasö bha- 'gü. =Dhe 'ö -dhe -ya -kpaɔ, 'yö 'yi go 'mü 'zü 'yi dho Neapodhi -pö 'gü. ¹²Yö 'yi go mü 'zü 'yi "ta sü 'yi dho Fidhipö -pö 'ö Maseduanö -sɛ bha- 'pö- -bhlëësü -sü 'ka bha- 'gü. Fidhipö -pö 'gü -me -nu bha -wo -kë 'me 'wo go Wlɔmö -a -nu 'ka.

¹³Yi -dhekpaɔyi 'në 'bha -kë mü. 'Yö Zuifö -nu -bha -glooyi 'ka 'yi go 'pödhö 'yi dho 'pö -taama, "yi do 'bha bha- "kpung "dhiü. Yi 'dho -sü 'ka yi yi -zɔ -gɔn -dhe yi -dho Zuifö -nu -bha -bheä Atanna -dhe -dhe 'bha yö -mü. =Dhe 'yi dho 'yi =loo -dhe 'ö "dhü bha- 'gü, 'yö yi 'yaanu, 'yö 'yi dhiang zë dhong -nu 'wo gun =loo -sü 'ka 'ko -ta mü bha- -nu -dhe. ¹⁴Dhebho do 'wo- -dhe Dhidi 'ö go Tiatii -pö 'gü -yö -gun dhong -nu bha- -nu kpö 'gü. Dhidi bha -yö -kë yuga sɔ -zaɔndhö =bhlëësü 'ö -ma 'yaa wo- sɔng -bha bha- "dhɔɔdɔdhe 'ka, "kɛɛ -yö Atanna -bhlëë -ya. 'Yö kwa Dëme -ya zuë" "dhiü -pɔ kö -yö 'dhang bho Pɔdhö -wɔ bha- "dhiü. ¹⁵Yö 'wo waa- -bha 'kɔɔmë -nu -a -nu -bɔ Atanna 'ka -zu bho. =Dhe 'ö go 'mü, 'yö- pö yi -dhe:

«Dhe 'ö -kë -dhe 'ka 'dhang bho- "dhiü 'kpakpadhö -dhe mang -du 'pö 'ma 'dhang bho kwa Dëme -wɔn "dhiü bha, -ka nu n -gɔ 'kɔɔdhö kö 'ka -ya mü.» 'Yö -bhea yi -dhe -dedewo, 'yö 'yi -kpla 'pö- -gɔ 'yi dho.

Pɔdhö waa- Sidhasö -a -nu -da -kaso 'gü -kɔ

¹⁶Yi do 'ka kö yi 'dho sië Zuifö -nu -bha -bhea Atanna -dhe -dhe 'gü, 'yö 'yi -dhuëngdhe do 'ö 'yina yaa 'dhö- 'gü, 'ö- kë -sü 'ka -dëdhe 'ka bha- yö zian -ta. Dhebhɔ bha -ya -dëbɔ "dhü 'yö dho- -naɔ "gblügbliü bha- 'ka ö -gɔme -nu -dhe. ¹⁷Dhebhɔ bha 'yö -ya -ziö yaa- Pɔdhö -nu yi -keng- -sü -bha kö -yö "gbla sië 'ö- pö me -nu -dhe: «Gɔɔn- -nu ya -wo Atanna 'ö 'kpüi- 'ö -ziö -dhɔkëpë "pepe 'wo to- -nu -ta bha -në- -bha yëkëme -nu 'ka! -Wo me dha -zian -në -zɔn sië ka -dhe bha.»

¹⁸'Yö- -kë "dhü -dhekpawü 'gbe =dede 'ka. 'Yö 'wɔn bha 'ö =sië Pɔdhö -dhe 'yö =gbla 'yina yaa 'ö dhebhɔ bha- 'gü bha- -ta 'ö- pö: «A- -pö i -dhe Yesu Klisi 'tɔ 'gü, -bhö 'go dhebhɔ ya- 'gü!» 'Yö 'yina bha 'ö go dhebhɔ bha- 'gü -dhe do bha- 'gü.

¹⁹⁻²⁰=Dhe 'ö -dëdhe bha- -gɔme -nu =waa- 'wɔn dɔ -dhe 'wii 'dho 'wëëga 'bha =slɔɔ- "gblɔɔ 'piü 'zü, 'yö 'wo Pɔdhö waa- Sidhasö -nu kun, 'yö 'wo- -nu =gbiü wo "piü -zuudhö "dheedhe bha- 'gü, -gɔme "gblügbliü -nu 'wo go Wlɔmö 'wo gun 'pö bha- -gɔ "dhiü bha- -nu -kuu "dhiü. =Dhe 'ö =wa =loo mü, 'yö 'wo- pö- -nu -dhe 'wo- pö: «Me 'wo ya =wa nu me zuë" -kaan "kwëë -wɔn 'ka 'pödhe ya- 'gü! ²¹Zuifö -nu -mü "këë -wo me -nu draan- sië pë -nu 'ö kwaa- 'tɔng- -ya pö 'me 'kwa Wlɔmö -me -nu 'ka, 'kwa 'dho- kë "ëen 'kwa 'dho "wɔ- -bha bha- -bha kö -wa kë.» ²²'Yö me kpö 'kpüi- 'wo gun 'mü bha 'wo wo 'zü -kë do Pɔdhö waa- Sidhasö -nu -dhe. 'Yö -gɔme "gblügbliü -nu bha 'wo- pö woo- "tasüme -nu -dhe -wo sɔ bho- -nu -bha kö -wa -nu -ma -klangga 'ka.

²³=Dhe 'ö =wa =klangga -yan 'gbe =dede bho- -nu 'gü, 'yö 'wo- -nu -zuö -kaso 'gü. 'Yö -gɔme -nu -wa pö "yan -to -kaso -kɔ "dhi -bha -me -dhe kö -yö ö "tüng kë- -nu 'gü -së 'ka. ²⁴=Dhe 'ö "yan -to -kaso -kɔ "dhi -bha -me -ya -wɔ bha- ma, 'yö dho me =plë bha- -nu 'ka -kaso -kɔdhi 'dhe 'ö 'kɔɔdhö mü =yën =gblëen bha- 'gü, 'yö 'wo- -nu -gen -da "dhü "kplü 'gü.

²⁵=Dhe 'ö dɔ gbeng =zinng 'gü, 'yö Pɔdhö waa- Sidhasö 'wo -ya -bhea Atanna -dhe -sü -bha kö -wo "tan -nu bho sië- 'tɔ bhɔ -sü 'ka, kö -kasogüme -nu -kpea -wo wo "tu 'to sië- -nu -wɔ -bha. ²⁶-Wo -to -dhe bha- 'gü 'yö "së 'dhö -ya -zii -sü -bha "gbu- =dede 'ka, 'yö -kaso -kɔ bha- "kpan -gwë =gban 'dhö -ya vin -sü -bha, 'yö- "dhi =gban 'wo -pu, 'yö 'me 'wo gun -kaso 'gü mü bha- -nu =gban -bha lɔɔga -nu -wo go- -nu -bha. ²⁷'Yö "yan -to -kaso -kɔdhi -bha -me -yö -bö.

=Dhe 'ö- -dhe yö kö -kaso -kɔdhi =gban =wa "pu, 'yö ö -bha -siang sü kö 'ö ö -du zë, -a -gen -mü -dhe -yö ö -zɔ gɔn =dhe -kasogüme -nu =gban =wa =dua. ²⁸"Këë =dhe Pɔdhö =yaa- 'wɔn dɔ, 'yö =gbla ö faan =gban "pepe 'ka 'ö- pö: «'Bha 'dho i -du zë! Me =gban yi yö!»

29=Dhe 'ö =ya kē "dhü, 'yö "yan -to -kaso -kɔdhi -bha -mɛ bha 'ö- pö -wo peng 'pu, 'yö -bɛang sü 'ö dho- 'ka 'kɔdhi 'dhe 'ö Pɔdhö waa- Sidhasö 'wo- 'gü bha- 'gü -zii -sü 'ka, 'yö zun ö kpiö 'gü -a -nu -dhe. 30=Dhe =ya kē "dhü 'yö- -nu zun "kpenng, 'yö- -nu dhe" kpɔ 'ö- pö: «N Dème -nu, a -dho -a kē -dhe kö 'a dhasü =slɔɔ?» 31'Yö 'wo- -yɔ bɔ- -gɔ 'wo- pö: «-Bhö 'dhang bho yi Dème Yesu -wɔn "dhiü, =ya kē "dhü kaa- i -gɔ 'kɔɔmɛ -nu ka -dho dha.» 32'Yö 'wo kwa Dème -dhiang zē waa- -gɔ 'kɔɔdhö mɛ =gban "pɛpɛ -dhe. 33'Yö "yan -to -kaso -kɔdhi -bha -mɛ bha 'ö dho- -nu 'ka ö -gɔ "kweandhö gbeng do bha- 'gü, "tüng do bha- 'ka, 'yö- -nu -bha bhiē -nu -zu. -Wo -to -dhe do bha- 'gü 'pö 'wo waa- -bha 'kɔɔmɛ -nu -a -nu -bɔ Yesu 'ka -zu bho. 34'Yö dho Pɔdhö waa- Sidhasö -nu 'ka ö -gɔ 'kɔɔdhö 'yö -bhöpē -nu -nu -dhe. 'Yö göndēnē bha waa- -bha 'kɔɔmɛ -nu -a -nu zuē" =nii -yö -da =dedewo -a -nu -bha 'dhang -bho Atanna "dhiü -wɔn bha- 'gü. (=Dhe 'ö =ya kē "dhü, 'yö 'wo wo yee -kē 'zü -deewo 'wo dho -kaso -kɔɔdhö.)

35=Dhe 'ö -dhe =ya -kpaɔ, 'yö -gɔmɛ "gblügbliü -nu 'wo go Wlɔmö bha 'wo mɛ bɔ "yan -to -kaso -kɔdhi -bha -mɛ -dhe kö -wa pö- -dhe -yö ö kwaa- Pɔdhö waa- Sidhasö -nu -zü kö -wo 'dho. 36'Yö "yan -to -kaso -kɔdhi -bha -mɛ bha 'ö nu, 'yö- pö Pɔdhö -dhe 'ö- pö: «-Gɔmɛ -nu =wa wo -wɔ bɔ n -dhe, -wa -pö 'a n kwaa- ka -zü. =Dhe 'ö "dhü -ka kaa- 'dho wo ka -ta "puu 'ka!»

37"Kee 'yö Pɔdhö -ya pö mɛ 'wo- -nu bɔ bha- -nu -dhe 'ö- pö: «'Yi 'ö 'yi -kē Wlɔmö 'nē -nu 'ka ('ö- -dhe 'yaa- -bha -dhe -wo yi -ma, "ɛɛn -wo yi -da -kaso 'gü kö za 'yii yi zē bha) 'yö 'wo yi -ma mɛ "pɛpɛ =gban "yan "dhiü, 'yö 'wo yi -da 'zü -kaso 'gü bha 'yö 'wo- "piü =taamasü ya- 'gü -dhe -wo yi -wo "kpenng -bin 'gü bha -ee? -Abin, -a pö- -nu -dhe woo =dede -wo nu kö -wo yi bho -kaso 'gü!»

38=Dhe 'ö =ya kē "dhü 'yö 'mɛ 'wo bha 'wo dho Pɔdhö -wɔ bha- 'ka -gɔmɛ "gblügbliü -nu bha- -nu -dhe. =Dhe 'ö -gɔmɛ -nu bha 'wo- ma -dhe Wlɔmö 'nē -mü Pɔdhö waa- Sidhasö -a -nu 'ka, 'yö "suü 'dhö -da -nu 'gü 39'yö 'wo nu 'wo -wɔ -sē pö- -nu -dhe -a kē 'wo- wo "dhü bha- -wɔn 'gü, 'yö 'wo- -nu bho -kaso 'gü 'wo =bhea- -nu -dhe kö -wo 'go 'pödhe bha- 'gü.

40=Dhe 'ö Pɔdhö waa- Sidhasö =wa 'go -kaso 'gü, 'yö 'wo dho Dhidi -gɔ 'kɔɔdhö. =Dhe 'ö =wa "yan -kpan 'dhang -bho Yesu "dhiü -mɛ -nu 'wo mü -a -nu -bha, 'yö 'wo- -nu faan dɔ, 'yö 'wo go 'pödhe bha- 'gü 'wo dho.

Pɔdhö waa- Sidhasö -a -nu -kē Tesadhonikö -ko

17 1=Dhe 'ö =ya kē "dhü, 'yö 'wo bɔ Angfipodhi -pö waa- Apodhoni -pö -nu 'gü, 'yö 'wo dho 'wo =loo Tesadhonikö -pö 'ö Zuifö -nu -bha -bho "kwēē -kɔ do- gun- -bha bha- 'gü. 2'Yö Pɔdhö -yö dho Zuifö -nu -bha -bho "kwēē -kɔ 'gü -dhe -kɔ 'ö- -kē 'ka -kɛawo bha- 'dhö. 'Yö Atanna -wɔ 'ö -ben zē -sü 'ka bha- pö- -nu -dhe, 'yö- -nu -klang -kē 'ka Zuifö -nu -bha =glooyi -yaaga 'ka. 3'Yö- 'klɔɔ- -nu pö- -nu -dhe -dhe -kɔ 'ö -ben zē -sü 'ka- 'ka Atanna -bha 'sēēdhe 'gü -a 'dhö, 'yö- -zɔn -nu -dhe -dhe -yö -ben zē -sü 'ka -dhe Atanna -bha -Yame -dho sēē bho 'ö ga, 'ö go ga 'gü. 'Yö-

pö- nu -dhe -dhe: «Yesu 'a- -dhiang zë sië ka -dhe bha -në Klisi bha- 'ka.»
 4=Dhe 'ö =ya kë "dhü, 'yö me 'do 'do 'bha -nu -wo go- -nu kpö 'gü 'wo 'dhang
 bho Atanna -wu 'ö Pɔdhö -ya pö- -nu -dhe bha- "dhiü, 'yö 'wo -da Pɔdhö
 waa- Sidhasö -nu "piü. 'Yö me kpö 'gbe 'wo -kë Glëkö -nu 'ka 'wo Atanna
 -dhökëmë -nu 'ka 'pö waa- dhebho =bhlëësü -nu 'gbe -ta -gbe 'wo gun
 'pödhë bha- 'gü bha 'wo- -kë -kɔ do bha- 'gü 'pö.

5'Yö =drɔ -yö -da Zuifö -nu 'gü, -a -gen -mü =dhe me 'gbe -bha -dho Pɔdhö
 waa- Sidhasö -nu =keng- -sü 'ö =dhe -kɔ bha- 'dhö bha 'yii dhi- -nu -dhe. 'Yö
 'wo "wlaame -nu =kpaä 'kwëë- -kpinng -ta -dhe -nu 'gü, 'yö 'wo zun me -nu
 =bhluu "bhluu kë -sü -bha 'yö 'wo 'pö- -me -nu zuë" =kaan- 'ka "kwëë, 'yö 'wo
 nu gɔndënë do 'bha 'wo- -dhe Zazɔn bha- -gɔ 'kɔ "dhiëngdhö, Pɔdhö waa-
 Sidhasö -nu mɔɔ- -sü 'ka kö 'wo 'dho- -nu 'ka 'pö- dë -nu -kuu "dhiü.

6=Dhe 'ö 'wii- -nu yö 'mü, 'yö 'wo Zazɔn waa- 'dhang -bho Yesu "dhiü -me
 -nu 'bha -nu =gaan 'gaan -kë, 'yö 'wo dho- -nu 'ka 'pödë -nu -kuu "dhiü,
 'yö 'wo -ya "gbla -sü -bha 'wo- pö: «Me =wa "kpongtaame -nu =gban "pepe
 zuëkaankwëëdhe =gban 'gü bha =në =wa nu =wa =loo 'pö- ya- 'gü ya! 7"Këë
 Zazɔn =në- -nu =yëë bho -sü 'ka ö -gɔ 'kɔɔdhö! 'Me 'wo bha -dhe "pepe 'wo
 =loo- 'gü, -wo 'tɔng- -nu 'ö kwa -bha "sekɔɔnme 'kpii- -ya dɔ bha- =gban
 "pepe -see, 'ö 'wo- pö =dhe -gblüdë "wëë 'bha -yö -dhö 'wo- -dhe Yesu!» 8'Yö
 -wu bha 'ö -siö me kpö 'gbe waa- 'pödë -nu -dhe, 'yö- -nu zuë" -yö =wliü.
 9'Yö Zazɔn waa- 'me 'wo dho- -nu 'ka 'pö- dë -nu -kuu "dhiü bha 'wo pë go-
 -nu -dhe "këë kö 'wii 'wɔn yaa 'bha kë. =Dhe 'ö =wa bo pë -go -a -nu -dhe
 -sü 'ka, 'yö 'wo wo =kwaa- -nu -zü 'wo dho.

Pɔdhö waa- Sidhasö -a -nu -wo Beedhe -pö 'gü -kɔ

10=Dhe 'ö "bin =ya 'ma, 'yö 'dhang -bho Yesu -wɔn "dhiü -me -nu 'wo
 wo -wu kpö Pɔdhö waa- Sidhasö -a -nu -bha kö -wo "suü sië, 'yö 'wo dho
 Beedhe. =Dhe 'ö =wa =loo mü, 'yö 'wo dho Zuifö -nu -bha -yakwëëkëgükɔ
 'gü 'zü. 11Zuifö -nu 'wo gun 'pö- bha- 'gü, "tu -to Pɔdhö waa- Sidhasö
 -nu -wu -bha -sü -yö kë -dhi -a -nu -dhe 'ö =ziö- 'ka me 'dhe 'wo gun
 Tesadhonikö bha- -nu -ta. 'Yö 'wo Atanna -wu kun 'zü wo zuë" =gban- 'ka,
 'yö yi =gban "pepe 'ka 'wo -ya -dhe do 'gü, 'yö 'wo Atanna -wu 'ö -ben zë
 -sü 'ka bha- -wu pö kö =ya kë =dhe 'pë 'ö Pɔdhö 'dhö- pö sië bha 'ö tɛan- 'ka
 'wo- dɔ. 12'Yö Zuifö 'gbe 'wo go- -nu kpö 'gü 'wo 'dhang bho Yesu -wɔn
 "dhiü. 'Yö Glëkö dhong -nu =bhlëësü -nu waa- gɔɔn- -nu 'gbe -ta -gbe 'wo
 'dhang bho Yesu -wɔn "dhiü 'pö.

13"Këë =dhe 'ö Zuifö -nu 'wo Tesadhonikö =waa- ma =dhe Pɔdhö -yö
 Atanna -wu pö sië Beedhe -pö 'gü, 'yö 'wo nu 'wo -da 'pö- -me -nu -gɔ 'gü,
 'yö 'wo- -nu dɔ bhluuudhö, 'yö 'wo- -nu zü =yɔɔn Pɔdhö -nu -bha.

14=Dhe 'ö =ya kë "dhü 'yö 'dhang -bho Yesu "dhiü -me -nu 'wo Beedhe
 bha 'wo to 'wo dho Pɔdhö dɔ zian- =weeyi "dhiü -zian 'ka -beang 'ka, 'yö
 'wo -wu kpɔ- -bha 'yö dho. 15"Këë 'yö Sidhasö waa- Timote -zë -wo -to

Beedhe -pö 'gü. 'Me 'wo dho Pɔdhö -dɔ zian -dhe 'gü bha -wo -dho "dhü 'wo -loo Atenö 'plöö. 'Yö 'wo gun -na wo yee -kë 'wo nu naɔ 'ö Pɔdhö -ya dɔ -nu -gɔ kö -wa dɔ Sidhasö waa- Timote -a -nu -gɔ bha- 'ka -dhe -wo nu "vaandhö kö -wo -kpan ö -bha mü.

Pɔdhö -bha Atanna -wu pö Atenö -kɔ

16 "Töng 'ö Pɔdhö gun dɔ sië- 'ka Sidhasö waa- Timote -nu -gɔ Atenö bha, -a zuë" -yö -gí -dedewo, -a -gen -mü -dhe Atenö -pö bha -yö -gun pa -sü 'ka -dhəkëpë -në- 'ka. 17 'Yö Pɔdhö waa- Zuifö -nu waa- 'me 'waa Zuifö 'ka "këe 'wo -kë Atanna -bhlëëyame -nu 'ka bha wo -ya -dhe do 'gü Zuifö -nu -bha -bho "kwëë -kɔ 'gü, 'yö 'wo zaɔdhe -nu -da ('wɔn -nu 'ö -gban Atanna -wu -bha bha- 'gü). 'Yö Pɔdhö -ya -kpan 'pö 'me -nu 'ö- -nu -bha "dhe 'kpii- 'gü -dhe -nu 'gü yi "bu yi 'ö- 'ka, 'yö weng- -nu 'wo dhiang -nu zë 'pö. 18 'Yö 'wɔndɔmë 'bha -nu 'wo -wɪ 'wɔn 'ö Epikudhö -yö me -draan- 'ka bha waa- me 'bha -nu 'wo -wɪ Zɛnɔ -bha pë -zɔn -wu -bha, 'wo- -nu -dhe Sitoisien -nu bha 'wo -ya dhiang -zë Pɔdhö -dhe -sü -bha. 'Yö me 'bha -nu -wa pö: «Më -wɔn -në dhiang plëëdë ya 'ö- pö sië- ya?» 'Yö me 'bha -nu -wa pö 'zü: «Kë -dhe -yö -zlan -dee 'bha -nu -në- -dhiang zë sië bha!» -A -pö "dhü -gen -mü -dhe Pɔdhö -yö -gun Yesu -wɔn waa- me "bhu- -nu -bha -go ga 'gü -dhiang -në- zë sië. 19 'Yö 'wo- -da wo -keng- 'wo dho- 'ka me zizi -nu -bha -yakwëëkëdhe 'kpii- 'wo- -dhe -dhe Adheopazö bha- 'gü, 'yö 'wo- pö- -dhe: «I -mɔɔ -bha 'i Atanna -dhəkë -kɔ -dee 'dhe 'i me draan- sië- -bha bha- -zɔn yi -dhe -ee? 20 -A pö 'yi- wo "dhü bha- -gen -mü -dhe 'wɔn -nu 'i- pö sië yi -dhe bha 'yii- ma do, -yö yi "piü -dhe 'yi- -gen ma 'kpakpadhö.» 21 (Atenö -me -nu bha waa- -nu -bha -dhe -nu -a -nu -dhidhewɔn 'ö gun -në gun 'wɔn -taɔng -dee -nu bha- ma -sü waa- pö -sü -nu 'ka yi -gban 'ka.)

22 'Yö Pɔdhö -yö -wɪü 'yö dɔ me zizi -nu 'wo nu Adheopazö -ya "kwëë -ta bha- -nu wëëdhö 'ö- pö: «Atenö -me -nu, a- dɔ 'kpakpadhö -dhe Atanna mɔɔ- -me -dede -mü ka 'ka, ka -bha -zlan mɔɔ- -sü -yö -ziö -naa 'gü; 23 -a -gen -mü -dhe 'ö gun kö a -nië sië- 'ka -bha 'pödhe ya- 'gü kö a ka -bha -zlan -dhəkëdhe -nu -ga sië, a -dhe -dhəkëdhe do 'bha -yö 'ö -ben zë -sü 'ka mü -dhe: «Atanna 'ö 'yaa- dɔ -a -dhəkëdhe -në.» »Dhe 'ö "dhü a -nu kö Atanna 'ö 'ka- -dhəkë "këe 'ö 'kaa- dɔ bha 'a yö -në- -dhiang zë ka -dhe. 24 Atanna 'ö "dhü bha -në "kpungtaadhe waa- 'ö 'gü -pë -gban -da, yö -në "së waa- dhang- -nu -kɔɔnme 'ka, -a -kë "dhü -sü bha- 'gü, 'yaa -mɔɔ- -bha kö -yö -ya 'kɔ 'ö me "bhu- -nu -wa dɔ wo -kɔ "dhiü bha- 'gü. 25 "Ën 'zü, -a "tu 'yaa mebhudhe -kwengpë -bha, -a -gen -mü -dhe yö -në -tosea waa- "tëe -sü -nu waa- pë "pepe 'ö me "bhu- -nu -mawɔn -yö zun- -bha bha- nu- -nu -dhe. 26 'Yö -në gɔndënë do -da yi 'bha 'ka. Gɔndënë do bha -në "kpungtaame "pepe -gban 'wo go- 'gü. 'Yö 'ö bha -në- -kë 'zü kö 'me 'wo bha -wo -mɔɔ "kpungtaadhe "pepe -gban 'gü. 'Yö 'ö bha -në 'me 'ö- -nu

-da "dhü bha- -nu -ya -dhe -nu 'wo dho "dhiëng kë- -bha 'gü 'yö "tüng -nu 'wo dho- kë "kpong =taa -a -nu -naa -kan 'yö gun -na me "bhu- -nu kë. 27 Atanna -yö me "bhu- -nu -da kö -wo ö mɔɔ- -në- wo -kɔ "wla bho -sü 'ka -dhe 'gbe 'gü, 'bha mü "dhü -wo -dho ö yö. "Kee 'sa kö 'yaa me 'bha 'ka -gbleen. 28 -A -gen -mü -dhe kwa -bha -tosea kë -sü waa- kwa -bha -pa diëë -sü -nu waa- 'pë 'ö 'kwa- 'ka -a =gban- -go yö -në- 'gü. Ka -bha "dhikanme 'bha- -nu -wo -wu do -pö 'ö bho -wu 'a- pö sië ka -dhe bha- -bha 'wo- pö: «Atanna -në kwa -da, -a -wɔn 'gü -a -bha 'në -nu -mü kwa 'ka.» 29 -Dhe 'ö -kë -dhe kwa Atanna -bha 'në 'ka bha kö 'kwii 'dho kwa -zu 'gɔn -dhe Atanna -yö -dhe pë "bleen- 'wo- -pë -kë "sënnng waa- 'wëë- waa- -gwë -nu 'ka, 'ö 'me 'wo dɔ- -pë kë -dhe 'ka 'wo- kë sië- 'ka bha- 'dhö. (Pë -nu 'wo "dhü bha pë "bleen- "wɛwɛɛdhe 'ö "tɛɛ -sü 'yaa- -gɔ -në- -nu 'ka.) 30 "Tüng 'ö me =gban- gun- 'ka wo tiibha bha, 'yaa gun Atanna "piü -dhe 'ö za dɔ me -bha -a "tüng bha- 'gü, "kee =taamasü ya- 'gü, -yö me "pɛpɛ =gban -dhe sië -dhe "pɛpɛ =gban 'gü kö -wo wo kwaa wo -bha -tosea kë -kɔ yaa -nu bha- -nu -zü kö -wo nu ö "piü. 31 -A 'klɔɔ- -mü -dhe -yö -dhekpɔɔyi do -ya -sü 'ka kö -yö bɔ- 'ka me 'ö- -ya ('wo- -dhe Yesu) bha- -ta kö -yö za dɔ- 'ka "kpongtaame -nu -bha tɛan- -ta. 'Wɔn 'ö- -wɔn 'gü 'yö- yi to "dhiü 'yö 'me 'ö "dhü bha- bɔ, 'yö- bho ga 'gü kö me =gban -wa dɔ bha 'yö bha.

32 -Dhe 'ö Atenö -me -nu -wa 'wɔn 'ö -kë me "bhu- -nu -bha -go ga 'gü -sü 'ka bha- ma, 'yö me 'bha -nu 'wo =wɛɛ dɔ Pɔdhö -bha, 'yö me 'bha -nu -du 'pö 'wo- pö: «Yi -dho yi "tu 'to 'wɔn -nu 'i- pö sië bha- -bha yi "wɛɛ 'bha 'ka.

33 -Dhe 'ö =ya kë "dhü, 'yö Pɔdhö -yö -kan -nu -bha. 34 "Kee yö -zë =gban 'gü, me ga 'bha -wo kë -slɔɔ mü 'wo to -kplü -sü 'ka Pɔdhö -bha, 'ö 'wo 'dhang bho -wu -nu 'ö- pö bha- "dhiü. Denisi 'ö -kë zagɔbhome -nu 'wo Adheopazö mü bha- me do 'ka bha waa- dhebhɔnë do 'bha 'wo- -dhe 'pö Damadhisö bha waa- me ga "kee bha -zë -wo kë 'dhang -bho Atanna -wu "dhiü.

Pɔdhö -bha -kë Kodhengtö -kɔ

18 1 -Dhe 'ö =ya kë "dhü 'yö Pɔdhö -yö go Atenö 'yö -ziö 'ö dho Kodhengtö -pö 'gü, 2 'ö dho 'yö -kpan Zuifö mi do 'wo- -dhe Akidhasö, 'ö bho 'Pɔn -se 'gü bha waa- ö -bha dhebhɔ 'wo- -dhe 'pö Plisidhö bha- -nu -bha kö =wa 'go Itadhi -se 'gü =wa nu Kodhengtö, "kee kö- yi 'yii -gwëë -kö. -A -nu nu -gen -mü -dhe kö Itadhi -sɛkɔɔnme 'kpüi- 'wo- -dhe Klodö bha =yaa- pö Zuifö -nu "pɛpɛ =gban -wo 'go Wlɔmö -pö 'gü. 'Yö Pɔdhö -yö dho- -nu -dhe 'gü. 3 -Dhe 'ö -kë -dhe weng- -nu -a -nu kë -yë -yö -gun do, ('ö 'wo -kë sɔkɔdɔme 'ka bha), 'yö Pɔdhö -yö to- -nu -gɔ 'kɔɔdhö 'yö weng- -nu 'wo yë -kë wo "kwëë. 4 'Yö Pɔdhö waa- Zuifö -nu waa- Glekö -nu 'wo zaɔdhe -da wo "kwëë -kpɛawo Atanna -wu -ta Zuifö -nu -bha -bho "kwëë -kɔ 'gü -a -nu -bha =glooyi "pɛpɛ =gban 'ka. 'Yö Pɔdhö -ya 'gü pö- -nu -dhe ö faan =gban 'ka kö -wo "wɔ ö -wu -bha.

⁵=Dhe 'ö Sidhasö waa- Timote =wa 'go Maseduanö -wa nu, 'yö Pɔdhö -yö dho "töng -gban 'gü Atanna -wu -pö Zuifö -nu -dhe -dhe 'gü, kè "dhü kö 'ö- -zɔn -nu -dhe =dhe Yesu -nè Atanna -bha -Yame 'ka. ⁶"Kee -dhe 'ö Zuifö -nu 'wii "wɪ Pɔdhö -wu -bha, 'ö 'wo gun "si -nu bho siè- -gɔ, 'yö ö -bha -sɔ -kɔpɛng kö 'ö- -zɔn -a -nu -dhe =dhe -a -nu 'gü =ya see- kö- -dhe 'bha 'yii 'to ö -bha. 'Yö- pö- -nu -dhe "gbu- 'ka 'ö- pö: «Ya kè -dhe 'kii dha (Atanna -bha 'wɔn -bho me 'gü -sü -gɔ) kö -yö -sü kaa =dede -nè ka -bha kö 'yii 'to ma -zè n -bha. =Dhe 'ö "dhü =ya 'go =dɛɛ 'gü, a -dho n -kɔ "kan ka "dhiü 'a dho 'me 'waa Zuifö 'ka- -nu "piü kö 'a Atanna -wu pö- -nu -dhe.»

⁷=Dhe 'ö =ya kè "dhü, 'yö ö -kwa- -nu -zü 'yö dho gɔndènè do 'wo- -dhe Titusö Zutusö 'ö -kè Atanna -bhlëyame 'ka, 'ö- -bha 'kɔ- gun dɔ siè Zuifö -nu -bha -bho "kwëè -kɔ "sɔɔ bha- -gɔ 'kɔɔdhö. ⁸Klipusö 'ö -kè Zuifö -nu -bha -bho "kwëè -kɔ -gɔme 'ka bha -yö kè 'dhang -bho kwa Dème -wu "dhiü waa- ö -gɔ 'kɔɔme -nu 'dhö. 'Yö Kodhengtö -me -nu 'dhe 'wo Pɔdhö -wu ma 'pö, -a megbedhe 'wo 'dhang bho Yesu -wɔn "dhiü 'yö 'wo- -nu -bɔ Yesu 'ka -zu bho.

⁹Gbeng do 'gü 'yö Pɔdhö "yan 'gü -yö -da, 'yö kwa Dème -ya pö- -dhe: «"Suü 'ya 'dho i kè! -Bhö i faan dɔ dhiang -zè 'me 'wo -dhe ya- 'gü -a -nu -dhe -sü -bha, 'bha 'dho i "dhi ta, ¹⁰-a -gen -mü =dhe a i "piü. Me 'bha -kɔ 'yii 'dho =mɔɔ- -bha kö -yö i 'kun kö -yö pè yaa 'bha kè i 'ka; -a -gen -mü 'zü =dhe 'me 'wo dho bɔ n 'ka 'pödhe ya- 'gü -wo 'gbe!» ¹¹Pɔdhö -yö -kwe do waa- ö 'gbu =nè- -kè Kodhengtö -pö bha- 'gü kö -yö me -nu draan- siè Atanna -wu -bha.

¹²"Töng 'ö Gadhion- gun- 'ka -gblüdè 'ka Wlɔmö "se -gɔ 'dhe 'wo- -dhe Akai bha- 'gü bha- 'ka, 'yö Zuifö -nu 'wo wo zü ma 'koo Pɔdhö -dhe, 'yö 'wo- kun 'wo dho- 'ka "segɔdhiüme -kuu "dhiü 'yö 'wo- 'wɔn -da -dhe, ¹³'wo- pö-: «'Me ya =ya yii- 'tɔng- bho, -a -gen -mü -dhe -yö Atanna -dhɔkè -kɔ -dee 'ö 'yaa yii- 'tɔng- 'gü =nè- -zɔn siè me -nu -dhe!»

¹⁴=Dhe 'ö Pɔdhö yöö dhiang zè, 'yö Gadhion -ya pö Zuifö -nu -dhe: «Zuifö -nu 'ka ya, -Ka -dhe -ga! =Ya kè -dhe 'me 'ö ya -yö 'wɔn "gbu- "wɛɛ 'bha =nè- -kè, "ɛɛn 'wɔn yaa 'bha -mü 'nu, kö a -dho "töng 'sü 'a n "tu to- -bha -sè 'ka, ¹⁵"kɛɛ =dhe 'kö -kè -dhe zaɔdhe 'ö -gban -wu "wlaasü -nu -bha, "ɛɛn me 'tɔ -nu -bha, "ɛɛn ka -bha 'tɔng- -nu -bha -a -wɔn -mü bha, kaa =dede -kaa -gɔ bho. Ma -zè 'mii 'dho "wɪ 'wɔn suu -nu bha- -nu -gɔ bho -sü -bha!» ¹⁶'Yö ö -bha "sɔdha -nu bɔ 'yö 'wo- -nu -kè ö -bha zadɔkɔ bha- 'gü.

¹⁷=Dhe 'ö =ya kè "dhü, 'yö 'me 'wo -dhe bha- 'gü bha 'wo Sɔsitenö 'ö -kè Zuifö -nu -bha -yakwëèkëgükö -gɔme 'ka bha- kun, 'yö 'wo -ya -ma -sü -bha zadɔgükö "dhiengdhö mü, "kɛɛ 'yii kè Gadhion 'gü 'wɔn 'bha 'ka.

Pɔdhö bha ö yee -kè kö -yö 'dho Angtiosö -kɔ

¹⁸Pɔdhö kè -gwëè Kodhengtö -pö 'gü =dedewo 'dhang -bho Yesu "dhiü -me -nu 'wo mü bha- -nu "piü, 'yö gun -na 'ö -kwɛɛ 'dhu kö yö 'dhö, Plisidhö

'dhö, (-a -bha gɔn) Akidhasö 'dhö 'wo dho Siidhi -se 'gü. "Kee "sanni -wo 'dho, Pɔdhö -yö -to 'yitagɔ 'sü -dhe 'ö Kodhengtö, 'wo- Sangkle -dhe -kë bha- 'gü 'ö ö -gɔ "kpaabho -sö 'ö- -bhö Atanna -dhe bha- -wɔn 'gü (-dhe -ko 'wo- -kë 'ka -a -nu wɔ -kɔ 'gü -a 'dhö), 'yö 'wo gun -na -da 'yitagɔ 'gü.

¹⁹Yö 'wo dho 'wo -loo Efezö, 'yö Pɔdhö -yö -kan Plisidhö waa- Akidhasö -a -nu -bha -dhe bha- 'gü. 'Yö yö -zë 'ö dho Zuifö -nu -bha -bho "kwëë -kɔ 'gü, 'yö weng- -nu 'wo -ya -dhe do 'gü 'wo zaɔdhe -nu -da 'wɔn -nu 'wo -gban Atanna -wu -bha bha- 'gü. ²⁰Yö 'wo- pö- -dhe -yö -gloo wo "piü mü, "kee 'yö Pɔdhö 'yii "wɔ- -bha -a -nu -gɔ. ²¹Yö ö -wu -da -nu -dhe 'ö- pö: «Ya kë -dhe Atanna -ya "wɔ- -bha a -dho n yee kë 'zü -deewo 'a nu zun ka -dhe 'gü.» 'Yö -da 'yitagɔ 'gü 'ö go Efezö 'ö dho.

²²=Dhe 'ö dho 'ö -loo Sezadhe, 'yö -lɔɔ mü, 'yö -ta "sia- 'ö dho Zedhizadhëmö kö 'ö Atanna -bha 'kɔdhigüme -nu 'wo mü -a -nu -tua bho. =Dhe 'ö -yaa- kë "dhü, 'yö dho Angtɔsö.

²³=Dhe 'ö -ya "tüng 'në 'bha kë mü, 'yö dho 'yö -nië Gadhatö -se waa- Flizi -se -nu 'gü, 'dhang -bho Yesu "dhiü -me -nu faan dɔ -sü 'ka -a -nu -bha -zu -yö Atanna -dhe -sü -bha.

Apodhɔsö -bha -kë Efezö -dhe waa- Kodhengtö -dhe -a -nu 'gü -kɔ

²⁴=Dhe 'ö -ya kë "dhü 'yö Zuifö mi do 'wo- -dhe Apodhɔsö 'ö bho Dhezandri -pö 'gü bha 'ö -nu Efezö. 'Me bha -yö -gun "dhikanme 'ö Atanna -wu 'ö -ben zë -sü 'ka -a dɔ 'kpakpadhö -a 'ka. ²⁵Ya go mü 'zü 'wɔn 'ö -gban 'dhang -bho Yesu "dhiü -sü -bha, -yö kë- -draan 'gbe 'ka -dedewo. Yöö do bha 'zü -yö -gun "yangüsüme 'ka, 'yö Atanna -wu pö me -nu -dhe 'yö me -nu -draan teanwɔn -nu 'wo -gban Yesu -bha -a -nu 'ka, "kee 'wɔn 'dhe 'kö -gban me "zu -sü -bha bha- 'dhe 'ö -kë Zan -bha me -go 'wɔn yaa 'gü -zu bho -sü 'ka -në 'ö gun- dɔ sië doseng. ²⁶Yö zun dhiang zë -sü -bha -zugbandhe 'ka Zuifö -nu -bha -yakwëëkëgükɔ 'gü. "Kee -dhe 'ö Plisidhö waa- Akidhasö -wa -wu ma, 'yö 'wo- -dhe wo -gɔ 'kɔɔdhö 'yö 'wo Atanna -bha zian bha- 'dhe 'yii- dɔ -kö bha- -zɔn -dhe. ²⁷=Dhe 'ö -ya kë "dhü, 'yö Apodhɔsö -ya pö yöö 'dho Akai -se 'gü, 'yö 'dhang -bho Yesu -wɔn "dhiü -me -nu 'wo Efezö 'wo- faan dɔ 'dho -sü -bha, 'yö 'wo 'sëédhe -kë 'wo- dɔ- -gɔ kö -yö 'dho- 'ka me 'dhe 'wo mü -a -nu -dhe kö -wa -dhang bun -së 'ka.

=Dhe 'ö -ya 'dho -ya -loo mü, 'yö dho 'dhang -bho Yesu -wɔn "dhiü -me -nu 'wo mü -a -nu "piü, -gasite 'ö Atanna -ya -kë -dhe bha- -trɔɔn -yö kë -to 'me 'wo mü bha- -nu -bha -dedewo; ²⁸-a -gen -mü -dhe -yö -dɔ 'pö Zuifö -nu -ta ö -wu 'ka 'ö- pö- -nu -dhe -dhe 'pë 'wo- kë sië bha wo -dɔ -pö -në 'wo- wo sië, 'yö- -zɔn -nu -dhe -dhe Atanna -bha -Yame -zë -yö "dhü do, 'yö -mü Yesu -në- 'ka -dhe -kɔ 'ö -ben zë -sü 'ka- 'ka Atanna -bha 'sëédhe 'gü bha- 'dhö.

Pɔdhö -bha -kë Efezö -kɔ

19 ¹=Dhe 'ö gun kö Apodhɔsö -yö Kodhengtö, 'yö Pɔdhö -yö bɔ Azi -se 'gü 'ö dho 'ö -loo Efezö, 'yö -kpan 'dhang -bho Yesu -wɔn "dhiü

-mɛ 'bha -nu -bha mü ²'yö- -nu dhɛ" kpɔ 'ö- pö: «=Dhɛ 'ö 'ka 'dhang bho Yesu -wɔn 'dhiü, ka kɛ Atanna -bha 'Nii- "slüüslü -slɔɔ 'wɛ -ee?» 'Yö 'wo- pö- -dhɛ: «Yii- ma -zianwo do -dhɛ 'Nii- "slüüslü 'bha -yö -dhö (kö yöö 'to- slɔɔ -sü -nɛ- -bha). ³'Yö Pɔdhö -ya -nu dhɛ" 'bha kpɔ 'ö- pö: «"Kɛɛ -go 'wɔn yaa 'gü -zu bho -kɔ suu -mɛɛ 'pö 'ka- wo -sü 'ka 'sa?» 'Yö 'wo- -yɔ bɔ- -gɔ 'wo- pö: «-A suu 'dhe 'ö Zan -ya -dhiang zɛ bha -nɛ 'yi- wo.» ⁴'Yö Pɔdhö -ya pö- -nu -dhɛ: «'Mɛ 'wo -wɪ -bha 'wo go woo- =song yaa 'gü -nɛ Zan -ya -nu -zu, 'yö- pö Izraedhö -següme -nu -dhɛ -wo 'dhang bho 'mɛ 'ö dho nu ö zian -ta bha- -wɔn 'dhiü, -yö -gun 'wɪ siɛ- Yesu -nɛ- 'ka 'dhü bha. (=Dhɛ 'ö 'dhü, -a -dhɛa -bha -dhɛ 'ka -bɔ Atanna 'ka -zü bho Yesu bha -nɛ- 'to 'gü kö -ya -zɔn -dhɛ 'ka 'dhang bho- "dhiü.)»

⁵=Dhɛ 'ö 'wɔn bha =waa- ma, 'yö 'wo -wɪ -bha 'wo- -nu -bɔ Yesu 'ka -zu bho kwa Dɛmɛ 'tɔ 'gü. ⁶'Yö Pɔdhö -yö ö -kɔ kpa- -nu -ta ('yö -bɛɛa Atanna -dhɛ), 'yö 'Nii- "slüüslü -yö nu- -nu 'gü, 'yö 'wo -ya dhiang zɛ -sü -bha -wu "wɛɛ 'ö 'waa- dɔ -a 'gü, 'yö 'wo -ya -wu -nu 'ö Atanna -ya dɔ- -nu 'dhi -a pö -sü -bha mɛ -nu -dhɛ. ⁷'Mɛ 'wo 'dhü -a -nu -kpaɔ 'kwɛɛ- -sü -gun mɛ -kaɔng do ö ga -plɛ -nu 'sinma 'ka.

⁸'Yö Pɔdhö -yö dho Zuifö -nu -bha -bɔ "kwɛɛ -kɔ 'gü 'ö dhiang zɛ -zugbandhe 'ka. 'Yö 'wɔn 'ö -gban Atanna -bha -gblüädɛdhɛ -wɔn -bha -a -dhiang zɛ- -nu -dhɛ "su -yaaga 'ka, kö -ya "slɛ mɔɔ- siɛ ö zɛ -dhiang -nu 'gü kö mɛ 'ö dhiang zɛ siɛ- -nu -dhɛ bha -wo 'dhang bho -wu -nu 'ö- pö siɛ- -nu -dhɛ bha- "dhiü. ⁹"Kɛɛ mɛ 'gbe -wo wo gɔɔ- -kɛ "gbu- 'ö 'wii 'dhang bho Yesu -wɔn 'dhiü, 'yö 'wo -ya Atanna -bha zian -san kɛ -dhiang -nu zɛ -sü -bha mɛ 'gbe 'wo gun 'mü bha- -nu -dhɛ. 'Yö Pɔdhö -yö 'dhang -bho Yesu 'dhiü -mɛ -nu 'wo gun 'mü -a -nu sü ö -keng-, 'yö 'wo go mɛ kpö 'gü mü 'yö -ya Atanna -wu pö- -nu -dhɛ -sü -bha yi =gban "pepe 'ka 'kɔ 'kpɪi- 'ö göndɛnɛ do 'wo- -dhɛ Tidhanisö 'ö gun mɛ -nu -klang kɛ siɛ- 'gü bha- 'gü. ¹⁰'Wɔn bha -wa -kɛ "dhü -kwɛ -plɛ -nɛ- 'ka, 'wɔn 'ö- -wɔn 'gü 'yö mɛ "pepe 'wo bɔ Azi -sɛ 'gü, 'wo Zuifö 'ka, "ɛɛn 'ö 'waa Zuifö 'ka -a -nu -gban "pepe 'wo 'wɔn 'ö -gban kwa Dɛmɛ -bha -a ma bha 'yö bha.

Seva gbö -nu këwɔn

¹¹Atanna -gun "dhabhliwɔn "gblüglü -dede -nu kɛ siɛ Pɔdhö -kɔ -bha, ¹²'ö- -wɔn 'gü mɛ -nu -wo -ziö wɛɛdhö -sɔ -nu waa- sɔ "wɛɛdhɛ -nu 'ö =wa zun Pɔdhö kwi -bha -a -nu sü 'wo dho- 'ka "yuɛdhi -nu -dhɛ, 'ö 'wo- -yɛ wo kwi -bha, 'ö- -nu -bha "yua -yö bo "ɛɛn 'zü 'ö "yina yaa -nu 'wo go- -nu 'gü.

¹³Zuifö 'bha -nu -wo gun -niɛ siɛ "yina yaa -nu -kɛ mɛ -nu 'gü -sü 'ka 'pö, 'yö 'wo- pö wo- -kɛ Yesu 'tɔ 'gü, 'yö 'wo- pö "yina yaa -nu -dhɛ: «Yi- -pö ka -dhɛ Yesu 'ö Pɔdhö 'dhö- -dhiang zɛ siɛ bha- 'tɔ 'gü, -ka 'go 'mɛ 'wo ya- -nu 'gü!» ¹⁴('Mɛ 'wo 'wɔn suu bha- -kɛ bha Zuifö -nu -bha "saabhome 'kpɪi- do 'wo- -dhɛ Seva -a gbö -nu -nɛ gun- -nu 'ka, -wo -gun "saɔplɛ.) ¹⁵"Kɛɛ 'yö "yina yaa -ya pö- -nu -dhɛ yi do 'ka 'ö- pö: «A Yesu -dɔ, 'ö Pɔdhö

'dhö 'pë 'ö- 'ka 'a- do 'pö, "këe ka -zë de -mü ka 'ka?»¹⁶ 'Yö 'me 'ö "yina yaa -yö gun- 'gü bha 'ö -pö -nu -ta, 'yö- -ko -yö -ziö -a -nu -go 'yö -ya -a -nu -wëédhe bho -sü -bha =dedewo, 'yö 'wo =dua- -go 'wo -ziö -beang 'ka wo 'kpee- 'ka kö =wa -gi -nu wo, 'yö 'wo go- -go 'kɔɔdhö.

¹⁷Me "pepe 'wo gun Efezö, Zuifö -nu oo, 'me 'waa Zuifö 'ka oo, "këe me "pepe 'kö 'wo 'wɔn bha- ma, 'yö 'suü 'dhö -da -nu 'gü, 'yö 'wo -ya kwa Dëme Yesu 'tɔ =bhlëë -ya -sü -bha =dedewo 'ö -ziö 'ka -bleesü -bha -ta. ¹⁸'Yö me 'gbë -nu 'ö =wa kë 'dhang -bho Yesu -wɔn "dhiü -me -nu 'ka, 'wo nu me -nu wëédhë, 'yö 'wɔn yaa -nu 'wo- -kë 'yö 'wo gun -na 'dhang bho Yesu -wɔn "dhiü bha 'wo- -nu pö. ¹⁹'Yö 'me 'wo gun "zuvdhe këme -nu 'ka -nu wo, -a megbedhe 'wo nu 'sëédhe -be -nu 'wo gun "zuvdhe kë sië- -bha bha- 'ka, 'yö 'wo- -nu -gü me =gban "yan "dhiü 'pö kö- suu -yö 'go "sia- 'Yö 'sëédhe -be -nu bha 'wo- -nu song -zun ko "dhiü -kë, -a -nu song -kë "gbusü bha- -wɔn 'gü, 'yö- 'wëë- -da 'ko -ta -sü -yö -kë 'wëë- 'gbë =dede 'ka. ²⁰Kwa Dëme -wu -yö -pen -ko bha =në- 'gü 'gügbudhe 'ka, 'yö- -bha 'gügbudhe -wɔn.

Zuëkaankwëédhe -da Efezö -ko

²¹-Dhe 'ö 'wɔn -nu bha =wa bo -kë "dhü -sü 'ka, 'yö Pɔdhö -ya pö 'ö 'dho Zedhizadhëmö. -A 'dho -sü 'ka 'yö bɔ Maseduanö -dhe waa- Akai -dhe -nu 'gü, kö -yö 'ö -zu 'gɔn sië -dhe 'ya 'dho Zedhizadhëmö 'ö -dho dho 'ö =loo Wlɔmö 'pö. ²²-Dhe 'ö =ya kë 'dhü, 'yö 'ö -takunme -nu =plë, Timote waa- Edhatö -a -nu bɔ Maseduanö -se 'gü, 'yö 'yö -zë 'ö "tüng 'dede 'bha -kë 'zü Azi -se 'gü mü.

²³-A "tüng =dede bha- 'ka 'yö zuëkaankwëédhe 'kpii- -yö -da Efezö -pö 'gü kwa Dëme -bha zian bha- -wɔn 'gü. ²⁴Me do 'bha 'wo- -dhe Demetrisö, 'ö -kë -piöbhome 'ka bha 'yö =gebhɔ 'kpii- 'wo- -dhe Atemi bha- -dhökëgükɔ "bleen- -nu -kë 'wëë- 'ka. 'Yö -kë -a kë -yë 'ka, 'yö 'wëë- 'gbë =slɔɔ- 'gü, 'yö 'ö -bha yëkëme -nu =saa- bho- 'ka. ²⁵'Yö Demetrisö bha 'ö 'ö -bha yëkëme -nu waa- me 'bha -nu 'ö- -nu kë -yë 'dhö do bha- -nu -dhe -dhe do 'gü 'yö- pö- -nu -dhe: «Gɔɔn- -nu, kaa =dede ka- -do =dhe kwa -bha -naɔ -yö -go yë -nu 'kwa- kë sië ya =në- 'gü, ²⁶"këe 'me 'wo- -dhe Pɔdhö ya, 'pë 'ö- kë sië ya ka "yan -ya -dhe 'gü, ka "tu -ya 'gü 'pö. -A -gen -mü -dhe -ya -pö 'ö- pö -dhökëpë -nu 'ö me "bhu- -nu 'wo- kë sië bha 'waa Atanna =dede 'ka, 'yö me 'gbë =gban 'wo 'dhang bho sië- "dhiü, "këe 'yö 'yii kë Efezö -dhe doseng -zian 'ka, 'yö- -dhe -ya 'to 'dede kö =ya Azi -se ya- 'gü -me -nu "pepe =gban zuë" slëë- =yaa- -nu zuë" bho kwa -bha -zlan bha- -wɔn "piü. ²⁷'Wɔn bha 'yii kë =dhe -yö kwa -bha yë yöö do =në- -go zë, "këe kwa -bha -dhökëpë 'kpii- bha- -dhökëgükɔ =bhlëë 'bha 'yaa me 'bha -go 'zü, 'sa =ya kë "dhü 'pö kö -a -bha 'tɔbhɔdhe 'ö Azi -se "pepe =gban 'gü 'ö -da 'ka "kpungtaadhe "pepe =gban -bha bha -ya bo =naa bha.»

²⁸-Dhe 'ö 'me 'wo gun "tu 'to sië- -wu -bha bha 'wo -wu bha- ma, 'yö -siö -nu -dhe =dedewo 'yö 'wo -ya "gbla -sü -bha 'wo pö: «Efezö -me -nu, yi -bha Atemi -yö 'kpii-, -yö 'kpii-, -yö 'kpii-!»

²⁹Yö -bhlubhluudhe -yö -da 'plöö -dhe -gban 'pepe 'gü. 'Yö me -nu 'wo -ya Gayusö waa- Adhitakö -a -nu -gbiü -sü -bha wo 'piü -zuudhö. Me -plë bha -wo -go Maseduanö -se 'gü 'yö 'wo -kë Pɔdhö "tayɔɔ 'ka. 'Yö 'wo- -nu -gbiü 'wo dho- -nu 'ka -beang 'ka 'dhædhö. ³⁰Yö -gun Pɔdhö "piü 'nu -dhe 'ö -wo zang -ta kö 'ö -d -zɔn me kpö bha- -nu -dhe, "kæe 'yö 'dhang bho Yesu 'dhiü -me -nu 'wo gun mü bha 'wii 'wi- -bha. ³¹Yö me -bhlëüsü 'bha -nu 'wo go Azi -se 'gü 'wo gun Pɔdhö "taɔngdë -nu 'ka 'mü bha 'wo me bɔ kö -yö bhea" - -dhe kö 'ya 'dho 'dho "dhædhö.

³²Zuëkaankwëedhe 'kpii- -yö -da 'me 'wo -loo 'ko -ta bha- -nu kpö 'gü -kɔ bha -në- 'gü 'yö 'wo -ya -gbang dɔ -sü -bha. Me 'bha -nu 'wo 'gbla sië -kɔ 'bha 'gü kö me 'bha -nu -wo wo -bha wo sië -kɔ "wæe bha- 'gü 'pö. 'Ö me 'gbe =dede 'wo -kë -a -nu kpö 'gü 'ö 'wii- -nu -loo 'ko -ta -gen dɔ. ³³(Me 'bha -nu -gun -nu kpö 'gü mü 'ö 'wo wo -zɔ -gɔn =dhe Dhezandrö =në nu -gbang dɔ -sü bha- 'ka,) -a -gen -mü -dhe kö Zuifö -nu -wa -bliü sië wo "dhiü. =Dhe 'ö =ya kë "dhü, 'yö Dhezandrö -yö 'ö -kɔ "paa 'gü zë me kpö bha- -nu -dhe kö 'ö Zuifö -nu -ta 'kɔɔ- -dhiang zë- -nu -dhe. ³⁴"Kæe =dhe 'ö waa- 'wɔn dɔ =dhe Zuifö -mü 'ka, 'yö 'wo wo -wu -da 'kwëë- 'wo -ya 'gbla -sü -bha dhiang -wu dɔ 'ka, 'ö dho 'ö zun- 'ka "tüng kpö =dede -bha -a pö -sü 'ka =dhe: «Kpiidhe -yö Efezö -me -nu -bha Atemi -në- -gɔ! 'Kpiidhe -yö Efezö -me -nu -bha Atemi -në- -gɔ!»

³⁵=Dhe 'ö =ya kë "dhü 'yö 'wɔn 'yanbhɔme dɔ 'ö gun 'pödhe bha- 'gü, 'yö me kpö bha- -nu -ta ga, 'yö- pö- -nu -dhe: «Efezö -me -nu, me 'pepe =gban kwa- -dɔ =dhe 'me 'kwa Efezö -pö ya- 'gü =në 'kwa kwa -bha -zlan 'kpii- 'wo- -dhe Atemi bha- -dhɔkëgüko waa- 'blëen- 'ö go dhang- 'gü 'ö -pö bha- -maa kë -kɔ -së -kë. ³⁶Me 'bha 'yaa -dhö kö -ya zaa-. =Dhe 'ö "dhü kö -ka dɔ dingdhö kö 'ka -ka bo ka 'ko -nu -bhluu 'bhluu kë -sü 'ka! ³⁷-A -gen -mü -dhe 'me 'ka- -nu kun 'ka nu- -nu 'ka ya, 'wii -dhɔkëpë 'bha -kwaan kwa -bha -zlan -dhɔkëgüko 'gü 'een 'wii kwa -bha -zlan 'kpii- ya- -dhiang yaa 'bha zë. ³⁸-Ya kë =dhe Demetrisö waa- -bha yëkëme -nu 'wo 'dhö, za 'dhö- -nu -gɔ kö -wa dɔ me 'bha -bha, zadɔyi -yö -dhö. =Ya 'go mü 'zü, 'pö- -gɔdhiüme -nu -wo -dhö. =Dhe bha -në- -dhe 'dhö- -bha kö -wo 'dho woo- 'wɔn -nu 'ka- 'gü! ³⁹-Ya kë 'zü =dhe 'wɔn 'bha 'dhö- ka -gɔ kö 'ka- pö kö -ka 'dho- 'ka 'pödë -nu -kuu 'dhiü, wo -në 'wo 'tong- -nu dɔ, wo -në 'wo dho- bho 'koo, ⁴⁰'ka 'dho -gbang dɔ 'zü =dhe 'pë 'ka- dɔ sië bha- 'dhö, -a -gen -mü -dhe 'pë 'ka- -kë =dæe bha 'yaa -së. =Ya kë =dhe Wlɔmö -me -nu =wa 'wɔn bha- ma, -wo -dho za dɔ yi -bha 'wo- pö: «Yi "següme -nu zuë" "wlü sië "sekɔɔnme 'kpii- 'piü!» -A -gen -mü -dhe bho 'ö 'kwa- wo 'dhuu 'ö kwa -loo 'ko -ta ya- -gen kpenngdhö 'yaa 'dhö kö -yö za -së nu kwa -dhe. =Ya 'go mü -a 'kɔɔ- 'ö dho 'to me "tuudhö 'yaa kwa -gɔ kö 'kwa- pö.»

⁴¹=Dhe 'ö 'me bha =ya bo dhiang bha- zë -sü 'ka, 'yö- pö me kpö bha- -nu -dhe -wo 'dho, 'yö 'wo -kan 'kwëë-.

**"Ta 'ö Pɔdhö -yö dho- 'ka Maseduanö -se
waa- Glëkö -se -nu 'gü -a -dhiang**

20 ¹=Dhe 'ö me kpö bha =wa "kan wo 'kwëë-, 'yö Pɔdhö -yö 'dhang -bho Yesu 'dhiü -me -nu -dhe -dhe dɔ 'gü, 'yö- -nu faan dɔ -wu

'gbe 'ka. -Dhe 'ö -yaa- kē "dhü 'yö ö -wu -da -nu -dhe 'yö dho Maseduanö -se 'gü. ²Yö bɔ "se bha- 'gü 'dhang -bho Yesu "dhiü -mε -nu 'wo mü -a -nu faan dɔ -sü 'ka, 'yö Atanna -wu pö- -nu -dhe 'gbe =dede 'ka. -Dhe 'ö -ya kē "dhü, 'yö dho Akai -se 'ö Glekō -se 'gü bha- 'gü, ³yö "su -yaaga -kē "se bha- 'gü, -dhe 'ö -ya kē "dhü 'yö ö -kwεε- -nu dhu kö 'ö dho Siidhi -se 'gü 'yitagö 'gü 'nu, "kεε -dhe 'ö -yaa- ma -dhe Zuifö -nu =wa wo 'zü 'ma "kuv kö -wo ö zē, 'yö bɔ Maseduanö -se 'gü. ⁴Mε 'bha -nu yi kē -dho Pɔdhö -keng- Azi -se 'gü. 'Ö Pidhusö gbö 'wo- -dhe Sapatεε 'ö go Beedhe bha waa- Adhitakö waa- Sekundusö 'ö 'wo go Tesadhonikö waa- Gayusö 'ö go 'pö Dεεbö, Timote, Tisikö waa- Trofimö 'ö woo -dɪ 'pö 'wo -kē Azi -se 'gü 'nē =dede 'ka, ⁵'wo go 'pö yi kpö 'gü 'wo dho yi "dhiü Troasö -pö 'gü 'yö 'wo dɔ yi -gɔ mü.

⁶-Dhe 'ö troo 'wo- -dhe troo 'ö 'bluu- 'ö "seke 'yaa- -bha -a -bhö -ta troo bha -ya yēn, 'yö 'yi yi -bha -kwεε- dhu 'yi -da "yitagö 'gü Fidhipö, 'yö 'yi -dhekpacyi "sɔɔdhu -kē zian -ta 'yö 'yi -kpan -a -nu -bha Troasö -pö 'gü 'yö 'yi "dhɔɔgɔ do -kē mü.

Pɔdhö -bha "ta -totaamasü 'ö dho- 'ka Troasö -pö 'gü -a -dhiang

⁷Zuifö -nu =glooyi bha- 'ka yean" "piü, 'yö 'yi bho 'ko -ta kö 'yi -bhöpē "slüüslü -bhö. 'Yö Pɔdhö -yö dhiang zē mε kpö 'wo gun 'mü -a -nu -dhe. -Dhe 'ö -kē =dhe -yö -dho dho -a -tadhekpacɔ -ta bha, 'yö dhiang zē 'yö- to- 'ka "dhü, 'yö gbeng =zinng 'gü -yö -loo. ⁸-Dhangbha 'gbe -yö gun 'kodhi 'yi gun- 'gü 'kɔ -ta "dhüng 'gü bha- 'gü. ⁹'Nëglɔɔnnē "gbɔng do 'wo- -dhe Ötisö -yö -gun -ya -sü 'ka 'kɔ finetrö "dhiü kö Pɔdhö -yö Atanna -wu 'gü -gbleen bha- pö siē, 'yö yi -yö -ziö 'nëglɔɔnnē bha- 'ka, 'yö go finetrö 'ö 'kɔ -yaaga -naa 'ö 'kɔ -ta "dhüng 'gü, 'yi gun- 'gü bha- "dhiü 'ö -pö "sia- "kpenngdhö. 'Wo dho -kɔ -da 'gü kö =ya ga. ¹⁰-Dhe 'ö -ya kē "dhü 'yö Pɔdhö -yö -lɔɔ 'yö "gblēenu 'nëglɔɔnnē bha- -ta 'yö- sü 'ö- -wɔ ö -gbe 'gü 'yö- pö: «"Sika 'ya 'dho -da ka 'gü, (kö 'zü =ya ga "kεε -yö -dho -bö)!» ¹¹-Dhe 'ö -ya kē "dhü, 'yö -da 'zü -deewo "dhüng 'gü 'yö 'bluu- "kplükplü bho 'yö waa- 'dhang -bho Yesu "dhiü -mε -nu 'wo- -bhö. -Dhe 'ö -ya dhiang zē 'zü pinpindhö 'ö -ya 'to- 'ka "dhü 'yēnng- "tεε =ya -wo, 'yö -ziö 'ö dho. ¹²'Nëglɔɔnnē 'ö "dhü bha- "yaan -sü -nē 'wo dho- dɔ- -gɔ 'kɔɔdhö, 'yö -kē -a -nu -gban "pepe zuē" =niida -wɔn 'kpii- 'ka.

"Ta 'ö Pɔdhö -yö bɔ- 'ka Troasö 'ö dho- 'ka Midhe

¹³-Dhe 'ö -ya kē "dhü 'yö 'yi dho "dhiü, 'yö 'yi dho 'yi -da "yitagö 'ö dho yi 'ka 'pödhε 'wo- -dhe Asɔsö bha- 'gü bha- 'gü. -Dhe bha -nē 'yi dɔ Pɔdhö -gɔ -a 'gü, -a -gen -mü =dhe -ya -pö yi -dhe ö -dho bɔ ö -gen -ta. ¹⁴-Dhe 'ö -ya -kpan yi -bha mü, 'yö 'yi- sü yi -bha "yitagö 'yi nu- 'gü bha- 'gü, 'yö yi dho Mitidhenö -pö 'gü. ¹⁵-A -dhekpacyi 'ö dɔ- "piü kö 'ya 'go -dhe 'dhe bha- 'gü, 'yö 'yi dho- 'ka Sio -se 'ö -ya -sü 'ka 'yi =zinng 'gü bha- "sɔɔ.

-A -dhekpacyi 'dhe 'ö dɔ- 'dhe bha- "sɔɔ, 'yö 'yi dho "segɔ bha- 'dhe 'wo-Samɔsö -dhe -kë bha- 'gü. -A -dhekpacyi 'dhe 'ö dɔ- "piü 'zü 'yö 'yi dho 'yi -loo Midhe -pö 'gü. ¹⁶Yö Pɔdhö -ya pö 'yi bɔ Efezö -pö "sɔɔ, "kɛɛ kö 'ya 'dho 'daɔnnu mü kö "tüng 'ya 'dho zïö yi -ta Azi -sɛ 'gü. -A -zu -yö -gun dun sië, kë "dhü kö ö -kɔ -ya -sloo- -bha, kö 'ö kë Zedhizadhëmö Pangtökɔtö -niidadhe -yi -dede bha- 'ka.

**Pɔdhö -bha dhiang -zë zian -bho Atanna -bha me
-nu 'ka -me -nu 'wo Efezö -a -nu -dhe -kɔ**

¹⁷Dhe 'ö 'ya -loo Midhe -pö 'gü, 'yö Pɔdhö -yö me bɔ 'me 'wo zian bho sië 'me 'wo 'dhang bho Yesu -wɔn "dhiü Efezö -a -nu 'ka 'bha- -nu -dhe kö -wo nu. ¹⁸Dhe 'ö =wa nu =wa -loo- -dhe 'gü, 'yö- pö- -nu -dhe: «Kaa =dede ka n kë -kɔ 'a -kë 'ka ka -dhe 'gü 'ö sü yi -blɛɛsü 'a nu- 'ka Azi -sɛ 'gü -a -bha 'ö zun- 'ka =dɛɛ -bha bha- -dɔ. ¹⁹Dhe a ka yë -kë kwa Dëme -dhe -gɔ -dho -a -dhe "sia- -sü waa- "gbu 'ka 'ö 'a -ziö 'wɔn "gbu- -nu 'gü, 'ö Zuifö -nu 'wo =suasua -nu -ya n -bha kö =wa wo zü 'ma 'koo. ²⁰Kaa =dede ka- 'wɔn -dɔ 'kpakpadhö -dhe 'wɔn -nu 'wo =bhlëësü ka -bha dhasü -wɔn 'gü, 'mii- 'bha -bin ka -gɔ, "kɛɛ a ka -draan -a =gban "pɛpɛ -bha me kpö 'gü, "ɛɛn ka -bha 'kɔɔdhe -nu 'gü, ²¹'ö 'a Zuifö -nu waa- 'me 'waa Zuifö 'ka -a -nu -dhe n faan =gban 'ka kö -wo 'go woo- 'wɔn yaa 'gü kö -wo slëë- Atanna "piü, kö -wo 'dhang bho kwa Dëme Yesu -wɔn "dhiü. ²²Dhe 'ö "dhü, 'dho =në 'a- wo sië Zedhizadhëmö -dhe -kɔ 'ö 'Nii- "slüüslü -ya pö- 'ka n -dhe -dhe 'a- kë- 'ka gbonggbongdhö -a 'dhö ya. 'Sa 'wɔn 'ö dɔ sië n -gɔ mü 'maa- dɔ. ²³-A 'dhe 'a- -dɔ 'ö 'Nii- "slüüslü -ya -zɔn n -dhe 'pö- -nu 'a zïö sië- 'gü 'dɔɔndhö bha- -nu 'gü, 'yö -mü -dhe sëë "gbu- bho -sü waa- -dho -kaso 'gü -wɔn -yö n -bha. ²⁴"Kɛɛ =ya 'to mang -dede -zë n -bha -bha, n "tu 'yaa ma -tosea -wɔn -bha, 'maa- 'yö -zianwo -dhe 'pë 'ö- -wɔn 'dhö "gbu- -a 'dhö, 'wɔn doseng 'ö ma 'yaanu 'a n -zu gɔn- 'ka, -yö -mü -kɔ 'a dho- kë- 'ka kö yë 'ö n Dëme Yesu -ya "kplëng bho n -bha, 'ö -kë -a -bha 'wɔn -taɔng -së 'ö -gban Atanna -bha -gasite 'ö- -kë kwa -dhe -a -bha -a pö -sü 'ka bha 'a- "dhiü -ya -së 'ka, kö 'ö -dhe -beang 'dhö 'a- -ga 'sü bha -në- 'ka. ²⁵A kë -nu ka kpö 'gü 'ö 'wɔn 'ö -gban Atanna -bha -gblüédhe -bha 'a- pö ka -dhe, "kɛɛ a- -dɔ -taama -sü ya- 'gü -dhe me 'bha 'kii 'dho "yan -kpan n -bha 'zü, 'dho 'ö maa- wo ya- zian- 'gü. ²⁶'Wɔn 'ö- -wɔn 'gü, 'yö 'a- pö sië ka -dhe =dɛɛ n zuë" -gban 'ka -dhe 'me 'ö dho 'ö -dɔ -dheng, ('ö go zian 'ö- du 'yaa- -bha ya- -ta) ka -zinnng 'gü, kö ma -zë n -da -wɔn 'yaa -mü bha 'yö bha, ²⁷-a -gen -mü -dhe 'ta -kɔ 'ö Atanna -bha zian -ta 'ma- =gban pö ka -dhe 'mii- 'bha -bin ka -gɔ. ²⁸=Dhe 'ö "dhü, -ka ka -zu kë ka -dɔ "piü kö 'ka ka -zu kë Atanna -bha me -nu 'ö 'Nii- "slüüslü -yö ka -ya -a -gɔ "dhiü kö 'ka- -maa kë bha- "piü 'pö!

=Ya 'go 'yö -zë 'gü, -ka ka -zu 'to Atanna -bha me -nu "pɛpɛ 'ö 'yöö -dede 'ö- -nu dho 'ö -dɔ Gbö 'wo- zë -a =yɔɔn 'ka bha- "piü; ²⁹-a -gen -mü -dhe a- -dɔ -dhe =ya kë -dhe 'ma 'dho, 'me 'wo -dhe laa 'dhö 'ö 'wo dho "kpenng- kë

'me 'wo bha- -nu -gɔ, -wo -dho -da ka kpö 'gü. ³⁰Ö =suakëme 'bha -nu -zian 'wo =wli ka kpö 'gü -dhe =dede 'gü 'wo =sua -dhiang -nu zë kö 'wo 'dhang -bho Yesu "dhiü -me -nu bho zian 'ö pö 'aa- -bha bha- -ta kö -wo zio- -nu -keng-. ³¹Dhe 'ö "dhü -ka ka -zu 'to ka -dt 'gü! =Ya 'go mü 'zü kö 'ka- kè 'pö -dhe -kɔ 'a- -kè 'ka ka kpö 'gü -kwɛ -yaaga 'ka, 'ö n 'gü 'yii ga -dhio -dɔ ka -ta -sü 'ka 'yënn- 'gü waa- gbeng -nu -gban 'gü 'gbu 'ka bha- 'dhö.

³²Ma ka "kplëng bho Atanna waa- -bha -gasite -kè kwa -dhe -wu bha =në- -bha kö yö =në -yö ö "tüng kè ka 'gü =taama -sü ya- 'gü, -a -gen -mü =dhe yö =në- -kɔ dho =mɔɔ- -bha kö -yö ka gba faan 'ka, -ɛɛ 'zü kö -yö -dhekpaɔ dhia" saan 'ö- -ya 'me 'wo bɔ ö 'ka- -nu -gɔ bha -yö ka -bha nu. ³³N zuè" 'yii bho me 'bha -bha 'wëë- -bha, "ɛɛn -a -bha sɔ 'bha -bha ka kpö 'gü. ³⁴Kaa =dede, ka- -dɔ =dhe yë =në 'a- -kè n -dt -kɔdhe 'ka 'yö 'pè 'ö yaa ma -mɛ -nu yi -mawɔn -yö zun- -bha 'a- -slɔɔ. ³⁵A- -kè "dhü kö 'a- -zɔn =në- wo ka -dhe =dhe kwa -dho yë kè =dhe -kɔ bha =në- 'dhö kö 'kwa me 'ö "sü 'yaa- -nu -dhe -a -nu -ta 'kun, kö kwa -zu -yö -bö kwa Dëmɛ Yesu yöö =dede 'ö -wu 'ö- pö =dhe: «I -bha pè -nu mɛ -dhe -sü -yö i -bha 'wɔn -sè 'kpii- 'ka 'ö =zio- mɛ -bha pè -nu i -dhe -sü -ta bha- -ta».

³⁶=Dhe 'ö Pɔdhö =ya bo 'wɔn -nu bha- -nu pö -sü 'ka, 'yö waa- 'me -nu 'wo bha 'wo zun wo kpiö 'gü 'yö 'wo =bheä- -dhe. ³⁷=Dhe 'ö =wa bo -bheä Atanna -dhe -sü 'ka, 'yö 'wo wo -wu -da Pɔdhö -dhe 'gbu 'ka, -a -gen -mü =dhe Pɔdhö -dho -gun -a -nu kè sië =dedewo.

³⁸-A -nu =gban wëë'- -gun -siö -sü 'ka =dedewo -a pö 'ö Pɔdhö -ya wo -nu -dhe =dhe 'yii 'dho ö "yan -kpan wo -bha 'zü bha- -wɔn 'gü. 'Yö 'wo dho- -dɔ zian -dhe 'gü 'wo dho 'wo -loo 'yitagɔ "dhiü.

Pɔdhö -dho Zedhizadhëmö -kɔ

21 ¹=Dhe 'ö 'ya "kan yi 'kwëë-, 'yö 'yi -da 'yitagɔ 'gü 'yi dho vɛedhö Kɔsö -sɛ 'gü. =Dhe 'ö- -tadhe =ya -kpaɔ, 'yö 'yi dho Dhɔdö -sɛ 'gü, 'yö go mü 'zü 'yi dho Patadha 'plöö. ²'Yö 'yi -kpan 'yitagɔ do -bha mü kö -yö 'dho sië Fenisi -sɛ 'gü, 'yö 'yi go- -blɛsü bha- 'gü, 'yi -da 'dhe bha- 'gü 'yi dho. ³'Yö 'yi dho 'yi -loo "segɔ 'ö -ya -sü 'ka 'yi =zinng 'gü 'wo- -dhe Siplè bha- "sɔɔ, 'yö 'yi "segɔ bha- yö yi "dhiü =dhe 'pɛ 'dhö, "kɛɛ 'yö 'yi- to yi -kwaa- 'gü, 'yö 'yi dho Siidhi -sɛ 'gü 'yi dho 'yi -loo Tii -dhe 'ö "yitagɔ dho -kwɛɛ- lɔɔ- -bha bha- 'gü 'yö 'yi -lɔɔ mü.

⁴=Dhe 'ö 'ya -kpan 'dhang -bho Yesu "dhiü -mɛ -nu -bha -dhe bha- 'gü, 'yö 'yi "dhɔɔgɔ do -kè -a -nu 'piü mü. 'Yö 'Nii- "slüüslü -yö 'dhang -bho Yesu -wɔn "dhiü -mɛ -nu 'wo mü bha- -nu -zu -bö =dhe 'wɔn 'gbu- -dho Pɔdhö =slɔɔ Zedhizadhëmö, 'yö 'wo- pö- -dhe 'ya 'dho 'dho. ⁵"Kɛɛ =dhe 'ö 'ya "dhɔɔgɔ do kè- -nu 'piü mü, 'yö 'yi dho yii- "ta 'ka "dhiü, 'yö waa- -nu -bha dhebho -nu, -a -nu -bha 'në -nu 'wo dho yi -dɔ zian- -dhe 'gü, 'yi go- 'ka 'plöö 'yi dho 'yi -loo "saan "dhiü, 'yö 'yi zun yi kpiö 'gü =weeyi "dhiü -dhe bha- 'gü 'yö 'yi =bheä Atanna -dhe. ⁶=Dhe 'ö 'ya -wu -da yi 'ko -nu -dhe "pɛpɛdhö, 'yi -da sië "yitagɔ 'gü kö woo -dt 'pö -wo 'dho sië wo -gɔ 'pödhö.

⁷Yö 'yi dho yii- 'ta 'ka 'dhiü 'yi go Tii 'yi dho Pötodhemaisö -pö 'gü 'yö 'yi yi dheebhang -nu 'wo Yesu -bha 'ka mü -a -nu -tua bho, 'yö 'yi -dhekpacyi do -kë -a -nu "piü mü 'pö.

⁸Dhe 'ö -dhe -ya -kpaɔ, 'yö 'yi dho yi "dhiü, 'yi dho 'yi -loo Sezadhe -pö 'gü, yi -da Fidhipö 'ö -kë Atanna -wu pö -me 'ka bha- -gɔ 'kɔɔdhö -dhe bha -në- 'gü 'yö 'yi -wɔ mü. Fidhipö bha -yö -kë me "saɔplɛ 'ö Yesu -bha -klangdhiü -nu 'wo -kɔ -yɛ -nu -bha Zedhizadhemö "tüng 'bha 'gü bha- me do 'ka. ('Wɔn 'ö -gban me "saɔplɛ bha- -nu -wɔn -bha -yö mü.) ⁹Fidhipö bha- 'dhu 'nëdhiäng -nu -yiisiö 'ö 'waa gwaan- -bha -wo -gun mü 'ö 'wo gun Atanna -wu "dhiü -loo sië -nu wo. ¹⁰Yi -dhekpacyi 'gbɛ -du "püpü -kë mü, 'yö Atanna -wudhiüloomɛ do 'wo- -dhe Agabusö bha 'ö go Zude -se 'gü 'ö nu yi "piü. ¹¹Yö Pɔdhö -bha kwi "pɛn sü, 'yö 'ö -gen waa- 'ö -kɔ -nu -lö 'ka 'yö- pö: «'Wɔn 'ö 'Nii- "slüüslü -ya pö n -dhe 'yö ya, -ya pö: «'Mɛ 'ö- -bha kwi "pɛn 'dhö n -gɔ ya, Zuifö -nu -dho -a -lö Zedhizadhemö -dhe -kɔ ya- 'dhö, 'yö 'wo- dɔ 'mɛ 'waa Atanna dɔ- -nu -gɔ».

¹²Dhe 'ö -wu -nu bha 'ya- ma, 'yö yi 'dhö, Sezadhe -mɛ -nu 'dhö, 'yi -kpaɔ yi 'kwë- 'yi -bheɔ Pɔdhö -dhe =dedewo kö 'ya 'dho 'dho Zedhizadhemö, ¹³"kɛɛ 'yö- -yɔ bɔ yi -gɔ 'ö- pö: «-Mɛ -në -kë 'yö 'ka "gbu bɔ kö n zuë" "dhiü -yö "tɛɛ? =Ya 'to ma -zë n -bha -bha n -lö -sü 'yaa n 'gü 'wɔn 'bha 'ka, 'kö 'ma ga -zian -në- wo Zedhizadhemö n Dɛmɛ Yesu -wɔn 'gü -yö n 'gü -sɛ.» ¹⁴"Kɛɛ -dhe 'ö -kë -dhe Pɔdhö 'yii "wɔ yi -wu -bha, 'yö 'yi yi bo -a -bho zian- -sü 'ka, 'yö 'yi- pö kwa Dɛmɛ dhɔɔbhaa -yö kë.

¹⁵Dhe 'ö 'ya -dhekpacyi 'bha kë 'mü, 'yö 'yi yii- -kwɛɛ- -nu dhu 'yö 'yi dho Zedhizadhemö. ¹⁶'Dhang -bho Yesu "dhiü -mɛ -nu 'bha -nu -wo kë -go Sezadhe, 'wo dho yi dɔ zian- -Wo -dho 'wo yi dɔ gɔndënë do 'ö- 'dhang -bho Yesu "dhiü -yi -ya =gwëë 'pö 'wo- -dhe Nasɔn 'ö go "sɛgɔ 'ö -ya -sü 'ka 'yi -zinng 'gü 'wo- -dhe Siplɛ bha- 'gü bha- -gɔ 'kɔɔdhö 'yö 'yi -wɔ mü.

Pɔdhö -bha -wo Zakö -dhe 'gü -kɔ

¹⁷Dhe 'ö 'ya 'dho 'ya -loo Zedhizadhemö, yi dheebhang -nu 'wo Yesu -bha 'ka mü -wo yi -dheng bun zuë" -nii -da -sü 'ka -dedewo. ¹⁸Dhe 'ö -dhe -ya -kpaɔ, 'yö yaa- Pɔdhö -nu 'yi dho Zakö -gɔ 'kɔɔdhö, 'yö mɛ zizi -nu 'wo Yesu -bha 'ka Zedhizadhemö 'wo nu 'wo -kpan yi -bha mü. ¹⁹Yö Pɔdhö -ya -nu -tua bho, 'yö 'ö "kpläng bho- -nu -dhe, 'yö pë -nu 'ö Atanna -ya -kë -a -kɔ -bha 'mɛ 'waa Zuifö 'ka- -nu kpö 'gü bha- -gban "pepe sü 'do 'do 'yö- -gen bho- -nu -dhe.

²⁰Dhe 'ö =waa- -wu -nu bha- ma, 'yö 'wo -ya Atanna 'tɔ bho -sü -bha. 'Yö 'wo- pö Pɔdhö -dhe: «Yi dheebhang, -bhö -dhe -ga, pë -nu 'wo kë sië Zedhizadhemö -pö ya- 'gü -a -nu -ga 'wo ya: Zuifö -nu "gblü drun 'gbɛ =dede =wa 'dhang bho Yesu -wɔn "dhiü. -A -nu -gban "pepe -wo Atanna -bha 'tɔng- -nu 'ö Moizö -ya nu kwa -dhe bha- -kun -së 'ka. ²¹"Kɛɛ -wa ma -sü 'ka -dhe i- -pö Zuifö -nu 'wo -pɛn -sü 'ka "sɛgɔ "wɛɛwɛɛ -nu 'gü bha- -nu -dhe 'i- -nu

-klang -kè 'ka -dhe -wo wo kwaa- 'tɔng- 'ò Moizö -ya nu kwa -dhe bha- -zü, -ya 'go mü 'zü 'wa 'dho woo- 'nè -nu kè 'gbannè 'ka 'zü "ɛɛn 'wa 'dho Zuifö -nu -bha -toseadhe kè -kɔ 'wo bhɔ- 'gü bha- 'bha kè 'zü. ²²-Dhe 'ò "dhü 'kwa- kè -dhe? -Ya kè -dhe kö 'mè 'wo bha -wo i nu -wɔn ya- ma, -wo -dho bho 'ko -ta 'gbe =dede 'ka. ²³-Dhe 'ò "dhü, 'pè 'yi dho- pö i -dhe bha -bhö -a kè! Gɔɔn- -nu -yiisio 'wo "plüün bho -sü 'ka Atanna -dhe -wo kwa kpö 'gü -dhe ya- 'gü. ²⁴-Dhe 'ò "dhü -bhö 'dho kö keng- -nu 'ka =mɔɔ- 'gü kö -bhɔkwëédhe 'ò- -nu "plüün -bho 'gü -wɔn kè -sü "dhiütodhe 'gü, 'ò dho- -nu kè "slüüslü Atanna wëédhò bha 'ka- kè ka "kwëë. "Kɛɛ kö bhi =nè 'i- -nu -bha "saa- -bho 'ka -pè -nu song nu kè "dhü kö -wo wo -gɔ bho. Yö =nè -ya kè "dhü 'yö me =gban- dho- 'wɔn dɔ -dhe 'pè 'wo- pö i -bha bha- -bha 'yaa teanwɔn 'ka, "kɛɛ i i -bha -tosea -kè Moizö -bha 'tɔng- 'kun -sü 'ka. ²⁵-A 'dhe 'ò -gban 'mè 'waa Zuifö 'ka "kɛɛ 'ò =wa 'dhang bho Yesu -wɔn "dhiü -a -nu -bha -bha bha, 'wɔn 'yi- dɔ 'wɔn -sè 'ka -a -nu -bha 'ka, yi- -ben zè -sü 'ka 'sëédhe 'gü 'yi- bɔ- -nu -dhe. Yö -mü -dhe kö 'wa 'dho -bhöpè -nu 'wo "saa- bho- 'ka -dhɔkèpè -nu "dhiü bha- -bhö. -Ya 'go mü 'zü 'wa 'dho pè =yɔɔn -bhö, -ya 'go mü 'zü wü 'ò- =yɔɔn 'yii =wɛnng 'wa 'dho- -bhö, -a -gen -mü =dhe kö- "tung 'yii "pu. -Ya 'go mü 'zü kö -wo wo -dɔ 'kun -zua zè -sü -gɔ.

²⁶-Dhe 'ò =ya kè "dhü 'yö Pɔdhö waa- gɔɔn- -nu -yiisio bha 'wo dho. =Dhe 'ò -dhe =ya =kpaɔ, 'yö- -nu =gban 'wo -gɔ "kian 'gü -sü bha- -kè. 'Yö Pɔdhö -yö dho Atanna -dhɔkègüko 'gü, 'yö "tüng 'ò- -nu -bha -kè "slüüslü -troo dho yèn- 'ka bha- pö mɛ -nu -dhe, -a -gen -mü =dhe yi 'ò bha -nè 'ò dho- -nu -bha "saabhokapè -nu song nu- 'ka.

Pɔdhö 'kun -kɔ

²⁷-Dhe 'ò- -dhekpaɔyi "saɔple ('ò 'wɔn 'wo- "plüün bho Atanna -dhe bha- 'gü -wɔn -kè 'gü -dhekpaɔyi 'ka bha) bha =ya yèn =gban wo, 'yö Zuifö -nu 'bha -nu 'wo go Azi -se 'gü bha 'wo "yan -kpan Pɔdhö -bha Atanna -dhɔkègüko 'gü, 'yö 'wo mɛ 'gbe zuè" =wlü Pɔdhö "piü 'yö 'wo- kun. ²⁸Yö 'wo -ya "gbla -sü -bha "gbu- 'ka 'wo- pö: «Izraedhö -mɛ -nu, -ka nu yi -dhe! -Ka -dhe -ga, 'mè 'ò ya =nè -da "se "piü 'yö bɔ -dhe =gban "pepe 'gü 'yö mɛ =gban "pepe =draan 'ò pö: «'Mè 'yi -kè Izraedhö -mɛ -nu 'ka oo, Moizö -bha 'tɔng- -nu oo "ɛɛn Atanna -dhɔkègüko ya yi 'bha yi -bhlèë 'yaa 'dhö!» -Ya 'go mü 'zü =ya -da 'mɛ 'waa Zuifö 'ka- -nu 'ka kwa -bha Atanna -dhɔkègüko ya- 'gü, 'yö- -kè "dhü -sü bha- 'gü =ya -dhe 'ò "slüüslü bha- -kè -dhiisü.» ²⁹['Pè 'ò -kè 'yö 'wo- pö "dhü bha yö -mü =dhe kö =wa wo "yan -kpan Trofimö 'ò go Efezö 'ò 'yaa Zuifö 'ka bha- -bha Pɔdhö -keng- 'pö- bha- 'gü, 'yö -kè -nu 'gü -dhe =ya -da 'ka Atanna -dhɔkègüko ('ò 'mè 'waa Zuifö 'ka 'waa -da mü bha-) 'gü.]

³⁰Yö =bhluubhluudhe -yö -da 'pödhe bha- 'gü zian =gban 'ka, 'yö 'pögüme -nu 'wo go -beang 'ka -dhe =gban 'gü 'wo nu 'wo Pɔdhö kun 'yö 'wo- =gbiü -zuudhö 'wo go- 'ka Atanna -dhɔkègüko 'gü, 'yö 'wo- "kwëë

ta -dhe do bha- 'gü. ³¹-Wo -to -a "slë mɔɔ- -dhe 'gü kö 'wo Pɔdhö zë, 'yö- taɔng -yö dho 'ö -kpan Wlɔmö -mɛ -nu -bha "sɔdha -gɔmɛ 'kpii- 'ö gun Zedhizadhëmö mü bha- -bha -dhe -bhlubhluudhe -ya -da 'pöme -nu =zinng 'gü. ³²-Wo -to -dhe do bha- 'gü 'yö "sɔdha -gɔmɛ 'kpii- bha 'ö ö -kɔwölöome -nu waa- "sɔdha -nu -dhe, 'yö 'wo dɔ -bɛang -bha 'wo dho mɛ kpö 'gü mü. =Dhe 'ö Zuifö -nu bha- -nu "yan -ya -kpan -lame 'kpii- bha waa- ö -bha mɛ -nu bha- -nu -bha, 'yö 'wo wo bo Pɔdhö -ma -sü 'ka.

³³=Dhe 'ö -ya kɛ "dhü 'yö "sɔdha -lame 'kpii- bha 'ö- pö ö -bha -yame -nu -dhe -wo Pɔdhö 'kun kö -wa -lö löɔga -ple 'ka, 'ö "dhü bha kö yöö -dede -ya =yɔɔn Pɔdhö 'ka klöö-. =Dhe 'ö -ya kɛ "dhü 'yö 'mɛ 'wo gun -klëën -sü 'ka Pɔdhö -zü bha 'yö- -nu dheɛ" kpɔ 'pɛ 'ö- -kɛ waa- 'pɛ 'ö- 'ka -a ka. ³⁴"Kɛɛ kö mɛ 'bha -nu -wo "gbla sië -kɔ "wɛɛ 'gü mɛ kpö bha- 'gü, 'ö mɛ 'bha -nu -wo -gbla -kɔ "wɛɛ 'bha 'gü 'pö. =Dhe 'ö "sɔdha -gɔmɛ 'kpii- bha -yaa- dɔ -dhe 'mɛ 'wo bha- -nu -wu 'yaa do, 'yö- pö ö -bha -ya -mɛ -nu -dhe -wo 'dho Pɔdhö 'ka wo -gɔ "yasa 'gü. ³⁵"Tüng 'wo -loo- 'ka 'kɔ bha- "kpan gɛnng- -dhe -dede 'gü bha kö "sɔdha -nu -wa Pɔdhö -ya wo -kɔ -ta "dhüng 'gü -dhe -nɛ- 'gü mɛ kpö bha- -nu -gɔ kö =wa bhɔ- zë -dhe -bha. ³⁶-a -gɛn -mü -dhe kö mɛ "pɛpɛ 'wo gun- -nu -kɛng- bha -wa pö sië -dhe -wa zë -nɛ- wo.

Pɔdhö -bha ö -dɪ -ta kɔɔ- za dɔ -kɔ

³⁷=Dhe 'ö "sɔdha -nu 'wo 'dho sië Pɔdhö 'ka wo -gɔ "yasa 'gü, 'yö dhiang zë- -nu -bha -lame 'kpii- bha -dhe glɛkö -wu 'gü 'ö- pö: «A -mɔɔ -bha 'a 'wɔn do 'bha pö i -dhe "wɛ -ee?» 'Yö "sɔdha -lame 'kpii- bha 'ö Pɔdhö dheɛ" kpɔ 'ö- pö: «'Kwo! I glɛkö -wu -ma? ³⁸=Dhe 'kö 'i glɛkö -wu ma kö Ezitö mi 'ö mɛ -nu zuɛ" =wliü -dee ya- 'gü "segɔdhiüme -nu "piü 'ö dho mezëme "gblü -yiisiö 'ka "tung -ta bha 'yaa -mü i 'ka 'sa!» ³⁹'Yö Pɔdhö -ya -yɔ bɔ- -gɔ 'ö- pö: «-Abin, 'mɛ bha 'yaa -mü n 'ka, ma -zë Zuifö -mü n 'ka, Taasö -pö 'ö Sidhisi -se 'gü 'ö- 'tɔ- bhɔ bha- 'gü -nɛ -mü n 'ka. =Dhe 'ö "dhü -bhö dɔ "gbu- kö 'a dhiang zë mɛ kpö ya- -nu -dhe.» ⁴⁰'Yö "sɔdha -lame 'kpii- bha 'ö -wu -bha. 'Yö Pɔdhö -yö dɔ 'kɔ 'wo gun 'dho sië- 'ka -a 'gü bha- "kpan -ta 'yö ö -kɔ "paa 'gü zë 'mɛ 'wo bha- -nu -dhe. =Dhe 'ö -dhe -ta -ya dɔ dingdhö, 'yö dhiang zë- -nu -dhe -a -nu -dɪ -wu 'ö -kɛ eblö -wu 'ka bha- 'gü 'ö- pö:

22 ¹«N dheebhang -nu, n dɛ -nu, -ka ka 'tv 'to n -takɔɔwu 'ö maa- pö ka -dhe ya- -bha -sɛ 'ka!»

²=Dhe 'ö =waa- yö kö -yö dhiang zë sië- -nu -dhe -a -nu -dɪ -wu -nɛ- 'gü, 'yö -dheɛ -yö -ga -a -nu -ta -kpeawo do. 'Yö Pɔdhö -yö dhiang zë- -nu -dhe 'ö dho- 'ka "dhiü 'ö- pö: ³«Zuifö -mü n 'ka, a -bhɔ Taasö -pö 'ö Sidhisi -se 'gü bha- 'gü, "kɛɛ a n "klu -bho Zedhizadhëmö -dhe ya -nɛ- 'gü Gamadhiedhö -kɛng-. -Yö n =klang -kɛ 'pö kwa "bhɛma -nu -bha 'tɔng- bha- 'kun -kɔ 'ka =dedewo. -A -wɔn 'gü mang -dɪ 'pö Atanna -bha yɛ kɛ -pɛng -yö -gun n -ta =dhe -kɔ 'ö 'ka- 'ka =dɛɛ bha- 'dhö. ⁴'Ö 'a 'mɛ 'wo -da kwa Dɛmɛ -bha zian -dee ya- -ta, -a -nu -wɛɛdhe bho 'a- -nu zë- 'ka, 'ö 'a

gɔɔn- -nu waa- dhong -nu kun 'a- -nu -da -kaso 'gü. ⁵"Saabhome -gɔme 'kpii- waa- me zizi -nu 'wo Zedhizadhemö -dhe ya- 'gü -wo -mɔɔ -bha 'wo -kë n 'sɛɛ- 'ka =dhe 'pë 'a- pö sië bha tɛan- -mü, "ɛɛn 'zü -sua -mü. Woo =dede bha -wo kë 'sëedhe -nu -nu n -dhe kö 'a dho- 'ka kwa dheebhang -nu 'wo Zuifö 'ka Damasö -pö 'gü -a -nu -dhe, 'yö 'a dho -dhe bha- 'gü kë "dhü kö 'a 'dhang -bho Yesu -wɔn "dhiü -mɛ -nu 'wo mü -a -nu 'kun 'a nu- -nu 'ka Zedhizadhemö kö -wa -nu -wëedhe bho.

⁶-Dhe 'ö 'ma -da zian -ta 'ma 'dho 'ma =loo Damasö -dhe "sɔɔ, "kɛɛ kö 'yënnɔ- =ya -ya me -gɔ =zinng 'gü, 'yö to 'yö -dhepuudhe -ziisü 'bha -yö go 'dhang 'gü 'yö sɔ n -ta -dhe me mɛ- me "yan zë, ⁷'yö 'a -pö "sia-, 'yö n "tu -yö -da -wu do 'gü kö -ya pö sië: «Sɔdhö, Sɔdhö, -yö mü -dhe 'yö 'i n "yënnɔ =gbaɔn "dhü?» ⁸'Yö 'a- dhe" kpɔ 'a- pö: «Bhii 'de 'i bha =zɔɔ?» 'Yö- pö n -dhe: «Mang Yesu 'a go Nazadhetö i- "yënnɔ =gbaɔn sië bha ma -mü.» ⁹'Me 'wo gun n -keng- -wo kë -dhepuudhe bha- yö 'pö, "kɛɛ -wu 'kö dhiang zë n -dhe bha 'wii- ma -së. ¹⁰'Yö 'a- dhe" kpɔ 'zü 'a- pö: «-Më =në 'i- "piü 'a- kë, n Dëme?» 'Yö kwa Dëme -ya pö n -dhe: «-Bhö "wlü kö 'i 'dho Damasö! -Dhe bha =në 'pë 'ö Atanna "piü kö 'i- kë 'wo dho- pö i -dhe -a -dhe 'gü.» ¹¹-Dhe 'ö -kë -dhe n "yënnɔ -yö -tröö -dhepuudhe 'ö- 'bhü -yö -gban n "yan 'gü bha- -wɔn 'gü, 'yö n "tayɔɔ -nu 'wo -kɔ -da n =kwɛɛ- 'yö 'wo dho n 'ka Damasö 'plöö.

¹²Gɔndënë do -yö -gun 'pödhe bha- 'gü 'wo- -dhe Ananiasö 'ö -kë Atanna =bhlëeyame 'ka 'ö kwa -bha 'tɔng- -nu kun 'pö, 'ö Zuifö -nu 'wo 'pö- bha- 'gü 'wo- -dhiang -së zë. ¹³'Yö nu 'yö -kpan n -bha 'yö- pö n -dhe: «Sɔdhö, n dheebhang, i "yan 'gü -yö "pu 'zü -deewo!» 'Yö to mü 'yö n "yan 'gü 'dhö -pu 'yö 'a- yö. ¹⁴'Yö- pö n -dhe: «Kwa "bhema -nu -bha Atanna -yö i -sü kö 'i 'pë 'ö- dhɔɔbhaa 'ka =në- dɔ, kö 'i i "yan -kpan me doseng 'ö pö 'aa- -bha ('ö- Gbö 'ka) bha- -bha kö 'i -wu 'ö go- "dhi bha- ma. ¹⁵-A -gen -mü -dhe i -dho kë -a "sɛɛ- 'ka kö 'wɔn -nu 'ö i "yan 'dhö -da 'gü, "ɛɛn 'ö i "tu 'dhö- ma bha 'i- pö me =gban "pepe -dhe. ¹⁶-A -wɔn 'gü i -dɔ -më -gɔ? -Bhö "wlü kö -wo i -bɔ Yesu 'ka -zu bho kö -yö i -bha 'wɔn yaa -nu -mawɔn 'to kö 'i kwa Dëme -dhe kö -yö nu i -dhe.

¹⁷-Dhe 'ö =ya kë "dhü, 'yö 'a n yee -kë 'a nu Zedhizadhemö. 'Yö yi do 'ka kö a bhea" sië Atanna -dhe -a -dhɔkëgüko 'gü, 'yö n "yan 'gü 'dhö -da, ¹⁸'yö 'a kwa Dëme yö, 'yö- pö n -dhe: «-Bhö -a kë "dhü "vaandhö kö 'i 'go Zedhizadhemö -pö ya- 'gü, -a -gen -mü -dhe -a 'gü -mɛ -nu 'wii 'dho wo "tu 'to n -wɔn 'i- pö sië- -nu -dhe bha- -bha.» ¹⁹'Yö 'a- -yɔ bɔ- -gɔ 'a- pö: «N Dëme, woo =dede -wa dɔ =dhe a gun 'dho sië Zuifö -nu -bha -yakwëëkëgüko -nu 'gü, 'ö 'a 'dhang -bho i "dhiü -mɛ -nu kun 'a- -nu -da -kaso 'gü, 'ö 'a- 'slë =mɔɔ 'ö 'wo- -nu -ma -nu wo =klangga 'ka. ²⁰-Ya 'go mü 'zü Etienö 'ö -kë i "sɛɛ- 'ka bha 'wo gun- zë sië kö a mü, 'ö 'a 'me 'wo gun- zë sië bha- -nu faan dɔ, 'a- pö 'wɔn -së =në 'wo- -kë bha, 'ö ma =në 'a -kë -a -nu -bha sɔ -kwɛɛ -wɛɛ bho -mɛ 'ka -zianwo. ²¹"Kɛɛ 'yö kwa Dëme -ya pö

n -dhe: «Bhò 'dho, -a -gen -mü -dhe a i -bɔ mü -gblɛn 'me 'waa Zuifö 'ka -në- -nu "piü.»

²²Me kpö bha -wo wo "tu -to Pɔdhö -wu -bha 'ö dho 'ö dhiang -nu bha-gban "pɛpɛ zë, "kɛɛ -dhe 'wo- -bha -dho 'me 'waa Zuifö 'ka- -nu "piü -wɔn bha- ma, 'yö 'wo zun 'gbla -sü -bha 'wo- pö: «-Ka me bha- zë kö -yö 'go me 'yan "dhiü bha. -Tosea këme 'yaa -mü!»

²³Yö 'wo -ya 'gbla -sü -bha kö -wo woo- -bha sɔ -nu -kpɛng 'ö -wo -bobi -nu -pɛn 'tɛng- -ta =dhe -kɔ 'ö 'me 'wɔn =ya -siö -a -nu -dhe 'wo- -kë 'ka -a -nu -gɔ 'sɛ 'gü bha- 'dhö, (-a -gen -mü -dhe -wa -pö Pɔdhö -ya -da Atanna "dhiü).

²⁴Yö "sɔdha -gɔmɛ 'kpɪi- -ya pö ö -bha "sɔdha -nu -dhe -wo 'dho Pɔdhö 'ka -a -nu -gɔ 'yasa 'gü kö -wa -ma -klangga 'ka kö 'pɛ 'ö- -wɔn 'gü 'ö me kpö bha 'wo 'gbla sië "dhü -a -keng- bha kö -ya -gen pö, 'yö 'wo dho- 'ka -a -nu -gɔ 'yasa 'gü. ²⁵"Kɛɛ =dhe 'ö =waa- -lö kö -wa -ma -klangga 'ka, 'yö Pɔdhö -ya pö "sɔdha -nu -gɔmɛ 'ö gun mü bha- -dhe: «Ma 'a -kë Wlɔmö 'në 'ka ka -mɔɔ -bha 'ka n -ma kö za 'bha 'yii n zë -ee? -Wa -kë "dhü kwa -gɔ "sɛ ya- 'gü "wɛ -ee?» ²⁶=Dhe 'ö =yaa- -wu bha- ma, 'yö dho 'ö- pö "sɔdha -lame bha- -dhe 'ö- pö: «Me kwaa- -ma bha =zɔɔ bha Wlɔmö 'në =dede -mü -wa! =Dhe 'ö "dhü i -dho -a kë -mü -dhe kö 'ya 'dho kë i -gɔ 'wɔn 'ka?» ²⁷Yö "sɔdha -lame 'kpɪi- =dede bha 'ö nu Pɔdhö "piü 'yö- dheɛ" kpɔ 'ö- pö: «Wlɔmö 'në -mü i 'ka tean- 'ka -ee? -Ya kë =dhe Wlɔmö 'në 'dhö i 'ka tean- 'ka -bhö -a pö n -dhe.» Yö Pɔdhö -ya pö- -dhe: «=Iin, Wlɔmö 'në -mü n 'ka.» ²⁸Yö "sɔdha -lame bha 'ö- pö Pɔdhö -dhe: «Ma -zë ma -kë Wlɔmö mi 'ka -sü bha 'wëë- 'gbɛ =në 'a- go. Yö Pɔdhö -ya pö- -dhe: «Ma -zë 'mii 'wëëga 'bha nu kö 'a gun -na kë Wlɔmö 'në 'ka, a -bho 'ka.» ²⁹=Dhe 'ö bo- pö "dhü -sü 'ka, 'ö dho "kan ö -ta kö 'me 'wo gun- "piü -dhe 'wo- -ma bha =wa "kan- -zü 'kwëë-. =Dhe 'ö "sɔdha -gɔmɛ 'kpɪi- -dɪ 'pö 'ö- 'wɔn dɔ =dhe 'wɔn 'ö 'yaa këwɔn 'ka 'ya- kë, 'ya Pɔdhö 'ö Wlɔmö 'në 'ka -a -lö lɔɔga 'ka, 'yö "suü 'dhö -da 'gü, (-a -gen -mü -dhe kö =yaa- 'wɔn dɔ =dhe Wlɔmö -me -nu -bha -gblüdë 'kpɪi- -dho -mɔɔ- -bha 'ö za dɔ ö -bha 'wɔn 'ö- -kë bha- -wɔn 'gü).

Pɔdhö -bha -dho zagɔmɛ 'kpɪi- -kuu "dhiü -kɔ

³⁰"Kɛɛ -dhe 'ö -kë =dhe -yö -gun "sɔdha -gɔmɛ 'kpɪi- bha "piü -dhe 'ö 'pɛ 'ö- -wɔn 'gü Zuifö -nu 'wo za -ya sië Pɔdhö -bha bha- -gen ma bha- -wɔn 'gü, =dhe 'ö -dhe =ya -kpaa, 'yö -piö lɔɔ' bha bho Pɔdhö -bha, 'yö- pö "saabhome -nu 'gblüglü -nu waa- Zuifö -nu -bha 'wɔngɔtame -nu 'wo -ya 'kwëë- -nu -kë bha- -nu -dhe -wo -ya -dhe do 'gü. =Dhe 'ö =ya kë "dhü 'yö 'wo Pɔdhö sü 'wo nu- 'ka wo kpö 'gü.

23 ¹Yö Pɔdhö -yö ö "yan "dhiü =wlü -ya 'kwëë- këme -nu bha- -nu -ta, 'yö- pö- -nu -dhe: «N dheebhang -nu, -tosea 'a- -kë Atanna wëëdhö 'ö nu 'ö zun- 'ka =dɛɛ -bha bha a- -kë n zuë" 'puu 'ka.» ²Yö

"saabhome -nu -gɔme Ananiasö -ya pö 'me 'wo gun Pɔdhö "sɔɔ -a -nu -dhe -wo Pɔdhö "tu -ma. ³Yö Pɔdhö -ya pö- -dhe 'ö- pö: «'Wɔn 'i- -kë n 'ka bha Atanna -në dho i -bha "yɔɔ bho, =flüme. -Wo i -dhe kö 'i za dɔ n -bha teanwɔn =në- -ta =dhe -kɔ 'ö kwaa- 'tɔng- -ya pö- 'ka -a 'dhö, "kɛɛ 'pë 'ö 'tɔng- -ya pö 'bhaa yö -zë kë, =flü =në 'i- -kë sië, i- -pö me -nu -dhe -wo n -ma "wɛɛwɛ kö- -gen 'bhaa 'dhö -më -wɔn 'gü?» ⁴Yö 'me 'wo gun Pɔdhö "sɔɔ mü bha 'wo- pö- -dhe 'wo- pö: «I "si bho sië Atanna -bha "saabhome -nu -gɔme 'kpii- -në- -gɔ bha =zɔɔ -wa!» ⁵Yö Pɔdhö -ya -yɔ bɔ 'ö- pö: «N dheebhang -nu, 'maa- 'wɔn =në- dɔ -dhe "saabhome 'kpii- -mü, (a- 'wɔn -dɔ "dhü 'nu 'mii dho- pö "dhü -a -gen -mü -dhe) 'pë 'ö -ben zë -sü 'ka Atanna -bha 'sëedhe 'gü yö -mü -dhe:

«'Bha 'dho dhiang yaa zë i -gɔdhiöme -nu -bha.»»

⁶-Dhe 'ö -kë -dhe -ya 'wɔn -dɔ -dhe zadɔme -nu bha- me -kɔ "pean do -yö -kë 'me 'wo- -nu Sadusien -nu -kë bha- 'ka, 'yö- -kɔ "pean 'bha 'dhö me 'dhe 'wo- -nu Fadhizien -nu -kë bha- -nu 'ka 'pö bha- -wɔn 'gü, 'yö Pɔdhö -ya pö- -nu -kuu "dhiü 'ö- pö: «N dheebhang -nu, Fadhizien -mü n 'ka, n dë- -kë Fadhizien 'ka. 'Dhang =në 'a- bho "dhiü, n -zɔ -yö Atanna -dhe -sü 'ka =dhe -yö -dho game -nu bho ga 'gü 'yö 'wo za -ya sië n -bha ya. ⁷-Dhe 'ö -ya ö bo 'wɔn -nu bha- pö -sü 'ka, 'yö Fadhizien -nu waa- Sadusien -nu 'wo -ya zaɔdhe -da wo "kwëë -sü -bha, 'yö 'gügblüdhe -yö -da zadɔme -nu bha- -nu =zinng 'gü, ⁸(-a -gen -mü -dhe Sadusien -nu -wa -pö game -nu 'wii 'dho 'go ga 'gü "ɛɛn 'zü 'yina 'yaa 'dhö, "ɛɛn Atanna -bha "kië -nu 'waa 'dhö, "kɛɛ 'yö Fadhizien -nu -zë 'wo 'dhang bho 'wɔn -nu bha- =gban "pɛpɛ "dhiü.) ⁹Yö 'wo wo -wɔ "dhiü =wli "gbu- 'ka, 'yö 'tɔnggɔme -nu 'bha -nu 'wo -kë Fadhizien -nu -bha me 'ka bha 'wo =wli, 'wo- pö 'me 'wo gun za dɔ sië Pɔdhö -bha bha- -nu -dhe -dhe 'wii "wɔ- -nu -wɔ -bha tongtongdhö, 'yö 'wo- pö: «'Wɔn yaa 'bha 'ö 'me ya 'ö dho- -kë 'yaa 'dhö, "kɛɛ -yö -dho kë 'yina "ɛɛn Atanna -bha "kië 'bha -bha dhiang -zë -a -dhe -sü =në- 'ka.

¹⁰Ö dɔ mü kö -a -nu -bha zaɔdhe "tɛɛ =ya kë "gbu-, 'yö "suü 'dhö -da "sɔdha =lame 'kpii- bha- 'gü, 'yö -kë 'gü -dhe woo- Pɔdhö -gaan "gaan kë kö -wa zë- 'ka do, 'yö- pö ö -bha "sɔdha -nu -dhe -wo lɔɔ- kö -wo 'dho me kpö 'gü mü kö -wo Pɔdhö bho me kpö 'gü kö -wo 'dho- 'ka 'yasa 'gü.

¹¹-A gbeng 'dhe 'ö dɔ- "piü, 'yö kwa Dëme -yö ö -dɔ -zɔn Pɔdhö -dhe 'yö- pö- -dhe: «-Bhö i faan dɔ, 'bha "sɛedhe kë n -bha Zedhizadhëmö yö "kɛɛ Wlɔmö -dhe -bha -wɔn -yö -tun i -bha.»»

Zuifö -nu -bha wo zü -ma 'koo kö -wo 'wɔn yaa kë Pɔdhö 'ka -kɔ

¹²-A -tadhekpɔɔ -ta dhia" "piü, 'yö Zuifö -nu 'wo wo zü ma 'koo 'yö 'wo -sö -bhö 'wo- pö 'wii 'dho pë -bhö "ɛɛn 'wii 'dho müpë -zë 'bha mü "fɔn kö 'wa Pɔdhö =në- zë. ¹³'Me 'wo wo zü ma 'koo "dhü bha -wo -ziö me -kaɔng -yiisiö -ta. ¹⁴Yö 'wo dho "saabhome -gɔme -nu waa- me zizi -nu "piü, 'yö 'wo- pö-

-nu -dhe: «'Ya yi -wu kē do 'ya -sö -bhö yi -dɪ -ta -dhe, 'yii dho pē 'bha -bhö 'εen 'yii 'dho müpē 'bha mü 'ö dho ö zun- 'ka yi -bha Pɔdhö zē -sü -bha. 15=Dhe 'ö "dhü, -kaa -dhe "sɔdha -lame 'kpii- -gɔ kaa- zagəbhome 'kpii- -nu 'dhö kö -yö nu Pɔdhö 'ka ka -dhe, -kaa pö- -dhe -dhe -yö ka "piü -dhe 'ka 'wɔn bha- 'gü ma -sē 'ka. Yi -zē 'ya -mɔɔ- 'gü kö 'yi- zē kö 'yii -loo -kö ka -dhe 'gü.»

16"Kεε 'yö Pɔdhö dheebhang -dhebhɔ gbö -yö Zuifö -nu -bha "kpəngg- bha- -wɔn ma, 'yö dho "sɔdha -nu -gɔ "yasa 'gü mü 'yö- pö Pɔdhö -dhe. 17'Yö Pɔdhö -yö "sɔdha -gɔmε -nu bha- mε do -dhe 'yö- pö- -dhe: «-Bhö 'dho 'nəglɔɔnnē ya- 'ka "sɔdha -lame 'kpii- -dhe 'gü, 'wɔn 'bha -ya -gɔ kö -ya pö- -dhe.» 18'Yö "sɔdha -gɔmε bha waa- 'nəglɔɔnnē bha 'wo -ziö 'wo dho "sɔdha -lame 'kpii- "piü 'yö- pö- -dhe: «Pɔdhö 'ö -kaso 'gü bha -ya -pö 'a nu 'nəglɔɔnnē ya- 'ka i -dhe 'gü, dhiang 'bha -ya -gɔ kö -ya zē i -dhe.» 19'Yö "sɔdha -lame 'kpii- bha 'ö 'nē bha- kun- -kɔ -bha, 'yö 'wo dho -dhe "wεε 'gü, 'yö- dheε" kpɔ 'ö- pö: «-Mē -wɔn -nē i "piü 'i- pö n -dhe?» 20'Yö- -yɔ bɔ 'ö- pö: «Zuifö -nu -wa ziö wo 'ko "piü kö -wo Pɔdhö -gbadhe i -gɔ kö -yö nu wo -bha zadɔmε -nu -kuu "dhiü dhia". Kē "dhü kö zadɔmε -nu -wo 'wɔn 'ö -gban -a -bha bha- 'gü ma -sē 'ka. 21"Kεε 'bha 'dho 'dhang bho- -nu "dhiü, -a -gen -mü -dhe mε -dhü 'ö -ziö -kaɔng -yiisiö -ta, -wa wo -gblen 'kpɔ kö 'wo -pö -ta zian 'ka, -a -nu zü -yö do 'wɔn bha- 'gü, -wa -sö -nu -gban -bhö -wa -pö 'wii 'dho pē 'bha -bhö 'εen 'wii dho müpē suu "wεεwε 'bha mü kö 'wii Pɔdhö zē -kö. =Wa -mɔɔ- 'gü "pəpədhö, 'pē 'kö =ya 'to yö -mü -dhe kö 'i "wɪ- -bha kö 'i- bɔ.» 22=Dhe 'ö =ya kē "dhü, 'yö "sɔdha -lame 'kpii- bha 'ö- pö 'nəglɔɔnnē bha- -dhe: «=Dhe 'kö 'bha- pö n -dhe bha 'bha 'dho- -gen dɔ mε "wεε 'bha -dhe.» 'Yö ö -kɔ bho- 'gü 'yö dho.

Pɔdhö -bɔ -gblüdē Fedhisö -dhe -kɔ

23=Dhe 'ö =ya kē "dhü 'yö "sɔdha -lame 'kpii- bha 'ö ö -bha "sɔdha -gɔmε -nu bha- mε =plε -dhe, 'yö- pö- -nu -dhe: «-Ka "sɔdha kəng =plε -dhe -dhe do 'gü kö 'ka -soomε -nu -kaɔng 'saɔplε 'sü kö 'ka mε kəng =plε 'ö 'düga 'dhö- -nu -kwεε- 'pö -a -nu 'sü kö 'ka ka baa- -sē 'ka, kö "töng 'sueisiö -naa 'ka gbeng, 'ka 'dho Sezadhe. 24-Ka -soo 'bha -nu -pē kē 'pö kö 'ka Pɔdhö 'sü- -ta kö 'wɔn 'bha 'ya 'dho- 'dhiü -slɔɔ, kö 'ka 'dho -gblüdē Fedhisö "piü.» 25'Yö 'sēédhe -ben zē ö -dɪ -wu 'ka 'ö- pö: 26«N -gɔdhiümε =bhlēēsü, -gblüdē Fedhisö, mang Klodö Dhisiasö 'ma i -tua bho 'gbe! 27Zuifö -nu =wa 'mε 'a- bɔ i -dhe bha- 'kun 'nu kö -wa zē, "kεε =dhe 'ma- ma =dhe Wlɔmō 'nē =dede -mü -a 'ka, 'yö yaa- ma "sɔdha -nu 'yi dho mü 'yi- bho- -nu -gɔ, 28'yö 'a- sü 'a dho- 'ka Zuifö -nu -bha zadɔmε -nu -kuu "dhiü, kē "dhü kö 'wɔn 'ö- -wɔn 'gü 'wo za dɔ siē- -bha bha 'a- dɔ. 29'Pē 'a- ma mü yö -mü -dhe -wo za -ya -bha 'wɔn -nu 'wo -gban -a -nu -bha 'tɔng- -nu -wɔn -bha =nē- -wɔn 'gü, "kεε 'wɔn 'wo dho- pö kö -yö kē -a -dho -kaso 'gü -gen 'ka, 'εen -a zē -gen 'ka kö 'a- dɔ 'yii =slɔɔ. 30=Dhe 'ö =waa- pö 'zü n -dhe -dhe Zuifö 'bha -nu =wa wo zü 'ma "kuv -a -bha, 'yö 'a- bɔ i -dhe 'piö- -sü 'ka, 'yö 'a- pö 'zü za -dɔ -bha -mε -nu -dhe =dhe -wo nu mü kö -wa -da i -dhe.»

³¹'Yö "sɔdha -nu 'wo- -kë -dhe -kɔ 'wo- pö- 'ka- -nu -dhe bha- 'dhö. 'Yö 'wo Pɔdhö sü gɓeng do bha- 'gü 'wo dho- 'ka Angtipatrisö -pö 'gü. ³²-Dhe 'ö -dhe -ya -kpaɔ, 'yö "sɔdha 'dhe -nu 'wo 'ta sü wo -gen -ta bha 'wo wo yee -kë 'wo dho wo -gɔ "yasa 'gü, 'yö me 'dhe 'wo -soo -ta bha waa- Pɔdhö -nu 'wo dho 'ta 'ka wo "dhiü.

³³-Dhe 'ö -wa 'dho -wa -loo Sezadhe 'plöö, 'yö "sɔdha -nu bha 'wo 'sëedhe bha- dɔ -gɓlüdë Fedhisö -gɔ waa- Pɔdhö 'dhö. ³⁴'Yö -gɓlüdë -yö 'sëedhe bha- -wu pö. -Dhe 'ö -ya bo, 'yö Pɔdhö dhe" kpɔ "sɛgɔ -dede 'ö go- 'gü -a -wɔn 'ka. -Dhe 'ö -yaa- ma -dhe -yö -go Sidhisi -se 'gü, ³⁵'yö- pö Pɔdhö -dhe: «Ya kë -dhe me 'wo za -ya i -bha bha -wa nu -diö kö 'ka ziö dhiang 'gü kö 'yi ka -wu ma.» -Dhe 'ö go- 'gü, 'yö- pö ö -bha 'sɔdha -nu -dhe -wo 'dho Pɔdhö 'ka 'kɔ 'ö -gɓlüdë Edhodö kë dɔ bha- 'gü kö -wo wo "yan 'to- -bha.

Za 'ö Zuifö -nu -wa dɔ Pɔdhö -bha

24 ¹-Dhe 'ö -dhekpaaɔi "sɔdhu -ya ziö, 'yö "saabhömë -gɔmë 'kpii- 'wo- -dhe Ananiasö bha waa- me zizi -nu 'bha -nu, waa- -nu -bha dhiang "dhüsümë do 'wo- -dhe 'pö Tɛɛtudhusö bha 'wo dho Sezadhe. 'Yö 'wo dho -gɓlüdë Fedhisö -kuu "dhiü kö 'wo Pɔdhö -da -dhe. ²'Yö 'wo Pɔdhö -dhe, 'yö nu, 'yö Tɛɛtudhusö -yö -ya Pɔdhö kewɔn -gen dɔ -sü -bha 'ö- pö: ³«Yii- -gɓlüdë dhɔɔbhaasü Fedhisö 'ö i -bha -kë -kpaɔsü -sü -wɔn 'gü, 'yi -ya -sü 'ka yi 'flëë- 'gü "sɛgɔ ya- 'gü "tüng -gban 'gü bha, yi- 'wɔn -dɔ -dhe pë "pɛpɛ 'yi- -slɔɔ "sɛ ya- 'gü bha yi- -slɔɔ bhi -në i 'saa- 'gü. ⁴'Ö "dhü 'yaa n "piü -dhe 'a i -ya i ko -ta pinngdhö, "kɛɛ kö i -bha "klusédhe -wɔn 'gü 'i i "tu 'në 'dɛdɛ 'to yi -bha. ⁵'Mɛ 'ö ya yi- dɔ -dhe me -nu zuëkaankwëëmë -mü. Yöö do bha me suu yaa -mü, yö -në -ya 'güɓlüdhe -da Zuifö -nu 'wo "sɛ "pɛpɛ =gban 'gü -a -nu -zinng 'gü. Me kpö 'wo -kë Nazadhetö -mɛ -nu 'ka, -a -nu -bha me -dheng -zian bha- -gɔmë -në bha. ⁶-Ya "piü kö 'ö yi -bha Atanna -dhɔkëgükɔ "slüöslü bha- see-, 'pë 'ö -kë 'yö 'yi- kun bha 'yö bha. ['Yö yi- 'pö 'yi za dɔ- -bha -dhe -kɔ 'ö yi -bha 'tɔng- -ya pö- 'ka -a 'dhö. ⁷'Kɛɛ 'yö "sɛkɔɔnmɛ Dhisiasö -ya sü yi -gɔ faandhe -bha, ⁸'yö- pö 'me 'yi za -ya -bha bha yi- -dhe 'yi nu- 'ka i -kuu "dhiü.] -Ya kë -dhe 'me bha 'bha- dhe" 'kpɔ, 'pë 'ö -kë 'yö 'yi za -ya -bha bha, bhii -dede i -dho tɛanwɔn dɔ- 'gü. ⁹'Yö Zuifö -nu 'bha -nu 'wo to 'wo wo -wu -da Tɛɛtudhusö -bha "piü -kɔ do bha- 'gü kö -ya -zɔn -dhe 'pë 'ö- pö bha 'yaa -sua 'ka.

Pɔdhö -bha ö -dɔ -ta -kɔ Fedhisö -kuu "dhiü -kɔ

¹⁰'Yö -gɓlüdë -ya pö Pɔdhö -dhe -yö dhiang zë. 'Yö Pɔdhö -ya pö: «A- -dɔ -dhe bhi -në 'i zagɔbhömë 'ka "sɛgɔ ya- 'gü 'ö- -kwe kpö 'dhö ya. -A -wɔn 'gü "sika 'yaa n 'gü n -dɔ -ta -za dɔ -sü 'gü i -kuu "dhiü. ¹¹Bhii -dede -bhö -dhe -ga dhiang -nu 'a dho- zë i -dhe bha- 'gü -së 'ka, -a -gen -mü

-dhe 'a nu Zedhizadhëmö -dhe ya- 'gü, yi -bha Atanna -dhøkë -dhe 'gü -a -dhekpaɔyi 'yii ziö -kaɔng do ö ga -ple -ta -kö. ¹²Wii n yö kö a "dhiinaa 'ma sië me 'bha 'ka Atanna -dhøkëgüko 'gü, "ëen kö 'ma me -nu -ko -ya 'kwëë- yi -bha -bho "kwëë -kë 'gü -ko -nu 'gü, "ëen 'zü 'pö- yaan- -bha -dhe "wëe 'bha -zian 'gü. ¹³A- 'wɔn -dɔ -dhe 'me 'wo ya za 'wo- dɔ sië n -bha ya- -gen kpenngdhö 'wo dho- bho i -dhe 'yaa- -nu -gɔ. ¹⁴A- -kë "dhü -sü bha- 'gü, 'pë 'ö ma -zë 'a- dɔ 'ö 'a dho- pö i -dhe -a -ga 'ö ya: Yö -mü -dhe yi "bhema -nu -bha Atanna -në 'a- -dhøkë 'yö 'a- -bha yë -kë, 'yö 'a 'ta sü zian -dee 'ö wo -zë 'wo- -dhe -sua -zian bha- -ta. "Këe Atanna -bha 'tɔng- 'ö Moizö -ya -ben zë 'sëedhe 'gü waa- Atanna -wudhiüloome -nu -wu 'ö 'dhö, a 'dhang -bho -gban 'dhiü. ¹⁵A n -zu -yö Atanna -dhe -dhe -ko 'ö woo -dɔ 'pö 'wo wo -zu yö- 'ka -a 'dhö, -dhe Atanna -dho 'me 'ö- -nu këwɔn 'dhö -së waa- me 'ö- -nu këwɔn 'yaa -së -a -nu -bö 'ö 'wo go ga 'gü. ¹⁶Yö -në- -wɔn 'gü 'yö 'a n -dɔ 'gbu- -ta bho kö kë "dhü 'ö Atanna -wu 'ö n 'gü bha 'ö dho za dɔ n -bha -a wëedhö "ëen me "bhu- -nu -zian wëedhö.

¹⁷-Dhe 'ö -kë -dhe 'a go Zedhizadhëmö -a -kwe -ya kë 'gbe, 'yö 'a nu 'zü kö 'a 'wëëga 'bha -gban Zuifö -nu 'bha -nu -gɔ -a -nu -takunpë 'ka kö 'a "saa- bho 'zü yi -bha Atanna bha- "dhiü. ¹⁸-Dhe 'a gun "saa- bha- bho sië yi -bha Atanna -dhøkëgüko 'gü, 'yö 'wo nu 'wo -kpan n -bha mü, "këe kö 'ma bo -go "kian 'gü -sü -zë 'ka 'nu. Me kpö 'bha 'yaa gun mü "ëen -bhlubhluudhe 'bha 'yaa gun mü. ¹⁹Zuifö 'bha -nu 'wo go Azi -së 'gü -në 'wo gun mü, wo -në- -dhe 'dhö- -bha 'nu -dhe -wo za dɔ n -bha i -kuu "dhiü, "ni kö -a -nu -bha 'wɔn 'bha -zë -yö n -bha. ²⁰'Yii kë "dhü 'me 'wo nu ya 'wɔn yaa 'a- -kë 'ö- -wɔn 'gü -za -yö n zë zagɔbhome -bha za -dɔ n -bha -yi 'ka bha -wa pö. ²¹"Ni kö 'yii kë dhiang 'a n -wu "dhiü -wli- -bha 'gbu- 'ka -a -nu -gban wëedhö 'a- pö -dhe a 'dhang -bho game -nu -bha -go ga 'gü -sü "dhiü bha yö -zë 'ka, 'wɔn 'ö- -wɔn 'gü 'yö 'a dɔ sië ka -kuu "dhiü -dëe bha 'yö bha.»

²²-Dhe 'ö -kë -dhe Fedhisö -yö 'wɔn 'ö -gban Klisi -wɔn -bha bha- -dɔ -së 'ka bha, 'yö 'kwa ma kun, 'yö yi "wëe kpɔ 'me 'wo gun 'mü bha- -nu -gɔ 'ö- pö- -nu -dhe: «Ya kë -dhe "sekɔnme Dhisiasö -ya nu kö 'a -wu do pö ka -dhe.» ²³Yö- pö 'ö -bha "sɔdha -gɔme -dhe -wo 'dho Pɔdhö 'ka -kaso 'gü "këe -wo -putaasü nu- -dhe -kaso -ko 'gü kö -wo wo kwaa- 'pö -a "tëabɔ -nu -zü kö pë "pepe 'ö- -mawɔn dho zun- -bha -wa nu- -dhe.

Pɔdhö -bha ö -dɔ 'gü -dhiang -zë Fedhisö waa- Drusidhö -nu -kuu "dhiü -ko

²⁴-Dhe 'ö -dhekpaɔyi 'bha -ya ziö, 'yö Fedhisö waa- ö -bha dhebho 'ö -kë Zuifö dhebho 'ka 'wo- -dhe Drusidhö bha 'wo nu. 'Yö Fedhisö -yö me bɔ 'yö 'wo nu Pɔdhö 'ka 'yö 'ö "tu to 'wɔn 'ö -gban -zu -yö Yesu Klisi -dhe -sü 'ö Pɔdhö 'dhö- pö sië bha- -bha bha- -bha. ²⁵"Këe -dhe 'ö Pɔdhö -yö zun 'wɔn 'ö -gban -kë kpengdhö -sü waa- me -bha -ko -mɔɔ 'ö -dɔ -bha -sü waa- za 'ö Atanna dho- dɔ me -bha dhia", me "bhu- -nu këwɔn -nu -wɔn 'gü bha- -dhiang zë -sü -bha,

'yö "suü 'dhö -da Fedhisö 'gü 'yö- pö: «-Bhö 'dho -kö, =ya kë -dhe 'ma "tüng bha-
-slɔɔ a -dho i -dhe kö 'i- 'bha pö.»²⁶ -Ya -ga -dhe Pɔdhö dho gbadhiü kè 'nu ö
-dhe 'wëë- 'ka 'yö =ya kë -sië 'yö- -dhe -nu wo, 'yö 'wo "gbæta -nu zë.

²⁷Wɔn bha -wo -to 'ka "dhü 'ö -kwe =ple -yö -da 'gü. =Dhe 'ö -kwe =ple
bha =ya ziö, 'yö Pɔɔsiusö Fetusö 'dhö -kè -gblüde 'ka Fedhisö "gbluɔ 'gü.
Fedhisö -yö Pɔdhö -to -kaso 'gü kè "dhü 'nu kö 'ö Zuifö -nu dhɔɔbhaa kè.

Pɔdhö dhiang -zë "sekɔɔnme 'kpïi- -kuu "dhiü -kɔ

25 ¹=Dhe 'ö Fetusö =ya -loo "sɛ "pɛan 'dhe bha- 'gü, 'ö- -dhekpaɔyi =ya
kè -yaaga, 'yö go Sezadhe 'ö dho Zedhizadhëmö. ²-Dhe bha- 'gü,
'yö Zuifö -nu -bha mɛ "gblügbliü -nu waa- "saabhómɛ -gɔmɛ -nu 'wo Pɔdhö
-wɔn -da Fetusö -dhe 'wo- pö ³-yö 'wɔn -sè do kè wo -dhe, -yö Pɔdhö bɔ
Zedhizadhëmö. 'Ö "dhü bha kö =wa wo zü ma "kuu 'nu kö 'wo Pɔdhö zë
zian -ta. ⁴"Kɛɛ 'yö Fetusö -ya -yɔ bɔ- -nu -gɔ 'ö- pö: «Pɔdhö -yö -kaso 'gü
Sezadhe, =ya 'go mü mang =dede n -dho mü -wɔn -dhö.» ⁵'Yö- pö 'zü- -nu
-dhe: «Ka -gɔmɛ -nu -wo nu kö 'kwa 'dho Sezadhe kö =ya kë -dhe 'mɛ bha
'wɔn yaa =nè 'ö- -kè =dedewo tɛan- 'ka kö -wa -za dɔ- -bha mü.»

⁶Fetusö 'yii =gwëë mü, -yö 'pè 'ö =mɔɔ -dhekpaɔyi "saaga "ɛɛn -kaɔng do -nu
-bha =nè- -kè -nu "piü Zedhizadhëmö mü, 'yö ö yee kè 'ö dho Sezadhe. =Dhe 'ö
-dhe =ya -kpaɔ, 'yö dho zadɔgüko 'gü 'yö -ya ö -bha za -dɔ 'gü -gbloo 'gü 'yö- pö
-wo nu Pɔdhö 'ka. ⁷=Dhe 'ö =wa nu Pɔdhö 'ka =wa -loo mü, 'yö Zuifö -nu 'wo
go Zedhizadhëmö bha 'wo -klëën- -zü, 'yö 'wo 'wɔn yaya -nu pö- -bha 'gbɛ 'ka,
"kɛɛ 'sa 'wɔn -nu 'wo "dhü bha 'waa =mɔɔ- -bha kö -wa -gen bho -sè 'ka. ⁸"Kɛɛ
yö =nè- =gban 'gü, Pɔdhö -yö ö -dɔ -ta -kɔɔ 'ö- pö: «Mii Zuifö -nu yi -bha 'tɔng-
'bha bho "ɛɛn 'mii 'wɔn yaa 'bha kè 'pö yi -bha Atanna -dhɔkëgüko 'gü kö yöö
'to- Wlómö -mɛ -nu -bha "sekɔɔnme 'kpïi- =nè- -bha. ⁹=Dhe 'ö -kè -dhe -yö -gun
Fetusö "piü -dhe 'ö Zuifö -nu dhɔɔbhaawɔn =nè- kè bha 'yö- pö Pɔdhö -dhe: «I
-dho -mɔɔ- -bha kö 'i nu Zedhizadhëmö kö 'yi za bha- dɔ n -kuu "dhiü mü kö
=ya kë -dhe 'pè 'wo- pö sië i -bha bha 'ö tɛan- 'ka 'a- dɔ -ee?» ¹⁰'Yö Pɔdhö -ya
-yɔ bɔ- -gɔ 'ö- pö: «-Abin, =ya 'to yö -zè -bha kö 'maa maa "wu- -bha, =ya kë -dhe
bhi 'ö bhi -zè 'i "sekɔɔnme 'kpïi- -bha bɔmɛ 'ka bha 'bhii -mɔɔ ma za bha- dɔ
-sü -bha kö a -dho 'dho Wlómö, "sekɔɔnme 'kpïi- yöö =dede -a -kuu "dhiü, -a
-gen -mü -dhe bhii =dede i- 'wɔn -dɔ =dhe 'mii 'wɔn yaa 'bha kè Zuifö -nu 'ka.
¹¹=Ya kë -dhe 'a 'wɔn yaa =nè- kè -sü 'ka "ɛɛn 'pè 'ö mɛ zè -gen bho 'ma yö =nè-
'bha kè, 'mii -kɔ n zè -wɔn -bha, "kɛɛ =ya kë -dhe 'wɔn -nu 'wo- pö sië n -bha
ya 'ö tɛanwɔn -zè 'yaa- 'gü, kö mɛ 'bha 'yii 'dho =mɔɔ- -bha kö -yö n dɔ- -nu
-gɔ. 'Mɛ n "piü kö -yö ma za ya- dɔ yö -mü "sekɔɔnme 'kpïi- ('ö Wlómö bha)
=nè- 'ka.»

¹²=Dhe 'ö Fetusö waa- ö -bha zadɔmɛ -nu =wa dhiang 'bha -nu zë wo
'ko =zinng 'gü, 'yö- -yɔ bɔ Pɔdhö -gɔ 'ö- pö: «=Dhe 'ö -kè -dhe -yö i "piü kö
"sekɔɔnme 'kpïi- =nè -yö i -bha za dɔ bha, i -dho 'dho "sekɔɔnme 'kpïi- -kuu
"dhiü.»

Pɔdhö -dho Aglipa waa- Bedhenisö -a -nu -kuu "dhiü -ko

¹³-Dhe 'ö -dhekpacyi 'bha -ya ziö, 'yö -gblüdë Aglipa waa- -bha dhebho Bedhenisö 'wo dho Sezadhe kö 'wo Fetusö =tua bho. ¹⁴-Dhe 'ö -wa -dhekpacyi kpö kë mü, 'yö Fetusö -yö Pɔdhö -bha 'wɔn bha- -da -gblüdë -dhe, 'yö- pö- -dhe: «Gɔndënë do 'ö Fedhisö -ya to -kaso 'gü -yö yö. ¹⁵-Dhe 'ö 'ma 'dho Zedhizadhemö, Zuifö -nu -bha 'saabhome -gɔme -nu waa- -nu -bha me zizi -nu -wo ka -nu 'wo- -wɔn -da n -dhe 'wo- pö 'a- zë za 'ka. ¹⁶'Yö 'a- -yɔ bɔ- -nu -gɔ 'a- pö 'ö Wlɔmö -me -nu wɔ -kɔ 'gü 'waa me 'bha zë za 'ka "wëewëe kö 'me 'wo za dɔ- -bha bha 'yii ziö ö -bha za -gen 'gü -a za dɔ 'yɔɔ -nu wëëdhö, ¹⁷'yö 'wo -ziö n -keng- 'yö 'yi nu yö, 'yö 'wɔn 'ö 'dhiü bha 'mii- -da n -gen -wɔlöö, "këe =dhe 'ö -dhe -ya -kpaɔ, 'yö 'yi dho zadɔgükö 'gü kö 'a za bha- dɔ, 'yö 'a- pö -wo nu 'me bha- 'ka. ¹⁸'Yö- -da -me -nu 'wo nu, "këe 'yö 'wɔn yaa -nu 'ö ma zë 'a n -zɔ gɔn- 'ka bha 'wii- 'bha pö. ¹⁹'Wɔn do 'ö weng- -nu 'wo- zaadhe -da wo 'ko =zinng 'gü yö -mü =dhe -a -nu -bha Atanna -dhɔkë -kɔ 'yaa do, -ya 'go mü 'zü, gɔndënë do 'bha 'wo- -dhe Yesu 'ö -ya ga "këe 'ö Pɔdhö -ya pö glɔglɔdhö =dhe -yö "yaan bha- -wɔn -mü. ²⁰'Yö -kɔ 'a dho- kë- 'ka kö 'a 'wɔn bha- 'gü ma 'mii- dɔ, 'yö- -wɔn 'gü 'a- -dhe Pɔdhö -gɔ kö -ya 'wɔ- -bha kö -yö 'dho Zedhizadhemö kö 'a- -bha za dɔ 'mü. ²¹"Këe Pɔdhö -ya -pö 'zü n -dhe glɔglɔdhö =dhe 'ö- "piü 'ö 'to -kaso 'gü kö "sekɔɔnme 'kpii- -dede =në -yö ö -bha za dɔ. 'Yö 'a- pö ma "sɔdha -nu -dhe -wo wo -zɔ 'to- 'gü kö -yö zun- 'ka yi 'a dho- bɔ- 'ka "sekɔɔnme 'kpii- -kuu "dhiü bha- -bha.» ²²'Yö Aglipa -ya pö Fetusö -dhe: «-Yö n "piü -dhe mang -dɔ 'pö 'a 'me bha- -wɔ ma.» 'Yö Fetusö -ya pö- -dhe: «I -dho -a -wɔ ma dhia".»

²³-Dhe 'ö -dhe -ya -kpaɔ, 'yö 'wo ta Aglipa waa- Bedhenisö -nu -bha, 'yö 'wo dho -yakwëëkëgükö 'kpii- 'gü. 'Yö "sɔdha -nu, "sɔdha -gɔme waa- 'pö- -kɔɔnme -nu 'wo dho 'mü. 'Yö Fetusö -yö dhiang zë ö -bha "sɔdha -nu -dhe 'yö 'wo nu Pɔdhö 'ka. ²⁴'Yö Fetusö -ya pö 'me 'wo bho 'ko -ta bha- -nu -dhe: «-Gblüdë Aglipa waa- me "pepe 'ka yi "piü yö, 'me 'ö Zuifö 'gbe -dhe 'wo za dɔ- -bha 'wo nu- 'ka n "piü Zedhizadhemö 'gbɔ -sü 'ka, 'ö 'wo nu 'zü- 'ka n "piü yö "gbɔ -sü 'ka -dhe -wa zë bha yö -në. ²⁵"Këe ma -zë n -bha 'ka pë yaa 'ö- -kë 'ö 'wo dho- zë- -wɔn 'gü 'mii- yö. =Dhe 'ö -kë 'pö =dhe yöö =dede -ya -pö -yö ö "piü 'ö 'dho "sekɔɔnme 'kpii- -kuu "dhiü bha, -yö n 'gü -së 'pö kö 'a- bɔ 'mü. ²⁶"Këe pë 'bha 'kö 'a dho- -ya 'sëëdhe 'gü kö 'a- bɔ "sekɔɔnme 'kpii- -dhe -a -bha 'wɔn bha- 'gü 'maa- dɔ. 'Wɔn 'ö- -wɔn 'gü 'yö 'a nu- 'ka ka -kuu "dhiü "këe bhii -gblüdë Aglipa -me i -kuu "dhiü "vaandhö kö -a dhe" -ya 'kpa, kö 'pë 'a dho- -ben zë 'a- dɔ bha 'yö bha. ²⁷-A -gen -mü =dhe 'ma -kasogüme bɔ -gblüdë 'kpii- -kuu "dhiü kö 'mii za 'kö- kun -a -gen pö, kö- bɔ -gen 'yaa 'dhö.»

Pɔdhö -bha ö -dɔ 'gü -dhiang zë Aglipa -kuu "dhiü -ko

26 ¹'Yö Aglipa -ya pö Pɔdhö -dhe: «-Putaa-sü -yö i -gɔ kö 'i i -dɔ -ta kɔɔ- -dhiang zë.» 'Yö Pɔdhö -yö ö -kɔ wang -pu kö yöö dhiang zë,

'yö- pö: ²«-Gblüde Aglipa, n zuë" =nii -yö -da kö 'a dɔ i -kuu "dhiü =deε -dhe 'pë ya- 'dhö kö 'a n -dɪ -ta kɔɔ- -dhiang zë 'wɔn 'ö Zuifö -nu 'wo- pö sië n -bha bha- -wɔn 'gü. ³-A -gen -mü -dhe bhii -dede i Zuifö -nu wɔ -kɔ -dɔ. -Ya 'go mü i- -nu -bha zaadhe -da 'gü -wɔn -nu -dɔ. -Dhe 'ö "dhü, a- -dhe i -gɔ kö 'i i "tu 'to n -wɔ -bha -së 'ka. ⁴Zuifö -nu "pepe -gban -wo n -tosea kë -kɔ 'a- kë 'ka 'ö sü n 'nëglɔɔndhe 'gü -bha 'ö zun- 'ka -deε -bha -a -dɔ. 'Ö -kɔ 'a -tosea -kë 'ka n -gɔ "së 'gü -dhe waa- Zedhizadhëmö -pö ya- 'gü 'wo- dɔ 'pö. ⁵-Ya kë -dhe =wa "wɪ- -bha -wo -mɔɔ -bha kö woo- -dede -wo kë n "sëε- 'ka -dhe dhiang 'a- zë sië bha 'yaa =sua 'ka. -A -gen -mü -dhe -wo n -dɔ Fadhizien -nu 'wo Zuifö -nu -bha 'tɔng- 'ö- -nu -bha Atanna -dhɔkëgüko 'gü -a =bhlëë -ya wo faan =gban 'ka 'wo -ziö 'ka me -kpëa -ta bha- me do 'ka -a yi 'yaa =deε. ⁶'Yö 'ma kë za -dɔ -bha -më 'ka dɔ 'kwa- wo =deε ya- 'gü, 'yö- -gen 'dhö -kë -dhe 'pë 'ö Atanna -ya "plüün bho yi "bhema -nu -dhe ('ö -gban -Yame nu -wɔn -bha) bha n "yan -ya kë -yi -gɔ. ⁷"Plüün bho -wɔ 'ö yö =në yi -bha "kwean- -gɔ -kaɔng do ga =ple 'wo -ya -sü 'ka -a kë -yi -gɔ, 'yö 'wo yë -kë Atanna -dhe wo faan =gban 'ka 'yënn- 'gü waa- gbeng -nu =gban 'gü bha- yö =në- -wɔn 'gü, -gblüde, 'yö Zuifö -nu 'wo za dɔ sië n -bha ya.»

⁸'Yö Pɔdhö -yö 'ö wë =slëë Zuifö -nu -ta 'ö- pö: «Zuifö -nu 'ka ma ya, -më =në -kë 'yö 'kaa 'dhang bho yi -bha Atanna -bha me -bho ga 'gü -sü -wɔn "dhiü? ⁹Ma -zë n -bha 'ka, a -gun n -zɔ 'gɔn sië -dhe 'a pë yaa "pepe =gban suu kë Yesu 'ö go Nazadhetö bha- 'ka. ¹⁰Pë 'ö gun n kë -pë 'ka -bleesü Zedhizadhëmö 'yö bha, 'ö "saabhome -nu -gɔmε -nu 'wo -wɔ -kpɔ n -bha kö 'a 'dhang -bho Yesu "dhiü -më -nu 'gbe -da -kaso 'gü. 'Yö -ya 'go mü =waa- -nu zë za 'ka kö -wa -nu zë, 'yö -kë me =gban yi -ya 'kwëë- -wɔn 'ka. ¹¹'Ö- 'bha -nu =wa kë -zianwo, 'a 'wɔn "dhiü- -nu -kë -a -nu 'ka, Zuifö -nu -bha -yakwëëkëgüko -nu 'gü, 'yö 'a- "slë =mɔɔ, faan -wɔ -a -nu -ta -sü 'ka kö -wo wo kwaa- -zɔ -yö Yesu -dhe -sü -zü. 'Wɔn -siö n -dhe -kɔ yaa 'gü yaa 'ö- "piü bha- -wɔn 'gü, a -gun "wlü sië 'a dho 'wɔn -wɔ -a -nu -ta -dhe 'gü 'pö "gblüglü "wëε -nu -zian 'gü.

¹²-A kë 'a gun- wo sië "dhü bha- -wɔn 'gü, 'yö "saabhome -nu -gɔmε -nu 'wo n bɔ Damasö 'plöö yi do 'ka, -kɔ -mɔɔ 'wɔn -bha -sü 'wo- nu n -dhe bha- 'ka. ¹³-Gblüde, -dhe ma -da zian -ta, 'ö 'yënn- =ya -ya mε -gɔ =zinng 'gü, 'yö -dhepuudhe 'ö go dhang- 'gü 'ö- 'bhü 'dhö -ziö 'yënn- 'bhü -ta bha 'ö sɔ ma 'dhö, -ta n -bha -më -nu 'wo -kë n "tayɔɔ -nu 'ka -a -nu 'dhö, yi -ta. ¹⁴'Yö mε "pepe =gban 'yi -pö "sia-, 'yö 'a mε -wɔ do 'bha ma. -Wɔ bha 'yö- pö n -dhe eblö -wɔ 'gü 'ö- pö: «Sɔdhö, Sɔdhö, -më =në -kë 'yö 'i n "yënn =gbaɔn "dhü? 'Bha 'ko zë n 'ka kö i 'wɔn yaa -kë i -dɪ =në- 'ka -dhe -kɔ 'ö -du -yö 'ö -dɪ -gban 'ka 'ö -maakëmε -gɔ "dhü "zɔ "dhiü bha- 'dhö.»

¹⁵=Dhe 'ö =ya kë "dhü 'yö 'a- dheε" kpɔ 'a- pö: «Bhii 'de i bha =zɔɔ?» 'Yö yi Dëmε -ya pö: «Mang Yesu 'i n "yënn =gbaɔn sië bha ma -mü. ¹⁶-Bhö "wlü kö 'i dɔ i -gεan, a n -dɪ -zɔn i -dhe "dhü kö 'i kë ma yëkëmε -më =në- 'ka, i -dho kë n "sëε- 'ka kö -kɔ 'a n -dɪ -zɔn 'ka i -dhe =deε bha 'i- pö 'me 'wo to

-a -nu -dhe. -Ya 'go mü kö 'pè 'a dho- zɔn i -dhe bha 'i- -gen dɔ- -nu -dhe 'pö. 17A -dho i bɔ Zuifö -nu waa- 'me 'waa Zuifö 'ka- -nu 'piü, -wa -ya i -san 'ka kö -wa pö 'wo i zè, a -dho i dha- -nu -gɔ. 18A i -bɔ kö 'i- -nu 'yan "dhiü -nè- "pü kö -wo 'go -dhetiidhe 'gü kö -wo nu -dhepuudhe 'gü, kö -wo 'go Sɔtraan -gban -wLöö, kö -wo nu Atanna 'piü, kö -wa 'dhang bho n -wɔn "dhiü kö Atanna -ya -nu -bha 'wɔn yaa -mawɔn 'to kö -wo wo -yèa -slɔɔ 'pö 'me 'ö Atanna -ya -nu -ya -dɪ -ta bha- -nu kpö 'gü.

19-Gblüdè Aglipa, -a kè "dhü -sü bha- 'gü, =dhe 'ö n "yan =ya -da 'wɔn 'ö go dhang- 'gü bha- 'gü -dhe -kɔ bha- 'dhö, 'yö 'a- -kè =dhe -kɔ 'ö n Dème -ya pö- 'ka n -dhe bha- 'dhö 'pö. 20'Yö 'a Atanna -wu pö Damasö -pö 'gü, 'yö 'a- 'bha pö Zedhizadhemö -pö 'gü waa- Zude -sɛ 'dhö. 'Yö 'a dho- 'ka "sɛ "wɛɛ 'gbe =gban 'gü kö a- pö siè- -nu -dhe -wo wo kwaa- woo- sɔng yaa -zü kö -wo wo zuè" slèè- Atanna 'piü kö këwɔn -sè -nu 'wo- -zɔn =dhe =wa wo wè slèè- Atanna 'piü =dedewo bha -wa kè. 21Ma Atanna -wu -pö "dhü -sü -nè- -wɔn 'gü, 'yö Zuifö -nu 'wo n kun kö a Atanna -dhɔkègükö 'gü, 'yö 'wo- "slè =mɔɔ kö -wo n zè, 22"keɛ Atanna -yö n -ta -kun -kpeawo 'ö nu 'ö zun- 'ka -dɛɛ -bha kö 'a ma "sɛɛdhe kè 'me 'ö- -nu -bhlèè 'yaa 'dhö waa- 'me 'ö- -nu -bhlèè 'dhö 'dhö bha- -nu wèédhö. 'Mii 'wɔn "wɛɛ 'bha pö kö 'yii kè Moizö waa- Atanna -wudhiüloome -nu 'wo -wu 'ö- pö yi 'bha 'ka bha- 'ka. 23=Dhe Atanna -bha -Yame -wèédhe -dho bho 'ö ga 'ö -kè me -blesü 'ö go ga 'gü -a 'ka kö -yö dhasü 'ö -dhepuudhe 'ka bha- -dhiang zè Zuifö -nu waa- 'me 'waa Zuifö 'ka -a -nu -dhe.»

Pɔdhö dhiang zè Aglipa -dhe kè "dhü 'nu kö -yö ö zuè" slèè- -kɔ

24=Dhe 'ö Pɔdhö 'dhö ö -dɪ -ta -za dɔ siè "dhü, 'yö Fetusö -yö ö -wu "dhiü =wlü 'ö- pö: «Slaa" 'pö yöö i 'kun =zɔɔ -ee, Pɔdhö, -a -ga bha, i -bha 'sèédhe draan- -kɔ yaa 'gü yaa bha- -ga 'ö =ya slaa" -da i -ta bha!» 25'Yö Pɔdhö -ya -yɔ bɔ- -gɔ 'ö- pö: «Slaa" 'yii -da n 'gü, ma me -wɔngbusü Fetusö, "keɛ 'wɔn -nu 'a- pö siè bha teanwɔn -mü, a- -pö 'pö -kpaɔdhe -bha. 26-Gblüdè Aglipa -yö 'wɔn -nu bha- -nu -dɔ, -a -wɔn 'gü a -mɔɔ -bha 'a- -dhiang zè n -ta "puu 'ka -a wèédhö. A- -dɔ =dhe 'wɔn -nu 'wo "dhü bha -ya =gban -dɔ "pɛpɛdhö, -a -gen -mü -dhe pè -nu bha- 'bha 'yii kè -bin 'gü!»

27=Dhe 'ö go 'mü 'yö Pɔdhö -ya pö Aglipa -dhe: «-Gblüdè Aglipa, 'wɔn 'ö Atanna -wudhiüloome -nu -wa pö (yi 'bha 'ka 'ö -gban Atanna -bha -Yame -wɔn -bha) bha i 'dhang -bho "dhiü "we -ee? "Keɛ a- -dɔ -zè wo =dhe i 'dhang -bho "dhiü!» 28'Yö Aglipa -ya pö Pɔdhö -dhe: «-Yö i "piü =dhe i -kɔ -yö =mɔɔ n -bha -dede ya- 'gü kö 'i n kè 'dhang -bho Yesu "dhiü -me 'ka -wa?» 29'Yö Pɔdhö -ya pö: «'Kö 'zü 'ö -kè =dɛɛ, "ɛɛn 'ö -kè yi "wɛɛ 'ka, "keɛ a -bhɛa yi -bha Atanna -dhe kö 'ya 'dho kè bhii do -zian i 'ka, "keɛ kö me "pɛpɛ 'ka "tu 'to siè n -wu -bha =dɛɛ ya 'ka kè 'dhang -bho Yesu "dhiü -me 'ka =dhe n 'dhö, "keɛ kö 'ka 'dho kè -kasogüme -zè 'ka =dhe -kɔ 'a- 'ka ya- 'dhö.»

³⁰=Dhe 'ö =ya kë "dhü 'yö -gblüdë 'dhöö, "sekɔɔnme 'dhö, Bedhenisö waa-me "pepe 'wo bho wo 'ko -ta bha 'wo =wli. ³¹=Dhe 'ö =wa 'go wo 'gbluu, 'yö 'wo- pö wo 'ko -dhe: «'Me ya 'wɔn yaa 'ö dho kë- këme 'ka kö -wa zë- wɔn 'gü "ëen kö -wa -da -kaso 'gü -zianwo 'yaa 'dhö.»

³²=Dhe 'ö =ya kë "dhü 'yö Aglipa -ya pö Fetusö -dhe: «'Ya kë =dhe 'me ya 'yii- pö 'nu =dhe -yö ö "piü 'ö -wo -gblüdë 'kpii- -kuu "dhiü kö kwa -dho kwa kwaa- zü, "këe =dhe 'ö -kë =dhe -ya "piü kö 'ö -wo -a -kuu "dhiü bha, kwa -dho -a 'to -kaso 'gü kö 'kwa- bɔ- -dhe.»

Pɔdhö -bɔ Wlɔmö -kɔ

27 ¹=Dhe 'ö -gblüdë -nu bha- -nu -wu =ya 'to- -bha do =dhe yi -dho 'dho "yitagɔ 'gü Itadhi -se 'gü, 'yö 'wo Pɔdhö waa- -kasogüme 'bha -nu dɔ "sɔdha -gɔme do 'wo- -dhe Zudhiusö 'ö -kë Wlɔmö 'në 'ka bha- -gɔ. Zudhiusö bha -yö -kë Wlɔmö "sekɔɔnme 'kpii- -dɔ -bha "sɔdha kpö -gɔme do 'ka. ²'Yö 'yi -ya "yitagɔ 'ö go Adramitö -pö 'gü 'ö dho "yitagɔ 'gbaannu -dhe 'ö Azi -se 'gü -a -bha bha- 'gü 'yö 'yi dho. Adhitakö 'ö -kë Maseduanö mi 'ka 'ö go Tesadhonikö bha -yö -gun yi "piü mü. ³'Yö -dhekpaa yi 'dhe 'ö dɔ- "piü bha 'yi =loo- 'ka Sidɔn -pö 'gü. Zudhiusö "klu- -gun -së Pɔdhö -bha 'ö -putaasü nu- -dhe kö -yö 'dho zun ö "taɔngdë -nu 'wo gun mü -a -nu -dhe 'gü kö 'pë 'ö- -mawɔn 'dhö- -bha -wa nu- -dhe.

⁴=Dhe 'ö =ya kë "dhü 'ö 'ya go mü, 'yö "tëe 'dhö -ya yi -bha. 'Yö yi -bha "ta 'yi- sü "segɔ 'ö 'yi =zinng 'gü 'wo- -dhe Siplë -a "sɔɔ bha- 'gü bha, 'yi dho- 'ka "pean 'dhe 'ö "tëe 'yii dho -ya yi -bha "yitagɔ -bha -a 'ka bha- 'ka. ⁵'Yö yi =weeyi -kan Sidhisi -se waa- Panfidhi -se -nu "sɔɔ, 'yö 'yi nu 'yi =loo Midha -pö 'ö Dhisi -se 'gü bha- 'gü. ⁶=Dhe bha -në "sɔdha këng do -gɔme -yö "yitagɔ 'ö 'go sië Dhezandri -pö 'gü 'ö 'dho sië Itadhi -se 'gü bha- yö- -bha, 'yö 'yi go yi -bha "yitagɔ 'yi nu- 'gü bha- 'gü 'yi dho 'yi -da "yitagɔ 'dhe bha- 'gü 'yö 'yi dho.

⁷=Dhe 'ö 'ya =yɔɔn 'dede wo yi "dhiü, 'yö "tëe 'dhö -ya 'zü yi -bha "yitagɔ bha- -bha "gbu- 'ka. -A -wɔn 'gü yi yi -zlaɔ 'yi dho. 'Ö 'yi "ta sü -dhekpaa yi 'gbë =dede 'ka, 'yö 'yi gun -na =loo Kinidö -pö "saan "dhiü kö 'ya sëe bho. =Dhe 'ö -kë =dhe "tëe 'yii "wu- -bha yi -gɔ kö 'yi 'dho 'zü "pean 'dhe bha- 'ka bha, 'yö 'yi- zë- 'gü "se "pean 'dhe 'yi =zinng 'gü 'zü, 'wo- -dhe Kletö -se bha- "sɔɔ, "pean 'ö bɔ "së -kɔ "pean 'dhe 'wo- -dhe 'Kapö Salmɔne bha- 'ka. "Pean 'dhe bha "tëe 'yaa gun- 'ka. ⁸"yitagɔ 'yi gun- 'gü bha -yö -nëng "kpuɔng "piü, 'ö 'yi =loo -dhe 'wo- -dhe -dhe «"yitagɔ dɔdhe -së» 'ö Dhasö -pö "sɔɔ bha- 'gü sëebhodhe =dede 'ka.

⁹=Dhe 'ö 'ya -dhekpaa yi kpö kë 'mü, 'yö "ta 'sü -sü 'ö 'yi -ta bha 'ö -kë -ziisü, -a -gen -mü -dhe kö -kwe "dhiü 'to -yi -ya 'to klöö-, kö Zuifö -nu -bha =bhlëëkpɔdhe 'ö =waa- kë 'wo- dɔ =dhe Atanna =ya wo -bha =sɔng yaa -nu -mawɔn 'to bha =waa- kë 'nu. (-A "tüng bha- 'ka kö "tëe "gbu- nu "tüng 'yaa =gblëen 'zü). ¹⁰'Yö Pɔdhö -yö -dhio dɔ- -nu -ta 'ö- pö: «Gɔɔn- -nu, "ta ya 'kwa 'dho- 'ka "dhiü -yö -dho =gbaɔn, -a -gen -mü =dhe "yitagɔ waa-

-kwɛɛ- -nu -zè -a -gban -dho see-, 'ö kwaa -du 'pö 'yii kè -sè 'ö kwa 'gü -yö -see, (=dhe 'ö 'dhü, -ka -kwa 'to yö kö "tüng yaa bha -yö ziö).»

¹¹"Kɛɛ 'yö "sɔdha këng do -gɔme bha 'ö 'ö -zu yö "yitagɔ dème waa- "dhiü "ta 'sü -me -dhe 'ö ziö- 'ka Pɔdhö -ta. ¹²"Yitagɔ dɔdhe 'yi gun- 'gü bha 'yaa -sè kö mɛ -yö 'to mü "tɛɛ "gbu- bha- "tüng 'gü. Yö =nè- -wɔn 'gü 'yö 'me waa- Pɔdhö -nu -wo gun "ta 'sü siè bha mɛgbedhe 'wo gun- "piü -dhe 'wo 'go mü kö 'wo 'dho =weeyi -ta. 'Yö 'wo- "slè -mɔɔ kö 'wo -loo "yitagɔ dɔdhe 'dhe 'ö Fenisö, Kletö -sɛ 'gü bha- 'gü. Fenisö -dhe bha -yö -gun 'yënn- -pö -zian 'ka. Kè 'dhü kö 'wo "tɛɛ "gbu- "tüng bha- kè mü.

"Tɛɛ "gbu- -ziö Pɔdhö -nu -bha -weeyi -ta -kɔ

¹³=Dhe 'ö -kè =dhe "tɛɛ =zɔngsü 'ö go "sia- 'yën bha -yö -gun ziö siè bha, 'yö -kè -nu 'gü -dhe 'wɔn -nu 'wo- -ya 'ko "dhiü -kè bha -yö -dho kè =dhe -kɔ 'wo wo -zu gɔn- 'ka bha- 'dhö. 'Yö 'wo -piö kpö 'gbiin- 'ö -kè "yitagɔ 'gbaannu 'ka -pè 'ka 'ö "yi =wlöö bha- bho- -gɔ, 'yö zun "ta 'sü -sü -bha "tɛɛ bha- -kɔ 'ka, 'yö 'wo dho- 'ka "sɛ "pɛan 'ö "yi -zinng 'gü 'wo- -dhe Kletö bha- "pɛan "piü. ¹⁴=Dhe 'ö "tüng 'dede 'bha -ya ziö, 'yö "tɛɛ "gbu- 'wo- -dhe «"tɛɛ "gbu- 'ö go "dhuü- =yën» 'ö go Kletö -sɛgɔ 'ö "yi -zinng 'gü bha- "piü =yën bha 'yö -ya ziö -sü -bha "gbu- 'ka "pɛan bha- -ta. ¹⁵'Yö yi -bha "yitagɔ =bang "bang kè -sü zü bho. 'Yö 'yi- "slè =mɔɔ kö 'yi 'dho yi "dhiü "tɛɛ 'go -zian 'ka, "kɛɛ 'yii =mɔɔ- -bha. 'Yö 'yi yi -kwaa yi -bha "yitagɔ bha- -zü 'yö "tɛɛ 'dhö- -blü 'yö dho- 'ka "pɛan 'ö -dhi -dhe -a 'ka.

¹⁶'Yö 'yi dho 'yi -loo "sɛ "pɛan 'dede 'ö "yi -zinng 'gü 'wo- -dhe Kloda bha- "sɔɔ. 'Yö 'yi bɔ- "pɛan 'dhe 'ö- -bha "tɛɛ 'yaa "gbu- bha- 'ka, 'yö 'yi "yitagɔ 'dede -sü 'ö -kè -kplü -sü 'ka "yitagɔ 'kpiisü -taama bha- bho 'mü kè "dhü kö "yi kpö 'ya 'dho- 'wü. "Kɛɛ -a -bho mü -sü -yö -kè "gbu- =dedewo. ¹⁷'Yö 'wo "yitagɔ 'nè 'dede bha- =wlü 'wo- dɔ- 'kpiisü -ta, 'yö 'wo bhiëga -klëen- 'kpiisü bha- -zü -zü kö -yö "yitagɔ bha- 'kun glengdhö (kö 'ya 'dho 'wü). 'Yö "suü 'dhö -ya -nu kè -sü -bha "ta 'sü -sü 'ö "yi -ta bha- 'gü, -a -gen -mü -dhe -wo wo -zu -gɔn =dhe wo -bha "yitagɔ -dho -gban "yɛɛn -tɔn -nu 'wo "yi =wlöö Dhibi -sɛ "sɔɔ bha- -nu -bha. 'Yö 'wo sɔ "kplü 'ö "tɛɛ -ya dɔ- 'gü 'ö "yitagɔ dho "dhiü bha- bho 'mü. 'Yö 'wo =kwaa "tɛɛ -zü 'yö- -nu -bha "yitagɔ -blü zian 'ö -dhi -a 'ka. ¹⁸"Tɛɛ "gbu- bha -yö -gun ziö siè yi -bha "dhü "gbu- 'ka 'ö dho- 'ka "dhiü -kpeawo. -A -dhekpɔɔyi 'dhe 'ö dɔ- "piü, 'yö 'wo pè -nu 'wo gun "yitagɔ 'gü bha- 'bha -nu =wënnng 'yi -bhaa. ¹⁹-A -dhekpɔɔyi 'dhe 'ö dɔ- "piü 'zü, 'yö woo- =dede 'wo pè 'bha -nu 'wo "yitagɔ "ta sü bha- 'bha -nu =wënnng 'yi =bhaa. ²⁰'Yii yi "yan -kpan 'yënn- -bha -dhekpɔɔyi 'gbe =dede 'ka, "ɛɛn "susëngga -zian -bha kö "tɛɛ "gbu- bha -yö ziö siè "dhü -kpeawo (kö yi 'dho -zian -gbaan =dhëng yi -gɔ -a -kè "dhü -sü bha- 'gü). 'Yö 'yi yi -zu -gɔn =dhe 'yii dho dha 'zü.

²¹'Mɛ 'wo "yitagɔ 'gü 'wii pè -bhö -dhekpɔɔyi 'gbe =dede 'ka. 'Yö Pɔdhö -yö =wlü- -nu -gban "pepe wëëdhö 'ö- pö: «Gɔɔn- -nu, -ya kè -dhe ka ka "tu -to n

-wu -bha 'ö 'kwa to Kletö kö -yö -dho kë -së. Kö 'wɔn 'gbu- 'ö nu kwa -ta ya 'yii 'dho nu kwa -ta 'nu, 'εεn kö pë 'bha 'yii dho see- kwa -bha. ²²'Kεε 'tüng ya- 'gü a- -dhe ka -gɔ kö 'ka ka faan dɔ, -a -gen -mü -dhe me 'bha 'yii dho ga ka kpö 'gü, 'yitagɔ bha yöö do -në 'yii 'dho dha. ²³A- 'wɔn -dɔ, -a -gen -mü -dhe Atanna 'a- -bha 'ka 'ö 'a- -bha yë kë sië bha- -bha 'kië do -yö -wo n -ta -dεε gbeng, ²⁴'yö- pö n -dhe: «Pɔdhö, 'suü 'ya 'dho i kë, -a -dhe a -bha -dhe 'i 'dho "sekɔɔnme 'kpii- -kuu "dhiü (kö 'i dhiang zë- -dhe). -Dhe 'ö -kë -dhe Atanna "gblü -yö -së 'pö bha, -yö -dho 'wɔn -së kë i -dhe, -a -gen -mü -dhe me "pepe 'wo i "piü 'yitagɔ 'gü bha -yö -dho -a -nu -gban dha 'pö.» ²⁵'Yö Pɔdhö -yö dhiang zë- -nu -dhe 'ö dho- 'ka 'ö "dhiü 'ö- pö: «Gɔɔn- -nu, 'wɔn 'ö Atanna -bha "kië -ya pö bha- -wɔn 'gü -ka ka faan dɔ, -a -gen -mü -dhe n 'dhang bho -sü -yö Atanna "dhiü, -yö -dho -a kë -dhe -kɔ 'ö- pö- 'ka n -dhe bha- 'dhö. ²⁶'Kεε -a -dhe -dho kë 'ya-, -a -gen -mü -dhe kwa -bha 'yitagɔ -zë -dho 'wü "tεε 'gbu- 'ö dho kwa -blü "kpung "piü -dhe do 'bha 'gü bha- ka.

²⁷'Sa "tεε 'gbu- bha 'ö -ya ziö -sü -bha -a gbeng 'gü -kaɔng do ga -yiisiö -naa -në 'kwa "wɪ sië- 'ka "dhü bha, "kεε kö -yö 'dho sië yi 'ka -weeyi 'wo- -dhe Meditedhane bha- -ta -kpeawo. -Dhe 'ö gbeng =zinng 'gü =ya 'to klöö-, 'yö "yitagɔ -yëkëme -nu 'wo wo -zɔ gɔn -dhe yi =yɔɔn sië "se "sɔɔ. ²⁸'Yö- -nu -bha bhië" ga 'wo "yi =wlöö -dhe dan- 'ka bha 'wo- -lɔɔ "yi =wlöö, 'yö "yiwlöödhe -naa 'dhö -kë -genyan -kaɔng -yaaga ö ga "saɔple. -Dhe 'ö =wa =yɔɔn 'bha wo wo "dhiü, 'yö 'wo- -zuö 'bha wo "yi =bhaa, 'yö -kë 'zü -deewo -genyan -kaɔng -ple ö ga "saaga. ²⁹'Yö 'wo -ya wo -zɔ 'gɔn -sü -bha -dhe 'wa =yɔɔn 'bha wo wo "dhiü, "tεε- -dho -nu -bha "yitagɔ -gban -gwë -bha, -a -gen -mü -dhe kö "yi 'yaa -gbleen 'zü. 'Yö 'wo wo -bha -piö kpö -yiisiö 'ö -kë "yitagɔ 'gbaannupë 'ka bha- -nu -lɔɔ "yi -bhaa "yitagɔ =taama, 'yö -gban mü, "kεε kö "suü -ya -nu kë sië kö -a -nu -zɔ -yö dun sië 'pö -dhe -dhe -yö -kpaɔ "vaandhö.

³⁰'Yö yi -bha "yitagɔ -yëkëme -nu 'wo- "slë =mɔɔ kö 'wo -dua "yitagɔ 'gü, 'yö 'wo "yitagɔ 'në 'dede -sü 'ö- 'kpiisü -ta "dhüng 'gü bha- -lɔɔ "yi -bhaa "yitagɔ 'kpiisü bha- "dhiü, kö -wa kë sië -dhe 'pë woo -da 'gü kö 'wo "yitagɔ 'gbaannu -bha -pë -nu bha -në- -gban -gbleen 'në 'bha bho -a 'dhö. ³¹'Kεε -dhe 'ö Pɔdhö -ya -dhe yö, 'yö- pö "sɔdha këng do -gɔme waa- "sɔdha -nu bha- -nu -dhe: «Kwaa- "yitagɔ -yëkëme -nu ya 'wii 'to "yitagɔ ya- 'gü, me -gban ka 'gü -dho see-» ³²-Dhe 'ö =ya kë "dhü, 'yö "sɔdha -nu 'wo "yitagɔ sɛen" 'në -sü bha- bhië" ga 'ö -kplü -a 'kpiisü -bha bha- -kan 'yö 'wo -kwaa- -zü "yi -ta 'yö dho.

³³-Dhe 'ö -dhe 'gü 'dhö "pɪ sië kö "tüng bha =ya ziö, 'yö Pɔdhö -yö =bhe a- -nu -dhe kö -wo pë -bhö. 'Yö- pö- -nu -dhe: «'Ka -ya ka -dɪ -wɔn zuën -ta -a -dhekpaɔyi -kaɔng do ga -yiisiö -në =dεε, 'kii pë 'bha -bhö =kö. ³⁴-Dhe 'ö "dhü a -bhe a ka -dhe kö 'ka pë -bhö, -a -gen -mü -dhe ka -mawɔn -ya -bha kö 'ka faan =sɔɔ kö 'ka dha. Pë 'bha 'yii 'dho me 'bha ka kë.»

³⁵-Dhe 'ö =ya bo- pö "dhü -sü 'ka, 'yö 'bluu- sü 'yö =bhe a Atanna -dhe -a -nu -gban "pepe wëdhö mü, Atanna nuε" bho -sü 'ka -bhöpë 'ö- nu- -nu

-dhe bha- -wɔn 'gü, 'yö- "kplü bho, 'yö zun- -bhö -sü -bha. ³⁶'Yö- -nu zuë" 'dhö -kë -sɛa 'yö 'wo- -bhö 'pö. ³⁷'Mɛ 'yi gun "yitagɔ bha- 'gü, yi -gun mɛ këng =plɛ -kɔ "sɔɔplɛ waa- mɛ "sɔɔdo. ³⁸-Dhe 'ö -wa pɛ -bhö -wa 'kɛn, 'yö 'wo 'bluu- -kë 'ka -pɛ 'wo- -dhe "kwi -wu 'gü ble bha- 'dhe 'ö gun- -nu -gɔ "yitagɔ 'gü bha- -loo 'yi -bhaa kö "yitagɔ -yö 'to 'füü-.

³⁹-Dhe 'ö -dhe =ya -kpaɔ, 'yö yi "yan 'dhö -kpan 'sɛ -bha yi "dhiü, "kɛɛ yi -bha "yitagɔ -yëkɛmɛ -nu 'wii- dɔ. 'Yö 'wo =weeyi -gbeng bho -dhe "kɔpung "dhiü -dhe -sɛ do 'bha yö. 'Yö 'wo- "slɛ =mɔɔ kö 'wo 'dho wo -bha "yitagɔ -gban mü. ⁴⁰'Yö "yitagɔ -yëkɛmɛ 'bha -nu 'wo -piö kpö -nu 'wo "yitagɔ -gban bha- -nu bhië" -kan 'yö 'wo dho "yi -bhaa, kö mɛ 'bha -nu -dɪ 'pö -wo "dhü "pɛn -nu 'wo "yitagɔ dɔ- 'ka =zinng 'gü 'wo -kë "yitagɔ =taama bha, -wo bhiëga "pu sië- -bha kö -wo "yitagɔ dɔ- 'ka =zinng 'gü 'zü -deewo. 'Yö 'wo sɔ "kplü do =wliü "yitagɔ "dhiü =yɛn, kö "tɛɛ -yö "yitagɔ -bliü "kɔpung "dhiü. ⁴¹"Kɛɛ 'yö yi -bha "yitagɔ bha 'ö -gban "yɛn -tɔn bha "yi =wlöö 'yö 'gbaannu, 'yö to mü; -a -gɛn -mü -dhe kö- -gɔ =ya -gban "yɛn 'gü, "kɛɛ kö -a "pɛan 'dhe 'ö -taama bha -yö 'wü sië "yikpö -nu 'wo -ma sië- -bha "gbu- 'ka "dhü do bha- -wɔn 'gü.

⁴²-Yö -gun "sɔɔdha -nu "piü =dhe 'wo -kasogümɛ -nu zɛ, kɛ "dhü 'ö 'wo "yi -kë 'wo dha 'ö 'wo =dua. ⁴³"Kɛɛ "sɔɔdha këng do -gɔmɛ bha -yö -gun "piü -dhe 'ö Pɔɔdhö -zɛ dha, 'yö- -wɔn 'gü 'ö- pö- -nu -dhe -wo mɛ =gban dha. 'Yö- pö 'mɛ 'wo dɔ "yi kɛ -dhe 'ka -a -nu -dhe -wo -pö "yi -bhaa kö -wo "yi kɛ -wo 'dho "kɔpung =taa. ⁴⁴'Yö- pö mɛ -kpea -nu -dhe -wo -pö "yi -ta 'pö kö -wo -kplü "yitagɔ "pɛn -nu "ɛɛn "dhü "pɛn 'bha -nu 'wo 'go sië- 'gü bha- -nu -bha. Mɛ =gban yi -dha -kɔ bha =nɛ- 'gü.

Pɔɔdhö -bha -kë Maltö -sɛ 'ö "yi -zinng 'gü bha- 'gü -kɔ

28 ¹-Dhe 'ö mɛ =gban 'yi dha, 'yö 'yi- ma -dhe "sɛ 'ö "yi -zinng 'gü 'ö 'yi bɔ- 'gü 'yi dha bha -wa -dhe -dhe Maltö. ²'Mɛ 'wo gun "sɛ bha- 'gü bha- -nu "klu -yö -dhi yi -bha =dedewo. =Dhe 'ö -kë -dhe dha -yö -gun ban sië kö "nɛnɛ =ya kɛ 'gbe bha, 'yö 'wo peng 'kpii- do bha -ya, 'yö 'wo yi -dhe -bha mü. ³'Yö Pɔɔdhö -yö "wɔ "kang 'bha -nu sü kö 'ö- -nu -da peng 'gü, 'yö -mlɛɛ -yö go "wɔ "kang bha- 'gü peng "tɛɛ bha- -wɔn 'gü, 'yö Pɔɔdhö kun- -kɔ -bha 'yö dun- -kɔ -bha mü. ⁴-Dhe 'ö 'mɛ 'wo "sɛgɔ bha- 'gü =wa -mlɛɛ bha- yö kö -yö dun -sü 'ka Pɔɔdhö -kɔ bha -dhe -kɔ bha- 'dhö 'yö 'wo- pö wo 'ko -dhe: «Gɔndɛnɛ ya kwaa 'dho -yö -dho kɛ mezɛmɛ 'ka, -a -gɛn -mü -dhe Atanna 'ö 'yaa =fliü kɛ bha 'yii "wɪ- -bha kö -yö dha, "kɛɛ kö =ya dha =weeyi -zɛ -gɔ.» ⁵"Kɛɛ 'yö Pɔɔdhö -yö 'ö -kɔ -kpɛng peng -ta, 'yö -mlɛɛ bha 'ö go- -kɔ -bha 'ö -pö peng 'gü, 'yö- bhaa 'yii- kɛ -kɔ 'bha 'gü. ⁶-Yö -gun kɛ sië mɛ -nu 'gü -dhe -yö -dho -bhla "ɛɛn -yö -dho ga -mlɛɛ bha- bhaa "dhiü "sia- mü. "Kɛɛ -dhe 'ö- -dhe =ya =gwëë, 'ö =waa- dɔ =dhe pɛ 'bha 'yii- kɛ, 'yö 'wo wo -wu =slëë, 'yö 'wo -ya pö -sü -bha =dhe Atanna -mü -a 'ka.

⁷-Dhe 'bha- -gun -dhe 'wo gun- -bha bha- "sɔɔ mü 'ö gun "sɛ bha- 'gü -mɛ -nu -gɔmɛ 'wo- -dhe Pibliüsö bha- -bha -dhe 'ka. Pibliüsö bha 'pö, -yö yi

-dheng bun -dho 'gü 'ö 'yi -wɔ -gɔ 'kɔɔdhö -dhekpacyi -yaaga 'ka. ⁸Pibliüsö dë -yö -gun wɔ sië dhii- -ta, -a -gen -mü =dhe "nene waa- -tɔɔɔɔ -wo gun- kē sië, 'yö Pɔdhö -yö dho- -gɔ 'kɔɔdhö 'yö ö -kɔ kpa- =gbin- 'yö -bhea Atanna -dhe -a -wɔn 'gü, 'yö- -bha "yua -nu bha 'wo bo. ⁹Dhe 'ö =ya kē "dhü, 'yö "yuëdhi -nu 'wo "sɛgɔ bha- 'gü 'wo nu 'pö, 'yö- -nu -bha "yua -yö bo. ¹⁰-Wo yi =bhlëë -ya -kɔ =gban "pɛpɛ suu 'gü -dhe bha- 'gü. =Dhe 'yi yi -bha -kwɛ- -nu dhu, 'yö pē "pɛpɛ 'ö yi -mawɔn dho zun- -bha yi -bha "ta -zian bha- -ta, 'yö 'wo- nu yi -dhe.

Pɔdhö -loo Wlɔmö -kɔ

¹¹=Dhe 'ö "su -yaaga =ya ziö, 'yö 'yi -ya "yitagɔ 'ö go Dhezandri -pö 'gü 'wo- -dhe «'peng- -zlan -nu» 'ö "tɛɛ 'gbu- "tüng bha- -kē -dhe bha- 'gü bha- 'gü. ¹²Yö 'yi dho 'yi =loo Siidhacusö -pö 'gü, 'yö 'yi -dhekpacyi -yaaga -kē mü. ¹³-Dhe 'ya 'go mü, 'yö 'yi bɔ- "sen -ta 'yi dho 'yi =loo Dhezio 'plöö. =Dhe 'ö -dhe =ya -kpaɔ, 'yö "tɛɛ 'ö go "yi -zü -gɔ bha 'ö -ya ziö -sü -bha. Yi -dhekpacyi =ple "gbeng =nē- -kē "yitagɔ 'gü 'yö 'yi =loo Puzɔdhö -pö 'ö "yitagɔ dɔdhe 'ka bha- 'gü, ('yö 'yi go "yitagɔ 'gü). ¹⁴Yi -kpan 'dhang -bho Yesu "dhiü -mɛ -nu 'bha -nu -bha 'pö- bha- =nē- 'gü 'yö 'wo =bhea yi -dhe kö 'yi "dhɔɔgɔ do kē mü, ('yö 'yi -wɔ -bha). 'Yö 'yi "dhɔɔgɔ do -kē -a -nu "piü mü 'yö 'yi gun -na 'dho Wlɔmö.

¹⁵=Dhe 'ö 'dhang -bho Yesu "dhiü -mɛ -nu 'wo Wlɔmö =waa- -wapö ma -dhe yi zian -ta yi nu sië, 'yö 'wo nu dɔ yi -gɔ zian-, 'wo nu "dhü 'wo =loo Apiusö "dhɔɔkwëëdhö 'yö 'yi -kpan 'kwëë- mü. =Dhe 'ya 'dho 'ya =loo -dheng =yëëbhodhe 'wo- -dhe 'kɔ -yaaga "dhiü -dhe bha- 'gü, 'yö 'yi -kpan 'zü mɛ kpö 'bha -bha mü kö -wo nu sië. =Dhe 'ö Pɔdhö =ya -kpan mɛ "pɛpɛ 'wo nu -dɔ yi -gɔ zian bha- -nu -bha, 'yö Atanna nuɛ" bho, 'yö faan =slɔɔ 'yö 'yi -kpaɔ 'kwëë- 'yi dho Wlɔmö 'plöö.

¹⁶=Dhe 'ö 'ya -loo Wlɔmö, 'yö Wlɔmö -pö -kɔɔnɛ -nu 'wo -wɔ -bha kö Pɔdhö -yö 'to ö =yëë "dhiü, kö 'ya 'dho 'dho -kaso 'gü, "kɛɛ 'yö 'wo "sɔdha do -ya -gɔ "dhiü kö 'ya 'dho =dua.

Pɔdhö Atanna -wɔ -pö Wlɔmö 'plöö -kɔ

¹⁷=Dhe 'ö -dhekpacyi -yaaga =ya ziö, 'yö Pɔdhö -yö Zuifö -nu -bha mɛ zizi -nu 'wo Wlɔmö -pö 'gü -a -nu -dhe ö =yëë "dhiü. =Dhe 'ö =wa =loo 'ko -ta, 'yö- pö- -nu -dhe: «N dheebhang -nu, 'mii pē yaa 'bha kē kwa -bha "sɛgüme -nu 'ka "ɛɛn kwa "bhema -nu wɔ -kɔ 'ka, "kɛɛ Zuifö -nu -wo n -kun 'wo n -da -kaso 'gü Zedhizadhémö, 'yö 'wo n dɔ Wlɔmö -mɛ -nu -gɔ. ¹⁸Yö 'mɛ 'wo bha 'wo n dhɛɛ" kpɔ 'pē 'a- -kē -a 'ka, 'yö 'wo- "slë =mɔɔ kö -wo wo kwaa- n -zü, -a -gen -mü =dhe 'pē 'kö 'a dho- kē kö -yö kē n zë -gen 'ka 'yii =slɔɔ. ¹⁹'Kɛɛ Zuifö -nu -gɔmɛ -nu 'wii "wɔ- -bha. 'Yö mang -dɔ 'pö 'ö -kē n 'gü -së kö "sɛkɔɔnɛ 'kpii- -yö za bha- dɔ yi =zinng 'gü. "Kɛɛ ma -zë 'mii 'dho za -ya ma "sɛgüme -nu -bha. ²⁰'Pē 'ö -kē 'yö 'a ka -dhe bha 'yö bha. 'Wɔn 'ö -gban Atanna -bha -Yame 'ö Izraëdhö -sɛgüme -nu 'wo -ya -gɔ bha-

-wɔn -bha bha -në 'a ('dhang bho- "dhiü 'yö 'a) -kasogüme 'ka- wɔn 'gü, 'yö 'a -dɔ lɔɔga 'ka ka kpö 'gü -dɛɛ ya.»

²¹'Yö 'wo- pö- -dhe: «Sëédhe 'ö dho 'go Zude -sɛ 'gü kö -yö 'wɔn 'ö -gban i -bha -a pö yi -dhe 'yii- yö, -ya 'go mü 'zü kö yi dheebhang Zuifö -nu 'wo mü kö -a me 'bha -zian -yö 'go mü kö -ya -gen dɔ yi -dhe, 'ɛɛn kö -yö dhiang yaa 'bha zë i -bha 'yii kè, ²²"kɛɛ -yö yi "piü -dhe 'i i zuëpiüwɔn pö yi -dhe, -a -gen -mü -dhe yi 'wɔn -dɔ -dhe ka -bha -zu -yö Atanna -dhe -kɔ bha -wa -dhiang yaa -zë -dhe -gban "pɛpɛ 'gü.» ²³'Yö waa- Pɔdhö -nu 'wo yi do kpɔ wo 'ko -gɔ.

-Dhe 'ö yi bha -ya -loo, 'yö me kpö 'gbɛ 'wo nu Pɔdhö -yëë "dhiü. 'Yö sü dhia" "piü -bha, 'ö dho 'ö zun- 'ka yeann" "piü -bha, 'yö Pɔdhö -yö 'wɔn -nu 'wo -gban Atanna -bha -gblüédhe -bha -a -gen pö- -nu -dhe. 'Yö- "slë -mɔɔ 'pö kö -wo (Yesu dɔ -dhe 'mɛ 'ö Atanna -ya -ya -a -nu dhame 'ka -a 'dhö, kö -wo) "wɩ- wɔn -bha, 'yö bɔ- 'ka Moizö -bha 'tɔng- 'sëédhe -ta, 'yö dho 'yö -wo 'ka Atanna -wudhiüloome -nu -gɔ 'sëédhe 'gü. ²⁴'Yö me 'bha -nu 'wo 'dhang bho Pɔdhö zë -dhiang bha- "dhiü, 'yö 'wo -wɩ Atanna -wu -bha. 'Yö me 'bha -nu -du 'pö 'wii 'dhang bho- -wu 'dhiü. ²⁵'Yö 'wo -ya zaɔdhe -da -sü -bha wo "kwëë. =Dhe 'wo 'dho sië zaɔdhe bha- 'ka wo -gɔ 'kɔɔdhe -nu 'gü, 'yö Pɔdhö -ya pö- -nu -dhe: «'Wɔn 'ö 'Nii- "slüöslü -ya pö ka "bhema -nu -dhe yi 'bha 'ka 'ö bɔ- 'ka Atanna -wudhiüloome Ezai -ta bha 'yaa -sua 'ka. ²⁶-A -gen -mü -dhe Atanna -ya -pö -dhe: «-Bhö 'dho i -gɔ "sɛgüme -nu "piü kö 'i- pö- -nu -dhe: «Ka -dho n -wu ma 'kpakpadhö, "kɛɛ 'kii 'dho- 'gü ma, 'ka -dho -dhe -ga 'kpakpadhö, "kɛɛ 'kii 'dho -dhe 'bha yö, ²⁷-a -gen -mü -dhe -a -nu zuëga -ya kè "drɔɔdrɔ 'ka -dhe -nii -gwë 'dhö. -Wa wo "tu "dhiü -te -gban kö 'wa 'dho 'wɔn ma, 'yö -wa wo "yan ta kpɛnngkpɛnngdhö kö 'wa 'dho -dhe yö, -wa -kè "dhü kö 'wa 'dho 'wɔn 'gü ma kö -a -nu zuë" 'ya 'dho slëë- n "piü 'ö 'a- -nu dha.» ²⁸'Yö Pɔdhö -yö 'ö -bha -da -ta 'ö- pö: «=Dhe 'ö "dhü, -kaa 'wɔn dɔ -dhe -taamasü ya- 'gü Atanna -ya 'ö -bha me dha -wu bha- bɔ 'mɛ 'waa Zuifö 'ka- -nu -dhe. Wo -zë (ya- pö- -nu -dhe) -wo -dho wo "tu 'to- -bha.»

²⁹[=Dhe 'ö Pɔdhö -ya bo 'wɔn -nu bha- -nu pö -sü 'ka, 'yö Zuifö -nu 'wo dho wo -gɔ 'kɔɔdhe -nu 'gü, zaɔdhe -da wo "kwëë -sü 'ka -dedewo.]

³⁰-Kwɛ -plɛ -në- Pɔdhö -ya kè 'kɔ 'ö- sü bha- 'gü. Mɛ "pɛpɛ 'wo nu zun- -dhe 'gü -wo -kpan -bha -dhe bha -në- 'gü. ³¹'Yö Atanna -bha -gblüédhe -wɔn -dhiang zë- -nu -dhe, 'yö 'wɔn 'ö -gban kwa Dëme Yesu Klisi -wɔn -bha bha 'ö mɛ -draan- -bha -zugbandhe waa- -putaasü 'ka.